

sc. sup. 23. Pl. 5.













# MANUALE THOMISTARVM

SEV  
BREVIS THEOLOGIÆ  
CVRSVS,

In gratiam, & commodum  
Studentium editus,

AB ADM. REV. PATRE

F. IO: BAPTISTA GONET

*Biterrensi, Ordinis FF. Prædicatorum,  
Prouinciæ Tolosanæ, strictioris  
Observantiæ, in Accademia  
Burdigalensi Antecessore.*

TOMVS QVARTVS.

*Admodum Reuerendo Patri*

F. DOMINICO  
MARIÆ  
SANTINO  
AB ÆXIO,

*Ordinis Prædicatorum Sac: Theol. Magistro,  
ac Almi Conuentus S. Dominici  
de Bononia Priori.*

BONONIÆ, M. DC. LXXXI.

Typis Iosephi Longi. *Superiorum Permissu.*

W. A. R. A. M.  
THOMAS

BREITENBURG

1711

1711

1711

1711

1711

1711

1711

1711

1711

1711

1711



# INDEX

## TOMI QUARTI.

<b>T</b> RACTATUS IV. De legibus.	pag. 1
CAP. I. De lege in communi.	2
§. I. De existentia & essentia legis.	ibid.
§. II. Quenam sit legis divisio?	12
§. III. Officia, effectus, & actus legis.	16
CAP. II. De lege æterna.	18
CAP. III. De lege naturali.	21
§. I. Quid sit lex naturalis?	ibid.
§. II. Quænam pertineant ad legem naturæ.	24
§. III. Virum lex naturalis pati possit mutationem dispensationem aut interpretationem?	27
§. IV. An possit dari ignorantia inuincibilis iuris naturalis, seu præceptorum legis naturalis?	35
Soluuntur obiectiones.	47
CAP. IV. De lege humana.	55
§. I. De Existentia & quidditate legis humanæ.	ibid.
§. II. De potestate legis humanæ.	62
§. III. Quinam legibus humanis subijciantur?	67
CAP. V. De Aliquibus speciebus legum humanarum.	72

# INDEX.

§. I. De lege penali.	ibid.
§. II. De Consuetudine.	76
§. III. De Privilegijs.	78
CAP. VI. De interpretatione legum humanarum per Epijkiam.	81
CAP. VII. De dispensatione à legibus humanis.	83
CAP. VIII. De Abrogatione legum humanarum.	86
CAP. IX. De lege diuina veteri.	89
§. I. Præmittuntur quæ de lege veteri apud omnes sunt certa.	ibid.
§. II. De præceptis legis veteris.	94
§. III. An & quando lex vetus abrogata sit & pag.	100
§. IV. Virum lex Mosaica statim atque cessauit obligare, fuerit mortifera?	112
CAP. X. De lege diuina noua & Euangelica.	116
TRACTATVS VII. De Gratia.	124
CAP. I. De necessitate gratiæ ad cognitionem veri.	127
§. I. Homo sine auxilio Dei speciali & cum solo generali concursu, potest plures, imò & singulari diuinitè veritates naturales cognoscere, non tamen omnes collectiue.	ibid.
§. II. Soluuntur Obiectiones.	134
§. III. Ad cognoscendas veritates supernaturales & assentiendum mysterijs nostræ fidei, non sufficit externa reuelatio, sed necessario requiritur gratia interna, non solum in intellectu, sed etiam in voluntate.	140
CAP. II. De necessitate Gratia ad volitionem & operationem boni.	146
§. I. Confutantur tres primæ sententiæ & quartæ.	14

# INDEX.

ta statuitur .	147
§. II. Soluuntur Obiectiones .	161
CAP. III. De necessitate gratiæ in ordine ad dilectionem Dei .	175
§. I. Resolvitur difficultas quoad utramque partem , seu de homine in utroque statu naturæ lapsæ & puræ considerato .	176
§. II. Soluuntur Obiectiones .	181
CAP. IV. De necessitate Gratiæ ad observantiam legis naturæ .	187
§. I. Triplici conclusione difficultas resolvitur .	188
§. II. Soluuntur Obiectiones .	190
CAP. V. De necessitate Gratiæ ad victoriam tentationum .	195
CAP. VI. De necessitate gratiæ ad diu vitanda omnia peccata mortalia quæ sunt contra legem naturæ .	204
CAP. VII. De necessitate gratiæ ad vitanda peccata venialia .	213
CAP. VIII. De necessitate gratiæ ad se præparandum ad illam .	221
§. I. Utraque sententia rejicitur .	ibid.
§. II. Soluuntur obiectiones .	230
CAP. IX. De necessitate gratiæ ad perseverantiam finalem .	236
§. I. Perseverantia finalis est donum Dei speciale , à gratia habituali , & communibus auxilijs distinctum , & consistens in coniunctione gratiæ cum morte , ex efficaci glorificationis intentione imperata .	238
§. II. Soluuntur obiectiones .	245
CAP. X. De divisione gratiæ .	252
CAP. XI. De essentia gratiæ habitualis seu gratum facientis .	269
§. I. Gra-	

# I N D E X.

§. I. *Gratia habitualis, seu gratum faciens est donum aliquod homini inuoluntarium, nempe aliqua qualitas supernaturalis, in anima permanens, subindeque habens rationem habitus & non dispositionis.* 270

§. II. *Gratia sanctificans est participatio formalis naturæ diuinæ, non solum qua natura, sed etiam qua infinita est.* 275

CAP. XII. *Quibusdam corollarijs magis explicatur natura & perfectio gratiæ sanctificantis.* 284

Corollarium I. *Repugnat dari plures species gratiæ sanctificantis, physicè & essentialiter inter se diuersas.* ibid.

Corollarium II. *Gratia sanctificans est simpliciter perfectior charitate, lumine gloriæ, visione beatifica, & quocumque alio ente supernaturali, licet visio beatifica in modo essendi illam excedat & sit perfectior secundum quid.* 287

Corollarium III. *Gratia sanctificans per se ita peccatum expellit, ut repugnet utrumque in eodem subiecto sociari.* 290

Corollarium IV. *Gratia habitualis realiter distinguitur à charitate.* 296

Corollarium V. *Gratia habitualis subiectatur immediatè in anima, non autem in potentijs eius.* 299

CAP. XIII. *De causâ gratiæ habitualis, & actione per quam producitur.* 301

CAP. XIV. *De primo effectu gratiæ habitualis nimirum adoptione hominis in filiū Dei.* 309

§. I. *Forma constituens hominem Filium Dei adoptiuum, neque est diuinitas Spiritus sancti, nobis extrinsecè vnita seu assistens, neque habi-*



# INDEX.

habitus charitatis, sed gratia habitualis, adequatè, nulloq; favore extrinseco expetato.	311
§. II. Soluuntur obiectiones.	315
§. III. Tria corollaria notatu digna.	319
CAP. XV. De iustificatione peccatoris, quæ est secundus gratiæ habitualis effectus.	325
§. I. Gratia sanctificans est causa formalis iustificationis, non verò actus contritionis vel charitatis.	330
§. II. In statu naturæ elevatæ ad ordinem & finem supernaturalem, non potest dari alia iustificationis forma quam gratia sanctificans, bene tamen in statu naturæ puræ.	334
§. III. Soluuntur obiectiones.	338
§. IV. Corollarium notatu dignum.	344
§. V. De dispositionibus ad iustificationem requisitis.	347
§. VI. Actus contritionis & charitatis effectivè procedunt à gratia habituali ad quam disponunt.	352
CAP. XVI. De merito iusti, quod est tertius gratiæ habitualis effectus.	362
§. I. De conditionibus ad merendū requisitis.	363
Tres conditiones ex parte actus meritorij requisitæ.	ibid.
Due conditiones ex parte personæ merentis necessariae.	365
Conditio ad meritum ex parte Dei requisita, nempe ordinatio operis ad premium.	368
§. II. Retributio præmij pro meritis in Deo, non est actus gratitudinis, aut fidelitatis, sed strictæ iustitiæ, non commutativæ, sed distributivæ.	369
§. III. Iusti per opera ex gratia & charitate proceden-	

# I N D E X.


- cedentia, de condigno, merentur vitam æternam.* 373
- §. IV. *Vt opera hominis iusti sint meritoria de condigno vitæ æternæ, non sufficit quod per habitum charitatis habitualiter ordinentur in Deum sed relatio actualis, vel saltem virtualis charitatis requiritur.* 377
- §. V. *Soli charitati præmium essentiale beatitudinis tribuitur, alijs autem virtutibus præmium duntaxat accidentale, si illarum à charitate non imperantur.* 382
- §. VI. *Opera bona moralia, ex viribus naturæ profecta, nec de condigno, nec de congruo, primam gratiam auxiliantem premerentur.* 388
- §. VII. *Homo non meretur de condigno primam gratiam iustificantem, bene tamen augmentum eius; & primam gloriam, prima gratiæ habituali correspondentem.* 394
- §. VIII. *Iustus non potest si bi mereri de condigno reparationem post lapsum, nec perseverantiæ donum; neque etiam de congruo, si meritum de congruo strictè & propriè sumatur; bene tamen, si largè & impropriè accipiatur.* 398
- Appendix ad Tractatum de Gratia. 406
- De varijs hæreticorum erroribus, circa gratiam & liberum arbitrium.* ibid.
- CAP. I. De hæresi Pelagiana. 407
- §. I. *Hæresis Pelagianæ origo.* ibid.
- §. II. *Præcipui errores circa gratiam.* 411
- §. III. *Varij gradus, seu status hæresis Pelagianæ.* 413
- CAP. II. De hæresi Semipelagiana. 431
- §. I. *Origine hæresis Semipelagianæ.* ibid.
- §. II. *Præcipua Semipelagianorū dogmata.* 434
- CAP. III. Qui fuerint Semipelagianæ hæresis

# I N D E X.

<i>Autores vel Sectatores præcipui</i>	443
<i>§. I. De vitali Carthagenensi.</i>	<i>ibid.</i>
<i>§. II. De Cassiano.</i>	444
<i>§. III. De Fausto Regiensi.</i>	446
<i>§. IV. De Gennadio.</i>	449
<i>§. V. De Severo Sulpitio.</i>	450
<i>§. VI. De Ioanne Chrysostomo.</i>	451
<i>§. VII. De Vincentio Lyrinensi.</i>	453
<b>CAP. IV. Errores Manichæorum, Lutherano-</b> <b>rum, &amp; Caluinistarum, circa gratiam &amp; li-</b> <b>berum arbitrium.</b>	454
<i>§. I. De erroribus Manichæorum.</i>	<i>ibid.</i>
<i>§. II. De erroribus Lutheranorum &amp; Caluini-</i> <i>starum, circa liberum arbitrium.</i>	455
<i>§. III. Calvini errores in materia de gratia.</i>	463


F I N I S.

Vid. D. Fulgentius Orighetus Cler. Reg.  
S. Pauli, & in Metropol. Bonon. Ec-  
cles. Pœnitentiarius pro Eminentiss. ac  
Reuerendiss. D. D. Hieronymo Bon-  
compagno, Archiep. Bonon. & Prin-  
cipe.



*Imprimatur*

Fr. Thomas Raineri de Forliuio Vicarius  
Generalis S. Officij Bononiæ.




## TRACTATUS VI.

D E

# LEGIBVS.



VM iuxta Apostolum ad Roman. 6. peccati cognitio per legem habeatur, ipsumque peccatum legis transgressio sit, ad perfectiorem tractatus de peccatis intelligentiam, tractationem de legibus, subiungimus, in qua agemus primò de legibus in communi, deinde varias eius species, nempe legem æternam, naturalem, humanam, & diuinam, tam veterem, quam nouam, exponemus.



## CAPUT I.

## De lege in communi.

## §. I.

## De existentia, &amp; essentia legis.

**E**Xistentiam, seu necessitatem legum, ut certam, & manifestam supponimus, eam enim insinuat ipsa natura creaturæ intellectualis, quæ cum non possit sibi esse regula moralium operationū, necessariò eget aliquo superiore, à quo certa lege, & norma in suis operationibus dirigatur, ne à fine ad quem creata est aberret. Cum enim eius natura defectibilis sit, & à fine honestatis, ad quem inclinat, deflectere possit necessaria ei est aliqua lex, quæ illam per certam normam ad finem suum dirigat. Ipsa quoque experientia necessitatem ac utilitatem legum demonstrat, cum constet nullam Rempublicam absque legibus stare posse; unde leges dicuntur esse quasi fundamenta Reipublicæ, quibus nixa hæret, & veluti vincula & funiculi, quibus constricta, firma, & fixa, in cœpto bono perseverat. Hinc Cicero orat. pro Cluentio, leges, nervos & sanguinem Reipublicæ appellat, aitque quod sicut corpora nostra sine sanguine, & nervis subsistere nequeunt, ita nec Republica sine legibus. Et Aristoteles 3. Rhetor. Reipublicæ salutem in legibus constitutam esse asserit.

Lex consistit essentialiter in actu intellectu,

Etus, ut docet D. Thomas 1. 2. quæ. 90. art. 1. & probat tum quia legis est præcipere & imperare, hoc autem essentialiter pertinet ad intellectum, ut ostendimus in tractatu de actibus humanis, agendo de actu imperij. Tum etiam, quia lex est regula quædam & mensura humanorum actuum: regulare autem & mensurare actus humanos, ad rationem pertinet, cum illa sit primum principium actuum humanorum, & in vnoquoque genere id quod est principium sit mensura & regula illius generis; sicut unitas quæ est principium numeri est mensura omnium numerorum, & motus primi cœli, qui est primus in genere motuum, est mensura omnium motuum corporum inferiorum.

Ilex tamen præsuppositiuè & de connotato importat actum voluntatis, tum quia proprium est legis mouere subditos ad aliquid agendum; solus autem intellectus absque voluntate non potest mouere: tum etiam, quia lex non pertinet ad intellectum speculatiuum, sed ad practicum: intellectus verò practicus actum voluntatis a quo moueatur, & efficaciam ac vim mouendi participet, præsupponit. Consistit ergo lex essentialiter in actu imperij, quo Princeps ordinat subditum ad aliquid agendum, intimando, vel denunciando. Vel potius in aliquo per illum constituto: Lex enim habet se ad intellectum, & eius actum, sicut idea se habet ad intellectum artificis, & artem, vtraque enim est mensura, regula, & exemplar; illa quidem morum, ista verò rerum per artem faciendarum: Sed idea est terminus, media arte in intelle-

ctus productus: Ergo & lex erit terminus, medio imperio productus, & verbum practicum illius.

Confirmatur: Lex est in intellectu Principis, non tantum subiectiuè, sed etiam obiectiuè, tanquam cognitum in cognoscente; Princeps enim dum legem profert, ad eam attendit, ipsam cognoscit: Ergo non est actus intellectus practici, sed potius ipsum verbum practicum, & terminus conceptionis practicæ, & imperij quo Princeps subditos ordinat ad aliquid faciendum.

Leges debent esse firmæ, stabiles, ac permanentes, subindeque a liquo modo perpetuæ: Sunt enim, vt supra dicebamus, veluti fundamenta quibus Respublica innititur, & quasi nerui quibus subsistit. Vnde Iurisperiti hoc discrimen statuunt inter legem & præceptum ab homine factum, quod purum præceptum expirat per mortem præcipientis, non verò lex quæ cum ipso non moritur, vt obseruauit Abbas in cap. *Irrefragabili*, §. *Cæterum*, de officio ordinarij.

Leges debent ferri pro tota communitate nam in hoc etiam differt lex à præcepto, quod præceptum vni, lex multis imponitur; quatenus illum ad priuatam directionem partis, hæc ad publicam gubernationem Respublicæ ordinatur; vnde lex est actus prudentiæ politicæ, vel regalis, quæ per se primò respicit bonum communis. Addo quod lex debet esse perpetua, vt mox dicebamus: Ergo non imponitur vni priuatæ personæ, quæ mortalis est, sed communitati, quæ perpetua est, quatenus durat per continuam successionem.



Ex hoc inferitur, de ratione legis esse quod sit propter bonum commune, & ad illius utilis sit; nam potestas condendi leges non est data hominibus, siue à Deo, siue à Republica, nisi propter bonum commune. Vnde Isidorus lib. 5. Ethymol. ait quod *lex est nullo priuato commodo, sed pro communi utilitate ciuium conscripta*: iuxta illud duodecim tabularum, *Salus populi suprema lex esto*. Addo quod lex, cum subiectetur in intellectu practico, & sit regula actuum humanorum, regulari debet per primum principium praxis, & actuum humanorum: primum autem principium in practicis est vltimus finis, & beatitudo: Ergo lex omnis regulari debet & reduci ad vltimum finem seu beatitudinem, quæ est bonum commune. Vnde lex naturalis ordinatur ad beatitudinem naturalem, quæ est bonum commune sibi proportionatum; lex verò supernaturalis ad beatitudinem supernaturalem; ciuilis autem ordinat homines ad beatitudinem politicam ciuitatis, & regni, quæ est bonum sibi proportionatum, maximeque in tranquillitate & pace Reipublicæ consistit. Vnde Plato lib. 1. de legibus ait leges condendas esse publicæ pacis gratia.

Nec obstat quod sint aliquæ leges quæ bonum priuatum videntur respicere, vt lex naturalis de tuenda propria vita, & priuilegium, quod respicit bonum particulare illius personæ, in cuius fauorem conceditur. Nam aliud est loqui de materia proxima circa quam versatur lex, aliud de motiui formali propter quod versatur circa talem materiam: cum enim lex sit regula humanorum actuum, sicut in

actibus humanis illa duo distinguimus, ita in lege ea distinguere debemus. Lex ergo naturalis de tuenda propria vita, respicit bonum priuatum personæ particularis, ut materiam proximam circa quam versatur, habet tamen bonum commune pro motu quod per se primo respicit; cum enim quilibet homo sit pars naturæ humanæ, & pars per se ordinetur ad totum, sicut imperfectum ad perfectum, hinc fit quod bonum cuiuslibet hominis in particulari, per se ordinetur ad bonum totius naturæ humanæ: Vnde author, & conseruator totius naturæ, cuius interest respicere tale bonum, rectè præcipit ut quilibet conseruet propriam vitam, ut conseruetur bonum totius naturæ, quod non nisi indiuiduis potest subsistere.

Ex hoc patet responsio ad id quod subditur de priuilegio, licet enim illud respiciat bonum priuatum alicuius personæ, ut materiam proximam, hoc tamen cedit in bonum commune, quod aliqui sint priuilegiati, propter strenuè facta in obsequium Reipublicæ, ut alij accendantur ad promouendum bonum commune, per opera studiosa, & ardua. Addo quod priuilegium, ut infra dicemus, non habet propriè rationem legis.

Ex dictis colligitur primò, potestatem con-  
dendi leges pertinere ad communitatem seu Rempublicam, vel ad eum qui curam habet illius: quia lex (ut iam ostensum est) primò & principaliter ordinatur ad bonum commune, Sed ordinare aliquid in bonum commune pertinet ad communitatem, vel ad eum qui eius curam habet; quia sicut pars respicit bo-

num particulare, ut finem sibi proportionatum & proprium, ita tota communitas bonum commune: Ergo condere leges ciuiles, solum pertinet ad communitatem, vel ad eum qui ei præest, & habet curam illius.

Obseruandum tamen est, potestatem legislatiuam immediatè & iure naturæ residere in communitate, in Rege verò aut quolibet alio habente potestatem condendi leges, mediataè solum; & iure humano. Cum enim potestas condendi leges ciuiles, non possit commodè à tota communitate exerceri per seipsam, transferri solet ad vnum, qui sit caput morale communitatis, & Princeps supremus reliquorum omnium, si monarchicum regimen instituat; vel in paucos & optimos, si aristocraticum; vel in plures, & plebeios, si democraticum. Potestas tamen condendi canones & leges Ecclesiasticas, apud Summos Pontifices, & Concilia legitime congregata residens, non ab Ecclesia, sed à Christo immediatè illis communicata est, sicut & potestas regendi Ecclesiam. Vnde in cap. *Novit de iudicijs*, sic loquitur Pontifex de Pontificia authoritate: *Cum non humane constitutioni, sed diuine innitatur; quia potestas nostra, non ex hominibus, sed ex Deo est.*

Colligitur secundò, hæc tria, præceptum, scientiam, & priuilegium, non habere veram rationem legis. Triplex enim inter simplex præceptum & legem reperitur differentia. Prima est, licet præceptum possit imponi toti communitati, hoc tamen non exigit necessariò sed potest imponi personæ particulari: lex verò semper communitatem personarum respi-

cit necessario. Secunda, præceptum expirat morte vel amotione imponentis, lex non expirat morte legislatoris, cum ex natura sua perpetua sit. Tertia, præceptum potest imponi à quocunque superiore, lex vero ferri nequit nisi ab eo qui à Deo vel à Republica habet potestatem legislatiuam.

Similiter sententia differt à lege, lex enim est ipsa ordinatio superioris, sententia verò potius est applicatio, & executio legis circa priuatam personam & euentum, quam legis impositio. Vnde ad ferendam sententiam non requiritur suprema potestas legislatiua Principis, sed inferior iudex per authoritatem deriuatam ab illo, potest eam ferre, ut ex usu constat. Et ratio est, quia sicut in artificialibus disponere formam domus pertinet ad architectum, applicare tamen illam inducendo eam in aliquam singularem materiam, doſando scilicet ligna, & aptando lapides, spectat ad inferiores artifices: Sic in moralibus ad Principem, qui est architectonicus, regiminis, pertinet disponere formas legum ad bonum commune procurandum; applicare verò illas ad singularem casus, & personas, ad particulares iudices attinere potest.

Demum lex à priuilegio differt quia lex semper respicit pluralitatem personarum, & bonum communæ Reipublicæ: priuilegium autem potest respicere particularem personam, & illius bonum particulare. Vnde priuilegium ex Isidoro lib. prim. Etymol. cap. octau. dicitur quasi priuata lex, seu lex priuatorum. De quo fusius infra cum de priuilegijs.

Quæres primò, an promulgatio sit necessaria & essentialis legi?

Respondeo quod ut lex obliget in actu secundò, eius promulgatio necessariò requiritur; illa tamen non est de essentia legis, aut ratio formalis illius, sed duntaxat conditio necessariò requisita, ut actualiter obliget subditos.

Prima pars huius resolutionis patet; lex enim se habet per modum regulæ & mensuræ actuum humanorum, quam homines sequi debent, eique suas actiones conformare: Sed id præstare nequeunt, nisi lex eis innotescat, cum voluntas non possit ferri in incognitum, neque lex potest eis innotescere, nisi per promulgationem. Ergo ut lex obliget, eius promulgatio necessariò requiritur. Non tamen æqualiter in omnibus legibus, sed diuersimodè, iuxta naturam cuiuslibet; nam lex diuina positiua non eget tam solemnī promulgatione, sicut lex humana; aliquando enim lex diuina promulgatur sola interna reuelatione, ut multis Prophetarum contigit; lex verò humana semper debet promulgari per signa externa, cum aliqua solemnitate, & sic obtinuit usus tam in Republica sæculari quam Ecclesiastica. Ratio verò huius discriminis est, quia cum Deus legis diuinæ institutor, sit supremus dominus simpliciter & omnibus modis, potest eo modo quo voluerit intimare suam legem, & obligare ad eius obseruantiam; homo verò, qui non habet tam supremum dominium, id non potest, sed cum agat veluti duplicem personam, publicam scilicet & priuatam, Princeps sic debet proponere legem, ut ex modo proponendi significet se proponere il-

Iam ut principem condentem legem, & non ut particularem personam, quod non fit, nisi adhibita aliqua solemnitate publica, id significante.

Dices, ad reuocationem legis non requiritur promulgatio; Ergo nec ad eius institutionem. Respondeo negando Antecedens, dum enim lex non reuocatur per solemnem promulgationem, censetur moraliter persenerare cum sua prima & legitima promulgatione, subindeque obligare in actu secundo: Sicut dum valor monetae non reuocatur reuocatione solenni, intimata subditis, moraliter loquendo, censetur manere, ut constat ex usu.

Secunda verò pars, quæ asserit promulgationem non esse de essentia legis, est D. Thomæ hic quæst. 90. articul. 4. ubi ait promulgationem esse applicationem legis ad illos qui per eam obligantur: Sed applicatio alicuius rei supponit rem iam constitutam in sua ratione formali: Ergo promulgatio supponit essentiam & rationem formalem legis iam constitutam, subindeque eam non constituit. Ratio enim id suadet, nam ad essentiam & rationem legis, sufficit quod habeat aptitudinem ad obligandum; quia res per aptitudinem & actum primum, ut docent Philosophi, definiuntur, & non per exercitium & actum secundum, qui modò est, modò non est: Atqui lex nondum promulgata apta est ad inducendam obligationem, licet eam actu non inducat, donec promulgetur: Ergo habet veram rationem legis, licet promulgatio sit conditio requisita ad hoc ut actu obliget. Non est tamen conditio purè accidentalis, & merè

Extrinfeca, ficut approximatio agentis ad paf-  
fum, fed intrinfeca, & effentialis, cum requira-  
tur per modum propositionis obiecti volunta-  
ti, quæ cum fit appetitus rationalis, id eft  
fequens ductum rationis, & cognitionem in-  
tellectus, non poteft ferri in incognitum.  
Non fufficit tamen ad hoc vt lex humana o-  
bliget in actu fecundo, quod innotefcat &  
applicetur hominibus per quancumque noti-  
tiam (vt tacitæ obiectioni occurramus) fed de-  
bet ipsis applicari per notitiã legi humanæ  
proportionatam, quæ folùm habetur, cum  
Princeps eam facit intimare & promulgare  
cum aliqua folemnitate, vt ex fupra dictis  
conftat.

Quæres fecundò, an fit de ratione legis  
quod fcriptis mandetur.

Refpondeo quod non, vt conftat primò ex  
Aristotele 10. Ethic. cap. vltimo, vbi fic ait:  
*Scriptæ fint, an non fcriptæ leges, interesse  
nihil videtur.* Secundò ex iure ciuili inftit, de  
iure naturali, gentium, & ciuili §. *Sed & quod  
conftitutum eft*, vbi fic dicitur; *Quodcumque  
conftituit imperator per epiftolam, vel cogno-  
fcens decreuit, legem effe conftat.* Vbi diuidit  
decretum à Scriptura, & vtrumque legem effe  
affirmat. Tamen ad melius effe, & vt fuanis  
ordo conftituendi legem obferuetur, opor-  
tet illam fcripto tradi; quia cum natura fua fit  
ftabilis, immobilis & perpetua, connatura-  
liter petit modum illum ad fui confidentiam,  
quo melius immobilitas, & perpetuitas illius  
conferuetur, & tenaciùs ac firmiùs memoriæ  
hominum infigatur; hic autem modus eft  
Scriptura, vt de fe patet. Vnde D. Thomas

hic artic. 4. ait quod *promulgatio presens ad futurum extenditur per firmitatem scripturae, quae quodammodo semper legem promulgat.*

Ex dictis intelliges, legem à D. Thoma ibidem sic rectè definiri seu describi: *lex est quadam rationis ordinatio ad bonum commune, ab eo qui curam communitatis habet promulgata.* Vt enim supra ostendimus, lex essentialiter consistit in actu intellectus, respicit bonum commune, debetque ferri ab eo qui curam communitatis habet. Addit verò illam esse ab illo promulgatam, quia licet promulgatio non sit de essentia legis, vt supra diximus, est tamen modus intrinsecus illius, vt obligantis in actu secundo. In definitione enim alicuius non solum potest ingredi id quod se habet vt ratio formalis, sed etiam id quod se habet tanquam modus, vel conditio intrinseca; sic enim in definitione fidei ingreditur obscuritas, & in definitione obiecti voluntatis, apprehensio intellectus.

## §. II.

### *Quanam sit legis diuisio?*

Lex generaliter diuiditur in diuinam, & humanam: Lex diuina est illa quæ à Dei auctoritate immediatè vim habet, licet eius promulgatio non fiat à Deo immediatè, sed interuentu Angeli vel hominis. Cuiusmodi fuit lex vetus, à Deo tradita Moyse per Angelos, & per eum promulgata, & lex Euangelica, à Christo lata, & partim per ipsum, partim per

Apo-



Apostolos publicata, Lex humana est illa quæ fertur immediatè humana auctoritate, licèt à Deo accepta. Primus verò inter homines legislator fuit Moyſes apud Hæbreos, Phoroneus apud Græcos, Trimegiſtus apud Ægyptios, Solon apud Athenienſes, Lycurgus apud Lacedæmones, & Numa Pompilius apud Romanos.

Lex diuina ſubdiuiditur in æternam, naturalem, & poſitiuam; quia lex Dei ſpectari poteſt vel vt ab æterno concepta, vel vt impreſſa cuiuslibet hominis intellectu, vel vt publica promulgatione manifeſtata. Lex verò diuina poſitiua, in veterem & nouam ſubdiuiditur: Prima eſt illa quam Deus dedit Moyſi, per myniſterium Angelorum, in Monte Sinai, & per Moyſen populo Iſraelitico. Secunda ea eſt quam tulit Chriſtus, noui teſtamenti author, & partim per ſeipſum, partim per Apoſtolos promulgauit. Sicut autem vetuſ triplicis generis præcepta continebat; nempe moralia, cæremonialia, & iudicialia; ſic noua etiam triplicia præcepta complectitur, nempe fidei, ſacramentorum, & morum, vt ſuſius exponemus infra cum de lege noua differemus.

Lex humana in Eccleſiaſticam & ciuilem ſubdiuiditur. Illa fertur poteſtate Eccleſiaſtica, vt Papæ & Conciliorum; iſta poteſtate ſæculari, vt Regum & Imperatorum. Prima ius Canonicum, altera ius Ciuile appellatur.

Corpus iuris Canonici diuiditur in decretum & decretales. Decreti collector & ordinator eſt Gratianus, Monachus Ordinis S. Benedicti, qui poſt veteres canonum & decretorum

collectores, ingens illud opus contexuit, & composuit, partim ex Summorum Pontificum decretis, partim ex Canonibus Conciliorum, partim ex dictis & sententiis Sanctorum Ecclesiae Patrum. Hoc autem corpus correctum & editum fuit auctoritate Gregorij XIII. Summi Pontificis.

Decretum verò in tres partes diuiditur, Prima pars continet distinctiones centum & vnam, in quibus de iure diuino, & humano, de que his quæ ad mores componendos, quæque ad disciplinam Ecclesiasticam spectant, tractatur. Secunda continet causas triginta sex, & quælibet causa in varias quæstiones distribuitur. Causæ autem trigesimæ sextæ inferitur Tractatus de pœnitentia, qui distinctionibus quinque perficitur. Tertia denique pars decreti, quæ agit de consecratione, quinque distinctiones complectitur.

Quod attinet ad decretales, quo nomine propriè significantur rescripta seu Epistolæ Summorum Pontificum, ad petentium preces, aut relationes emissæ, eæ fuerunt collectæ auctoritate Gregor. IX. Summi Pontificis, per S. Raymundum, Ordinis Prædicatorum, ipsius Capellanium, & Pœnitentiarium, & diuisæ in quinque libros. Quoties autem decretales simpliciter allegantur, Gregorianæ per excellentiam intelliguntur.

His quinque libris decretalium Gregorij, additus est alius liber decretalium a Bonifacio VIII. Summo Pontifice, quem librum ideò sextum nuncupari voluit. Hoc Bonifacij volumen quinque libros comprehendit.

Sunt & aliæ constitutiones seu decretales, quæ

quæ authorem habent Clementem V. Fuerunt autem editæ & publicatæ ab eius successore Ioanne XXII. solentque appellari Clementinæ & diuisæ sunt in quinque libros.

Clementinis adiunctæ sunt ab eodem Ioanne Papa constitutiones viginti, quæ *Extraneæ* appellantur, quasi vagæ & excurrentes extra prædictos decretalium libros.

Denique sunt aliæ constitutiones a diuersis Romanis Pontificibus editæ, quæ *Extraneæ communes* inscriptæ sunt, & quinque libros continent.

Assignat autem Gratianus à dist. 14. vsq; ad 25. sex principia seu fontes, ex quibus totum ius canonicum eruitur, sed derivatur, nimirum Scripturam sacram, Traditiones, quæ ab Apostolis tanquam ab Euangelij præconibus promulgatæ sunt; Canones Apostolorum, qui tantæ authoritatis non sunt, quantæ sunt Traditiones; Decreta Summorum Pontificum, & Conciliorum generalium; Concilia particularia; Summi Pontificis calculo confirmata, & Epistolas decretales Summorum Pontificum.

Librorum verò iuris ciuilis, ab Imperatore Iustiniani collecti, ordo & diuisio est huiusmodi. Iustinianus cum animaduerneret ius Romanum, quod ciuile per excellentiam appellatur, in immensam & confusam molem excreuisse, statuit illud certis, & breuioribus finibus concludere. Erant autem ante ipsius tempora tres Codices, qui continebant leges & Constitutiones anteriorum Imperatorum, Gregorianus, Hermogenianus, & Theodosianus; ex quibus vnum confecit, quem

quem de suo nomine nuncupauit; Peractō  
 Codice Iustinianus animum ad veterum  
 Iurisconsultorum volumina, quorum  
 infinitam prope multitudinem, & in duo  
 millia librorum disperſam, coarctauit ac di-  
 gessit in quinquaginta libros, qui ideò libri  
 Digestorum appellantur; vel Pandectarum  
 dicto nomine à Græcis vocibus *παν δέχεται*,  
 hoc est totum capio, quia vniuersam veteris  
 iurisprudentiæ scientiam continet. Deinde vt  
 haberent legum cupidi adolescentes facilem  
 & simplicem viam, quā progredi possent ad  
 amplissimam iuris scientiam, Iustinianus com-  
 poni curauit quatuor Institutionum libros, vt  
 essent totius iuris elementa atque principia;  
 Sed quoniam priori illi Codici pleraque de-  
 esse videbantur, Iustinianus alium auctiorem  
 & emendatiorem edidit; quem vocauit Codicem  
 repetitæ prælectionis, & hic est Codex,  
 quem habemus, & quo vtimur: Denique idem  
 Imperator varias constitutiones, quas deinceps  
 imperij sui tempore promulgauit, in vnum li-  
 brum redegit, & has constitutiones modò  
 Nouellas, modò Authenticas appellamus, Er-  
 go totum ius ciuile constat, & compositum  
 est, ex Codice, qui duodecim libris absolvitur,  
 & quinquaginta libris Digestorum, seu Pan-  
 dectarum, ex quatuor libris Institutionum, &  
 vnico libro nouellarum.

### S. III.

*Officia, effectus, & actus legis.*

Duo sunt præcipua legis officia, nempe di-

rigere, & obligare, cum enim habeat rationem regulæ & mensuræ actuum humanorum, est directiua hominum, eisque ostendit quid agere vel omittere debeant, quapropter vocatur lux Prouerb. 6. *Mandatum lucerna est, & lex lux.* Cum verò emanata sit à superiori, eiusq; voluntatem contineat, habet vim obligandi. Vnde lex a ligando dicitur, quia ut ait S. Tho. hic art. 4. *per eam obligantur subditi ad eius obseruantiam*, vel (ut loquitur Cassiodorus) *eo quod animos nostros liget, suisque teneat obnoxios constituitis.*

Præcipuus effectus legis est reddere homines bonos, vel simpliciter, vel secundum quid. Lex enim diuina, præsertim Euangelica, intenditur homo fiat simpliciter bonus, non modo in exteriori opere, sed etiam in interiori animo. Lex naturalis, ut fiat bonus virtutibus moralibus, quæ naturæ commensuratae sunt. Lex ciuilis, ut fiat bonus ciuis, faciatque ea quæ ad pacem Reipublicæ sunt necessaria. Lex ecclesiastica, ut fiat bonus Clericus, qui satisfaciat filo muneris.

Quatuor sunt actus legis, nimirum præcipere, & prohibere, permittere, & punire. Nam actus humani sunt vel ex genere boni, vel ex genere mali, vel ex genere seu obiecto indifferentes: primi præcipiuntur, secundi prohibentur, tertij permittuntur. Et quia lex efficaciter actus malos prohibere non posset, nisi homines metu poenarum posset à malo retrahere, ponere quartus actus, qui est punitio.

## CAPVT II.

## De lege aeterna.

**L**ex aeterna est ratio diuinæ sapientiæ existens in Deo ab æterno, secundum quod est directiua, omnium actuum, & motionum singularum creaturarum, in ordine ad bonum commune totius vniuersi. Ita D. Thomas hic qu. 93. art. 1. ubi sic discurret: Sicut ratio rerum faciendarum per artem, vocatur ars vel exemplar rerum artificiarum, ita enim ratio gubernantis actus subditorum, rationem legis obtinet, seruatis alijs quæ supra diximus esse de essentia legis: Deus autem per suam sapientiam conditor est vniuersarum rerum, ad quas comparatur sicut artifex ad artificata: est etiam gubernator omnium actuum, & motionum quæ inueniuntur in singulis creaturis: Vnde sicut ratio diuinæ sapientiæ, in quantum per eam cuncta sunt creata, habet rationem artis, vel exemplaris, vel ideæ: ita ratio diuinæ sapientiæ, mouentis omnia ad debitum finem, obtinet rationem legis. Et sic lex aeterna nihil aliud est, quam ratio diuinæ sapientiæ, secundum quod est directiua omnium actuum & motionum singularum creaturarum. Vel ut loquitur D. Augustinus l. 1. de lib. arbit. Lex aeterna est *ratio in mente Dei existens, qua res omnes per congrua media in suos fines ordinantur & diriguntur.*

Ex quo colligitur primò, legem æternam multipliciter ab idea differre. Idea enim respicit rem ut creabilem, lex æterna ut gubernandam

dam. Idea se habet per modum determinantis Deum ad specificationem operis, ex parte obiecti; lex verò per modum obligantis ad operis executionem. Ideæ in Deo multiplicantur, quia dicunt respectum ad diuersas creaturas, secundum proprias & distinctas earum rationes & quidditates; lex verò æterna vnita est, quia respicit actiones & metiones omnium creaturarum sub vna ratione communi, nempe quatenus ordinantur ad bonum commune vniuersi.

Colligitur secundo, legem æternam differre a prouidentia; illa enim per se primo respicit bonum commune vniuersi; hæc verò bonum singulare vniuscuiusque creaturæ. Illa dicit in sua ratione vim obligandi, non vero ista. Item lex æterna in Deo tradit regulas generales gubernationis, v.g. lapidem deorsum, ignem sursum inclinari; prouidentia verò iuxta illas regulas de motibus creaturarum in particulari disponit, & ideo prouidentia legem æternam habet pro principio.

Colligitur tertio, vniuersas leges ab æterna deriuari, & ab illa tanquam à fonte profluere: Tum quia primum in quolibet genere est causa & mensura cæterorum. Tum etiam, quia in omnibus mouentibus ordinatis, virtus secundi mouentis deriuatur à primo; vnde cum lex æterna sit ratio gubernationis in supremo gubernante, necesse est quod omnes rationes gubernationis, quæ sunt in inferioribus gubernantibus à lege æterna deriuentur. Non tamen eodem modo omnes leges ab æterna promanant, diuinæ enim immediatè ab ea profluunt, naturalis medio lumine rationis;

hu-

humana verò, media potestate, vel ab ipso Deo immediatè, vel mediante Republica consensu, Principibus communicata.

Colligitur quartò, quod cum lex æterna sit directiua omnium actuum & motionum singularum creaturarum, omnes operationes creaturarum, siue rationalium, siue irrationalium, ei subiunguntur: cum hoc tamen discrimine, quod actiones creaturarum rationalium subiunguntur legi æternæ, ut præcipienti, & obliganti, actiones verò quibus creaturæ insensibiles & rationis expertes ad suos fines diriguntur, non subiunguntur legi æternæ, ut formaliter præcipienti, & obliganti, quia illæ non sunt capaces obedientiæ & obligationis, sed ut ordinanti & mouenti illas ad suos fines.


Colligitur quintò, legem æternam esse verè & propriè legem, cum sit ordinatio rationis in bonum commune ab eo qui curam habet communis, in quo ratio legis essentialiter consistit, ut constat ex eius definitione capite præcedenti tradita. Nec obstat quod illa ab æterno promulgata non fuerint, cum ab æterno nullæ fuerint creaturæ quibus promulgati potuerit. Promulgatio enim est solum conditio intrinseca, ut lex obliget in actu secundo, non verò ut habeat rationem legis, & sit obligatiua in actu primo, ut cap. præcedenti ostensum est.

Probabilius tamen videtur, quod licet lex æterna respectu creaturarum rationalium, quibus modo intelligibili notificatur, exerceat rationem, & munus veræ legis; nihilominus respectu irrationalium, quibus non modo

incl.



intelligibili, sed per impressionem inclinationis & actiui principij, quo mouentur ad suos fines, notificatur & promulgatur, non possit exercere rationem & munus veræ & propriæ legis, sed tantum cuiusdam prouidentia, siue principij gubernationis. Vnde Diu. Thomas hic qu. 90 art. 1. ait, quod lex propriè dicta est mensura humanorum actuum, subindeque rationem veræ & strictæ legis, respectu creaturarum irrationalium, non videtur admittere.



## CAPVT III.


## De lege naturali.

## §. I.

*Quid sit lex naturalis?*

**I** Ex naturalis est dictamen quoddam rationis naturalis, à natura vel ab Authore naturæ nobis inditum, non solum offensuum boni, & mali, sed etiam præceptum.

Prima pars patet, lex enim consistit essentialiter in actu intellectus, sed dictamine rationis, vt cap. 1. ostendimus; vnde lex naturalis debet consistere in iudicio seu dictamine rationis naturalis, & à natura seu Authore naturæ nobis indito, iuxta illud Apostoli: *Habemus legem scriptam in cordibus nostris.* Vnde Augustinus lib. 2. de serm. Domini  
in



in monte cap. 9. ait, *Nu'lam animam esse quæ  
ratiocinari possit, in cuius conscientia loquatur  
Deus. Quis enim legem naturalem in cordibus  
hominum scribit, nisi Deus?* Et Ambrosius lib.  
9. Epist. 71. *Ea lex (inquit) non inscribitur, sed  
innascitur, nec aliqua percipitur lectione, sed  
proflus quodam naturæ fonte in singulis expri-  
mitur.*

Secunda vero pars, nempe quod tale dicta-  
men, non solum sit ostensuum boni & mali,  
sed etiam præceptivum; constat ex dictis c. 1.  
ubi ostendimus legem essentialiter consistere  
in actu imperij, cum legis sit præcipere, seu  
imperare, & illa sit actus prudentiæ, quæ  
præceptiva est.

Confirmatur: Lex naturalis nihil aliud est  
quam participatio legis æternæ in creatura  
rationali, ut docet D. Thomas hic quæst. 91.  
art. 2. & constabit ex infra dicendis: Ergo non  
consistit in dictamine & iudicio solum osten-  
sivo boni & mali, sed etiam præceptivo. Con-  
sequentia patet, quia lex æterna, prout sic; est  
præceptiva; Ergo id quod per modum legis  
eam participat, participat essentialiter vim  
percipiendi.

Ex his colligitur primò, hæc tria quæ alias  
eadem putari possent, esse distinguenda, le-  
gem naturæ conscientiam, & synderesim.  
Nam lex naturæ est ipsa ordinatio divinæ vo-  
luntatis, nobis impressa. Synderesis lumen ip-  
sum naturale intellectus, per quod ipsam Dei  
ordinationem naturaliter cognoscimus, Con-  
sciëntia verò est ipsa actio mētis, quæ formaliter  
illam cognoscimus, seu iudicium practicum,  
quo apprehendimus, seu iudicamus, aliquid  
esse

esse faciendum ; vel non faciendum . Addo quod conscientia est de aliquo agibili in particulari , lex verò naturæ est regula vniuersalis de agendis & vitandis in communi . Conscientia est de futuris , de præsentibus , & iam factis ? lex naturæ tantum disponit de futuris , nec respicit iam facta . Demum conscientia potest esse erronea , rationi autem veræ legis erroneam esse repugnat. —

Colligitur secundo , legem naturalem esse veluti partem quandam legis æternæ , nam lex æterna extendit se ad omnes creaturas tam rationales quam irrationales , sicut diuina prouidentia , at lex naturalis ad solam creaturam rationalem ; idest ad homines , & Angelos extenditur . Vnde lex naturalis in brutis propriè non residet , quia licet ad ea quæ sibi naturaliter conueniunt , inclinationem ab Authore naturæ habeant , hæc tamen inclinatio non se habent per modum cuiusdam directionis & præcepti , sicut in homine , sed per modum cuiusdam impressionis , quatenus scilicet Deus illis imprimit principia intrinseca ad agendum conformiter ad suam naturam , quæ impressio magis instinctus naturalis , quam lex naturæ appellari debet.

Colligitur tertio , legem naturalem esse in se simpliciter vnā , quia licet præcepta legis naturæ sunt plura , omnia tamen conueniunt in fine ultimo naturæ humanæ , ad quem ordinantur ; & radicaliter continentur in illo primo , & vniuersalissimo principio . *Bonum est faciendum , & malum fugiendum* , quod est vnum : vnde ab vnitatis finis , & radicalis , ac primi principij , lex ipsa

ipsa naturalis, simpliciter una dicitur.

§. II.

*Quanam pertineant ad legem naturæ.*

Ad legem naturæ pertinet in primis notissima illa, & vniuersalissima principia practica, cuiuslibet naturaliter nota: *Bonum est faciendum, malum est fugiendum. Quod tibi non vis, alteri non feceris.* Quæ non tam dicenda sunt præcepta, quam præceptorum omnium principia.

Secundò ad eandem legem pertinent omnia præcepta Decalogi, ea enim ex illis duobus principijs lumine naturali inferuntur, ut constat de cultu Dei, de honore parentum, de homicidio, furto, & adulterio non faciendo, & de alijs, quæ non sunt bona, quia præcepta, & mala, quia prohibita; sed è contrario sunt præcepta, quia bona, & prohibita, quia mala, & naturaliter indecentia. Excipiendum tamen est præceptum de sabbato obseruando, quod aliquid habet iuris positiui diuini, & aliquid iuris naturalis. Quatenus enim cultum Dei præcipit, est de iure naturæ, siquidem natura docet ac dictat, Deum, ob supremam eius excellentiam, & propter collata beneficia, esse colendum. Sed quatenus præscribit certum diem potius quam alterum, est iuris diuini positiui; natura enim hunc diem non præscribit, sed Deus solus eum obseruandum Adamo & Eux expressè præscripsit, eò quòd, ut ait scriptura, à creatione, seu ab omni opere, quod patrarat, die se-

ptimo

primo requieverit, & sic duntaxat fuit veteris legis abrogatione, antiquatum per evangelicam, in qua Sabbato dies Dominica, resurrectione Christi consecrata, colenda à nobis successit.

Tertiò omnes actus virtutum moralium sunt de lege naturæ, si spectentur secundum suam rationem genericam, siue inquantum sunt virtuosus; non verò si considerentur secundum seipsos & in proprijs speciebus. Ita docet Din. Thomas hic quæst. 94. art. 3. ubi primam partem hac ratione demonstrat: *Ad legem naturæ pertinet omne illud ad quod homo inclinatur secundum suam naturam: inclinatur autem unumquodque naturaliter ad operationem sibi convenientem secundum suam formam sicut ignis ad calefaciendum; unde cum anima rationalis sit propria forma hominis, naturalis inclinatio inest cuilibet homini ad hoc quod agat secundum rationem, & hoc est agere secundum virtutem, unde secundum hoc omnes actus virtutum sunt de lege naturali, distat enim hoc naturaliter unicuique propria ratio ut virtuosè agat.*

Secunda verò ex eo probat, quod multa secundum virtutem fiunt, ad quæ natura non primo inclinatur, sed per rationis inquisitionem ea homines adinuenerunt quasi utilia ad bene viuendum, ut patet in actibus iustitiæ commutatiuæ, qui in emptione, venditione, alijsq; humanis contractibus exercentur.

Utraque pars declarari potest hoc exemplo: Actus temperantiæ v. gr. secundum suam genericam rationem, seu ex genere suo, idest, quatenus est actus virtuosus, talis est ut in eum

natura inclinet, sicque ad legem naturæ dicitur pertinere: Quod autem per abstinentiam à carnibus, & per ieiunium quadragesimale, debeat exercere, hoc non est à lege naturali, sed positiva, pendet enim ex voluntate & præcepto Ecclesiæ.

Dices, omnia peccata non sunt contra naturam: Ergo nec omnes actus virtutum moralium, ad legem naturæ pertinent.

Respondeo quod licet omnia peccata non sint contra naturam animalem, seu omnibus animalibus communem, eo modo quo concubitus masculorum dicitur esse contra naturam: omnia tamen sunt contra naturam rationalem, id est contra rationem, quæ est natura hominis. Quod ut melius percipatur: Observandum est in natura hominis tres distinguere gradus, viuentis, animalis, & rationalis. Si illa spectetur secundum gradum viuentis, seipsum interficere dicitur peccatum contra naturam, quia quisque, quatenus est viuens, suam vitam conservare tenetur, iuxta illud Tullij capit. 1. Officiorum: *Principio generi animantium omni est à natura tributum, ut se, vitam, corpusque tueatur.* Si iuxta gradum animalis consideretur, peccata nefanda carnis, ut sodomitia, bestialitas, & mollicies, dicuntur contra naturam, quia contra inclinationem naturalem, omnibus animalibus insitam, pugnant. Demum si natura hominis, secundum gradum rationalem, & propriam differentiam, qua a brutis animalibus secernitur, inspicatur; omnia peccata dicuntur contra naturam hominis pugnare, quia omnia contrariantur rationi, quæ est hominis natura, ut do-

cet

cet Diu. Thomas supra quæst. 71. art. 2. Nilominus per antonomasiam duo priora genera peccatorum pugnare contra naturam dicuntur, quia nefandissimum est id committere à quo bruta ipsa, nec non omnia viuenda abhorrent.

## §. III.

*Utrum lex naturalis pati possit mutationem, dispensationem, aut interpretationem?*

Dico primò, legem naturalem non posse pati mutationem propriè dictam, sed solum mutationem impropriad, seu ex parte materiæ.

Prima pars probatur: Tunc mutatio legis propriè dicta contigit, quando lex ipsa mutatur in se, vel quia desinit in se, vt quando ad tempus est lata, vel cùm de iusta fit iniusta, vel quia abrogatur à superiori, vel ab illo per dispensationem restringitur: At nullo ex his modis lex naturæ mutationem pati potest, non enim potest per se ipsam definire, quia non est lata ad tempus, sed sine termino. Neque potest de iusta fieri iniusta, cùm nihil præcipiat, quod non sit intrinsecè, & ex natura rei bonum, nihil prohibeat quod non sit intrinsecè, & ex natura rei malum; neque enim bonum aut malum facit, sed ostendit. Non potest etià à Deo abrogari, quia Deus non potest non præcipere aut non prohibere quæ iure naturali necessaria vel illicita sunt. Vnde Tullius apud Lactantium lib. 1. diu. instit. cap. 8. *Est vera lex, recta ratio, na-*

*tura congrua, diffusa per omnes constans, sempiterna, quæ vocet ad officium iubendo, vetando à fraude deterreat. Huic igitur legi nec prorogari fas est; neque derogari aliquid licet, nec tota abrogari potest. Nec verò per senatum aut per populum solui hac lege possumus; nec est quærendus explanator aut interpret alius. Non erit alia lex Romæ, alia, Athenis, alia nunc; alia post hac, sed & omnes gentes & omni tempore, una lex & sempiterna & immutabilis continebit. Denique dispensatio in illam cadere non potest, ut dicemus conclusione sequenti: Ergo mutationem propriè dictam pati non potest. Vnde Gratianus distinct. 5. c. 1. *Naturale* (inquit) *inter omnia primum obtinet tempore & dignitate, capit enim ab exordio rationalis creaturæ, nec variatur tempore, sed immobilis semper permanet.**

Quod verò mutatio impropria, & ex parte materiæ, in legem naturalem cadere possit, manifestum est; materia enim circa quam lex naturæ versatur, non semper eodem modo se habet, sed interdum variatur, propter aliquas circumstantias occurrentes, ex quo fit ut illud quod erat de lege naturæ, postea non sit de lege naturæ: v. g. de lege naturæ est quod depositum sit reddendum, quando res in deposito constituta non petitur in damnum alicujus, sed quia potest contingere quod petatur in alicuius perniciem, tunc mutatur materia legis depositi; subindeque lex de reddendo debito mutatur impropriè; nam antea dictabat depositum esse reddendum; quando scilicet non considerabatur hæc circumstantia, postea verò contrarium dictat ratione talis circum-



stantiæ. Semper tamen ratio legis naturalis inuariata manet; illa enim solum dicitur depositum esse reddendum, seruatis debitis circumstantijs, subindeq; dummodo id quod peritur, non vergat in detrimentum alicuius, & non aliter: Hoc autem nunquam variatur, nec variari potest, cum sit intrinsecè bonum, sicut colere Deum, & honorare parentes.

Dico secundò, nullam potestatem neque humanam neque diuinam posse dispensare propriè in lege naturali, relaxando obligationem, immutata materia præcepti; bene tamen impropriè, mutando materiam ex qua proximè legis obligatio oriebatur.

Probatur prima pars: Dupliciter tantum intelligi potest, quod fiat dispensatio in lege naturæ: Primò, manente illicito ac inhonesto & naturæ rationali dissono, actu in quo dispensatur, mendacio, v.g. vel adulterio: Secundò, ita quod per dispensationem actus desinat esse illicitus & inhonestus, atque naturæ rationali dissonus: Sed neutro modo potest fieri dispensatio in lege naturæ: Ergo repugnat ullam potestatem humanam, vel diuinam, propriè & directè dispensare in lege naturæ. Maior patet, minor etiam quoad primam partem videtur manifesta, si enim Deus ita in lege naturali dispensaret, ut homo eliceret aliquem actum, qui non obstante dispensatione maneret illicitus, inhonestus, & naturæ rationali dissonus, dispensaret illum ut peccaret, & actum intrinsecè malum eliceret, quod infinitæ eius sanctitati repugnat. Probatur verò quantum ad secundam: Præcepta negatiua legis naturalis prohibent tantum actiones per se

intrinsecè & ex natura sua mala, & dissente-  
neas naturæ rationali, vt mentiri; iurari, adul-  
terium committere, falsum testimonium pro-  
ferre &c. Res autem per se & intrinsecè ma-  
la, non potest non esse mala; quia essentia re-  
rum sunt inuariabiles: Ergo non potest dispen-  
satio efficere vt non mala, ita vt illi auferat na-  
turalem malitiam.

Quod diximus de præceptis negatiuis legis  
naturæ, cum proportionem dicendum est de af-  
firmatiuis; præcepta enim affirmatiua legis  
naturalis, obligant tantum in illis occasioni-  
bus, in quibus ommissio actus præcepti esset in-  
trinsecè & per se mala: Ergo hæc ommissio non  
potest non esse mala, & fieri nequit vt per di-  
spensationem adimatur illi malitia, ita vt actus  
illi omissioni oppositus, non sit adhuc mora-  
liter necessarius.

Secunda verò pars conclusionis, quæ asserit  
posse dispensari improprie in his quæ sunt de  
iure naturæ, mutando scilicet materiam ex qua  
legis obligatio oriebatur, patet in dispensatio-  
ne votorum, quæ sunt de iure naturæ, & tamen  
per potestatem Ecclesiasticam in illis dispen-  
sari improprie, *quatenus auctoritate super-  
ioris dispensantis fit vt hoc quod continebatur  
sub voto, non contineatur; in quantum deter-  
minatur in hoc casu, hoc non esse congruam  
materiam voti*, vt ait D. Th. 2. 2. q. 68. art. 10.  
ad 2. Idem magis constabit ex infra dicendis.

Dico tertio, legem naturalem nonnunquam  
egere declaratione & interpretatione. Cum  
enim omnia legis naturæ præcepta non sint  
æque nota, & æque intellectu facilia, quædam  
ex illis aliqua declaratione, & interpretatione

indigent, ad hoc ut verus eorum sensus haberi possit. Exempli gratia lex naturalis quæ iubet seruari secretum, eget aliqua interpretatione, cum illa non obliget in omni casu, in eo scilicet in quo custodia secreti noceret Republicæ. Similiter in lege naturali prohibente homicidium, explicandum est id non intelligi de occidente cum moderamine inculpatae tutelæ, vel alia iusta de causa. Et in lege naturali præcipiente restitui alienum, intelligendum est, si fieri possit sine periculo vitæ, vel famæ, quæ maius bonum est; vel sine damno domini vel alterius; puta si furiosus essem suum repetat ad occidendum, vel prodigus pecuniam ad profundendum.

Quæres, an Epiphora in lege naturali locum habeat? Respondeo negativè: Epiphora enim est interpretatio mentis legislatoris, quando expressa ab eo haberi non potest; unde si præsens ipse mentem suam explicet, talis mentis expressio à legislatore facta, Epiphora non est: At in lege naturali non est opus hac interpretatione, cum ipsa legislatrix ratio, quæ legem tulit & dictavit, v.g. depositum esse restituendum, dicet illud non esse restituendum, dum petitur in damnum alicuius: Ergo in lege naturali Epiphora locum non habet.

Obijcies primò contra primam conclusionem: Lex verè & propriè mutatur per derogationem: Sed legi naturali derogari potest: Ergo illa potest verè & propriè mutari. Maior constat minor probatur. Per leges civiles derogatur iuri naturali, ut constat in legibus usufructus & præscriptionis, quæ auferunt à vero domino quod suum est, illudque transfer-

runt in dominium vsucapientis; cùm tamen sit legis & iuris naturalis, vt nullus proprijs bonis ab altero spoliatur: Ergo iuri naturali perpositum derogari potest.

Respondeo, concessa Maiori, negando Minorem, nam per leges vsucapionis, & præscriptionis, non derogatur propriè lege naturali præcipienti quod nullus proprijs bonis ab altero spoliatur, sed solum fit mutatio materiæ legi antea subiectæ. Lex enim naturalis prohibet tantum ne retineatur alienum, domino rationaliter invito: cùm verò per leges vsucapionis & præscriptionis transfertur dominium bonorum præscriptorum, dominus non est rationabiliter invitus; quia nimirum leges illæ institutæ sunt ad bonum commune tuendum & conseruandum, ne scilicet rerum dominia diu incerta maneant, & ne lites interminabiles fiant, & supra numerum multiplicentur.

Obijcies secundò contra secundam conclusionem: homicidium, furtum, fornicatio, polygamia, & dissolutio matrimonij; legi, & iuri naturali repugnant: At Deus in his omnibus dispensare potest, imò & de facto dispensauit: Ergo in lege & iure naturali dispensare potest. Maior constat, Minor verò varijs exemplis est scriptura desumptis declaratur. Deus enim dispensauit cum Abrahamo vt filium suum interficeret & immolaret Genes. 22. Item cum Israelitis vt Ægyptum spoliarent & vasa aurea & argentea, quæ commodatò ab Ægyptijs acceperant, secum abducerent, Exodi 12. Iussit quoque Osee Prophetæ, vt assumeret sibi mulierem fornicariam, & ex ea  
filios

filios fornicationis susciperet, Osee 1. Deum dispensauit cum Iudæis, ut plures haberent uxores, eisque permisit uxoris dimittere per libellum repudij, & alias ducere, ut apparet ex Genesi, Exodo, ac Deuteronomio.

Respondeo, concessa Maiori, negando Minorem, & ad eius probationem dico, Deum in prædictis casibus non dispensasse propriè in lege, & iure naturæ, sed impropriè tantum, mutando materiam, & eam per mutationem subtrahendo legi naturali. Nam in primo exemplo, tanquam supremus dominus vitæ & necis omnium, dedit ius Abraham in vitam innocentis, vel eo tanquam ministro & executori uti voluit: Lex autem naturalis non prohibet homicidium innocentis in tali casu.

In secundo tanquam supremus dominus bonorum omnium, habens in manu sua dominium creaturarum, transtulit dominium Ægyptiorum in Israelitas, vel tanquam iudex supremus priuauit Ægyptios hac pena, propter crudelitatem commissam in Israelitas, & usum sacrilegum vasorum illorum, quæ ad idolorum cultum applicauerant, ut innuit Augustinus lib. 22. contra Faustum cap. 7. Vel denique Israelitis reddidit mercedem laborum suorum, qua fuerant fraudati ab Ægyptis, ut loquitur Scriptura Sapient. 10.

In tertio casu Deus tanquam supremus dominus corporum, potens efficere per se quod faciunt mas & foemina per mutuum consensum legitimum, quoad corporum traditionem, dedit hanc meretricem Osee in uxorem,

antequam ad eam accederet, propter mysterium quod eo facto tunc representabatur, quatenus scilicet ipse Deus debebat in sponsam assumere naturam humanam, quæ per peccatum primorum parentum, & innumera alia, seipsam turpiter prostituerat, & meretrici infami similem se reddiderat. Alij tamen existimant, verum & legitimum consensum conjugalem inter Oseam & mulierem illam, antecopulam carnalem intercessisse, quia (inquiunt) confectus est causa formalis matrimonij, quæ à Deo suppleri nequit. Nec obstat, quod talis mulier in Scriptura appelletur fornicaria, ideo namque sic appellatur, non quod esset tunc meretrix, sed quia antea fuerat talis; non enim est insolitum in Scriptura, res interdum retinere denominationem eorum quæ antea fuerant: Eva enim post formationem suam, appellata est ab Adamo os Genes. 2. *Hoc nunc os ex ossibus meis*, quia ante formationem talis erat. Et serpens à Moyse ex virga eius productus, non desinit adhuc appellari virga Exodi 7. *Devoravit virga Aaron virgas eorum*. Eodem quoque modo mulier Osee tradita, fornicaria appellatur, quia ante suum cum Osea matrimonium talis erat: Filij verò ex tali matrimonio progeniti, propter matris opprobrium, *flij fornicationum* nuncupantur.

In quarto casu, qui duas continet partes, alteram de poligamia, alteram de dimissione uxoris per libellum repudij, dicendum est, Denotare quæ naturæ auctorem, cui subiacet matrimonij iura, in ordine ad naturæ propagationem, & commune bonum totius spe-

speciei instituta, & tanquam supremum dominium corporum, dominium corporum ab una vxore in plures diuifisse, quando Iudæis simul habere plures vxores permisit; & irritasse prioris matrimonij vinculum, dum illis concessit vxores dimittere per libellum repudij, Vnde in vtroq; casu fuit solum mutatio materiæ, non verò stricta legis naturalis dispensatio; quia lex naturalis nunquam obligauit vt non fieret matrimonium vnius cum pluribus, Deo sic disponente de iure & contactu matrimonij. Similiter lex naturæ tantum prohibet repudium vxorum, quamdiu matrimonium manet insolutum; soluto autem matrimonij vinculo non vetat, quod coniuges possint transire ad alias nuptias.

## §. IV.

*An possit dari ignorantia inuincibilis iuris naturalis, seu præceptorum legis naturæ?*

Pro resolutione huius celebris difficultatis, obseruandum est, præcepta legis naturalis ad tres classes seu ad tria genera posse reduci. Prima sunt vniuersalissima, quæ (vt supra dicebamus) non tam dicenda sunt præcepta, quam præceptorum omnium principia. Cuiusmodi sunt ista: *Bonum est faciendum, malum est fugiendum. Quod tibi fieri non vis, alteri ne feceris. Deus est colendus. Parentes sunt honorandi.* Alia sunt quæ ex istis per facilem discursum deducuntur; qualia sunt præcepta non furandi, non fornicandi, non mentiendo, & similia. Denum alia sunt, quæ ex primis

mis non nisi longo ac difficili discursu deducuntur, qualia sunt præcepta quæ prohibent aliquos contractos, qui reuera vsurarij, vel simoniaci sunt, ac tales euidenter nõ apparent, sed de hoc difficultas & controuersia est inter Doctores, alijs affirmantibus, alijs negantibus. Hoc præmissis, pro resolutione difficultatis propositæ.

Dico, non posse dari ignorantiam inuincibilem inculpabilem de præceptis naturalibus primi & secundi generis; bene tamen de illis quæ sunt tertiæ classis.

Prima & secunda pars huius conclusionis docentur expressè à D. Tho. hic qu. 94. art. 6. ubi sic discurre: *Ad legem naturalem pertinent primò quedam principia communissima quæ sunt omnibus nota, quedam autem secundaria præcepta magis propria, quæ sunt quasi conclusiones propinquæ principijs. Quantum ergo illa principia communia, lex naturalis non potest à cordibus hominum deleri in uniuersali, deletur tamen in particulari operabili, secundum quod ratio impeditur applicare commune principium ad particulare operabile, propter concupiscentiam, vel aliquam aliam passionem. Quantum verò ad alia præcepta secundaria, potest lex naturalis deleri de cordibus hominum, vel propter malas persuasiones ( eodem modo quo etiam in speculatiuis errores contingunt circa conclusiones necessarias ) vel etiam propter prauas consuetudines & habitus corruptos; sicut apud quosdam non reputabantur latrocinia peccata, vel etiam vitia contra naturam, ut Apostolus dicit ad Roman. 1. Ex quibus probatæ inueniuntur duæ primæ partes nostræ conclusionis.*



clusionis . Nam prima & vniuersalissima præcepta legis naturæ, sunt cuiuslibet notissima, cum sint prima principia sinderesis; Vnde Augustinus concione 25. in Psalm. 118. dicit quod nullus finitur ea ignorare, Et in Psalm. 57. loquens de isto legis naturalis primo principio: *quod tibi fieri non vis, alteri ne feceris*; ait quod illud manu formatoris nostri, in ipsis cordibus veritas scripsit. Hoc & antequam lex daretur, nemo ignorare permissus est, ut esset unde iudicarentur etiam quibus non est data. Sed ne sibi homines aliquid defuisse viderentur scriptum est in tabulis quod in cordibus non legebant; non enim & scriptum non habebant, sed legere volebant. Ergo de primis & vniuersalissimis præceptis legis naturæ non potest dari ignorantia inuincibilis.

Quod verò non possit etiam dari de secundarijs, quæ ex istis per facilem discursum deducuntur, patet etiam ratione D. Thomæ, quia etsi aliquæ gentes talia præcepta ignorent, existimantes licitum esse furari, & fornicari, tamen hæc ignorantia vincibilis & culpabilis est (non ex eo quod per peccatum primi parentis in hominum mentes inuecta sit, ut docet Iansenius, quem in tract. de peccatis cap. 5. confutauimus) sed quia oritur ex propria hominis culpa, nempe ex praua consuetudine, & habitibus corruptis, ob quos in eam opinionem in quis adducitur, ut credat illud esse licitum, quod illicitum esse cerneret, & citò iudicaret, nisi esset prauorum affectuum tenebris obnubilatus & execratus, & nisi peccatis quæ contra legem naturalem committit, diuinæ illuminationi, &

legis

legis naturalis radijs, obstaculum culpabile poneret. Nam ut ait Diu. Augustinus lib. 2. de serm. Domini in monte cap. 3. *Deus semper paratus est dare suam lucem nobis, non visibilem, sed intelligibilem. & spir. salem, sed nos non semper parati sumus accipere, cum inclinamur in alia, & rerum corporalium cupiditate obtenebramur.* Cui concinit fidelissimus eius Discipulus. S. Thomas q. 3. de malo art. 7. his verbis: *Deus, quantum in se est, omnibus sese communicat, pro captu eorum, unde quod res aliqua à participatione beatitudinis ipsius deficiat, est ex hoc quod in ipsa inuenitur aliquod impedimentum participationis diuinæ.* Sic ergo quod gratia alicui non apponatur, non est causa ex Deo, sed ex eo quod ipse cui gratia non apponitur, impedimentum gratiæ præstat, in quantum aueritur à non auertente se lumine, ut Dionysius dicit. Similia habet 3. contra Gent. cap. 159.

Ex his probata manet tertia pars conclusionis: Ideò namque dari nequit ignorantia innunciabilis præceptorum primi & secundi generis, quia illa sunt cuilibet immediate & per se nota, utpote prima principia finderesis; ista verò sine magno labore per facilem discursum immediate ex illis deducuntur: At præcepta legis naturalis, à primis remotissima, nec sunt immediate & per se nota, ut constat, nec ab illis nisi magno labore, & discursu difficili deducuntur; Ergo possunt innunciabiliter ignorari à rusticis & indoctis, qui huiusmodi discursus, sunt incapaces, & qui à Prælaris, Confessarijs, vel Doctores, non possunt interdum instrui, & scire, quæ talia præcepta sint de

iure naturæ, & obligent indispenſabiliter; tum quia non poſſunt ſemper illos adire: tum etiam quia interdum hoc ab illis ignoratur, cum de hoc inter Magiſtros, & Doctores ſape fit lis & controuerſia, alijs affirmantibus, alijs negantibus. Vnde Medina in 1. 2. q. 76. art. 2. ſic ait. *Circa præcepta naturalia, quæ eliciuntur ex præceptis Decalogi per conſequentiam non valde evidentem, poteſt eſſe ignorantia inuincibilis per multum tempus, &c.* Mercorius etiam Inquiſitor Mantuanus, in libro de praxi opinionum, docet poſſe dari aliquam ignorantiam inuincibilem iuris naturalis. Cui ſubſcribit Vincentius Baroniſ in poſteriore parte manuductionis, ad moralem Theologiam diſp. 4. ſect. 1. §. vltimo.

Ratio etiam id ſuadet: Lex enim vim obligandi non habet, niſi applicetur hominibus per promulgationem ſeu intimationem, ut ſupra cap. 1. declarauimus. Sed lex naturalis non intimatur nec promulgatur omnibus hominibus, quantum ad omnia præcepta quæ continet, nimirum quantum ad illa quæ ſunt remotiſſima à primis præceptis vniuerſaliſſimis, quæ ſunt prima principia ſynderſis, Ergo non obligat omnes homines, quantum ad illa præcepta ſubindeque poteſt dari de illis ignorantia inuincibilis, & excuſans à peccato. Maior conſtat, minor verò ſic oſtenditur. Promulgatio, ſeu intimatio legis naturæ, fit per dictamen rationis intimantis homini agenda, vel omittenda. Sed tale dictamen, quantum ad præcepta, quæ ſunt remotiſſima à primis præceptis vniuerſaliſſimis, non habetur ab omnibus, cum non habeatur, niſi per diſcurſum dif-

fici.

ficilem , & magno labore & studio , cuius plures viri simplices, rustici , & ignari , sunt omnino incapaces. Ergo lex naturalis non intimatur nec promulgatur omnibus , quantum ad præcepta remotissima à primis præceptis vniuersalissimis, omnibus notis.

Addo quod, nisi admittatur aliqua ignorantia iuris naturalis , inuincibilis , & à peccato excusans, sequitur incredibilis conscientiarum perplexitas, inò & peccandi hic & nunc ineuitabilis & dura necessitas; quotiescumq; aliquis probabiliter & bona fide iudicat aliquid sibi agendum esse, neque posse omitti sine peccato, & tamen illud naturali iure illicitum est. Peccabit enim id faciendo, si nulla ignorantia iuris naturalis excuset à peccato. Peccabit etiam non agendo , quia aget conscientiam, quæ ipsi dicat hoc esse agendum. Peccabit igitur quocumque se vertat , & siue hoc faciat siue non faciat , subindeque necessariò peccabit , quod non solum est contra fidei dogmata, sed etiam contra prima luminis naturalis principia , nempe contra hoc principium: *Nemo peccat in eo quod vitare non potest*; quod D. Augustinus lib. de duabus animabus cap. 11. vsque adeò notum , & per se manifestum esse asserit, vt non solum à nemine ignoretur , sed insuper à toto genere humano decantetur , & declamet: *Nonne ( inquit ) ista cantant & in montibus Poeta , & indocti in circulis , & docti in bibliothecis , & Magistri in scholis , & Antistites in locis sacris , & in orbe terrarum genus humanum.*

Ex hoc sequitur aliud absurdum & inconuen-

ueniens ; nimirum plerumque esse fortunæ ,  
& non voluntatis ; quod hominē , peccent ,  
vel non peccent , prout videlicet id quod  
agunt est conforme vel difforme iuri naturali  
ab eis ignorato ; quod etiam absurdissimum  
est ; cū vera & sola causa peccati sit volun-  
tas creata , vt operans deformiter ad regulas  
morum .

Nec valet si dicas ; prædictam conscientiæ  
perplexitatem , & peccandi duram necessita-  
tem , esse voluntariam , indirectè & per acci-  
dens , his qui contra ius naturale peccant ; quia  
oritur ex propria illorum culpa , & ex prauis  
habitudinibus & concupiscentijs , quibus diuinæ  
illuminationi ponunt impedimentum . Licer  
enim hoc sit verum in his qui peccant ex i-  
gnorantia iuris naturalis , prout continet præ-  
cepta secundaria , quæ ex primis per facilem  
discursum deducuntur , qualia sunt præcepta  
non furandi , non mentiendi , non fornican-  
di , & similia , vt in solutione argumentorum  
declarabitur ; non tamen in illis qui ignorant  
præcepta naturalia , à primis remotissima ; quia  
illa non deducuntur ab istis , nisi magno stu-  
dio & labore , atque difficili , & longo dis-  
cursu , cuius cōm plurimi rustici ignari sint  
incapaces , nec interdum possint ab alijs in-  
strui , illorum ignorantia non potest censerī  
voluntaria per accidens & indirectè , ex eo  
nempe quod eorum notitiæ ponant impedi-  
mentum , sicut ignorantia præceptorum non  
fornicandi , non furandi & similium .

## Soluuntur obiectiones.

**C**ontra primam partem conclusionis nullum militat argumentum difficile, sed contra secundam obijcitur primò: Vt aliquid sit peccatum debet esse voluntarium, quod vsque adeò verum esse testatur Augustinus lib. de vera Relig. cap. 14. *vt nulla Doctorum paucitas, nulla indoctorum turba dissentiat.* Sed ignorantia iuris naturalis facit actum esse prorsus inuoluntarium: Ergo excusat à peccato, subindeque inuincibilis & inculpabilis est. Maior patet, minor probatur. Aduertentia, seu cognitio malitiæ, requiritur vt peccatum sit voluntarium, cum de ratione voluntarij sit esse à principio intrinseco, cum cognitione, vt ex eius definitione constat: Sed ignorantia iuris naturalis, tollit aduertentiam, seu cognitionem malitiæ actus mali qui elicitur: Ergo facit quod tale peccatum non sit voluntarium. Vnde S. Th. q. 3. de malo ar. 8. ait *Cum aliquis nescio fornicationem esse peccatum, voluntariè quidem facit fornicationem, sed non voluntariè facit peccatum.*

Huic difficili argumento variè respondent Authores, in primis Iansenius ait ignorantiam iuris naturalis, per culpam primi hominis in mentes hominum inuectam esse; vnde cum culpa Adami sit hominibus voluntaria, quia omnium hominum voluntates, in voluntate Adami vt capitis totius generis humani, quodammodo continebatur: ignorantia iuris naturalis, ex ea fluens, & proueniens, ipsis voluntaria censetur, subindeque mala, & culpabilis, Ve-

Verum hæc responsio, & doctrina Iansenij tract. præcedenti cap. 5. a nobis impugnata est ostendimus enim quod licet ad peccatum originale sufficiat quod sit voluntarium voluntate capitis, non tamen ad rationem peccati actualis seu personalis, ut expresse docet Div. Thomas in 2. dist. 30. qu. 1. art. 1. his verbis: *Oportet quod secundum hoc quod aliquid rationem culpæ habet, secundum hoc ratio voluntarij in ipso reperiatur. Sicut autem est quoddam bonum quod respicit naturam & quoddam quod respicit personam; ita etiam est quædam culpa naturæ, & quædam personæ. Unde ad culpam personæ requiritur voluntas personæ; ad culpam vero naturæ (idest originale peccatum) non requiritur nisi voluntas in natura illa.* Idem constat ex Augustino lib. de duabus animabus capit. 11. ubi dicit quod *nec peccatum nec rectè factum imputari cuiquam iuste potest, qui nihil fecerit propria voluntate.* Quibus ultimis verbis aperte declarat, ad peccatum actuale, seu personale, non sufficere quod sit voluntarium voluntate capitis, sicut sufficit ad peccatum originale, sed requiri necessarium quod sit voluntarium voluntate propria illius qui peccat.

- Respondet secundo Estius in 2. dist. 22. §. 14. quod ignorantia iuris naturalis nunquam facit actum prorsus involuntarium, etiam quæ ratione peccatum est, quia non facit ut malum prorsus ignoretur, sed semper permittit ipsum aliquo modo sciri: Quamvis enim qui hac ignorantia laborat, ignoret hoc malum, quod agit, sub ratione generis, idest nesciat esse peccatum, novit tamen sub ratione speciei, cui natu-

valiter & essentialiter tale genus compati. Exempli causa, qui mentitur officiosè, putans tale mendacium esse licitum, is quidem nescit tale mendacium pertinere ad genus peccati; ideoq; putat non esse peccatum, scit tamen se mentiri, & proinde actum qui essentialiter malus est, voluntariè committit. Eadem est ratio in fornicatione, usura, simonia, ac ceteris per se malis, idest quæ non ideo mala sunt, quia prohibita, sed ideo prohibita, atque illicita, quia mala sunt. Hæc solutio. & doctrina consona videtur menti August. lib. 1. retract. cap. 15. sic dicentis: Qui nesciens peccauit, nesciens peccatum esse quod fecit; ita nec tale peccatum sine voluntate esse potuit, sed voluntate facti, non voluntate peccati, quod geri non debuit. Quibus verbis negat S. Doctor, opera ex ignorantia iuris naturalis facta, esse inuoluntaria, quia sic operans bene cognoscit actum intrinsecè malum, ac legi naturali difformem, tametsi ex sua culpa, non reflectat supra eius malitiam, & supra deformitatem seu contrarietatem quam habet ad legem naturalem. Quod ut magis declaretur, & elucidetur.

Respondeo tertio ad objectionem, concessa maiori, negando minorem, & ad eius probationem dico, ignorantiam iuris naturalis tollere quidem cognitionem seu aduertentiam malitiæ peccati, & deformitatis actus ad legem naturalem, non excusare tamen à peccato; quia licet talis carentia cognitionis seu aduertentiæ malitiæ peccati, & deformitatis eius ad legem naturalem, non sit voluntaria directè & in se, bene tamen indirectè & in sua causa, nempe prauis affectibus, concupi-

scen



scientijs, & passionibus, quas voluntariè aliqui non reprimunt, & quibus diuinæ illuminationi, & radijs legis naturalis, obstaculum culpabile ponunt. Vnde Ambrosius libr. de bono mort. cap. 9. Errat oculus, ubi errat affectus. Affectus ergo deceptio, est deceptio visus. Quia ubi ibi obseruat, sic corruptus, quærit vt concupiscat, non vt verum cognoscat. Quam rationem eleganter prosequitur in Psalm. 118. serm: 4. his verbis: Tertia ista quam gerit, meretricis nos quibusdam illecebris capit, & quasi vultus quosdam voluptatum corporaliumque delectationum fucis illinit, vt lateat in his veritas, & forens quadam specie decipiant appropinquantes.

Hanc solutionem & doctrinam rectè explicat Caietanus supra qu. 74. ubi hæc scribit: Contrarietas intrinseca ipsi peccato, à scienter peccante est scienter & per se volita, ab ignorante aut errante, per accidens tripliciter: Primo ex parte actus, quia est volita ad volitionem actus. Secundo ex parte ignorantie voluntariæ, quia in ipsa volita sunt voliti omnes eius affectus, quorum vnus est incurrere in hoc contrarium. Sicut homo voluntariè oculis velatis incedens, vult in sua causa quidquid mali inde sequi natum est; vnde si impingat in læsionem aliquod, voluntariè impingit voluntate causæ scilicet velationis, vel vel. si incessus. Terio &c.

Ex his facile intelligitur, & explicatur testimonium D. Thom. desumptum ex qu. 3. de malo ar. 8. ubi ait: Cum aliquis nescit fornicationem esse peccatum, voluntariè quidem facit

*facit fornicationem, sed non voluntariè facit peccatum.* His enim verbis solum intendit, quòd cum aliquis nescit fornicationem esse peccatum, voluntariè quidem formaliter facit fornicationem, sed non voluntariè formaliter facit peccatum; quia facit peccatum non cum aduertentia malitiæ, sed ex ignorantia seu inaduertentia malitiæ, per accidens voluntaria. Quod verò hæc interpretatio legitima sit, constat ex verbis istis quæ idem S. Doctor scribit in hac parte supra qu. 19. art. 6. *Si ratio errans dicat quod nemo teneatur ad uxorem alterius accedere, voluntas concordans huic rationi erranti est mala, eo quod error iste provenit ex ignorantia legis Dei, quam scire tenetur.* Quibus verbis aperte declarat, ignorantiam iuris naturalis (prout continet secundaria legis naturæ præcepta, quale est præceptum non fornicandi) non excusare à peccato, quia nimirum semper est volita, saltem indirectè, per accidens; & in sua causa, modo superius explicato. Quod adeò verum est, ut Augustinus expositione inchoata in Epist. ad Roman. de peccatis carnalibus doceat, ne in ipsis quidem pueris, & adolescentibus, à mortali malitia expurgari per ignorantiam.

Obijcies secundò: Potest dari ignorantia inuincibilis, & excusans à peccato iuris positivi: Ergo & iuris naturalis, prout secundaria legis naturalis præcepta complectitur.

Sed nego consequentiam, & paritatem, cum enim ius naturale, prout includit præcepta secundaria legis naturæ, intimam habet cum principijs lumine naturali notis colligationem,

nem, & ex communissimis morum notionibus, in ipsis humanæ mentis medullis & visceribus indelebiliter impressis, certa connexionē dependeat, eius notitiā quilibet in sua manu & potestate habet, nisi corruptæ voluntatis prauitate fuerint impedita; ex quo fit quod tale ius, quantum ad illa præcepta, non possit inuincibiliter ignorari. E contra verò, cum ea quæ sunt iuris positiui, & pendent à libera voluntate legislatoris humani vel diuini, nullam habeant cum principijs lumine naturali notis connexionem, eorum notitiā non habemus in nostra potestate, subindeque de illis possumus habere ignorantiam inuincibilem & inculpabilem.

Addo quod, ignorans legem positiuam, & præcepta quæ ad illam pertinent, non cogitat se illorum scientiā debere comparare, nec aliquod lumen in se habet, in quo possit talem obligationem intueri; secus verò est de ignorante præcepta secundaria legis naturæ, nam ex conscientia ad illa instigante, emergunt plerumque cogitationes bonæ, quibus nullus homo per totam vitam caret, vnde si aliqua talia præcepta ignorent, ipsis imputandum est, qui conscientiam illorum admonentem audire noluerunt, vel ne moneret, voluntarium obicem posuerunt.

Obijcies tertio: Licet lumine naturali constet, actus intrinsecè malos, & legi naturali repugnantes, secundum se & absolutè consideratos, nunquam esse licitos, nec posse excusari à peccato; aliqui tamen existimant, eos esse bonos ac licitos, si considerentur vt vestiti circumstantia boni finis: v.g. licitum esse furari  
ad

ad dandam eleemosynam, mentiri ad propriam vel alienam vitam tuendam, sese polluere ad conseruandam vel recuperandam sanitatem: Ergo potest dari aliqua ignorantia iuris naturalis, prout complectitur præcepta secundaria legis naturæ,

Respondeo in prædictis casibus seu exemplis, ignorantiam vincibilem esse, potest enim vinci & depelli per istud principium lumine naturali notum, & cuilibet à natura institutum: *Non sunt facienda mala, ut exeniant bona.* Ex quo quilibet ratione vtens, facile colligere potest, non esse licitum furari ad dandam eleemosynam, mentiri ad propriam vel alienam vitam tuendam, & multò minus sese pollueret ad conseruandam vel recuperandam sanitatem, imò nec ad vitandam mortem. Vnde S. Casimirus; graui oppressus infirmitate, mori potius quam castitatis iacturam ex Medicorum consilio subire, constanter voluit, & de Verino Poeta Gallo, hi versus extant posteritati consecrati.

*Sola Venus poterat lento succumbere morbo.  
Ne se pollueret, maluit ille mori.*

Quare nedū improbabilis, sed & abominabilis est doctrina Caramuelis, asserentis in sua Thologia morali num. 1603. mollitiem iure naturæ prohibitam non esse, vnde si Deus eam non interdixisset, nunquam esset mala, sæpe esset bona, & aliquando obligatoria sub peccato mortali. Hoc probabilitatis monstrum in dissertatione de probabilitate contriuimus, vbi hos Martialis versus in Ponticum se polluentem retulimus.

*Hoc nihil esse putas? scelus est mihi crede, sed  
ingens.* Quan-

*Quantum vix animo concipis esse tuo.*

*Ipsam crede tibi naturam dicere rerum.*

*Istud quod digitis Pontice perdis, homo est.*

Obijcies quartò contra tertiam partem conclusionis: Nullum probabile falsum, & legi naturæ dissonum, excusat à peccatis, quæ sunt contra ius naturale, quamvis appareat & existimatur verum, & legi naturæ consonum: Ergo nulla prorsus datur ignorantia inuincibilis & inculpabilis iuris naturalis. Consequentia patet, Antecedens verò probatur triplici testimonio Diu. Thomæ. Primum habetur quodlib. 8. art. 13. vbi S. Doctor ait: *Illud quod agitur contra legem (æternam vel naturalem) semper est malum, nec excusatur per hoc quod est secundum conscientiam.* Secundum sumitur ex quodlib. 9. artic. 15. vbi hæc habet: *Error quo non creditur esse peccatum mortale, quod est peccatum mortale, conscientiam non excusat à toto, licet fortè à tanto.* Tertium habetur quodlib. 3. articul. 10. vbi hæc scribit: *Nullus excusatur si sequatur opinionem erroneam alicuius Magistri, in talibus enim ignorantia non excusat.*

Probatur secundò ex SS. Patribus, qui id etiam apertè videntur docere: Augustinus enim epist. 154. sic ait: *Si quis bonum putauerit esse quod malum est, hoc putando utique peccat: ea sunt omnia peccata ignorantiae, quando quisque bene fieri putat quod malè fit.* Bernardus etiam lib. de præcepto, & dispensat. cap. 14. hæc habet: *Siue itaque malum putes bonum quod fortè agis, siue bonum malum quod operaris, utrumque peccatum est.* Item

Tertullianus de spectaculis cap. 20. *Erramus (inquit) nusquam & nunquam excusatur quod Deus damnat: nusquam & nunquam licet, quod semper & ubique non licet.*

Probatur tertio idem Antecedens ex hac definitione peccati à S. Augustino tradita: *Peccatum est factum, dictum, concupisum contra legem Dei aeternam: Ergo omne opus à lege aeterna, & naturali, quæ est eius participatio, dissidens, malum est illicitum, quamuis bonum ac licitum existimetur. Vnde D. Th. supra qu. 19. ar. 5. docet bonitatem voluntatis pendere ex lege aeterna.*

Hæc sunt præcipua fundamenta illorum qui docent, nullam prorsus dari posse ignorantiam iuris naturalis, quæ non sit inuincibilis & culpabilis, quibus facile responderi potest, iuxta principia à nobis statuta. Vnde ad primum locum D. Thomæ respondeo; *Illud quod est contra legem, semper esse malum, nec excusari per hoc quod est secundum conscientiam erroneam errore crasso, & affectato, qui non excusat à peccato, bene tamen id quod est secundum conscientiam erroneam errore inuincibili, & inculpabili, quem à peccato eximere docet S. Doctor, non solum locis in tr. de peccatis, cap. 5. relatis, sed etiam in illo artic. 13. quolibet 8. in argumento, sed contra, ubi sic ait. Si aliquis adhibet diligentiam, inquirens an habere plures præbendas sit licitum, nec inuenit aliquid quod ipsum moueat ad hoc, quod sit illicitum, videtur quod sine peccato plures possit præbendas habere. At fieri potest quod sit contra legem diuinam habere plures præbendas: Ergo ex S. Thomas ille*  
non

non peccat qui ex ignorantia inuincibili facit aliquid legi diuinæ repugnans. Vnde idem S. Doctor in eodem quodlibeto artic. 15. sic ait: *Error autem conscientie quandoque habet vim absolnendi siue excusandi, quando scilicet procedit ex ignorantia eius quod quis scire non potest, vel scire non tenetur. Ex quibus liquet, nostram interpretationem legitimam esse: Vnde traditur à S. Antonino r.p. tract. 3. cap. 10. §. 10. vbi sic ait: hac verba D. Thomæ (quibus asserit in dicto quodlibeto illud quod est contra legem semper esse malum) non possunt intelligi nisi de his vbi manifestè patet ex Scriptura vel determinatione Ecclesiæ, quod sint contra legem Dei, & non de illis intelligit vbi non apparet, alias sibi contradiceret.*

Ex his patet responsio ad alium locum ex quodlibeto 9. desumptum, quando enim S. Doctor ait, *Error quoniam non creditur esse peccatum mortale, quod est peccatum mortale, conscientiam non excusat à toto, licet fortè à tanto,* loquitur de errore crasso, & affectato, vel de errore vincibili, qui oritur ex negligentia addiscendi, non vero de errore inuincibili, & inculpabili, Idem prorsus dicendum ad tertium textum quodlibeti 3. ar. 10. vbi ait quod *nullus excusatur, si sequatur opinionem alicuius Magistri:* hoc enim intelligendum est de eo qui ex ignorantia vincibili, & culpabili opinionem illam sequitur, secus verò de illo, qui inuincibiliter, & inculpabiliter talem errorem ignorat.

Ad testimonia SS. Patrum similiter dicendum est, illos tantum locis adductis significa-

re voluisti, ees qui ex errore crasso. & affectato, aut errore vincibili, qui oritur ex negligentia addiscendi, putant bonum esse quod malum est, aut malum, quod bonum est, peccare ex conscientia erronea, quæ non excusat à peccato, vt in tractatu de actibus humanis cap. vlt. ostensum est. Vnde quando Tertullianus ait, *nunquam excusari quod Deus damnat*, hoc debet intelligi quando scienter & voluntariè fit, vel quando fit ex errore vincibili, non verò si ignoranter, & inuoluntariè fiat, velex errore inuincibili.

Ad tertiam probationem desumptam ex definitione peccati, respondeo quod quando D. Augustinus definit peccatum, *factum, dictum, vel concupitum contra legem æternam*, hoc intelligendum est de lege æterna, vt intimata & participata à dictamine rationis, quod est proxima regula actuum humanorum, & quædam æternæ legis impressio, participatio, & denuntiatio, vt docet S. Thomas supra quæst. 19. artic. 4. Vnde quando lex æterna per cognitionem intellectus, seu dictamen rationis hominis non intimatur, sed inuincibiliter, & inculpabiliter ignoratur, seu quando nullum est dictamen rationis prohibens actum, quamuis legi æternæ contrarius sit, non est peccatum formaliter, sed tantum materialiter. Ex quo intelliges, quod quando D. Thomas ait, *bonitatem voluntatis pendere à lege æterna*, loquitur de lege æterna, vt per diuinam reuelationem aut dictamen naturale rationis nobis intimata, vt patet ex solutione ad 3. vbi sic ait: *Licet lex æterna sit nobis ignota secundum quod est in mente diuina,*  
inno-



*innotescit tamen nobis vel per rationem naturalem, quæ ab ea derivatur ut propria eius imago, vel per aliquam revelationem superadditam.*

Dices: Idem S. Doctor quodlib. 8. artic. 1. docet duobus modis aliquem peccare videlicet agendo contra legem Dei & agendo contra conscientiam, ita ut ad peccandum sufficiat alterum ex illis duobus: Ergo censet ad peccandum non requiri necessariò imitationem legis æternæ, vel naturalis, quæ sit per dictamen conscientiæ.


Sed nego consequentiam, ut enim supra ostendimus, Div. Thomas ibi non loquitur de conscientia secundum se & absolute considerata, prout importat dictamen rationis, legem æternam aut naturalem intimantis, sed de conscientia erronea, errore crasso & vincibili. Unde solum intendit, quod ut aliquis actus sit bonus, requiritur quod sit secundum legem divinam & secundum conscientiam talem legem nobis intimantem, ut vero sit malus, alterutrum ex his duobus sufficit, nempe vel quod sit contra legem divinam, tamen si non sit contra conscientiam; vel quod sit contra conscientiam erroneam, licet non sit contra legem divinam; quia conscientia erronea non excusat à peccato, sed illud causat, ut idem Doctor Angelicus docet supra quæ, 19. art. 5. & 6.

Obijcies vltimò. Plures antiqui Theologi, eruditione insignes, ut Alensis, D. Bonaventura, Albertus Magnus, Durandus, Hugo Victorinus, Guillelmus Parisiensis, Altissiodorensis & alij, docent nullam dari ignorantiam in-

vincibilem iuris naturalis. Vnde Gerson libi. de vita Spirituali lect. 14. corol. 3. testatur eam sententiam suo tempore inter Theologos fuisse concordem: *Quidquid sit (inquit) de ignorantia facti, aut iuris humani positiui, concors est sententia, nullam in his, quæ legis diuinæ sunt, cadere ignorantiam inuincibilem.* Id etiam videtur docere D. Thomas 3. p. quæst. 80. artic. 4. ad 1. his verbis: *Hoc quod non habet aliquis conscientiam sui peccati potest contingere dupliciter, vno modo per culpam suam, vel quia ignorantiam iuris, quæ non excusat, reputat non esse peccatum quod est peccatum; puta si quis fornicator reputaret simplicem fornicationem non esse peccatum mortale, &c.* Quibus verbis apertè declarat, ignorantiam iuris naturalis non excusare à peccato, subindeque non esse inuincibilem & inculpabilem, sed culpabilem, & vincibilem. Vnde Gratianus 1. quæst. 5. *Ignorantia (inquit) iuris naturalis, omnibus adultis damnabilis est.*

Respondeo quod quando illi celebres & antiqui Theologi docent, nullam dari ignorantiam inuincibilem iuris naturalis, loquuntur de iure naturali, vt dicit notissima illa, & generalissima principia morum quæ nullo indigent discursu, sed statim habita notitia terminorum, ipso lumine naturalis rationis, innotescunt; vel de alijs quæ per facilem discursum ex istis deducuntur, non verò de illis quæ non nisi longo ac difficili discursu ex primis deduci possunt, de quibus solum asserimus dari posse ignorantiam inuincibilem. Eodem modo intelligendus est S. Thomas cum  
ait

ait quod *ignorantia iuris non excusat à peccato*, loquitur enim de ignorantia iuris naturalis, quantum ad præcepta secundaria legis naturæ, quæ ex primis sine labore, & per discursum facilem deducuntur, ut constat in exemplo quod affert de fornicatione; præceptum enim non fornicandi, ad secundaria legis naturalis præcepta pertinet. In eodem sensu intelligi & explicari debet Gratianus, dum ait quod *ignorantia iuris naturalis, omnibus adultis damnabilis est*.



## CAPUT IV.

*De lege humana.*

## §. I.

*De existentia, & quidditate legis humane.*

**P**RÆTER legem naturalem & diuinam, adhuc necessarias esse leges humanas, probat D. Thomas hic qu. 91. art. 3. ex eo quod lex naturalis, vel diuina, generalis est, & solum complectitur quædam generalia principia morum per se nota, & ad summum extenditur ad ea quæ necessaria illatione ex illis principiis deducuntur: præter illa verò nonnulla alia sunt necessaria in Republica humana, ad rectam eius gubernationem & conseruationem; ideòque necessarium fuit, ut per humanam rationem magis in particulari determinarentur generalia illa principia morum,

quod fit per leges humanas. Idem ostendit quæst. 95. articul. 1. ubi docet necessarium fuisse ad pacem hominum & virtutem, aliquas leges ab hominibus imponi, quibus improbi & proterui, metu poenarum à vitijs cohiberentur, & ad virtutem impellerentur; quia ut Philosophus dicit 1. Politic. cap. 2. Sicut homo, si sit perfectus virtute, est optimum animalium; ita si sit separatus à lege & iustitia, est pessimum omnium. Hanc rationem tangit Isidorus lib. 5. Etymol. cap. 20. his verbis: *Factæ sunt leges, ut humano metu humana coerceretur audacia, tutaque sit inter improbos innocentia, & in ipsis improbis formidato supplicio refrænetur nocendi facultas.* Vnde si nullæ essent leges humanae, quæ licentiam agendi cohiberent, adulteria, furti, homicidia, & qualibet alia scelera, quæ statim Rempublicam funditus euerterent, impunè grassarentur, iuxta illud vulgatum Augustini: *Remota iustitia (quæ per leges humanas potissimum statuitur) quid sunt regna, nisi magna latrocinia?*

Lex humana est *ordinatio rationis humanæ ad bonum commune, ab eo qui curam communitatis habet sufficienter promulgata.* Bonitas huius definitionis patet ex dictis suprâ c. 1. cum definitionem legis in communi exposuimus. Sed circa ultimam particulam difficultas est, & controuersia apud Theologos, qualem promulgationem requirat lex humana, ut obliget. Pro resolutione.

Dico primò, stando in solo iure naturali, ut lex tam civilis quam Pontificia censeatur sufficienter promulgari, sufficit quod publice-

tur

tur in curia. Ratio est, quia ad promulgationem sufficientem ex natura rei, sufficit quod lex taliter publicetur, quod de facili possit venire in notitiam subditorum: Sed promulgatione facta in curia, lex in notitiam subditorum facile deuenire potest; nam cum ad Principis sedem frequens sit recursus, & concursus ex ciuitatibus omnibus quæ eius imperio sub sunt, facile est quod in curia agitur, in omnium notitiam venire: Ergo ad promulgationem legis sufficientem ex natura rei, sufficit quod promulgent in curia.

Dico secundo, attento iure positiuo civili, leges imperiales non obligant prouincias, nisi in earum metropoli promulgentur: imò non valent neque obligant in prouincia, nisi post duos menses à promulgatione ibi facta.

Probatur prima pars ex Authentica, *Ut factæ novæ constitutiones*, quæ est constitutio 68. inter Nouellas Iustiniani, vbi decernitur constitutiones nouas non valere, vsque dum per metropolitam palam factæ sint, idest vsque dum publicentur in ciuitatibus metropolitannis. Vbi licet Imperator loquatur de legibus testamentorum, Glossa tamen ad omnes leges extendit, & hanc regulam Iurisperitorum affert; Quotiescumque verba rubricæ faciunt perfectum sensum, & non repugnat corpori legis, nigris litteris exarato, & sub rubris contento, rubrica habenda est pro textu, cum igitur rubrica illius authenticæ loquatur vniuersaliter de omnibus legibus, constitutio illa Iustiniani, tametsi loquatur solum de legibus testamentorum, ad omnes tamen leges extendenda est, subindeque nullæ leges imperiales

giales obligant prouincias, nisi in earum metropoli promulgentur.

Ex quo probata manet secunda pars, nam Authentica illa decreuit quod legis non obliget in prouincia, nisi post duos menses à promulgatione earum; ut patet ex rubrica, quæ est: *Ita factæ nouæ constitutiones, post continuationem earum post duos menses valeant.* Idem constat ex Bulla quadam Pij IV. super declaratione temporis observationis Concilij Tridentini, ubi sic ait: *In re communi sancitum est ut Constitutiones non nisi post certum tempus vim obligandi obtineant.* His enim verbis audiuit haud dubiè ad prædictam authenticam, cum nullibi nisi in ea reperiatur aliquid sancitum circa tempus quo nouæ constitutiones vim obligandi habent.

Quod diximus de legibus impèrialibus dicendum est etiam de legibus latis à Principibus vel Regibus subiectis Imperatoris; quia ius ferendi leges quod habent ab Imperatore, fuit illis concessum, secundum ius commune imperij, & iuxta modum ac limitationem quam seruant ipsi Imperatores.

Dico tertio, stando in iure positio communi, & nisi sit constitutio, vel consuetudo contraria, leges Principum qui imperio non subduntur, ut leges Regis Galliæ & Regis Hispaniæ, non requirunt promulgationem in singulis prouincijs, nec duos menses post promulgationem, sed sufficit promulgatio quæ fit in curia Principis, idest in vrbe in qua residet, ex qua ad alia loca diuulgetur.

Patet hæc conclusio, nam iure communi nihil aliud sancitum est quod arctius possit obli-

bligare, quam prædicta Iustiniani authentica: Sed illa, cum sit imperatoria, non habet vim obligandis in terris imperio non subditis: Ergo, &c.

Dixi, si non est constitutio, vel consuetudo contraria, quia ferè ubique consuetudo est, aut lex regni, ut Reges qui plures habent prouincias, curent suas leges in singulis prouincijs promulgari, neque aliter illæ obligent. Et in Gallia Regiæ leges non obligant, nisi à Parliamentis recipiantur. Vnde aliquæ leges firuantur Parisijs, quæ non obligant Tolosæ, aut Burdigalæ.

Dico quartò, stando etiam in iure positiuo, ad sufficientem promulgationem legum Pontificiarum, non requiritur alia promulgatio, quam quæ Romæ fit; nec spatium duorum mensium, ut leges illæ habeant vim obligandi.

Probat ex praxi & consuetudine curiæ Romanæ, nam leges Pontificiæ solent tantum Romæ promulgari, & secundum illas, Rotæ Auditores, Cardinales, & alij Iudices Pontificij, iudicant de causis aliarum Prouinciarum; licet in illis promulgatio facta non fuerit, sed simplex tantum diuulgatio, nisi ex concessione vel consuetudine gaudeant eo privilegio, quod leges Pontificiæ ibi non obligent, nisi ibidem promulgentur, aut etiam recipiantur, ut fit in Regno Galliæ. Item qui Romæ non seruant leges Pontificias, statim post promulgationem nondum elapsis duobus mensibus, puniuntur, teste Nauarro consil. 1. de constit. q. 4. n. 18. Ergo &c.

Confirmatur ex illo receptissimo axioma, *Papa habet pedes plumbeos; & non plumeos,*  
C 6
quod

quod ideo verum esse asserunt Ioannes Monachus cap. *in generali*, de regulis iuris in sexto, & Nauarrus in dicta quaest. 4. num. 20. quia Papa neque solet, neque tenetur discurrere per singulas Provincias, deferendo per illas promulgationem suarum legum; eò quod sit totius vrbis vnicus Pastor, ac Vicarius Christi, in rebus spiritualibus ad animæ salutem conducentibus, de cuius proinde decretis agnoscendis, maiorem curam debent habere fideles, quam de legibus temporalibus, à Principibus secularibus editis.

Quæres, an vt lex humana obliget, requiratur consensus, siue acceptatio populi?

Respondeo negatiuè, quia obligatio legis oritur ex subiectione qua subditi prælatis subsunt, & obedientia quam illis præstare tenentur: At obedientiæ vis non oritur à subditi acceptance, sed ab excellentia authoritatis quam superiores habent in subditos; nam sicut in naturalibus oportuit, vt per quandam necessitatem mouerentur inferiora à suis superioribus, ad suas actiones naturales, puta corpora sublunaria à cœlestibus, per excellentiam naturalis virtutis diuinitus illis communicatæ, ita in rebus humanis oportet quod inferiores, per voluntatem moneantur à suis superioribus, secundum quandam necessitatem moralem, in qua consistit obligatio legis, vt docet D. Th. 2. 2. q. 104. ar. 5. his verbis: *Obediens mouetur ad imperium præcipientis, quadam necessitate iustitiæ, sicut res naturalis mouetur ex virtute sui motores, necessitate naturæ.* Ergo obligatio legis non pendet à consensu seu acceptance populi. Et certè pene inutilis est.



esset potestas legislatoris, si non posset cogere subditos ad acceptandam, & observandam legem iustam, & utilem. Imo nisi lex cogeret subditos, & obligationem induceret, absque dependentia ab eorum approbatione, & acceptance, subditi que possent dissentire, & talem legem respuere, esset bellum utriusque iustum; nam & Prælatus iuste exigeret obedientiam & observationem legis, & subditus iuste resisteret, cum acceptatio legis eius arbitrio commissa esset; hoc autem videtur absurdum: Ergo, & illud.

Hoc præcipuè habet locum in legibus Pontificijs, & Ecclesiasticis, cum enim Summus Pontifex suam potestatem immediatè recipiat à Christo, non potest in usu illius pendere ab Ecclesiæ consensu; Vnde certum omnino videtur, posse Summum Pontificem obligare Ecclesiam suis legibus, independentè à consensu & acceptance illius. Imo Suarez lib. 4. de legibus cap. 16: ait id tuta fide negari non posse.

Dices, saltem legislator civilis accipit potestatem legislativam à Republica: Ergo dependentè à consensu illius legis fert, subindeque saltem leges civiles, sub hac tacita conditione feruntur, ut vim habeant, si fuerint acceptatæ, & usu receptæ. Vnde apud Romanos non antea leges obligabant, quam fuissent à populo acceptatæ, ut refert Alexander ab Alexandro lib. 6. dierum genial. c. 16.

Respondeo, concessò Antecedente, negando consequentiam, nam semel à populo in Principem translata potestate legislativa; penes ipsum tantum est leges condere, iisque popu-

populum obligare , independenter ab ipsius consensu , & acceptatione. Nec vllum fundamentum est asserendi populum potestatem legislatiuam in Principem transtulisse, sub hac conditione, vt leges vim habeant , si fuerint acceptatæ , & vfu receptæ , præsertim cum talis conditio valde debiliter obedientiam & subordinationem subditorum erga superiores quæ ad rectam gubernationem maximè necessaria est, vt passim docet Aristoteles in libris Politicorum. Vnde licet populus Romanus initio sub hac conditione suam potestatem in leges transtulisset, ideòque tunc temporis eorum leges antea non obligarent quam à populo acceptatæ fuissent , postea tamen idem populus totam suam potestatem transtulit in leges , & capita Reipublicæ; eaque sine vlla limitatione vfi sunt.

## S. II.

### *De potestate legis humane.*

Quæres primò, vtrum lex humana possit præcipere vel prohibere actus internos?

Responden illam non posse præcipere aut prohibere actus purè internos, qui nullam cum exterioribus connexionem habent, nec illos qui tantùm per accidens cum illis coniunguntur, bene tamen illos, qui per se requiruntur ad integritatem exteriorum in genere moris.

Prima pars huius resolutionis patet, quia potestas legislatiua per se primò tendit ad externum & commune Reipublicæ regimen:

Sed

Sed actus purè interni non sunt apta materia humani regiminis, unde communiter dicitur quod Ecclesia non iudicat de internis: Ergo potestas legislativa ad actus purè internos, qui nullam cum exterioribus connexionem habent, extendi nequit.

Ex hoc probata manet secunda pars, nam actus interni qui per accidens tantum coniunguntur cum exterioribus, cum non sint per se sensibiles, non sunt apta materia humani regiminis: Ergo non possunt à lege humana præcipi vel prohiberi. Sic quando lex humana præcipit ieiunium observandum tempore quadragesimæ, non præcipit internum motuum vel poenitentiae vel temperantiae, quia illud per accidens coniunctum est externo ieiunio, cum non referat, ex quo motivo præceptum ieiunii impleatur, modò impleatur ex honesto motivo.

Tertia verò pars, quam negant plures ex Recentioribus, hac ratione suadetur: Qui habet potestatem præcipiendi aliquid, habet etiam potestatem præcipiendi illud quod necessariam connexionem cum eo habet ut illud subsistat: Ergo lex humana potest accipere illos actus qui per se requiruntur ad integritatem exteriorum in genere moris. Quia pacto attentio connectitur cum oratione vocali, non enim est vera oratio exterior in genere moris considerata, nisi procedat ex aliqua attentione interiori. Unde præceptum Ecclesiasticum de horis canonicis recitandi, non solum ad attentionem, & devotionem exteriorem, sed etiam ad interiorem obligat, ut in dissertatione de opinionum probabilitate fuse con-

contra Caramuelem ostendimus;

Quæres secundò, an leges humanæ, tam ciuiles, quam Ecclesiasticæ, si iustæ sint, habeant vim obligandi ad culpam, & in foro conscientia?

Respondeo affirmatiuè cum D. Thoma hic q. 96. art. 4. quod probat hac ratione: Lex humana, siue ciuilis, siue Ecclesiastica, deriuatur à lege æterna: Ergo habet vim obligandi in foro conscientia. Antecedens constat ex dictis supra cap. 2. corollario 3. in quo ostendimus vniuersas leges ab æterna deriuari. Consequentia verò probatur: Quod deriuatur ab aiquo, participat rationem eius suo modo, scilicet iuxta suam naturam; cum igitur de ratione legis æternæ sit obligare posse in foro conscientia creaturam rationalem, vnde peccatum definitur ab Augustino *dictum, factum, vel concupiscitum contra legem æternam*, id ipsum etiam erit de ratione legis humanæ, siue ciuilis, siue Ecclesiasticæ, suo modo, & iuxta suam naturam.

Dices, potestas Principum sæcularium est merè temporalis, & politica: Ergo non potest se extendere ad aliquid spirituale, nec per consequens obligare ad culpam, & in foro conscientia.

Respondeo potestatem Principum sæcularium dici temporalem, ratione obiecti, quia secundum se tota est de personis, rebus, & actionibus temporalibus, ratione tamen obligationis quam inducit, dici potest spiritualis, & in conscientia obligare: Licet enim per se primò respiciat bonum temporale Reipublicæ, & per se primò non intendat ligare con-

scientias, sub pœna damnationis æternæ, sed solum præcipere aliquid ad promouendum tale bonum, sub pœna temporali, proportionata ad consequendum suum finem; ex consequenti tamen, quia hoc præcipit, ut stat sub ordine diuinæ potestatis, & in virtute illius potentis obligare in foro conscientiæ, quantum ad culpam, & pœnam æternam, ad culpam & in foro conscientiæ obligat, si iusta sit, Vnde Apostolus ad Roman. 13 *Qui resistis potestati, Dei ordinationi resistitis; qui autem resistunt, ipsi damnationem acquirunt. Quod de damnatione etiam apud Deum, Chrysostomus, & alij interpretes ibidem intelligunt.*

Dixi si iusta sit, quia ut docet D. Thomas hic qu. 69. art. 4. leges humanæ iniustæ non obligant in foro conscientiæ, nisi fortè propter vitandum scandalum aut turbationem. *Triplex verò (inquit) leges humanæ possunt esse iniustæ, nempe vel ex fine, sicut cum aliquis præficiens leges imponit onerosas subditis, non pertinentes ad utilitatem communem, sed magis ad propriam cupiditatem, vel gloriam. Vel ex auctore, sicut cum aliquis legem fert ultra sibi commissam potestatem. Vel etiam ex forma, puta cum inæqualiter onera multitudini dispensantur, etiamsi ordinentur ad bonum commune. Et huiusmodi magis sunt violentiæ, quam leges, quia ut ait Augustinus, lex esse non videtur quæ iusta non fuerit. Quæ si ad particulares leges quis sciat applicare, inde (subdit Caietanus) multos casus scientiæ in gabellis, & granaminibus, & huiusmodi oneribus publicis, clarificabit.*

Quæ-

Quæres tertio, an leges humanæ obligare possint ad sui obseruationem, cum periculo & dispendio vitæ.

Respondeo affirmatiuè, nam quando periclitatur salus publica, nisi ei cum manifesto dispendio vitæ aliquorum suorum ciuium subueniatur, Princeps vel Respublica, potestatem habet obligandi subditos ad exponendam vitam pro salute Reipublicæ: & agendum aliquid, non obstante euidenti periculo vitæ. Sic in bello iusto milites à ducibus iubentur seruare stationem periculosam, vel facere irruptionem, cum periculo & dispendio vitæ. Sic etiam tempore pestis possunt Prælati & Magistratus præcipere vt aliqui præbyteri & Medici maneant in ciuitate, vt ei in tanta necessitate succurrant. Patio est, quia omnis perfecta communitas debet habere medium conseruandæ salutem totius, etiam cum dispendio alicuius suæ partis; cum non minus de iure naturæ sit, vt totum se conseruet, etiam cum destructione partis, quam vt pars se periculo exponat propter conseruationem totius. Vnde leges illæ quæ ciues obligant ad exponendam vitam pro salute Reipublicæ, non sunt purè humanæ, sed aliquid iuris naturalis includunt.

Quod si petas, vnde cognosci possit, an lex humana obliget cum dispendio vitæ? Respondebo breuiter id ex hac potissimum regula colligi posse. Quotiescumque id quod præcipitur lege humanâ, ita conueit ad bonum commune, vt maius bonum commune sit obseruare legem quam seruare propriam vitam, tunc lex obligat etiam cum dispendio vitæ. Si  
autem

autem sit maius bonum commune conseruare vitam propriam, quam seruare legem tunc lex humana non obligat cum vitæ dispendio. Et ratio est, quia conseruatio vitæ ciuium spectat ad bonum commune, sicut obseruatio legis: Ergo nisi obligatio legis sit maioris momenti in ordine ad bonum commune, quam conseruatio vitæ ciuium, legislator cum tanto dispendio non potest obligare ad legis obseruationem; obligaret enim irrationabiliter, cum non ordinaret minus bonum ad maius, sed e contra maius ad minus.

Ex hac regula colligitur, Carthusianum in extrema necessitate aegritudine constitutum, non solum posse licite a carnibus abstinere, sed etiam ad id teneri; quia maioris momenti est conseruatio strictioris obseruantiae ac disciplinae in toto Carthusianorum ordine, quam vita vnius Carthusiani. Similiter possunt ac debent aliorum Ordinum Religiosi, ex amore & reuerentia suæ regulæ, ita illam seruare, ut à morbo liberari nolint, si necesse sit constitutiones suæ Religionis violare, & si ex earum violatione obseruatio regulæ non parum tepesceret, & disciplinae religiosæ vigor multum imminueretur.

### §. III.

*Quinam legibus humanis subijciantur?*

Dico primò, non solum subditi, sed etiam Principes, & Legislatores, subduntur legibus suis, quantum ad vim directiuam, sed non quoad coactiuam, seu coercitiuam. Ita

Diu.

Dicitur Thomas hic quæst. 96. art. 5. ad 3.

Prima pars patet, nam caput, quantum fieri potest, debet conformari corpori & membris communitatis, aliàs deformitas maxima esset in illa, iuxta illud Augustini 3. Confess. cap. 8. *Tarpis est omnis pars suo universo non congruens*: Ergo conveniens est quod Princeps, vel Legislator, qui est caput Reipublicæ, servet leges suas, non minus quam subditi, subindeque illis subditur, quantum ad vim directivam, ex ipsa lege naturali, quæ dicat non minùs contra rationem esse caput discordare à membris, quam membra à capite. Vnde L. *Digna vox* C. de legibus sic dicitur: *Digna vox maiestate regnantis est, legibus alligatum se Principem profiteri*. Et L. *Princeps fit de legibus*: *Pareto legi quisquis legem sanxerit*. Similia habentur in iure Canonico cap. *Iustum* dist. 9. his verbis: *Iustum est Principem legibus obtemperare suis. Tunc enim iura sua ab omnibus custodienda existimat, quando & ipse illis reverentiam præbet*. Et ne videatur id consilij tantum causa dici, subditur: *Principes legibus teneri suis, nec in se posse damnare iura quæ in subiectis consistunt; iusta est enim authoritas eorum, si quod populis prohibent, sibi licere non patiantur*. Demum Ambrosius ad Valentinianum Imperatorem epist. 32. ita loquitur: *Quod cum præscripsisti alijs, præscripsisti & tibi, Leges enim Imperator fert, quas primus ipse constituit*.

Secunda pars probatur ex discrimine quod reperitur inter vim directivam, & coactivam, seu coercitivam legis. Vis enim directiva re-  
spi-



spicit actus licitos, vel illicitos, aut indifferentes; coactiua verò, seu coercitiua, poenam inductiuam ad obseruantiam legis; Sed Princeps non potest cogi vel puniri poena inductiua ad legis obseruantiam, cum nullum habeat superiorem à quo cogatur, & nemo propriè à seipso cogi possit: Ergo Princeps non subditur suis legibus, quoad vim coactiuam, seu coercitiuam, sed ab eis quantum ad obligationem poenæ subeundæ solutus est.

Dico secundò, Clerici non obligantur legibus ciuilibus. Principum sæcularium, quoad vim coactiuam, bene tamen quoad vim directiuam, & ex naturali æquitate, qua tenentur se conformare alijs membris Reipublicæ.

Prima pars est certa, cum Clerici sint exempti à iurisdictione Principum sæcularium, cap. *Decernimus* de iudicijs, cap. *Sanctæ Mariæ*, de constitutionibus, cap. *Sæculares*, de foro competenti in 6. Quam exemptionem aliqui putant esse de iure diuino, idque colligunt ex Scriptura sacra; ex nouo quidem testamento, ex illa Christi illatione Matth. 17. *Ergo liberi sunt filij*, à legibus scilicet tributorum; ex veteri autem ex Genesis 47. ubi Ioseph omnem terram Ægypti subiecit Pharaoni, *Præter terram sacerdotum*. Alij verò censent, hanc Clericorum exemptionem solùm esse de iure humano, nimirum ex prædictis Summorum Pontificum constitutionibus, & Principum sæcularium fauore; quod tamen ius humanum iuri naturali & diuino maximè consentaneum est, Cui sententiæ fauere


uere videtur Dñ. Thomas in illud ad Roman. 13. *Ideo tributa*, nam ibi loquens de obligatione soluendi tributa, sic ait; *Ab hoc debito liberi sunt Clerici ex privilegio Principum*, quod quidem equitatem naturalem habet.

Secunda pars ex eo constat quod Clerici non obstante Clericatu, sunt ciues Reipublicæ, & eius membra: Ergo ex naturali æquitate, & ratione conformitatis quam cum alijs Republicæ membris habere debent, tenentur seruare leges ciuiles Principum sæcularium, quæ non derogant Priuilegijs Clericorum, & ad pacem ac tranquillitatem Reipublicæ spectant.

Dico tertio, illi qui sunt in territorio alieno, siue transeundo, siue immorando, non tenentur seruare leges proprij territorij. Ratio est, quia iurisdictionis authoritas limitatur intra proprium principis territorium, sicut vis actiua agentium naturalium limitatur & coarctatur inter sphaeram suæ actiuitatis: Ergo sicut illa non possunt agere vltra propriam sphaeram, ita nec leges Principum obligare extra proprium illorum territorium. Vnde cap. 2. de constitutionibus in 6. dicitur prænam latam per statutum Episcopi, non incurri ab eo qui extra illius territorium non seruat tale statutum: quia (inquit) *extra territorium ius dicenti, non paretur impune*, vt habetur lege vltima ff. de iurisdictione omnium iudicum.

Dico quarto, peregrini, & aduenæ obligantur ad seruandas leges territorij per quod transeunt, Hæc conclusio sequitur ex dictis in

in præcedenti : Si enim brevis absentia sufficit ad eximendum viatores à subiectione legis proprii territorij à quo discedunt , debet quoque sufficere brevis præsentia ad subiiciendum illos legibus alieni territorij , per quod transeunt . Par enim est vt sentiat onus qui sentit commodum , vt dicitur regula 55. de regulis iuris in 6. Vnde aduenæ & peregrini transeuntes per loca in quibus festum aliquid celebratur , si sint ibi toto mane die festi , tenentur sacrum audire , non tamen ibi commorari vt audiant . Similiter tenentur quamdiu ibi sunt , abstinere ab opere feruili die festo , & cibis prohibitis in die ieiunij . Illi verò qui mane discedunt ex proprio territorio ; in quo ieiunium obligat , & nocte perueniunt ad locum vbi ieiunium non obligat possunt nocte cœnare , carnesque comedere ; cùm discedens non teneatur seruare leges sui territorij , sed possit sequi leges fauorabiles loci per quem transit . Ex quo inferes , ratum ac validum esse matrimonium clandestinum , celebratum in loco vbi Tridentinum non seruatur , ab incola loci in quo seruatur . Sed de hoc fusiùs in Tractatu de matrimonio cap. 3.



## CAPUT V.

*De aliquibus speciebus legum humanarum.*

**H**ucusque diximus de lege humana in communi, iam de quibusdam illius speciebus breuiter differendum est. Et primò de lege pœnali, secundò de lege non scripta, quæ consuetudo appellatur, tertio de lege fauorabili, seu de priuilegijs.

## §. I.

*De lege pœnali.*

Lex pœnalis dicitur omnis illa quæ præcepto vel prohibitioni pœnam expressè apponit; cuiusmodi sunt plurimæ leges Ecclesiastica & ciuiles, quarum istæ sæpe apponunt pœnas temporales mortis, exilij, verberationis &c. Illæ verò pœnas vel purè spirituales, vt censuras & irregularitates, vel mixtas, vt priuationes officij, aut beneficij, aut vocis acti-  
ux, vel passiuæ; vel denique interdum purè temporales, vt ieiunia, corporis macerationes, & similia.

Circa hanc legem triplex est difficultas & controuersia inter Theologos. Prima est, an quando legislator condendo legem pœnalem, nihil exprimit de obligatione ad culpam, lex pœnalis ad eam obliget, vel solum ad pœnam? Respondeo illam obligare non solum ad pœnam, sed etiam ad culpam, nisi legisla-  
tor

tor contrarium exprefferit: obligatio enim ad culpam consequitur legem per modum proprietatis, impedibilis tamen à legislatore. Ergo posita vera lege, qualis est poenalis, statim soquitur obligatio ad culpam; nisi legislator ferendo talem legem, declaret se non intendere obligare ad culpam.

Confirmatur: Leges humanæ quæ absque poenæ comminatione ponuntur, ad culpam obligant, ut constat ex dictis capite precedenti: Ergo & illæ quæ statuuntur cum comminatione poenæ. Probatur consequentia, quia comminatio tollit obligationem ad culpam, sed indicat illam. Nam ut ait Augustinus lib. 1. retract. cap. 9. *Omnis poena, si iusta est, peccati poena est, & supplicium nominatur.*

Dices, omnis lex, maxime poenalis, benignè interpretanda est, quando aliud non constat de mente legislatoris: Ergo quando in lege poenali legislator suam non exprimit voluntatem obligandi ad culpam, existimandum est, ipsum obligare ad solam poenam. Consequentia manifesta videtur, nam aliàs non benignè, sed valde odiosè, mentem legislatoris interpretamur.

Respondeo quod licet omnis lex, maxime poenalis, benignè interpretanda sit, hoc tamen debet fieri iuxta naturam ipsius legis, non verò extrahendo illam à suo statu connaturali; unde cum pertineat ad statum connaturalem legis, ut obliget ad culpam, nisi contrarium legislator exprimat, eam ad culpam obligare censendum est, nisi oppositum legislator exprefferit.

Secunda difficultas est, an leges poenales obligent ad poenam ante sententiam iudicis, vel solum post eius sententiam?

Respondeo illas ante sententiam iudicis obligare ad poenas priuatiuas, quales sunt excommunicatio, irregularitas, suspensio, priuatio vocis actiuæ, & passiuæ, non tamen ad poenas actiuas, quæ requirunt aliquam actionem executiuam, v.g. poena mortis, exilij, aut spoliationis bonorum.

Prima pars patet, nam leges quæ ipso facto imponunt poenam excommunicationis; suspensionis, interdicti, irregularitatis, priuationis vocis actiuæ & passiuæ, & fructuum beneficij à non recitantibus officium sortiuntur statim suum effectum, ante sententiam iudicis. Idem dicendum de lege Ecclesiastica, quæ in poenam criminis reddit aliquos inhabiles ad matrimonium ipso facto, nimirum adulteros spe futuri matrimonij adulterantes, aut mortis coniugis reos; talium enim matrimonium ante omnem sententiam irritum est.

Secunda verò pars, quæ est de poenis actiuis, seu ad sui executionem aliquam rei actionem requirentibus, videtur manifesta, tum quia lex obligans hominem ad exequendum in se poenam legis per propriam actionem, ante sententiam iudicis, nimis rigida videtur ac dura, ipsique naturæ repugnans; præsertim si poena ipso facto subeunda, grauis & acerbata sit, & aliunde non est necessaria ad bonum commune Reipublicæ, sufficit enim bono communi, si reus patiatur talem poenam, post sententiam iudicis. Tum etiam, quia exequi poenam requirentem aliquam actio-

nem

nem, per se loquendo, non ad reum, sed ad iudicem, & eius ministrum pertinet. Vnde D. Thomas 2. 2. q. 62. art. 3. sic ait: *Quantum ad culpam adhibetur remedi m per pœnam, cuius inflictio pertinet ad iudicem. Et ideo antequam sit condemnatus per iudicem, non tenetur resistere plusquam accipit, sed postquam condemnatus est, tenetur pœnam solvere.*

Tertia difficultas est, an transgressor legis pœnalis teneatur in conscientia subire pœnam legis, post iudicis sententiam.

Respondeo illum teneri in conscientia subire pœnam, quæ ad sui executionem requirit actionem, quæ commodius exercetur à reo; non verò illam, ad cuius executionem requiritur actio, quæ commodius exercetur à iudice, vel eius ministro.

Prima pars videtur manifesta, nam quando quis exilio, vel pœna pecuniaria mulctatur, tenetur egredi è regno, vel ciuitate, aut pecuniam soluere, hoc enim nihil crudelitatis, aut iniustitiæ continet. Secunda verò probatur ex eo quod sententia pœnalis, sicut & lex, benignè est interpretanda, cum sententia sit applicatio illius legis, quam benignè esse interpretandam, est communis animi conceptio, & dispositio iuris. Ergo non tenetur reus ad exequendam illam pœnam in seipso, cuius executio commodius fit à iudice, vel ministris, sed sufficit quod sit paratus ad illam sustinendam, quando infligetur ab illis. Patet consequentia nam aliàs non benignè, sed durissimè interpretaremur sententiam illam. Vnde Diuus Thomas 2. 2. quæst. 69. artic. 4.

**ad 2** Nullus ita condemnatur, quod ipse sibi inferat mortem, sed quod ipse mortem patiatur; & ideo non tenetur facere id unde mors sequatur, tenetur tamen non resistere agenti quin patiatur quod iustum est eum pati. Sicut etiam, si aliquis sit condemnatus, ut fame moriatur, non peccat, si cibum sibi occultè ministratum sumat, quia non sumere, esset seipsum occidere.

## §. II.

### De Consuetudine.

Consuetudo est ius quoddam moribus institutum, quod pro lege suscipitur, cum deficiat lex. Vnde cum lex tripliciter possit deficere, primò cum non est, secundò cum est inutilis, tertio cum dubia, vel obscura, pro illo triplici legis defectu consuetudo suscipitur. Nam primò ubi non est lex, suscipitur consuetudo legis introductiva, seu vim habens legis. Secundò venit in defectum legis inutilis, consuetudo abrogativa illius. Tertio cum lex obscura, vel dubia est, venit in eius defectum consuetudo, quæ vim habet interpretandi legem dubiam; vel obscuram. Quare Theologi docent, consuetudinem legitimè introductam, triplicem habere vim, nempe instituendi, abrogandi, & interpretandi legem; eamque posse novam instituere legem, veterem abrogare, & dubiam interpretari. Vnde cap. *Cum dilectis* de consuetudine, consuetudo dicitur *optima legum interpretres*.

Duo tamen breviter observanda sunt, Primum est, quod sicut de ratione legis est vs  
præ-



præcipiat actus bonos, ita ut consuetudo vim legis habeat, requiritur ut id de quo est sit actus bonus; unde consuetudo de re illicita aut indifferenti, vim legis non habet: Ex quo fit, nullam introduci posse consuetudinem, quæ vim obligandi habeat contra legem naturalem; cum lex naturæ id solum præcipiat quod est intrinsecè bonum, & vetet solum id quod est intrinsecè malum.

Alterum est, quod cum omnis lex procedere debeat à voluntate, & ratione Principis, ut consuetudo vim legis habeat, requiritur ut Princeps, vel alia potestas superior, ad quam pertinet condere leges, ei consentiat personaliter, vel legaliter, seu iuridicè. Dicitur autem consentire personaliter, quando per se immediatè consentit tacitè vel expressè. Legaliter verò seu iuridicè consentire censetur, quando vel ipse, vel prædecessores tulerunt aliquando legem, vi cuius talis consuetudo approbatur.

Quod verò spectat ad tempus necessarium pro iusta & legitima consuetudine, variè circumferuntur Doctorum sententiæ: Sed illis brevitatis causa prætermisissis, dicendum est, quod quando consuetudo introducit à populo; cum expresso consensu Principis, non est opus expectare tempus aliquod determinatum; quia cum consuetudo non minorem vim habeat quam lex scripta, si accedat consensus Principis, vius vocis oraculo expressus, non est dubium quin firmet illico consuetudinem, subindeque non est expectandum determinatum aliquod tempus ad eius validitatem. Si autem consuetudo introducit à populo, &

tacito seu præsumpto consensu Principis, tunc seruandum est tempus à iure determinatum, quia tunc Princeps non præsumitur consentire, nisi euoluto tempore à iure determinato, præsumitur enim velle seruare ea quæ iure communi statuta sunt. Cæterum, cum nec in iure ciuili neque in canonico, vllum certum tempus legatur determinatum pro introducenda consuetudine, hinc fit quod tempus à iure requisitum ad præscriptionem, requiri censeatur ad consuetudinem. Vnde iuxta hanc regulam consuetudo contra legem ciuilem, requirit decem annos, contra ecclesiasticam quadraginta.

### §. III.

#### *De Priuilegijs*

Priuilegium est lex à iure communi eximens & ius aliquod priuatum seu speciale & fauorabile concedens. Vel vt dicitur in capit. *Abbate*, de verb. signif. est *lex priuata speciale aliquid indulgens*. Vnde sicut de essentia legis non est quod sit scriptis exarata, ita nec ad essentiam aut valorem priuilegij scriptura necessaria est, sed potest verbo statui sicut & lex. Item sicut lex permanens est, nec expirat morte legislatoris, ita nec priuilegium. Differt tamen à lege in duobus, primò quia lex ius commune, priuilegium verò ius speciale refertur. Secundò, quia lex, quandiu est in vigore, semper obligat subditum: priuilegium verò à legis obseruatione priuilegiatum excipit.

Di-

Diuiditur autem primò in reale & personale. Reale est quod datur immediatè alicui rei, munerì, & conditioni distinctæ à persona: vt causæ piæ, templo, prædio, statui clericali, vel regulari, munerì Episcopali, conditioni pupillorum vel scholasticorum, &c. Personale est quod immediate datur personæ, ratione sui, & ex intentione vt ei prouideatur, vt si alicui concedatur vt non soluat decimas, vt sit immunis à tributis; vt absoluerè possit à reseruatìs, vel dispensare ab irregularitatibus Reale est perpetuum, & durat cum re; officio, statu, dignitate, aut conditione cui annectitur. Personale est ad tempus, extinguiturque cum persona cui conceditur, iuxta regulam septimam iuris in sexto; *Privilegium personale personam sequitur, & extinguitur cum persona.*

Diuiditur secundò in priuilegium gratiosum, remuneratiuum, & conuentionale: Gratiosum est quod datur gratis, sine ullis meritis priuilegiati, Remuneratiuum, quod datur in præmium meritorum ipsius. Conuentionale, quod datur pacto seu conditione interueniente.

Diuiditur tertio in locale, & generale. Isto licet uti ybique, illo non nisi in loco pro quo concessum est.

Diuiditur quartò in fauorabile & odiosum: fauorabile est illud quod nemini affert incommodum, vt vesci lacte vel butyro in quadragesima. Odiosum, quod licet faueat priuilegiato, alteri tamen simul nocuum vel incommodum est, vt eximi à vectigalibus aut tributis, cum onere aliorum.

## CAPUT V.

*De aliquibus speciebus legum humanarum.*

**H**ucusque diximus de lege humana in communi, iam de quibusdam illius speciebus breuiter differendum est. Et primò de lege pœnali, secundò de lege non scripta, quæ consuetudo appellatur, tertio de lege fauorabili, scilicet de priuilegijs.

## §. I.

*De lege pœnali.*

Lex pœnalis dicitur omnis illa quæ præcepto vel prohibitioni pœnam expressè apponit; cuiusmodi sunt plurimæ leges Ecclesiasticæ & ciuiles, quarum istæ sæpe apponunt pœnas temporales mortis, exilij, verberationis &c. Illæ verò pœnas vel purè spirituales, vt censuras & irregularitates, vel mixtas, vt priuationes officij aut beneficij, aut vocis actiue, vel passiuæ; vel denique interdum purè temporales, vt ieiunia, corporis macerationes, & similia.

Circa hanc legem triplex est difficultas & controuersia inter Theologos. Prima est, an quando legislator condendo legem pœnalem, nihil exprimit de obligatione ad culpam, lex pœnalis ad eam obliget, vel solum ad pœnam? Respondeo illam obligare non solum ad pœnam, sed etiam ad culpam, nisi legisla-  
tor

tor contrarium expreſſerit: obligatio enim ad culpam confequitur legem per modum proprietatis, impedibilis tamen à legiſlatore. Ergo poſita vera lege, qualis eſt pœnalis, ſtatim ſoquitur obligatio ad culpam; niſi legiſlator ferendo talem legem, declaret ſe non intendere obligare ad culpam.

Confirmatur: Leges humanæ quæ abſque pœnæ comminatione ponuntur, ad culpam obligant, ut conſtat ex dictis capite præcedenti: Ergo & illæ quæ ſtatuuntur cum comminatione pœnæ. Probatur confequentia, quia comminatio tollit obligationem ad culpam, ſed indicat illam. Nam ut ait Auguſtinus lib. 1. retract. cap. 9. *Omnis pœna, ſi iuſta eſt, peccati pœna eſt, & ſupplicium nominatur.*

Dices, omnis lex, maximè pœnalis, benignè interpretanda eſt, quando aliud non conſtat de mente legiſlatoris: Ergo quando in lege pœnali legiſlator ſuam non exprimit voluntatem obligandi ad culpam, exiſtimandum eſt, ipſum obligare ad ſolam pœnam. Confequentia manifeſta videtur, nam aliàs non benignè, ſed valdè odioſè, mentem legiſlatoris interpretamur.

Reſpondeo quod licet omnis lex, maximè penalis, benignè interpretanda ſit, hoc tamen debet fieri iuxta naturam ipſius legis, non verò extrahendo illam à ſuo ſtatu connaturali; vnde cum pertineat ad ſtatum connaturalem legis, ut obliget ad culpam, niſi contrarium legiſlator exprimat, eam ad culpam obligare cenſendum eſt, niſi oppoſitum legiſlator expreſſerit.

Secunda difficultas est, an leges pœnales obligent ad pœnam ante sententiam iudicis, vel solum post eius sententiam?

Respondeo illas ante sententiam iudicis obligare ad pœnas priuatiuas, quales sunt excommunicatio, irregularitas, suspensio, priuatio vocis actiuæ, & passiuæ, non tamen ad pœnas actiuas, quæ requirunt aliquam actionem executiuam, v.g. pœna mortis, exilij, aut spoliationis bonorum.

Prima pars patet, nam leges quæ ipso facto imponunt pœnam excommunicationis; suspensionis, interdicti, irregularitatis, priuationis vocis actiuæ & passiuæ, & fructuum beneficij à non recitantibus officium sortiuntur statim suum effectum, ante sententiam iudicis. Idem dicendum de lege Ecclesiastica, quæ in pœnam criminis reddit aliquos inhabiles ad matrimonium ipso facto, nimirum adulteros spe futuri matrimonij adulterantes, aut mortis coniugis reos; talium enim matrimonium ante omnem sententiam irritum est.

Secunda verò pars, quæ est de pœnis actiuis, seu ad sui executionem aliquam rei actionem requirentibus, videtur manifesta, tum quia lex obligans hominem ad exequendum in se pœnam legis per propriam actionem, ante sententiam iudicis, nimis rigida videtur ac dura, ipsique naturæ repugnans; præsertim si pœna ipso facto subeunda, grauis & acerbata sit, & aliunde non est necessaria ad bonum commune Reipublicæ, sufficit enim bono communi, si reus patiatur talem pœnam, post sententiam iudicis. Tum etiam, quia exequi pœnam requirentem aliquam actio-

nem

nem, per se loquendo, non ad reum, sed ad iudicem, & eius ministrum pertinet. Vnde D. Thomas 2. 2. q. 62. art. 3. sic ait: *Quantum ad culpam adhibetur remedium per penam, cuius inflictio pertinet ad iudicem. Et ideo antequam sit condemnatus per iudicem, non tenetur resistere plusquam accipit, sed postquam condemnatus est, tenetur penam soluere.*

Tertia difficultas est, an transgressor legis poenalis teneatur in conscientia subire poenam legis, post iudicis sententiam.

Respondeo illum teneri in conscientia subire poenam, quæ ad sui executionem requirit actionem, quæ commodius exercetur à reo; non verò illam, ad cuius executionem requiritur actio, quæ commodius exercetur à iudice, vel eius ministro.

Prima pars videtur manifesta, nam quando quis exilio, vel poena pecuniaria mulctatur, tenetur egredi è regno, vel ciuitate, aut pecuniam soluere, hoc enim nihil crudelitatis, aut iniustitiæ continet. Secunda verò probatur ex eo quod sententia poenalis, sicut & lex, benignè est interpretanda, cum sententia sit applicatio illius legis, quam benignè esse interpretandam, est communis animi conceptio, & dispositio iuris. Ergo non tenetur reus ad exequendam illam poenam in seipso, cuius executio commodius fit à iudice, vel ministris, sed sufficit quod sit paratus ad illam sustinendam, quando infligitur ab illis. Patet consequentia nam aliàs non benignè, sed durissimè interpretaremur sententiam illam. Vnde Diuus Thomas 2. 2. quæst. 69. artic. 4.

**ad 2** Nullus ita condemnatur, quod ipse sibi inferat mortem, sed quod ipse mortem patiatur; & ideo non tenetur facere id unde mors sequatur, tenetur tamen non resistere agenti quin patiatur quod iustum est eum pati. Sicut etiam, si aliquis sit condemnatus, ut fame moriatur, non peccat, si cibum sibi occultè ministratum sumat, quia non sumere, esset seipsum occidere.

## §. II.

### De Consuetudine.

Consuetudo est ius quoddam moribus institutum, quod pro lege suscipitur, cum deficiat lex. Vnde cum lex tripliciter possit deficere, primò cum non est, secundò cum est inutilis, tertio cum dubia, vel obscura, pro illo triplici legis defectu consuetudo suscipitur. Nam primò ubi non est lex, suscipitur consuetudo legis introductiva, seu vim habens legis. Secundò venit in defectum legis inutilis, consuetudo abrogativa illius. Tertio cum lex obscura, vel dubia est, venit in eius defectum consuetudo, quæ vim habet interpretandi legem dubiam; vel obscuram. Quare Theologi docent, consuetudinem legitimè introductam, triplicem habere vim, nempe instituendi, abrogandi, & interpretandi legem: eamque posse novam instituere legem, veterem abrogare, & dubiam interpretari. Vnde cap. *Cum dilectis* de consuetudine, consuetudo dicitur *optima legum interpretres*.

Duo tamen breviter observanda sunt, Primum est, quod sicut de ratione legis est ve-



præcipiat actus bonos, ita ut consuetudo vim legis habeat, requiritur ut id de quo est sit actus bonus; unde consuetudo de re illicita aut indifferenti, vim legis non habet: Ex quo fit, nullam introduci posse consuetudinem, quæ vim obligandi habeat contra legem naturalem; cum lex naturæ id solum præcipiat quod est intrinsecè bonum, & vetet solum id quod est intrinsecè malum.

Alterum est, quod cum omnis lex procedere debeat à voluntate, & ratione Principis, ut consuetudo vim legis habeat, requiritur ut Princeps, vel alia potestas superior, ad quam pertinet condere leges, ei consentiat personaliter, vel legaliter, seu iuridicè. Dicitur autem consentire personaliter, quando per se immediatè consentit tacitè vel expressè. Legaliter verò seu iuridicè consentire censetur, quando vel ipse, vel prædecessores tulerunt aliquando legem, vi cuius talis consuetudo approbatur.

Quod verò spectat ad tempus necessarium pro iusta & legitima consuetudine, variè circumferuntur Doctorum sententiæ: Sed illis breuitatis causa prætermittis, dicendum est, quod quando consuetudo introducitur à populo; cum expresso consensu Principis, non est opus expectare tempus aliquod determinatum; quia cum consuetudo non minorem vim habeat quam lex scripta, si accedat consensus Principis, viux vocis oraculo expressus, non est dubium quin firmet illico consuetudinem, subindeque non est expectandum determinatum aliquod tempus ad eius validitatem. Si autem consuetudo introducitur à populo, &

tacito seu præsumpto consensu Principis, tunc seruandum est tempus à iure determinatum, quia tunc Princeps non præsumitur consentire, nisi euoluto tempore à iure determinato, præsumitur enim velle seruare ea quæ iure communi statuta sunt. Cæterum, cum nec in iure ciuili neque in canonico, vllum certum tempus legatur determinatum pro introducenda consuetudine, hinc fit quod tempus à iure requisitum ad præscriptionem, requiri censetur ad consuetudinem. Vnde iuxta hanc regulam consuetudo contra legem ciuilem, requirit decem annos, contra ecclesiasticam quadraginta.

### §. III.

#### *De Priuilegijs*

Priuilegium est lex à iure communi eximens & ius aliquod priuatum seu speciale & fauorabile concedens. Vel vt dicitur in capit. *Abbate*, de verb. signif. est *lex priuata speciale aliquid indulgens*. Vnde sicut de essentia legis non est quod sit scriptis exarata, ita nec ad essentiam aut valorem priuilegij scriptura necessaria est, sed potest verbo statui sicut & lex. Item sicut lex permanens est, nec expirat morte legislatoris, ita nec priuilegium. Differt tamen à lege in duobus, primò quia lex ius commune, priuilegium verò ius speciale respicit. Secundò, quia lex, quandiu est in vigore, semper obligat subditum: priuilegium verò à legis obseruatione priuilegiatum excipit.

Di-

Diuiditur autem primò in reale & personale. Reale est quod datur immediatè alicui rei, munerì, & conditioni distinctæ à persona: vt causæ piæ, templo, prædio, statui clericali, vel regulari, munerì Episcopali, conditioni pupillorum vel scholasticorum, &c. Personale est quod immediate datur personæ, ratione sui, & ex intentione vt ei prouideatur, vt si alicui concedatur vt non soluat decimas, vt sit immunis à tributis; vt absoluerè possit à reseruatìs, vel dispensare ab irregularitatibus Reale est perpetuum, & durat cum re; officio, statu, dignitate, aut conditione cui annectitur. Personale est ad tempus, extinguiturque cum persona cui conceditur, iuxta regulam septimam iuris in sexto; *Priuilegium personale personam sequitur, & extinguitur cum persona.*

Diuiditur secundò in priuilegium gratiosum, remuneratiuum, & conuentionale: Gratiosum est quod datur gratis, sine ullis meritis priuilegiati, Remuneratiuum, quod datur in præmium meritorum ipsius. Conuentionale, quod datur pacto seu conditione interueniente.

Diuiditur tertio in locale, & generale. Illo licet uti vbique, illo non nisi in loco pro quo concessum est.

Diuiditur quartò in fauorabile & odiosum: fauorabile est illud quod nemini affert incommodum, vt vesci lacte vel butyro in quadragesima. Odiosum, quod licet faueat priuilegiato, alteri tamen sinul nocuum vel incommodum est, vt eximi à vectigalibus aut tributis, cum onere aliorum.

Diuiditur quintò in affirmatiuum, quo facultas aliquid faciendi conceditur, & negatiuum, quod dat facultatem ad aliquid omittendum. Plures sunt aliæ diuisiones priuilegij, pro quarum noticia recurrendum est ad eos qui de priuilegijs ex professo, & fusiùs tractauerunt.


Quæres primò, an vt profint priuilegia debeant priuilegiato esse nota, vel sufficiat quòd ea à Principe data & subscripta fuerint, & in curia authenticè expedita?

Respondeo quòd si ea priuilegia non possint habere effectum vel vsum sine periculo peccati, antequam innotescant, non valere sine notitia præhabita; quia probabilius est, Principem non velle dare occasionem illius prauus vsus, nec velle dispensare nisi propter vsum honestum. Vnde dispensatio contrahendi matrimonium cum consanguinea, debet partibus innotescere, vt validè contrahat, nec sufficit dispensationem, in curia Romana authenticè expeditam, & subscriptam seu bullatam esse, si adhuc partes id ignoret. Priuilegia verò quæ antequam innotescant possunt habere effectum, sine periculo peccati, effectum habent ante vllam notitiam à priuilegiario habitam, ab ipsa die expeditionis, & acceptationis illorum per procuratorem; quia cùm procurator faciat vnum cum ipso priuilegiario, vt morale instrumentum cum principali agente, quidquid agit procurator nomine priuilegiarij, priuilegiarius id agere censetur.

Quæres secundò, an cessante causa priuilegij, ipsum priuilegium cesset?

Re-

Respondeo affirmatiuè : Sic priuilegium non soluendi decimas alicui Ecclesiæ, quia habet aliunde vnde ministri sustententur, cessat quando Ecclesia desinit habere vnde illi sustententur. Sic etiam cessat priuilegium indultum Canonicis, vt absentes recipiant fructus præbendarum suarum, in gratiam studiorum, quando illi studijs incumbere desinunt.



## CAPUT VI.

*De interpretatione legum humanarum  
per epijkiam.*


**L**icet interdum agere contra verba legis per epijkiam, siuè benignam & prudentem eius interpretationem, quando scilicet obseruatio litteralis esset communi bono & salutis perniciofa, periculumque non patitur, vt ad superiorem recurri possit: tunc enim ipsa necessitas dispensationem habet annexam, quia necessitas non subditur legi. Exempli gratia. Lex generalis est, ne aperiantur noctu portæ ciuitatis: sed non obligat in eo casu quo noctu aduenirent copix auxillares; vrbis defensionis necessaria, essetque periculum ne si mox in urbem non admitterentur, interficerentur ab hostibus urbem obsidentibus. Licet etiam interpretari legem, quando eius obseruatio litteralis vergit in damnum notabile aliquius; v.g. lex generalis est depositum esse redigendum; æqua tamen & rationabilis interpre-

tatio est ; non debere reddi in eo casu quo noceret repetenti, aut alteri innoxio, vt si furiosus enssem suum repetat ad seipsum occidendum, vel alium, sine iusta causa. Item licitum est verba legis interpretari in eo casu, in quo nimis dura esset ac molesta eius observatio. Dauid enim 1. Regum 21. iudicauit legem prohibentem alijs quam Sacerdotibus edere panem propositionis, non obligare in ea necessitate (quamuis non extrema) in qua erat ipse cum suis constitutus. Similiter Apostoli Matth. 12. interpretati sunt legem Sabbathi non obligare ad non vellendas spicas, in simili necessitate edendi. Quod sapienter factum esse dubitari non potest, cum vtro umque factum Christus loco citato laudauerit.

Si vero quæras, an in dubijs liceat vtī episkia, & mentem legislatoris interpretari?

Respondeo id non licere, manente dubitatione. Nam vt ait D. Thomas hic q. 96. art. 6. ad 3. *Si dubium sit, debet vel secundum verba legis agere, vel superiorem consilium.* Et quodl. 8. art. 13. *Si quis in quandam dubitationem incidat contrarietate opinionum, & manente dubitatione plures præbendas habet, periculo se committit, & sic procul dubio peccat.* Nec obstat quod idem S. Doctor 2.2. quæst. 120. art. 1. ad 3. oppositum docere videatur, his verbis: *Dicendum quod interpretatio habet locum in dubijs, &c.* Hoc enim non debet intelligi de dubijs, stante iudicio dubio, sed quando dubietas deponitur & tollitur per rationem aliquam quæ verior aut probabilior iudicatur; tale enim iudicium sufficit ad  
pru.

prudenter operandum , quando necessitas agendi instat , & non potest regula certior haberi . Alioquin enim cū in rebus moralibus , & in casibus particularibus , sapissimè dubia occurrant , neque pateat recursus ad superiorem , qui legem interpretetur , intolerabile onus esset , & excedens humanam conditionem , si non possemus in huiusmodi casibus sequi sententiam , quæ nobis verior , & probabilior apparet , quamvis fortè à veritate deuiet . De quo fusiùs in tractatu de actibus humanis ,



## C A P V T VII.

### *De dispensatione à legibus humanis .*

**D**ispensatio est iuris relaxatio , vnde differt a legis interpretatione , in eo quod hæc declarat tantum legem non habere vim obligandi in aliquo casu vel persona particulari , illa , adhuc vigente legis obligatione , subditum ab ea eximit . Quod fit vt legem interpretari non sit tantum superioris , sed etiam subditi , qui per episcopiam potest in casu particulari declarare legem non obligare : contra verò in lege dispensare non potest nisi superior , cū sit actus iurisdictionis , qui superioritatem requirit in dispensante , & subiectionem in eo cum quo dispensatur .

Licet in legem diuinam non possit cadere dispensatio propriè & strictè sumpta , quia Deus omnia singularia contingentia præui-

det, nec in legem naturalem, cum illa nihil aliud sit, quam impressio legis diuinæ & æternæ facta in mentibus nostris; bene tamen in legem humanam, quia nimirum legislator humanus, quantumcumque prudens, non potuit singulos casus emergentes & contingentes præuidere, iuxta illud Sapient. 9. *Cogitationes mortalium timide, & incertæ prouidentia nostra*. Addo quod sicut ad bonum commune conducit eximere aliquas personas a lege communi, per speciale priuilegium; ita ad bonum commune promouendum conuenit cum aliquibus personis in eadem lege dispensare, cum non minus per priuilegium, quam per dispensationem, fiat à communi lege relaxatio.

Queres primò, an liceat superiori subditum sine iusta causa à lege humana dispensare? Respondeo negatiuè cum S. Thoma hic quæ. 97. art. 4. ubi docet quod superior sine causa & pro voluntate dispensans cum inferiori, peccat contra fidelitatem erga Rempublicam, quæ ei potestatem legislatiuam, in qua includitur dispensatiua, commisit, ut illa uti posset in eius bonum & commodum, non verò in eius destructionem & nocumentum. Agit enim contra prudentiam, eximendo à lege communi eum qui non est eximendus. Item peccat contra iustitiam, quia eximere ab onere communem qui non est eximendus, est vitium acceptionis personarum, oppositum iustitiæ distributiue. Vnde Bernardus lib. 3. de considerat. cap. 4. *Vbi necessitas riget excusabilis dispensatio. Vbi utilitas prouocat, dispensatio laudabilis est. Cum nihil horum est,*




*est, non planè fidelis dispensatio, sed crudelis dispensatio est.* Non peccat tamen inferior vtendo dispensatione concessa à superiori sine legitima causa; quia nullus peccat vtendo iure suo: At sic dispensatus vtitur iure suo, vtendo indulgentia dispensationis sibi concessæ; Ergo non peccat.

Nec valet si dicas cum P. Martinono, quod licet vtens tali dispensatione, non peccet contra legem humanam, quia definit ipsum obligare, peccat tamen contra ius naturale, quia turpis est pars quæ toti non consentit. Non valet, inquam, quia licet turpis sit pars quæ à toto sine causa discordat, non tamen quæ discordat à toto cum causa, At ille qui vtitur tali dispensatione, non discordat à toto sine causa; nam ad non seruandum legem illam in qua est dispensatus, habet causam & titulum legitimum, scilicet beneficium dispensationis: Ergo nec contra legem humanam, nec contra ius naturale peccat.

Obseruandum tamen est, dispensationem factam à Summo Pontifice in votis, vel in alijs quæ sunt de iure diuino, aut naturali, sine legitima causa, inualidam esse, subindeque sic dispensatum, non posse tali dispensatione vti cum conscientia; quia Summus Pontifex non accepit à Christo potestatem dispensandi in iure diuino, aut naturali, sine rationabili causa; vt rectè obseruant Caietanus in summa 5. verbo *Dispensatio*, Syluester verbo *Votum* 4. quæst. 3. & Soto de iustitia & iure quæst. 7. art. 3. ad 3. Quantum verò ad ea quæ spectant ad ius humanum & Ecclesiasticum, potest Summus Pontifex, ex plenitudine suæ

potestatis, valide in illis dispensare, non tamen licet, si nulla iusta causa talis dispensationis existat. Vnde Bernardus lib. 5. de consideranda ad Eugenium Papam hac scribit: *faciendo probatis vos habere plenitudinem potestatis, sed iustitiæ fortè non ita. Hoc facitis, quia potestis, sed utrum, & debeatis, quæstio est.*



## C A P V T VIII.

### *De abrogatione legum humanarum.*

**A** Brogatio differt ab irritatione, derogatione, correctione, & cessatione legis. Irritare enim legem est impedire ne illa obligandi robur habeat. Abrogare est postquam vim obligandi lex obtinuit, illam in uniuersum tollere: Derogare est illam non in totum sed in partem tollere. Corrigere legem est illam moderari, addendo, vel demendo aliquid. Deinum lex cessare dicitur, quando vel finitur tempus, pro qua illa ad obligandum posita fuit, vel cessat causa propter quam lata fuerat.

Legislator potest abrogare legem à se latâ, eadem potestate qua illam condidit. Idemque possunt illius successores, æqualem potestatem habentes, & à fortiori superiores. At inferiores non possunt abrogare legem superiorum, cum inferior nullum ius aut potestatem habeat in superiorem, eiusque constitutiones legales.

Licet legislator peccet abrogando leges absque vlla causa & vtilitate, abrogatio tamen sic facta, valida est, nec tenetur amplius subditi legem sic abrogatam seruare, quia lex essentialiter constituitur voluntate, & imperio Principis, vnde eo, ob quamcumque tandem rationem sublato, cessat lex, subindeque obligatio eius; nam vbi lex non est, nec legis obligatio esse potest.

Tribus modis lex antea acceptata abrogari potest: primò per expressam reuocationem Principis: secundò per constitutionem nouæ legis, priori repugnantis: tertio per contrariam consuetudinem; sicut enim consuetudo habet vim instituendi legem, ita & eam abrogandi, vt supra cap. 6. §. 2. dicebamus.

Iustæ verò causæ abrogationis legis humanæ sunt primò, si eius observatio reddatur nociua. Secundò, si eius observantia reddatur incompensabilis cum lege naturali, vel diuina. Tertio si ratione subiecti, vel alicuius circumstantiæ, lex fiat observata moraliter impossibilis. Quarto, si legum multitudo sit magna, expediatq; multas abrogari, & subditorum libertatem non adeò restringi circa res indifferentes.


Quæres, anquando cessat tota & integratio propter quam lex lata fuit, eo ipso cesset legis obligatio.

Respondeo affirmatiuè contra Suarez lib. 6. de legibus cap. 9. vbi licet fateatur, quod quando leges præcipiunt actus de se indifferentes, vt ferre aut non ferre arma, exportare triticum, & similia, cessent, deficiente fine ad quod ad quem leges illæ ordinantur, contin-

tendit tamen, quod quando lex præcipit actum de se bonum, non cessat, deficiente fine extrinseco quem legislator intendit; quia (inquit) bonitas intrinseca qua pollet, est finis proximus & intrinsecus legis. Opposita tamen sententia videtur probabilior, quia nimirum lex non obligat, nisi iuxta voluntatem legislatoris à quo fertur, neque continuat obligationem, nisi perseverante moraliter eadem voluntate: Atqui cessante tota & integra ratione propter quam legem tulit, non perseverat moraliter voluntas obligandi; Ergo cessante tota illa ratione, lex non amplius obligat. Maior patet, Minor probatur. Legislator non habuit voluntatem obligandi, nisi dependenter ab illa ratione, & propter illam, siue actus alioquin habeat intrinsecam bonitatem, siue non: At cessante ratione motiva, vel causa finali propter quam aliquid volumus, desinimus illud velle, cum impossibile sit stare actum voluntatis, sublato eius obiecto formali: Ergo cessante tota & integra ratione propter quam legislator legem tulit, & voluit eam obligare, cessat quoque voluntas obligandi.

Confirmatur: Si lex præcipiat ieiunium semel in hebdomada, ad Deum placandum; propter aliquam necessitatem publicam, cessante publica necessitate, cessat obligatio ieiunij, quamvis citra illam necessitatem, ieiunium sit actus virtutis, habens bonitatem & honestatem intrinsecam temperantiæ: Ergo quamvis lex præcipiat actum intrinsecè bonum, si tamen cesset causa adæquata legis, seu tota ratio motiva propter quam fuit lata: cessat eius obligatio.

Dixi cessante *causa adæquata*, quia si lex lata fuerit ob plures causas, cessante vna, dummodo non cessent aliæ propter quas lata est, non cessat obligatio legis, Sicut quia lex baptismi lata est non solum ad tollendum originale, sed etiam ad consignandum hominem Christianæ Religioni, eumque à cæteris sectis distinguendum, & reddendum idoneum & capace ad reliqua Sacramenta suscipienda; tametsi prima causa cessaret, & peccatum originale per sanctificationem in utero matris esset sublatum, nihilominus adhuc lex baptismi, propter alias causas propter quas lata est, obligaret.



## C A P V T IX.

*De lege diuina veteri.*

## §. I.

*Premittuntur quæ de lege veteri apud omnes sunt certa.*

**L**egem veterem esse verè diuinam; & non hominum, sed Dei ipsius auctoritate immediate latam, de fide certum est, ac definitum in Tridentino sess. 4. decreto de Canonicis scripturis, vbi sic dicitur: *Omnes libros tam veteris quam noui testamenti, cum vtriusque vnus Deus sit author, Ecclesia Catholica, pari pietate, affectu, ac reuerentia, suscipit & veneratur.* Colligitur etiam aperte ex Scriptura,

uap

nam Christus Matth. 15. loquens de lege Moſaica, appellat eam *mandatum Dei*, cum ait ; *Irritum feciſtis mandatum Dei, propter traditiones veſtras*. Et Apoſtolus ad Roman. 1. & Hebræ. 1. affirmat Patrem Chriſti fuiſſe authorem veteris teſtamenti. Ratio etiam ſuffragatur, nam vt diſcurrit D. Thomas hic q. 98. ar. 2. Eiufdem eſt proponere fidem, & diſponere media ad finem : Sed lex Euangelica eſt finis legis Moſaicæ, iuxta illud Apoſtoli ad Rom. 10. *Finis legis Chriſtus*: Ergo idem Deus qui eſt author legis Moſaicæ.

Conſtat etiam ex Scriptura, legem veterem fuiſſe à Deo traditam Moyſi per Angelos, in monte Sina, & ab eodem promulgatam. Nam S. Stephanus Act. 7. de Moyſe ſic ait : *Hic eſt qui fuit in Eccleſia in ſolitudine cum Angelo, qui loquebatur ei in monte Sina, & cum Patribus noſtris, qui accepit verba vitæ dare nobis*. Non deeſt etiam ratio ſeu congruentia ad id ſuadendum, nam vt ait Diu. Thomas quæſt. cit. art. 2. lex vetus erat imperfecta, & quaſi diſpoſitio quædam ad legem nouam: Ergo conueniens fuit vt noua daretur à Chriſto Domino; vetus autem à miniſtris. Sic enim fit in artibus ordinatis, vt ſupremus artifex per ſuos miniſtros diſponat ea quæ neceſſaria ſunt ad opus, ipſe verò vltimam perfectionem adhibeat.

Tertiò certum eſt, legem veterem fuiſſe bonam & ſanctam, vtpotè à Deo traditam: à quo nihil malum vel iniquū prodire poteſt. Vnde Apoſtolus ad Roman. 7 *Lex quidem ſancta & mandatum ſanctum, & iuſtum, & bonum*. Vbi mandatum legis Moſaicæ dicitur ſanctum, pro-

propter præcepta cæremonialia, iustum, propter iudicialia; bonum, propter moralia, ut obseruat D. Th. hic q. 99. art. 4.

Dices: præcepta legis Mosaicæ Ezechie l. 20. dicuntur *non bona*. Et Apostolus 2. ad Corinth. 3. ait quod *littera occidit, spiritus autem uiuificat*, ubi nomine litteræ, veterem legem intelligit. Et ad Hebræos 8. dicit vetus testamentum culpa non vacasse. Demum lex vetus, permittebat odium inimicorum, vsuram, pluralitatem vxorum, libellum repudiij, quæ mala sunt, & à recta ratione aliena: Ergo non erat bona & sancta.

Respondeo quod quando præcepta veteris legis dicuntur *non bona*, hoc debet intelligi de præceptis cæremonialibus, quæ appellantur non bona, idest non perfecta, quia gratiam non conferebant, per quam homines sanctificarentur & à peccato mundarentur. Ita S. Th. hic quæst. 98. art. 1. ad 1. Similiter lex vetus ab Apostolo occidere dicitur, eò quod spiritus vitam, idest gratiam, vi sua largiri non posset, & concupiscentiam prohibendo augetet, ut explicat Augustinus de spiritu & littera cap. 4. Cum verò idem Paulus ait vetus testamentum culpa non vacasse, culpam non sumit pro peccato, sed pro imperfectione, defectu, & infirmitate, & solum significare vult ipsum imperfectum fuisse, & habuisse aliquem defectum, eò quod gratiam non conferret, ad perfectum non adduceret, & ad æternam salutem immediatè suos obseruatores non eueheret.

Ad illud quod additur de odio inimicorum, dicendum est, illud non fuisse in veteri  
ege

lege permissum, cum Leuitici 19. dicatur: *Non quæres ultionem, nec memor eris iniuriæ ceterorum tuorum*. Vnde cum Matt. 5. dicitur: *Audistis quia dictum est antiquis, diliges proximum tuum, & odio habebis inimicum tuum*: non significatur (vt aliqui existimant) odium inimicorum fuisse aliquando in antiqua lege præceptum, aut permissum, sed solum fuisse deductum à Iudæis, seu à quibusdam Rabinis, odio habendos esse vniuersaliter inimicos, ex eo quod Deus illis præceperat, vt amicos diligerent, & Gentes quasdam tanquam inimicas persequerentur & perderent. Vnde idem est ac si diceretur: *Audistis quia dictum est antiquis, diliges proximum tuum* ( & per malam consequentiam Rabinorum & Phariseorum deductum ) *& odio habebis inimicum tuum*: *Ego autem dico vobis, diligite inimicos vestros*.

Ad id quod subditur de vsura, respondet D. Thomas 2. 2. qu. 78. art. 1. ad 2. vsuram erga alienigenas non fuisse approbatam aut permissam in veteri lege, sed tantum impune toleratam pro foro externo, & non pro interno; quemadmodum in Republica minora mala, ad vitanda maiora, interdum impune à Principibus & Magistratibus tolerantur.

Demum ad id quod ultimo loco de pluralitate vxorum, & libello repudij obijcitur, dicendum est, Deum dispensasse cum Iudæis, vt plures haberent vxores, & per libellum repudij. possent vxores dimittere, & alias ducere. De quo fusè in Tractatu de matrimonio c. 1. & 4.

Quartò certum est, legem Mosaicam quamuis



uis bonam & sanctam, fuisse imperfectam, comparatiue ad legem Euangelicam. Nam ut discurret S. Thomas supra quaest. 91. art. 5. Attenditur perfectio & imperfectio legis secundum tria quae ad legem pertinent. Primum enim ad legem pertinet, ut ordinetur ad bonum commune sicut ad finem. Quod quidem potest esse duplex scilicet bonum sensibile & terrenum, & ad tale bonum ordinabatur directe lex vetus, unde statim Exodi 3. in principio legis inuitatur populus ad regnum terrenum Chanaanorum. Et iterum bonum intelligibile & caeleste, & ad hoc ordinat lex noua, unde statim Christus ad regnum caelorum in suae praedicationis principio inuitauit, dicens: Penitentiam agite, appropinquauit enim regnum caelorum Matth. 4. Et ideo Augustinus dicit 4. contra Faustum, quod temporalium rerum promissiones in testamento veteri continentur, & ideo vetus appellatur, sed aeternae vitae promissio ad nouum pertinet testamentum. Secundo ad legem pertinet dirigere humanos actus secundum ordinem iustitiae, in quo etiam superabundat lex noua legi veteri, interiores actus animi ordinando, secundum illud Matth. 5. Nisi abundauerit iustitia uestra plusquam Scribarum & Phariseorum, non intrabit in regnum caelorum, & ideo dicitur quod lex vetus cohibet manum, lex noua animum. Tercio ad legem pertinet inducere homines ad obseruantias mandatorum, & hoc quidem lex vetus faciebat timore panarum. Lex autem noua facit hoc per amorem qui in cordibus nostris infunditur per gratiam Christi, quae in lege noua confertur, sed in lege veteri figura-

batur, & ideo dicit Augustinus contra Adaman-  
nium Manichæi Discipulum, quod brevis  
differentia est legis, & Euangelij, timor &  
amor.

## §. II.

### *De præceptis legis veteris.*

Triplicia fuerunt præcepta legis Mosaicæ;  
moralia, cæremonialia, & iudicialia. Finis  
enim illius erat dirigere populum Iudaicum,  
& conuenienter ordinare, tum in ijs quæ spe-  
ctant ad rectitudinē naturalem rationis huma-  
næ: tum etiam in ijs quæ ad cultum diui-  
num, & ad iustam politiam pertinent. Ad pri-  
mum data erant præcepta moralia; ad secun-  
dum, cæremonialia; ad tertium, iudicialia. Et  
per hæc tria simul sumpta homo conuenien-  
ter ordinabatur circa seipsum, circa Deum, &  
circa proximum; ac per ea, si bene obseruaren-  
tur, Respublica Iudæorum in felici & flo-  
renti statu conseruanda erat, vt Deus illis  
promiserat Deuter. 28.

Præcepta moralia ( vt notat S. Thomas hic  
3, quæst. 100. art. 11. ) sunt in triplici differen-  
tia: nam quædam ( inquit ) sunt communis-  
sima, & adeò manifesta, quod sunt quasi  
fines præceptorum; vnde in eis nullus po-  
test errare secundum iudicium rationis:  
Quædam verò sunt determinata, quorum  
rationem statim quilibet etiam popularis  
potest de facili videre; & tamen quia in  
paucioribus circa huiusmodi contingit iu-  
diciū humanum perueri, huiusmodi e-  
ditio.

ditione indigent & hæc sunt præcepta Decalogi: Quædam verò sunt, quorum ratio non est adeò cuilibet manifesta, sed solum sapientibus. Et ista sunt præcepta moralia superaddita Decalogo, tradita à Deo populo per Moysen, & Aaron. Sed quia ea quæ sunt manifesta, sunt principia cognoscendi ea quæ non sunt manifesta; alia præcepta moralia superaddita Decalogo, reducuntur ad præcepta Decalogi per modum cuiusdam additionis ad ipsa: nam in primo præcepto Decalogi prohibetur cultus alienòrum Deorùm, cui superadduntur alia præcepta prohibitiua eorùm quæ ordinantur in cultum idolorum; sicut habetur Deuteron. 18. *Non inueniatur in te qui lustret filium suum aut filiam suam, ducens per ignem, nec sit maleficus, neque incantator, nec Pythones consulat, neque Divinos, nec quærat à mortuis veritatem.* Secundum autem præceptum prohibet perjurium: superadditur autem ei prohibitio blasphemix. Ieuit. 14. & prohibitio falsæ doctrinæ, Deuteron. 13. Tertiò verò præcepto superadduntur omnia ceremonialia. Quarto autem præcepto de honore parentum superadditur præceptum de honorificatione senum, secundum illud Ieuit. 19. *Coram cano capite consurge, & honora personam senis;* & vniuersaliter omnia præcepta inducentia ad reuerentiam exhibendam maioribus, vel ad beneficia exhibenda, vel æqualibus, vel minoribus. Quinto autem præcepto, quod est de prohibitione homicidij, additur prohibitio odij & cuiuslibet

„bet molitionis contra proximum; sicut il-  
 „lud Leuit. 19. *Non stabis contra sanguinem*  
 „*proximi tui*; & etiam prohibitio odij fra-  
 „tris, secundum illud, *Ne oderis fratrem*  
 „*tuum in corde tuo*. Præcepto autem sexto,  
 „quod est de prohibitione adulterij, super-  
 „additur præceptum de prohibitione mere-  
 „tricij, secundum illud Deuteron. 24 *Non*  
 „*erit meretrix de filiabus Israel, neque forni-*  
 „*cator de filijs Israel*, & iterum prohibitio  
 „vitij contra naturam, secundum illud Le-  
 „uit. 18. *Cum masculo non commisceberis, cum*  
 „*omni pecore non coibis*, Septimo autem de  
 „prohibitione furti adiungitur præceptum  
 „de prohibitione usuræ, secundum illud  
 „Deuter. 18. *Non fœneraberis fratri tuo ad*  
 „*usuram*; & prohibitio fraudis, secundum  
 „illud Deut. 15. *Non habebis in sacculo di-*  
 „*uersa pondera*; & vniuersaliter omnia, quæ  
 „ad prohibitionem calumniæ & rapinæ per-  
 „tinent. Octauo verò præcepto, quod est  
 „de prohibitione falsi testimonij, additur  
 „prohibitio falsi iudicij, secundum illud E-  
 „xodi 23. *Nec in iudicio plurimum acquie-*  
 „*sce sententiæ, ut a veritate deuias*? & prohi-  
 „bitio mendaciij, sicut ibi subditur, *men-*  
 „*dacium fugies* & prohibitio detractionis, se-  
 „cundum illud Leuit. 19. *Non eris crimina-*  
 „*tor & susurro in populis*. Alijs autem do-  
 „cumentis (puta præcepto de non concupi-  
 „scenda vxore alterius ad coeundum, & præ-  
 „cepto de non concupiscenda re qualibet vel  
 „qualicunquæ possessione alterius ad possi-  
 „dendum illegitimè præter consensum eius  
 „& voluntatem) nulla alia adiunguntur;  
 „quia

3, quia per ea vniuerſaliter omnis mala concupiscentia prohibetur. Hæc Sanctus Thomas, quibus differentiam præceptorum moralium veteris legis luculenter exponit.

Quoad præcepta verò cæremonialia, Genebrardus, sub finem Chronologiæ, ex Burgensi, & alijs Doctoribus, afferit ea in antiqua lege vsque ad numerum sexcentorum tredecim ascendisse; ex quibus erant ducenta quadraginta octo affirmatiua, tot scilicet quot sunt in homine membra & ossa, & trecenta sexaginta quinque negatiua, quot in anno dies numerari solent. Omnia tamen ad quatuor genera reuocari possunt. Alia enim erant de sacrificijs, quorum tria erant genera in antiqua lege, nempe holocaustum, hostia pacifica, & hostia pro peccato, quorum differentiam explicabimus in Tractatu de virtutibus cardinalibus, cum de religione agemus. Alia de Sacramentis, quæ varia extiterunt in antiqua lege, tam pro laicis, quam pro Sacerdotibus, & ministris templi; vt circumcisio, Agnus Paschalis, consecratio Sacerdotum, eius panis propositionum, ablutio manuum & pedum, rasio pilorum, & similia, de quibus agit S. Thomas hic quæst. 102. art. 5. Item in veteri lege quædam erant præcepta cæremonialia de rebus sacris, quæ ad diuinum cultum tanquam instrumenta & adminicula ordinabatur, inter quas istæ erant præcipuæ, Tabernaculum, Arca fœderis, continens duas legis tabulas, virgam Aaronis, quæ fronduerat, & urnam auream cum manna; propitiatorium, quod erat ad instar cuiusdam mensæ ex auro purissimo,

mensa manum propositionis , altare thymiamatis seu incensi , in quo intendebatur thus , & alia aromata suauissimi odoris ; altare holocausti , in quo omnes victimæ offerebantur ; & demum varia vasorum genera , nempe acetabula , phialæ , thuribula , cyathi , lebetes , hydriæ , mortariola , lucerna &c. de quibus accuratè differunt Iosephus lib. 3. antiquitatum , & Rebera lib. 3. de Templo Salomonis. Denique in veteri lege aliqua erant præcepta cæremonialia de aliquibus obseruantijs legalibus , quibus ex decreto Dei populus Iudæorum discernebatur ab alijs gentibus , inter quæ præcipuæ erant , abstinentia à suffocato , sanguine , pinguedine , carne suilla ; ab animalibus , quæ non haberet ungulam diuisam , sed solidam & vnitam , quæque etiam non ruminarent ; manducatio panum azy-morum , lactücarum agrestium , & aliorum id genus , quorum significationem fusè ac eruditè explicat S. Th. quæst. 102. art. 6. Eiusdem generis hæc erant? *Non coques hædum in lacte matris suæ. Non arabis in boue & asino. Veste quæ ex dæobus texta est non indueris. Non indueris vestimento quod ex lana, linoque contextum est Qui tetigerit mortuum , immundus erit vsque ad vesperam.*

De præceptis iudicialibus , abundè differit S. Thomas quæst. 104. & 105. vbi ea ad quatuor capita reuocat. Nam quædam præscribunt certum ordinem iustitiæ inter Principem & populum quædam inter ipsos ciues ; quædam inter populum & extraneos ; quædam denique inter domesticos eiusdem familiæ. Exempla passim sunt in Scriptura : v.g.

pro principe dantur præcepta quomodo creandus sit , quomodo se gerere debeat erga populum , & vicissim populus erga illum . Similiter pro populo & ciuibus inter se dantur præcepta emptioris & venditionis , & aliorum contractuum . Pro extraneis dantur præcepta de susceptione aduenarum & peregrinorum , & de modo belli gerendi contra hostes . Denique pro domesticis leges sunt de viro & vxore , de parentibus & liberis , de dominis & seruis , de consanguineis , & affinibus , an sint inter eos ineunda matrimonia , & cætera alia .

Differunt autem hæc præcepta à moralibus , quòd moralia ad legem naturæ proximè pertineant ; iudicialia verò valde remotè , cum tantùm sint determinationes eorum quæ generaliter in iure naturali continentur : v. g. iure naturali fures puniendi sunt , iure autem illo iudiciali pœna mortis eis infligitur . A cæremonialibus verò tripliciter differunt . Primò , quia cæremonialia pertinebant ad cultum diuinum , iudicialia ad iustitiam cum proximo seruandam . Secundò , quia cæremonialia per se primo instituta erant ad Christum & mysteria Christianæ religionis significanda & figuranda , non autem iudicialia . Ex quo sequitur tertium discrimen , nempe quòd cæremonialia omnia desierint , imò & mortifera sint ; iudicialia verò aliqua adhuc remaneant , non quidem quatenus à veteri lege sunt præscripta , sed solùm quatenus sunt à Regibus , & Legislatores in vtilitatem publicam assumpta ; alia verò mortua quidem sint , non tamen mortifera , cum absque pec-

facto obseruari possint, vt ex dicendis §. sequenti patebit .

### §. III.

*An & quando lex vetus abrogata sit?*

Dico primò , lex vetus de facto abrogata est , & desinit obligare .

Conclusio est certa de fide , & definita ab Apostolis in Concilio Ierosolimitano super hac quæstione habito , eamque passim docet Paulus in suis Epistolis, præsertim ad Rom. 6. versu 15. ad Gal. 3. versu 19. ad Ephes. 2. versu 14. & ad Coloss 2. versu 16.

Confirmatur ex illo ad Hæbreos 7. *Translatio Sacerdotio necesse est vt legis translatio fiat?* Atqui Sacerdotium veteris legis translatum est in sacerdotium nouæ legis, vt tota epistola ad Hæbreos contendit Apostolus: Ergo & ipsa lex translata est in nouam , sicque tandem abrogata, de facto desijt obligare.

Si autem quæras , cur abrogata fuerit? Respondeo primò , illam abrogatam esse, propterea quod vetus testamentum imperfectum esset & infirmum. Vnde Apostolus ad Hæbreos 7. *Reprobatio (inquit) fit præcedentis mandati, propter infirmitatem & in utilitatem: nihil enim ad perfectum adduxit lex.* Secundò, quia graue iugumerat. Quam abrogationis rationem , indicauit D. Petrus Act. 15. cum dixit: *Quid tentatis Deum, imponere iugum super cervices Discipulorum, quod nec patres nostri, nec nos portare potuimus?* Tertiò, quia continebat tantum figuras, quæ per Christum



stum impletæ sunt. Vnde Bernardus homil.  
1. super Misſus est: *Prodeunſe fructu, ſlos  
decidit, quod veritate apparente in carne ſigura  
permanſit. Vel ut ait Hieronymus in cap. 4.  
ad Galatas: Priuſquam Chriſti in toto orbe  
Euangelium coruſcaret, habuerunt ſuum ful-  
gorem præcepta legalia; poſtquam verò maius  
Euangelica gratia lumen effulſit, & Sol Iuſtitie  
toti mundo ſe prodidit, ſtellarum lumen ab-  
ſconditum eſt, & eorum radij caligauerunt.  
Demum Chriſtus ( teſte Apoſtolo ad Ephe-  
ſios 2. ) fecit utraque vnum, id eſt ex duo-  
bus populis, Ethnico, & Iudaico, fecit vnum  
ouile, ac proinde debuit diſſoluere mediũ  
parietem legis Moſaicae, qui ſeparabat vnum  
populum ab alio, & ambos vna eademque le-  
ge Euangelica concludere.*

Dices, legem Moſaicam in ſacris litteris  
prædicari in æternum duraturam: Baruch 3.  
*Hic liber mandatorum Dei, & lex quæ eſt in æ-  
ternum.*

Reſpondeo cum D. Thoma hic qu. 103. art.  
3. ad 1. legem veterem duobus modis dici  
poſſe æternam: primò quoad præcepta mora-  
lia, quæ partim in Decalogo, partim verò  
in alijs Scripturæ locis continentur; hæc enim  
ſemper vigent & vigeſunt, cùm ſint iuris na-  
turalis: ſecundò etiam quoad cæremonialia,  
quandoquidem licet hæc, abrogata ſint; quoad  
ſignificationem, durant tamen adhuc & dur-  
rabunt, quoad rem ſignificatam, nempe Chri-  
ſtum, & religionem Chriſtianam. Addo quod  
lex vetus eiufque præcepta, vocantur æterna,  
quia ad tempus valde longum fuere ſtatuta, &  
ſine certo termino in ipſa legis promulgatio;

ne definito: statuta enim & præcepta quæ ita feruntur, solent vocari perpetua, in communi usu loquendi, eodem sensu quo leges omnes dicuntur esse perpetuæ.

Dico secundò, legem Mosaicam non cessasse ante Christi mortem. Ita communiter docent Theologi, paucis exceptis, qui volunt legem Mosaicam cessasse ante mortem Christi, in ipsa institutione Baptismi, per quam cessauit obligatio Circumcisionis, & consequenter totius legis Mosaicæ, cuius obligatio in illa fundabatur, & ab illa oriebatur, ut significat Paulus ad Galat. 3.

Probatur conclusio multipliciter: Primò quia lex Mosaica umbratilis erat & figuratiua, subindeque non cessauit, donec eius umbræ & figuræ impletæ fuerint. At illæ non fuere impletæ usque ad mortem & passionem Christi, & antequam Christus tam expiraturus diceret, *consummatum est*: Ergo lex Mosaica non cessauit ante Christi mortem & passionem.

Secundò, Christus usque ad mortem legem seruauit & seruari præcepit: nam Matth. 8. leproso sanato præcepit adire sacerdotem, ut secundum legem munus offerret quod Moyses mandauerat. Et Matth. 23. dixit: *Super Cathedram Moysi sederunt Scribæ & Pharisei; omnia ergo quæcunque dixerint vobis, seruate & facite*. Item pridie quam pateretur, cum Discipulis agnum paschalem immolauit: Ergo ante eius mortem lex Mosaica non cessauerat, sed adhuc colligabat. Vnde Lucæ 22. dicitur; *Venit dies azymorum, in qua necesse erat occidi Pascha, &c.* id est necessitate præcepti,

cœpti, quod Christus antequam moreretur, adimplere voluit.

Tertiò, sicut translato sacerdotio, necesse est ut & legis translatio fiat, ut ait Apostolus ad Hebræos 7. ita manente Sacerdotio legem manere necesse est: Sed sacerdotium legis Mosaicæ non fuit translatum usque ad passionem & mortem Christi; Apostolus enim ad Hebræos 9. affirmat prius tabernaculum habuisse statum, donec per Christi mortem propalaretur sanctorum via: quandiu autem tabernaculum illud Mosaicum habuit statum, habuit & sacerdotium: Ergo lex Mosaica ante Christi mortem & passionem non fuit abrogata.

Quartò, testamentum vetus, quod est idem atque lex, non cessavit nisi per novum: Sed hoc non cœpit obligare nisi post mortem Christi, eò quòd testamentum non valeat, nisi intercedat mors testatoris, ut ait Paulus ad Hebræos 9. & probat Vlpianus l. i. ff. de testamentis: Ergo testamentum non cessavit usque ad mortem Christi.

Dices primò, Lucæ 16. dicitur: *Lex & Prophetæ usque ad Ioannem*. Et Matth. 11. *omnes Prophetæ & lex usque ad Ioannem prophetarunt*: Ergo lex vetus cessavit, quando Ioannes Baptista prædicare cœpit.

Sed nego consequentiam, sensus enim horum verborum est, quod lex & Prophetæ, usque ad Ioannem, prædixerunt Christum esse venturum; ille autem iam venisse ostenderit. Vel quod lex & Prophetæ, usque ad Ioannem, promissiones temporales prædicauerint: exinde verò cœperit euangelizari regnum Dei, consistens.

sistens in bonis spiritualibus : Hoc enim Christus dixit respondens Phariseis ipsum irridentibus, quòd nimirum affectum erga diuitias reprehenderet, earumque contemptum doceret; quasi in hoc dissentiret à lege & Prophetis promittentibus bona temporalia.

Vel denique sensus est Veterem legem tantum durasse, usque ad aduentum Christi & prædicationem Ioannis Baptistæ : sed legem & Prophetas ad illud usque tempus regnasse & triumphasse, ac legem non tantum fuisse, sed & sanam fuisse. Ex quo autem venit Ioannes Baptista, lex non est quidem mortua continuò, sed cœpit ægrotare quia incipiebat iam gratia Euangelij resplendescere.

Dices secundo omnes Cæremoniæ antiquæ legis spectabant in Christum tanquam in ultimum scopum, & significabant illum esse venturum : Ergo statim atque Christus venit cœperunt esse falsæ, subindeque lex Vetus tunc definire.

Respondeo Cæremonias veteris legis non spectasse Christum absolutè sed tanquam Redemptorem, quapropter non simul-atq; Christus adfuit, abolitæ sunt, sed simul-atque expleuit per mortem Redemptoris officium.

Dices Tertiò, Baptismus qui est primum nouæ legis sacramentum, fuit à Christo institutus ante mortem : Ergo præceptum Baptismi cœpit obligare ante mortem Christi, subindeque præceptum circumcisionis obligare desijt ante passionem Christi.

Respondeo, concesso Antecedente, negando consequentiam ; quamuis enim Baptismus fuerit à Christo institutus ante mortem, non  
fuit

fuit tamen in præcepto nisi post passionem & resurrectionem Christi, ut docet D. Thomas 3. p. quæst. 66. art. 2. his verbis: *Necessitas extendi hoc sacramento indicta fuit homini post passionem & resurrectionem, tum quia in passione Christi terminata sunt figuralia sacramenta quibus succedit Baptismus, & alia sacramenta nouæ legis; tum etiam quia per Baptismum configuratur homo passioni & resurrectioni Christi, in quantum moritur peccato, & incipit nouæ iustitiæ vitam; & ideo oportuit Christum prius pati & resurgere, quam hominibus indiceretur necessitas se configurandi morti & resurrectioni Christi.* Vnde licet instituto Baptismo, ante Christi mortem & resurrectionem, non fuerit circumcisio necessaria necessitate mediæ, cum ad delendum peccatum originale illa non esset vnicum medium; sed ad hoc sufficeret Baptismus; erat tamen necessaria necessitate præcepti, nam ita erat legi antiquæ inserta, ut signum esset fidelium qui legem illam profitebantur, illoque proinde uti, dum lex illa persisteret, necessarium fuit ex Dei præcepto.

Dico tertio, legem Mosaicam cessasse in ipsa Christi morte & resurrectione. Est contra Scotum, Suarez, & alios, existimantes legalia non fuisse omnino & completè extincta, nisi ipso die Pentecostes, in quo facta fuit sollemnis promulgatio legis Euangelicæ. Est tamen D. Thomæ hic quæst. 103. art. 3. ad 2. ubi hæc scribit: *Mysterium redemptionis humani generis completum fuit in passione Christi, unde tunc Dominus dixit, consummatum est, ut habetur Ioan. 19. & ideo*

tunc totaliter debuerunt cessare legalia quasi iam veritate eorum consummata ; in cuius signum in passione Christi , velum templi legit esse scissum , Matth. 27. & ideo ante passionem Christi , Christo prædicante , & miracula faciente , currebant simul lex & Euangelium ; quia iam mysterium Christi erat inchoatum , sed nondum consummatum ; & propter hoc mandavit Christus Dominus ante passionem leproso , ut legales ceremonias observaret.

Idem docent SS. Patres : Augustinus enim serm. 124 de tempore sic ait : *Velum templi scinditur, quia Synagoga honore nudatur, observatio antiqua dissolvitur.* Ambrosius lib. 10. in Lucam cap. 25. *Etiam velum templi scinditur, quo mysteriorum Synagoga prophatio declaretur.* Cæsarius homil. 6. in Paschate , sub finem : *Velum templi scinditur, Velum ornamentum tabernaculi est. Ceruscente igitur gratia, Ecclesia edificatur, Synagoga destruitur.* Demum Leo Papa sermon: 7. de passione , Caipham vestes proprias scindentem , quasi Christus blasphemasset , lepidè irridet dicens , Pontificem legis mox interiturae , per hanc vestium suarum scissuram , ostendisse se mox sui sacerdotij honore spoliandum.

Confirmatur ex communi consensu Hieronymi & Augustini in Epistolis quas sibi mutuò de legalibus scripsere, quibus docent , post mortem & resurrectionem Christi , legales ceremonias mortuas fuisse , id est vim obligandi amisisse , cuamvis Hieronymus existimaverit, illas post mortem & resurrectionem

tionem Christi, nedum mortuas, sed etiam mortiferas fuisse, adeò ut quicumque eas seruasset (seclusa ignorantia aut errore inuincibili) peccasset: Ergo immeritò & sine sufficienti fundamento, Scotus & Suarez, ab illis dissentiunt.

Potest insuper conclusio quatuor rationibus suaderi. Prima est: Cum lex Mosaica umbratilis & figuratiua fuerit, debuit adueniente veritate quam figurabat, cessare: Sed per Christi mortem & resurrectionem impletæ fuerunt omnes figuræ antiquæ legis, ut Christus iam mortuus significauit, cum dixit, *Consummatum est*; Ergo in morte & resurrectione Christi lex Mosaica cessauit, & penitus fuit abrogata. Vnde I eo Papa serm. 7. de passione; *Vt umbræ cederent corpori, antiqua obseruantia nouo excluditur sacramento; hostia in hostiam transit, sanguine sanguis auferitur, & legalis festinitas, dum mutatur, impletur.*

Secunda: Christus in cœna vltima nouum condidit testamentum, quod morte deinde & resurrectione sua confirmauit: Ergo vetus quasi senio iam confectum, accedente tunc nouo, extinctum est. Consequentia patet, valor enim testamenti posterioris; reuocat vim prioris, quotiescumque posterius conditur ad reuocandum prius, ut patet in humanis; Atqui nouum testamentum conditum est, ut prius reuocaretur, ut fatentur omnes; docetq; Apostolus ad Hebr. 10. his verbis: *Auferit primum, ut sequens statuatur. Et c. 8. Dicendo nouum, veterauit prius. Quod autem antiquatur & senescit, prope interitum est: Ergo &c.*

Tertia ratio: Ad Romanos 7. ex eo quod sumus liberati à peccato, infert Paulus quod sumus pariter & à iugo legis exempti: Sed in morte & resurrectione Christi sumus à peccato liberati: Ergo & à lege veteri. Vnde idem Apostolus ibidem ait, quod sicut mulier in morte viri libera sit à lege matrimonij, ita Synagoga in morte Christi, à legis obligatione liberata est.

Quarta ratio sumitur ex illo Apostoli ad Hebræos 7. *Translato sacerdotio, necesse est, ut & legis translatio fiat*: Ergo cessante sacerdotio veteris legis, ipsam quoque legem veterem cessasse necesse est, quandoquidem iuxta Paulum & rei veritatem, erat connexio & concomitantia necessaria inter legem & sacerdotium: Atqui sacerdotium veteris legis, in ipsa Christi morte & resurrectione cessauit: tunc enim sacerdotium Aaronicum totaliter fuit euacuatum, & in sacerdotium Christi translatum, ut colligitur ex illo Apostoli ad Hebræos 9. *Christus assisens Pontifex futurorum bonorum, per amplius, & perfectius tabernaculum, non manufactum, id est non huius creationis, sed per proprium sanguinem introiuit semel in sancta, aeterna redemptione inuenta*: Ergo lex vetus in ipsa Christi morte & resurrectione cessauit, & penitus abrogata est, etiam quoad præcepta moralia, nam quamuis hæc etiam nunc retineant vim obligandi, non tamen quatenus præcepta legis Mosæicæ sunt, sed quatenus sunt præcepta legis naturalis, quorum obligatio perpetua est.

Dixi autem, in ipsa Christi morte & resurrectione, tum quia cum lex vetus non so-

luta



lūm passionis & mortis Christi, sed etiam eius resurrectionis figura & umbra extiterit, ante resurrectionem Christi, nondum fuit perfectē completa, nec proinde totaliter extincta. Tunc etiam, quia sacerdotium Aaron, quod erat proprium legis veteris, non debuit aboleri, donec sacerdotium Christi esset consummatum, & in perfectione atque indefectibilitate constitutum, quod non habuit usque ad eius resurrectionem, in qua ipse Christus vitam immortalem & indefectibilem reassumpsit; unde tunc solum adimpleta fuit hæc prophetia Danidis: *Tu es sacerdos in æternum secundum ordinem Melchisedech*. Adde quod obligatio Baptismi, qui est totius legis Evangelicæ fundamentum; cœpit solum post resurrectionem Christi; cum ipsa die resurrectionis, Christus eius præceptum proposuerit, dicendo Apostolis: *Euntes docete omnes gentes, baptizantes eos, &c.* Ergo tunc solum & non ante cessauit lex vetus.

Contra istam conclusionem obijciunt Adversarij: Lex Mosaica non prius desijt, quam Evangelica cœperit obligare, cū generatio istius, sit corruptio illius, iuxta illud Apostoli ad Ephes. 2. *Legem mandatorum decretis euacuans*, id est legem Mosaicam decretis Evangelicis excludens, ut exponunt Chrysostomus, Theophilactus, & Oecumenius ibidem: Atqui lex Evangelica non cœpit obligare ante diem Pentecostes: Ergo ante illum diem lex Mosaica obligare non desijt. Maiorem ut certam supponunt, minorem verò sic probant, Lex ante sui promulgationem

non obligat, vt docet S. Thomas ſuprà  
 1. 90. art. 4. Sed lex Euangelica non fuit pro-  
 mulgata ante Pentecoſten: Ergo ante diem  
 Pentecoſtes obligare non cœpit. Minor pro-  
 batur, tum quia vſque ad tempus Pentecoſtes  
 Apoſtoli non propoſuerunt populo publicè  
 Euangelium; tum etiam, quia quemadmodum  
 lex vetus non fuit promulgata, niſi quinquageſimo die à Paſchate Iudæorum, ita non de-  
 buit lex noua promulgari, niſi poſt quinquaginta dies à Paſchate ſiue reſurrectione Chriſti; promulgationem enim legis Moſaicæ, figuram fuiſſe promulgationem legis Euangelicæ, ſuprà art. 2. in fine oſtenſum eſt.

Huic argumento, quod eſt præcipuum Ad-  
 uerſariorum fundamentum; reſpondeo, con-  
 ceſſa Maiori, negando Minorem, & ad illius  
 probationem dico, duplicem eſſe legis pro-  
 mulgationem; vnā eſſentialem, legi ſuffi-  
 cientem, quæ fit quando Princeps vt publica  
 perſona illam proponit & intimat ſuis ſubdi-  
 tis in curia exiſtentibus; altera ſolemnis &  
 acciſſentalis; atque ad tollendam ſubdito-  
 rum ignorantiam ordinata, quæ fit cum lex  
 à præcone per ſingulas prouincias, aut  
 per omnes præcipuas ciuitates publicatur.  
 Quamuis ergo lex Euangelica hoc ſecundo ge-  
 nere promulgationis, ſolū die Pentecoſtes  
 promulgata fuerit ab Apoſtolo vt Chriſti  
 præconibus; ipſo tamen die reſurrectionis  
 fuit à Chriſto propoſita & intimata Diſcipulis  
 his verbis: *Euntes docete omnes gentes, bapti-  
 zantes eos, &c.* Vnde à die reſurrectionis cœ-  
 pit habere vim legis ex ſe obligantis, quam-  
 uis hæc promulgatio non ſufficeret ad tollen-  
 dam

dam ignorantiam illius, nec proinde ad reddendum homines inexcusabiles ab eius transgressione. Ex quo patet ad primam probationem Minoris, Ad secundam verò similiter dico, legem Mosaicam promulgatione sufficienti ad rationem legis, fuisse promulgatam ab eo tempore, quo Deus eam dedit Moyse in monte Sina, tunc enim locutus est Deus vt Princeps & Legislator, subindeque ex eo tempore præcepta illius legis lata à Deo, vim legis habuerunt; aded vt ipsius Publicatio facta deinde à Moyse toti populo, non habuerit vim promulgationis necessariæ ad essentiam legis, sed tantum declarationis, ne homines ignorantia ab eius obligatione excusari possent. Quare licet publicatio illa veteris legis facta per Moysen, fuerit figura promulgationis legis Euangelicæ, faciendæ per Apostolos in die Pentecestes, hinc tamen non fit, istam fuisse necessariam, ad rationem & essentiam legis Euangelicæ, sed tantum ad tullendam ignorantiam ipsius.

Ad solutionem alterius argumenti, quod contra nostram conclusionem fieri posset, Aduertendum est, quod licet à passione, & resurrectione Christi vsque ad Euangelij diuulgationem, lex antiqua mortua fuerit, ita vt nec obligaret, nec vim obligandi haberet, non tamen penitus erat inutilis, sicut est modò; sed quandiu permanfit eius bonitas, & non fuit mortifera, pueri Iudæorum recipientes circumcisionem, à peccato originali iustificabantur: illique qui bona fide legem illam obseruabant, saluabantur; diuinam namq, bonitatem decebat, vt quandiu sustinuit legem illam, non

auferret eius vtilitatem, vt prodesset illis, qui bona fide illam obseruabant: vnde pro illis valebat dispensatio & permissio per legem data, repudiandi vxorem legitimam, & ducendi aliam, vel habendi plures simul.

#### S. IV.

*An lex Mosaica statim atque cessauit obligare, fuerit mortifera?*

Partem affirmantem tenuit olim D. Hieronymus, vt constat ex Epistola eius ad Augustinum, quæ inter Epistolas ipsius Augustini connumeratur vndecima; distinxit enim solùm duo tempora, vnum ante passionem Christi, in quo legalia non erant mortua, quasi non habentia vim obligatoriam, aut expiatiuam, pro suo modo; nec etiam mortifera, quia non peccabant ea obseruantes: alterum post passionem Christi, in quo non solùm mortua (id est non habentia virtutem & obligationem) sed etiam mortifera fuerunt, ita scilicet quod peccarent mortaliter quicumque ea obseruarent. Oppositum docuit Augustinus Epist. 9. & 19. ad Hieronymum, vbi distinxit tempora. Vnum ante Christi passionem, in quo legalia neque erant mortifera, neque mortua. Aliud post tempus Euangelij diuulgati, in quo legalia sunt mortua & mortifera. Tertium autem est tempus medium, scilicet à passione Christi, vsque ad diuulgationem Euangelij, in quo legalia quidem fuerunt mortua, quia neque vim aliquam habebant, neque aliquis ea obseruare tenebatur: non tamen fuerunt mort-

mortifera, quia illi qui ex Iudæis conuersi erant ad Christum, poterant illa licitè obseruare, dummodo non sic ponerent spem in eis, quod ea reputarent necessaria ad salutem, quasi sine legalibus fides Christi iustificare non posset. Augustinum secutus est D. Thomas hic quæ. 103. art. 4. ad 3. alijque Theologi communiter, cum quibus.

Dico, legem Mosaicam non fuisse mortiferam statim atque cessare coepit illius obligatio, sed aliquo tempore post illius abrogationem, fuisse licitum seruare illius præcepta cæremonialia, quamuis non esset necessarium.

Probatur efficaciter, quia ipsimet Apostoli vsurparunt cæremonialia ijs in locis vbi iam lex Mosaica desierat obligare, facta iam sufficienti promulgatione legis Euangelicæ: vt patet ex Actuum 16. vbi Paulus Timotheum ex patre Gentili natum circumcidit; & ca. 18. vbi more Nazæeorum totondit caput in Cenchris; & cap. 21. vbi de consilio Iacobi Apostoli, & seniorum, vsus est legali purificatione cum Iudæis, vt illos sibi conciliaret, & purificatus cum illis templum ingressus est. Deum cap. 15. eiusdem libri, in Concilio Apostolorum statutum fuit, vt Christiani abstinerent à sanguine, & à suffocato, quæ vna erat ex cæremonijs legalibus.

Respondet D. Hieronymus Epistola citatâ, nunquam Apostolos post resurrectionem Christi legalia obseruasse secundum veritatem, sed solum ex quadam pia simulatione, ne scandalizarent Iudæos, & eorum conuersionem impedirent.

*Verum*

Verum si cæremonia illa tunc fuissent mortifera, vt sentit Hieronymus, non licitum fuisse Apostolis, eas simulatoriè vsurpare; quia contra fidei professionem est, vti cultu superstitioso, & profiteri exterius falsam religionem, cuiusmodi erat religio Iudæorum quoad cultus illos, si iam erant superstitiosi, & mortiferi. Item si licuisset Apostolis vti simulatoriè cultu superstitioso Iudæorum, vt eos lucrarentur, quemadmodum ait Hieronymus, licuisset similiter vti simulatoriè cultu superstitioso Gentilium, vt facilius eos conuerterent; & nunc etiam liceret vti cæremonijs Iudaicis, simulareque eorum fidem, vt eos lucrifaceremus, sicut contra Hieronymum rectè argumentatur S. Augustinus Epistolis citatis. Addit S. Thomas loco supra citato, *Indecens videri quod Apostoli ea occultarent propter scandalum, quæ pertinent ad veritatem vitæ, & doctrinæ, & simulatione crederentur in his quæ pertinent ad salutem fidei.*

Potest insuper suaderi conclusio optima congruentia, qua vtitur D. Augustinus ad probandum, post abrogationem legis Mosaicæ, per aliquod tempus fuisse licitum legalia seruare, vsque ad sufficientem diuulgationem Euangelij, quamuis non esset necessarium. Sicut enim (inquit) solemus homines mortuos aliquaudiu ante sepulturam seruare, vt cum honore sepultura tradantur: ita decuit legalia, quæ vt viua post Christi mortem seruari non poterant, vt mortua vsque ad perfectam Euangelij diuulgationem seruari, vt cum honore mortua mater synagoga sepeliretur; &  
ne

ne homines existimarent, si ea statim reiecta fuissent, veterem legem fuisse abominabilem, perinde ac Gentilium cultum, quem nulla unquam mora sustinere Apostoli voluerunt.


Dices, si licitum erat post abrogationem legis Mosaicæ per aliquod tempus legalia seruare, non potuit rationabiliter Paulus ad Galat. 2. reprehendere Petrum Apostolum, eò quòd illa usurparet, seque à Gentilibus Antiochenis recens conuersis segregaret, vt vñueret Iudaicè cum Iudæis, qui Ierosolimis à Iacobo aduenerant: Atqui Paulus iure reprehendit Petrum, qui vt dicitur ad Galat. 2. reprehensibilis erat: Ergo post abrogationem legis Mosaicæ, non licitum fuit seruare legalia.

Respondeo, negando sequelam Maioris, Petrus enim enim iure reprehensus à Paulo, non quòd simpliciter vteretur caeremonijs Iudaicis, post abrogationem legis Mosaicæ (quòd ipsemet Paulus sæpius fecerat, vt suprà ostendimus) sed quòd vteretur cum aliqua imprudentia & scandalo infirmorum, adeò vt Christiani ex eius facto inducerentur ad existimandum obseruationem legalium esse adhuc necessariam, & ita quodammodo cogerentur iudaizare, vt significat verba illa Pauli ad Petrum ad Galat. cap. 2. *Si tu Iudæus cum sis, gentilitèr viuas, & non Iudaicè, quomodo cogis gentes iudaizare?* Solutio est D. Thomæ hic quæstion. 103. articul. 4. ad 2. vbi hæc scribit. *Non peccauit Petrus in hoc, quòd ad tempus legalia obseruabat, quia hoc sibi licebat tanquam ex Iudæis conuerso; sed peccabat in hoc, quòd circa legalium obseruantiam nimiam diligentiam adhibebat, ne*  
scant,

*Scandalizare Iudeos, ita quod ex hoc sequeretur Gentilium scandalum.*

Quæres, quo præcisè tempore coeperit lex Mosaica esse mortifera?

Respondeo hoc esse dubium & incertum; valde tamen probabile esse quod plerique Theologi docent, illam solum coepisse esse mortiferam quadagesimo circiter post Christi mortem anno, postquam Euangelium sufficienter iam toto orbe Iudæis promulgatum fuit per Apostolos, templumque Ierosolymitanum, una cum statu Reipublicæ Iudaicæ, à Romanis Imperatoribus euersum; tunc enim non erat amplius necessarium deferre honorem Synagogæ iam extinctæ, aut uti condescensu erga Iudeos, tandiu Dei vocationi rebelles.



## C A P V T X.

*De lege diuina noua, siue Evangelicâ.*

**C**ertum de fide est, Christum non solum ab antiqua lege nos liberasse, sed etiam nouam instituisse, ad Christianos pertinentem, hoc enim plura vtriusque testamenti testimonia aperte declarant, & Tridentinum sess. 8. can. 12. confirmat, anathemate damnans eum qui dixerit, *Christum Iesum à Deo hominibus datum fuisse ut redemptionem cui fident, non etiam ut legislatorem cui obediunt.* Ratio etiam suffragatur; Nullum enim regnum, nullaue communitas perfecta-ciuilis, aut Ec-  
cle-



clesiastica, potest sine legibus conuenientes gubernari, stabiliter conseruari, atq: ad finem propositum efficaciter dirigi, vt lumine ipso naturali, & experientia notum est; cum igitur Christus Ecclesiam instituerit, vt nouum regnum spiritale, debuit leges illi dare per quas in sua institutione gubernari, conseruari, & ad finem propositum, qui est salus æterna, promoueri possit. Vnde Isaia 3. de Messia dicitur: *Dominum index noster, Dominus legifer noster, Dominus rex noster, ipse saluabit nos.*

Neque obstat illud Ioan. 1. *Lex per Moysen data est, gratia autem & veritas per Iesum Christum facta est*, quo significari videtur, Moysen fuisse legislatorem, non vero Christum, ipsumque nullam tulisse legem, sed solum gratiam, & iustificationem nobis promeruisse. Respondetur enim, non ideò gratiam dici per Christum factam, legem verò per Moysen datam, quòd Christus nullam legem tulerit, sed quia Moyses dedit Iudæis nudam legem sine gratia, idest legem præcipientem, sed non adiuantem; Christus verò dedit nobis legem cum gratia, idest legem præcipientem, & adiuantem. Quam ob causam vocatur ab Apostolo *lex Spiritus*, & à Christo, *ingum suauis, & onus leue.*

Lex noua à Christo data, præcepta triplicis generis continent, nempe moralia, sacramentalia, & fidei; inter quæ hoc intercedit discrimen, quod moralia, cum sint iuris naturalis, non fuerunt à Christo instituta, sed tantum explicata, & vindicata ab erroribus, quibus ex hominum malitia fuerant inuoluta. Sacramentalia verò instituta sunt à Christo, vt essent loco

cō veterum, quæ ab ipso abrogata sunt. Præcepta verò fidei de nouo instituta non sunt, sed tantum ex implicitis facta fuerunt magis clara; ita vt nunc explicitè mysteria quædam credere teneamur, quæ in lege vetèri implicitè duntaxat credebantur: cuiusmodi sunt natiuitas, passio, & mors Christi, quæ à Iudæis obscurè credebantur, sed expressè creduntur à Christianis.

Lex vetus & lex noua, seu Euangelica, in multis conueniunt, & in multis discrepant. Conueniunt primò in eo quod sicut lex Mosai-  
ca promulgata est die quinquagesimo post Pascha, idest in die Pentecostes, sic etiam lex Euangelica, vt constat Actorum 2. Secundò, sicut illa in monte Sina, ita ista in monte Syon promulgata est, iuxta illud Isaia 2. *De Syon exiit lex, & verbum Domini de Ierusalem.* Tertiò sicut ibi audita sunt tonitrua, & fulgura, ita hic factus est repente de cælo sonus, tanquam aduenientis spiritus vehementis. Quartò, sicut ibi apparuit ignis & fumus; ita hic appa-  
uerunt disseptæ linguæ tanquàm ignis. Quintò, sicut ibi timorè perculsi sunt Iudæi, ita hic Apostoli. Sextò sicut ibi Angelus clangore buccinæ verba Decalogi perstrepebat, ita hic tuba Euangelica Apostolorum ore insonuit, eiusque sonus in omnem terrarum orbem exiuit. Demùm quemadmodum in propitiatorium vertebant vultus duo Cherubini, ita duæ leges Mosai-  
ca & Euangelica in Christum, veluti magnum quoddam mundi propitiatorium oculos vertunt: cùm eadem Christi gratiam populus Iudaicus qui Christi aduentum præcessit, & Christianus qui sequitur, saluus fa-  
ctus

ctus sit, & eodem immaculati agni sanguine redemptus. Vnde Augustinus ep. 157. ad Optatum: Cum omnes iusti, idest viraces Deic ulto ret siue ante incarnationem siue post incarnationem Christi, nec viuerent, nec viuant, nisi ex fide incarnationis Christi, in quo est gratia plenitudo. profecto quod scriptum est act. 4. Non est aliud nomen sub caelo, in quo oporteat nos saluos fieri, ex illo tempore valet ad saluandum genus humanum, ex quo in Adam vitiatum est.

Discrepant verò duæ illæ leges, primò in eo quod Mosaica scripta sit in tabulis lapideis, ministerio Angelorum, Euangelica verò per Spiritum Sanctum hominum cordibus insculpta, iuxta illud Ieremix 31. Dabo legem meam in visceribus eorum, & in cordibus eorum scribam eam. Vnde Theophylactus in cap. 3. epist. 2. ad Corinth. Quanto interuallo spiritus ab atramento distat, & cor à lapide, tanto & nouum à lege discrepat testamentum. Et August. de spir. & litt. c. 17. Ibi in tabulis lapideis digitus Dei operatus est, hic in cordibus humanis. Ibi lex extrinsecus posita est qua iniusti terrentur, hic intrinsecus data est vt iustificarentur. Et iursus c. 21. Distat à vetere testamentum nouum, eò quòd per nouum scribitur lex Dei in corde fidelium, quæ per vetus in tabulis scripta est. Nec istam inscriptionem, quæ iustificatio est, poterat efficere in Iudæis lex in tabulis scripta. Succinit tanto magistro dignus discipulus Prosper lib. contra Collatorem c. 22. his verbis: In cordibus digito suo Deus, idest Spiritu Sancto, scribit nouum testamentum, vt legis plenitudinem, & opera charitatis naturaliter exequantur, reformata scilicet, renouataque natura.

Secundò differunt lex vetus & noua , in eo quod lex noua , cùm habeat præsentem Christum, eius authorem & institutorem , qui potuit ex perfecta iustitia mereri , & Deo satisfacere pro hominibus; & contineat sacramenta quæ habet vim causandi gratiam , & sunt veluti vasa illam continentia , habet vim iustificandi ex proprijs; secùs lex vetus, cùm utroque caruerit. Vnde D. Thomas hic q. 107. art. 1. ad 2. & D. Augustinus pluribus in locis affirmât illos qui in veteri testamento fuerunt Deo accepti per fidem, secundùm hoc ad nouum testamentum pertinuisse; non enim iustificabantur, nisi per fidem Christi, qui est author noui testamenti, iuxta illud 1. ad Corinth. *Bibebant autem de spiritali consequente eos petra ; petra autem erat Christus.*

Hinc intelliges legem veterem rectè speculo comparari, quod maculas quidem ostendit, sed non aufert; legem verò nouam aquæ , quæ non solum sordes valet ostendere, sed & abstergere: vnde Ezechiel. 25. Dominus fidelibus nouæ legis pollicetur: *Effundam super vos aquam mundam, & mundabimini ab omnibus iniquamentis vestris.*

Tertium discrimen consistit in eo quod vetus testamentum fuit timoris, nouum est amoris; fuit enim illud seruorum , quorum est timor; istud filiorum, quorum est amor erga patrem . Vnde Augustinus lib. aduersus Adamantium cap. 17. *Hac est breuissima & aper-  
tissima differentia duorum testamentorum , timor & amor .* Sicut ergo timor prior est amore , sic testamentum vetus prius fuit nouo ; & sicut timor locum præparat charitati , cum  
autem

autem coeperit charitas habitare, pellitur timor qui ei pręparauit locum: ita testamentum vetus pręparauit locum testamento nouo, quo adueniente abrogatum fuit.

Ex hoc sequitur quartum discrimen, in veteri enim testamento, mysteria fidei, pręsertim Trinitatis, & Incarnationis erant obscure, & imperfectę cognita, in nouo clarę & expressę sunt reuelata: quia nimirum serui non tam perfectę sciunt consilia & secreta patris-familias, quam filij. Vnde Christus Ioan. 14. discipulis dicebat: *Iam non dicam vos seruos, quia seruus nescit quid faciat dominus eius.* Hanc differentiam indicauit Augustinus, cum dixit vetus testamentum esse occultationem noui, & nouum esse reuelationem veteris, & propter hoc Moysem, cum loqueretur ad populum, faciem velasse, Christum verò nobis reuelata facie locutum esse, vt ait Apostolus 2. ad Corinth. 3.

Ex hoc intelliges, quod sicut hemispherium eò magis clarescit, quò magis ei sol appropinquat; ita status veteris legis, secundum maiorem ad Christum & Euangelium propinquitatem, maiorem cognitionis diuinorum mysteriorum claritatem & illustrationem accepit, & vt loquitur Gregor. Papa ho. 16. super Ezechielem: *Secundum incrementa temporum, creuit scientia Sanctorum Patrum, & quanto viciniore aduentui Saluatoris fuerunt, tanto sacramenta salutis plenius perceperunt.*


Quintum discrimen inter nouum & vetus testamentum consistit in eo quod nouum cęli fores aperuit, quas vetus aperire non potuit, vt declarat Apostolus ad Hębreos 9, his verbis:

*In secundo tabernaculo semel in anno solus Pontifex introibat, non sine sanguine, quem offerret pro sua, & populi ignorantia: hoc significante Spiritu Sancto, nondum propalatum esse sanctorum viam, adhuc priore tabernaculo habente statum. Hoc est: in Sancta Sanctorum, quæ templi pars erat intima, & cæteris præstantior, solus Pontifex semel in anno introibat, cæteri verò sacerdotes eo ingressu prohibebantur: quia occlusione intimi aduti, & partis templi præcellentioris, adumbrabat Spiritus Sanctus, viam in cælo fuisse occlusam, quandiu vetus testamentum ratum fuit. Noui autem testamenti auctor Christus, primus omnium cælum penetrauit, cælestemq; viam ac fores aperuit. Quam ob causam duodecim portas cæli patentes vidit Ioannes Apocal. 21. *Portæ (inquit) eius non claudentur. Ab Oriente portæ tres, ab Aquilone portæ tres, ab Austro portæ tres, & ab Occasu portæ tres. Versus omnes cæli plagas portæ patent, quia totius orbis habitatoribus patent, non veteris sed noui beneficio testamenti.**

Demum, omiſſis pluribus alijs inter veterem & nouam legem differentijs, hæc præcipua & veluti capitalis est, quod lex vetus fuit umbra & figuræ nouæ, noua autem veteris perfectio & complementum. Vnde Hieronymus lib. 1. aduersus Pelagianos cap. 9. *In lege promittitur, in Euangelio impletur: ibi initia hic perfectio est, in illa operum fundamenta iaciuntur, hic fidei & gratia culmen imponitur.* Et Bernardus homil. 1. super Missus est, docet quod sicut fructus tam seminis, quam florum suis & complementum est; ita Christus finis fuit,

fuit, perfectio, & complementum veteris legis. Alia similitudine vnitur Chrysostomus (vel vt alij volunt Victor Antiochenus) exponens illud quod habetur Marci 4. *Ultro terra fructificat primum herbam, deinde plenum frumentum - n Spica.* Subdit enim: *Primo herbam fructificat in lege naturæ, postmodum spicas in lege Moysi, postea plenum frumentum in Euangelio.*





## TRACTATVS VII.

DE

## GRATIA.



VM iuxta Augustinum lex data fuerit, vt gratia quaereretur; gratia verò, vt lex adimpleretur, non incongruè tractationi de legibus, tractatum de gratia subiungimus, in quo prius de eius necessitate agemus, deinde varias eius diuisiones breuiter explicabimus; postea differemus de gratia habituali, quæ est præcipua & nobilissima species gratiæ, eiusque essentiam, proprietates, causas, & effectus componemus.

Sed priusquam de illis agamus, duo breuiter hic præmittenda sunt. Primum est; nomine gratiæ significari dona gratis & liberaliter à Deo collata; vnde cum huiusmodi dona triplex generis sint, triplex etiam est gratiæ acceptio, & significatio, vna larga & impropria, quæ comprehendit quodcumque beneficium à Deo nobis gratis & liberaliter concessum; siue ad naturam pertineat, siue supra naturam sit; vnde



Vnde Patres sextæ Synodi actione 11. in epist. ad Sophorium, Angelorum immortalitatem, licet ipsis connaturalem, nomine gratiæ afficiunt; & Augustinus ep. 95. & 105. obseruat rerum creationem & conseruationem, gratiam vocari posse, quia gratis & liberaliter à Deo conceditur. Hanc gratiam non negauit Pelagius, imò Patres Concilij Palestini fefellit, concedens necessitatem gratiæ ad opera salutaria, sed gratiæ nomine dolose beneficii creationis, seu liberum arbitrium, gratis à Deo nobis concessum, intelligens, vt testatur Aug. serm. 11. de verb. Apostolici c. 7. vbi de Pelagianis ait: *Disputantes contra gratiam pro libero arbitrio, fecerunt auribus suis & catholicis offensionem; ceperunt horreri, ceperunt vicia perniciæ deuitari, cepit de illis dici quod contra gratiam disputarent, & invenerunt ad releuandam ipsam inuidiam tale commentum: non, inquit, contra gratiam Dei disputo, vnde, probes? eo ipso, inquit, non contra gratiam Dei disputo, quod liberum arbitrium defendo. Videte acumen, sed vitreum; luccet quasi vanitate, sed frangitur veritate.* Alia acceptio gratiæ est magis propria, & non se extendit ad quodcumque donum, in creatione gratis & liberaliter à Deo concessam, sed duntaxat ad dona aliqua naturalia, omnino indebita, quale in statu naturæ integræ fuit donum integritatis, & cuiusmodi sunt in statu naturæ lapsæ auxilia quædam intra ordinem naturæ specialia, quæ dantur ad aliqua opera difficilia & heroica ordinis naturalis exercenda, vt infra patebit. Tertia demum est maximè propria, & significat solum dona, & beneficia, supra to-

cō veterum, quæ ab ipso abrogata sunt. Præcepta verò fidei de nouo instituta non sunt, sed tantum ex implicitis facta fuerunt magis clara; ita vt nunc explicitè mysteria quædam credere teneamur, quæ in lege vetèri implicitè duntaxat credebantur: cuiusmodi sunt natiuitas, passio, & mors Christi, quæ à Iudæis obscurè credebantur, sed expressè creduntur à Christianis.

Lex vetus & lex noua, seu Euangelica, in multis conueniunt, & in multis discrepant. Conueniunt primò in eo quod sicut lex Mosai- ca promulgata est die quinquagesimo post Pascha, idest in die Pentecostes, sic etiam lex Euangelica, vt constat Actorum 2. Secundò, sicut illa in monte Sina, ita ista in monte Syon promulgata est, iuxta illud Isaia 2. *De Syon exiit lex, & verbum Domini de Ierusalem.* Tertiò sicut ibi audita sunt tonitrua, & fulgura, ita hic factus est repente de cælo sonus, tanquam aduenientis spiritus vehementis. Quartò, sicut ibi apparuit ignis & fumus; ita hic appa- nerunt disperitæ linguæ tanquàm ignis. Quintò, sicut ibi timorè perculsi sunt Iudæi, ita hic Apostoli. Sextò sicut ibi Angelus clangore buccinæ verba Decalogi perstrepebat, ita hic ruba Euangelica Apostolorum ore insonuit, eiusque sonus in omnem terrarum orbem exiit. Demùm quemadmodum in propitiato- rium vertebant vultus duo Cherubini, ita duæ leges Mosai- ca & Euangelica in Christum, ve- luti magnum quoddam mundi propitiatorium oculos vertunt: cū eadem Christi gratiam populus Iudaicus qui Christi aduentum præ- cessit, & Christianus qui sequitur, saluus fa- ciens

ctus sit ; & eodem immaculati agni sanguine redemptus . Vnde Augustinus ep. 157. ad Optatum : *Cum omnes iusti , idest viraces Deic ulto ret sue ante incarnationem siue post incarnationem Christi , nec viuerent , nec viuant , nisi ex fide incarnationis Christi , in quo est gratia plenitudo . profecto quod scriptum est act. 4. Non est aliud nomen sub caelo , in quo oporteat nos saluos fieri , ex illo tempore valet ad saluandum genus humanum , ex quo in Adam vitiatum est .*

Discrepant verò duæ illæ leges , primò in eo quod Mosaica scripta sit in tabulis lapideis , ministerio Angelorum , Euangelica verò per Spiritum Sanctum hominum cordibus insculpta , iuxta illud Ieremix 31. *Dabo legem meam in visceribus eorum , & in cordibus eorum scribam eam .* Vnde Theophylactus in cap. 3. epist. 2. ad Corinth . *Quanto interuallo spiritus ab atramento distat , & cor à lapide , tanto & nouum à lege discrepat testamentum .* Et August. de spir. & litt. c. 17. *Ibi in tabulis lapideis digitus Dei operatus est , hic in cordibus humanis . Ibi lex extrinsecus posita est ut iniusti terrentur , hic intrinsecus data est ut iustificarentur .* Et iursus c. 21. *Distat à vetere testamentum nouum , eò quòd per nouum scribit & lex Dei in corde fidelium , quæ per vetus in tabulis scripta est . Nec istam inscriptionem , quæ iustificatio est , poterat efficere in Iudæis lex in tabulis scripta .* Succinit tanto magistro dignus discipulus Prosper lib. contra Collatorem c. 22. his verbis : *In cordibus digito suo Deus , idest Spiritu Sancto , scribit nouum testamentum , ut legis plenitudinem , & opera charitatis naturaliter exequantur , reformata scilicet , renouataque natura .*

Secundò differunt lex vetus & noua , in eo quod lex noua , cùm habeat præsentem Christum, eius autorem & institutorem , qui potuit ex perfecta iustitia mereri , & Deo satisfacere pro hominibus; & contineat sacramenta quæ habet vim causandi gratiam , & sunt veluti vasa illam continentia , habet vim iustificandi ex proprijs; secùs lex vetus, cùm utroque caruerit. Vnde D. Thomas hic q. 107. art. 1. ad 2. & D. Augustinus pluribus in locis affirmât illos qui in veteri testamento fuerunt Deo accepti per fidem, secundùm hoc ad nouum testamentum pertinuisse; non enim iustificabantur, nisi per fidem Christi, qui est author noui testamenti, iuxta illud 1. ad Corinth. *Bibebant autem de spiritali consequente eos petra ; petra autem erat Christus.*

Hinc intelliges legem veterem rectè speculo comparari, quod maculas quidem ostendit, sed non aufert; legem vero nouam aquæ , quæ non solum sordes valet ostendere, sed & abstergere: vnde Ezechiel. 25. Dominus fidelibus nouæ legis pollicetur: *Effundam super vos aquam mundam, & mundabimini ab omnibus iniquamentis vestris.*

Tertium discrimen consistit in eo quod vetus testamentum fuit timoris, nouum est amoris; fuit enim illud seruorum , quorum est timor; istud filiorum, quorum est amor erga patrem . Vnde Augustinus lib. aduersus Adamantium cap. 17. *Hæc est breuissima & aper-  
tissima differentia duorum testamentorum , timor & amor .* Sicut ergo timor prior est amore , sic testamentum vetus prius fuit nouo ; & sicut timor locum præparat charitati , cum  
autem

autem coeperit charitas habitare, pellitur timor qui ei pręparauit locum: ita testamentum vetus pręparauit locum testamento nouo, quo adueniente abrogatum fuit.

Ex hoc sequitur quartum discrimen, in veteri enim testamento, mysteria fidei, pręsertim Trinitatis, & Incarnationis erant obscure, & imperfectę cognita, in nouo clarę & expressę sunt reuelata: quia nimirum serui non tam perfectę sciunt consilia & secreta patris-familias, quam filij. Vnde Christus Ioan. 14. discipulis dicebat: *Iam non dicam vos seruos, quia seruus nescit quid faciat dominus eius.* Hanc differentiam indicauit Augustinus, cum dixit vetus testamentum esse occultationem noui, & nouum esse reuelationem veteris, & propter hoc Moysem, cum loqueretur ad populum, faciem velasse, Christum verò nobis reuelata facie locutum esse, vt ait Apostolus 2. ad Corinth. 3.

Ex hoc intelliges, quod sicut hemispherium eò magis clarescit, quò magis ei sol appropinquat; ita status veteris legis, secundum maiorem ad Christum & Euangelium propinquitatem, maiorem cognitionis diuinorum mysteriorum claritatem & illustrationem accepit, & vt loquitur Gregor. Papa ho. 16. super Ezechielem: *Secundum incrementa temporum, creuit scientia Sanctorum Patrum, & quanto viciniore aduentui Saluatoris fuerunt, tanto sacramenta salutis plenius perceperunt.*

Quintum discrimen inter nouum & vetus testamentum consistit in eo quod nouum cęli fores aperuit, quas vetus aperire non potuit, vt declarat Apostolus ad Hębreos 9, his verbis:

*In secundo tabernaculo semel in anno solus Pontifex introibat, non sine sanguine, quem offerret pro sua, & populi ignorantia: hoc significante Spiritu Sancto, nondum propalatum esse sanctorum viam, adhuc priore tabernaculo habente statum. Hoc est: in Sancta Sanctorum, quæ templi pars erat intima, & cæteris præstantior, solus Pontifex semel in anno introibat, cæteri verò sacerdotes eo ingressu prohibebantur: quia occlusione intimi aduti, & partis templi præcellentioris, adumbrabat Spiritus Sanctus, viam in cælo fuisse occlusam, quandiu vetus testamentum ratum fuit. Noui autem testamenti auctor Christus, primus omnium cælum penetrauit, cœlestemq; viam ac fores aperuit. Quam ob causam duodecim portas cœli patentes vidit Ioannes Apocal. 21. *Portæ (inquit) eius non claudentur. Ab Oriente portæ tres, ab Aquilone portæ tres, ab Austro portæ tres, & ab Occasu portæ tres. Versus omnes cœli plagas portæ patent, quia totius orbis habitatoribus patent, non veteris sed noui beneficio testamenti.**

Demum, omiſſis pluribus alijs inter veterem & nouam legem differentijs, hæc præcipua & veluti capitalis est, quod lex vetus fuit umbra & figuræ nouæ, noua autem veteris perfectio & complementum. Vnde Hieronymus lib. 1. aduersus Pelagianos cap. 9. *In lege promittitur, in Euangelio impletur: ibi initia hic perfectio est, in illa operum fundamenta iaciuntur, hic fidei & gratia culmen imponitur.* Et Bernardus homil. 1. super *Missus est*, docet quod sicut fructus tam seminis, quam florum finis & complementum est; ita Christus finis fuit,

fuit, perfectio, & complementum veteris legis. Alia similitudine vnitur Chrysostomus (vel vt alij volunt Victor Antiochenus) exponens illud quod habetur Marci 4. *Utro terra fructificat primum herbam, deinde plenum frumentum - n Spica.* Subdit enim: *Primo herbam fructificat in lege naturæ, postmodum spicas in lege Moyse, postea plenum frumentum in Euangelio.*



Vnde Patres sextæ Synodi actione 11. in epist. ad Sophorium, Angelorum immortalitatem, licet ipsis connaturalem, nomine gratiæ afficiunt; & Augustinus ep. 95. & 105. obsequat rerum creationem & conseruationem, gratiam vocari posse, quia gratis & liberaliter à Deo conceditur. Hanc gratiam non negauit Pelagius, imò Patres Concilij Palestini fefellit, concedens necessitatem gratiæ ad opera salutaria, sed gratiæ nomine dolose beneficii creationis, seu liberum arbitrium, gratis à Deo nobis concessum, intelligens, vt testatur Aug. serm. 11. de verb. Apostolici c. 7. vbi de Pelagianis ait: *Disputantes contra gratiam pro libero arbitrio, fecerunt auribus suis & catholicis offensionem; ceperunt horreri, ceperunt vitia perniciosius deuitari, cepit de illis dici quod contra gratiam disputarent, & invenerunt ad releuandam ipsam inuidiam tale commentum: non, inquit, contra gratiam Dei disputo, vnde, probes? eo ipso, inquit, non contra gratiam Dei disputo, quod liberum arbitrium defendo. Videte acumen, sed vitreum; luccet quasi vanitate, sed frangitur veritate.* Alia acceptio gratiæ est magis propria, & non se extendit ad quodcumque donum, in creatione gratis & liberaliter à Deo concessam, sed duntaxat ad dona aliqua naturalia, omnino indebita, quale in statu naturæ integræ fuit donum integritatis, & eiusmodi sunt in statu naturæ lapsæ auxilia quædam intra ordinem naturæ specialia, quæ dantur ad aliqua opera difficilia & heroica ordinis naturalis exercenda, vt infra patebit. Tertia demum est maximè propria, & significat solum dona, & beneficia, supra to-



tum naturæ debitum , nobis per Christum exhibita , in ordine ad nostram salutem , & hæc est propria & theologica gratiæ consideratio , de qua in hoc Tractatu præcipuè acturi sumus , quamvis de gratia secundo modo accepta mentionem interdum facturi sumus .

Secundò explicandum est , qua ratione D. Thomas hic qu. 109. in titulo , gratiam *principium exterius humanorum actuum* appellet ; cum enim gratia , tum habitualis , tum actualis , intrinsecè animæ , vel potentijs eius inhereant , videtur quod eam appellare non debuerit principium extrinsecum actuum humanorum . Vnde aliqui dicunt titulum esse mendosum , & aliter esse legendum , scilicet *de exteriori principio humanorum actuum , nempe de Deo , quatenus per gratiam nos mouet* . Sed melius respondetur ; S. Doctorem appellare gratiam *principium exterius humanorum actuum* , non inhæsiuè , sed egressiue ; quia licet ponat aliquid in anima , vel per modum habitus , vt gratia sanctificans , vel per modum motionis , vt gratia auxilians , illud tamen ex intraneis naturæ non dimanat , sed ab exteriori principio , Deo scilicet , vt operante supra totam naturæ exigentiam , procedit . Sicut lapis dicitur moueri à principio extrinseco , quia licet impulsus illi inhæreat , tamen à principio exteriori causatur .

## CAPVT I.

De necessitate gratiæ ad cognitionem  
veri.

**C**um veritates aliæ sint naturales, aliæ supernaturales, vt necessitas gratiæ in ordine ad cognitionem veri clariùs eluceſcat, de vtriſque hic agendum eſt: & primò quidem de cognitione veritatum naturalium, id eſt quæ ex primis principijs per euidentem conſequentiam poſſunt deduci, & ex ſenſibilibus cognoſci; poſtea verò de cognitione veritatum ſupernaturalium, quæ nullam habent cum principijs naturalibus connexionem, & omnia ſenſibilia ac naturalia transcendunt; quales ſunt myſteria noſtræ fidei, & veritates à Deo reuelatæ.

## §. I.

*Homo ſine auxilio Dei ſpeciali, & cum ſolo generali concurſu, poteſt plures, imò & ſingulas diuiſiue, veritates naturales cognoſcere, non tamen omnes colloſtiue.*

Prima pars eſt contra Vaſquez, quem ex noſtris nouiſſimè ſecutus eſt P. Vincentius Contenſonus tomo 5. diſſert. 2. cap. 1. Eſt tamen D. Thomæ hic quaſt. 109. art. 1. vbi ſic ait: *Ad cognitionem cuiuſcumque veri homo indiget auxilio diuino, vt intellectus à Deo moueatur ad ſuum actum, non autem indiget ad cognoſcendam veritatem, in omnibus, nouit.*

*lustratione superaddita naturali illustrationi, sed in quibusdam quæ excedunt naturalem cognitionem.*

Respondent Aduersarij, D. Th. his verbis solum excludere necessitatem nouæ illustrationis superadditæ lumini naturali intellectus humani, non tamen necessitatem auxilij Dei specialis, distincti à generali eius concursu.

Sed contra: Licet Diu. Thomas loco citato asserat hominem indigere auxilio Dei ad cognitionem cuiuscumque veritatis, nomine tamen auxilij diuini, non intelligit donum speciale gratiæ actualis; sed generalem duntaxat concursum primæ causæ cum omnibus causis secundis; loquitur enim de auxilio Dei communi intellectui, & cœteris agentibus creatis, vt constat manifestè ex eo quod immediate ante verba citata comparet intellectum humanum cum alijs agentibus creatis, quantum ad indigentiam auxilij diuini, quod appellat *motionem ad agendum*; auxilium autem Dei, commune intellectui, & alijs causis secundis, non est speciale, sed generale, vt constat; asserit ergo S. Doctor, intellectum hominis, cum solo concursu Dei generali, absque dono speciali gratiæ, etiam actualis, & naturalis ordinis, aliquas veritates naturales posse cognoscere.

Confirmatur D. Thom. ait quod *ad cognitionem cuiuscumque veri indiget homo auxilio diuino*; Sed homo non indiget auxilio speciali gratiæ, etiam actualis, & naturalis ordinis, ad cognitionem cuiuscumque veri ordinis naturalis, v. g. ad cognitionem primorum principiorum, quia habet à natura insitam,

vt de se patet: Ergo D. Thom. non loquitur de speciali Dei auxilio, non solum de concursu, & auxilio generali.

Confirmatur ampliùs ex alio eiusdem S. Doctoris testimonio, desumpto ex 2. sentent. dist. 28. qu. 1. art. 5. in argumento sed contra, in quo sic concludit: *Ergo intellectus sine omni gratia superaddita, veri cognitionem habere potest.* Vbi per verba illa, *sine omni gratia*, excludit necessitatem, cuiuscumque gratiæ, siue habitualis, siue actualis; siue ordinis naturalis, siue supernaturalis, ad cognoscendas veritates naturales. Vnde 1. p. q. 93. art. 3. sic ait: *Omnia illa quæ virtualiter existunt in primis principijs per se notis, naturaliter homines cognoscere possunt.*

Potest insuper eadem pars probari hac ratione quam idem S. Doctor loco citato insinuat. Qualibet creatura potest, cum solo generali Dei concursu, actus sibi connaturales & proportionatos elicere, vt sol illuminare, ignis calefacere, visus colores, & auditus sonos percipere: Ergo similiter intellectus, cum eodem concursu, & sine auxilio Dei speciali, potest cognoscere veritates naturales, quæ ex primis principijs per euidentem consequentiam possunt deduci, & ex sensibilibus cognosci, cum naturaliter habeat (inquit S. Doctor) *intelligibile lumen quod est de se sufficiens ad aliqua intellegibilia cognoscenda, ad ea scilicet in quorum notitiam per sensibilia possumus deuenire.* Alioquin (vt ait idem Doctor Angelicus in 2. dist. 28. quæst. 1. art. 5.) *Natura humana alijs imperfectior esset, quæ non sibi sufficeret in naturalibus operationibus, & intel-*

Intellectus esset deterioris conditionis, quàm aliarum formarum, & potentiarum naturales; cum tamen sit illis perfectior & actiuior, utpote immaterialior.

Respondet Contentsonus supra citatus, duplex inter intellectum & cœteras formas & potentias naturales discrimen reperiri. Primum est, quod cœterarum formarum, & potentiarum naturales, non sunt ullo vulnere sauciatae, sicut intellectus per peccatum originale manet vulnere ignorantiae latus. Secundum, quod aliarum formarum & potentiarum, non sunt indifferentes, sed determinatae ad sua obiecta; intellectus verò ad verum & falsum indifferens est, unde quod determinetur ad verum potius quam ad falsum, indiget auxilio Dei, intra ordinem naturalem specialem.

Sed contra primò: Etsi per peccatum originale lumen naturale intellectus nostri fuerit latus, siue attenuatum, non tamen fuit totaliter extinctum, ut de fide certum est: Ergo cum solo generali Dei concursu plures veritates naturales, saltem ex facilioribus, & per se notis, vel quæ ex primis principijs per euidentem consequentiam possunt deduci, cognoscere potest. Patet consequentia, nam lumen attenuatum, etsi non intensè, potest tamen lucere; & homo ægrotus potest aliquos passus elicere, etsi non sicut homo sanus: item potentia visiva, quantumcumque lassa & debilitata, dummodo non sit totaliter extincta, potest absque speciali Dei auxilio, plura obiecta videre, ea præsertim quæ maximè visibilia sunt.

Confirmatur: Voluntas hominis magis est lassa per peccatum originale, quàm eius in-  
rel-

tellectus: magisque indifferens ad bonum & malum, quam ille ad verum & falsum, & tamen non obstante hac plaga, & indifferentia, voluntas humana in statu naturæ lapsæ potest sine gratia, seu auxilio Dei speciali, elicere plures actus honestos & moraliter bonos, ut colere parentes, succurrere egenis, &c. ut capite sequenti contra prædictum Authorem ostendemus: Ergo à fortiori intellectus, non obstante vulnere ignorantia, per peccatum originale inflicto, & indifferentia quam habet ad verum & falsum, cum solo generali Dei concursu, plures veritates naturales cognoscere potest.

Addo quod, sicut voluntas, ex sua naturali inclinatione propensa est in bonum honestum, ita intellectus naturaliter inclinatur in verum sibi proportionatum; unde falsitas est contra eius naturam, sicut peccatum dicitur esse contra naturalem inclinationem hominis: Ergo sicut voluntas ratione propensionis naturalis, quæ habet ad bonum honestum, potest naturaliter, & secluso speciali Dei auxilio, plures actus honestos & moraliter bonos elicere; ita & intellectus plures veritates naturales cognoscere.

Quod verò singulas cognoscere possit, hac ratione suaderetur: Maxima, & difficilissima veritatum naturalium cognitio est illa quæ habetur de Deo ex effectibus naturalibus, utpote quæ sit de obiecto maximè immateriali, & à sensibus remoto: Sed in statu naturæ lapsæ potest diuinitas, naturaliter ex creaturis ab homine cognosci, ut constat ex illo ad Rom. 1. *Inuisibilia Dei per ea quæ facta sunt, intellecta conspiciuntur.* & ex illo Sapie. 13. *A magnitudine*

dine speciei & creatura cognoscibiliter poterat horum creator videri: Ergo à fortiori quacumque alia veritas naturalis, illi inferior, poterit naturaliter, seu absque auxilio Dei speciali cognosci.

Quod autem non valeat homo in statu naturæ lapsæ, totam veritatum naturalium collectionem, sine gratia, seu auxilio speciali attingere, ostenditur contra Caietanum. Potentia infirma & vulnerata non potest præstare totum id quod facere potest potentia sana, & integra: Sed attingere omne verum speculabile, nedum diuini, sed etiam collectiue, est actus potentie intellectiue sanæ & integræ. Ergo intellectus hominis lapsi, vulnere ignorantie affectus, non potest, nisi sanetur per gratiam, seu speciali auxilio confortetur, totam veritatum naturalium collectionem attingere.

Confirmatur: Voluntas propter vulnus malitiæ non potest omnia præcepta legis naturæ collectiue sumpta adimplere, vt infra patebit: Ergo pariter intellectus, propter vulnus ignorantie, non poterit omne verum collectiue cognoscere.

Responder Caietanus, vulnus ignorantie ex peccato originali, proueniens, esse tantum in intellectu practico, non autem in speculativo, subindeque non impedire quod homo in statu naturæ lapsæ omne verum speculativum collectiue attingat, sed solum omne verum practicum, seu ad operationem ordinatum.

Sed contra: D. Thomas 4. contra Gent. cap. 52. dicit quod inter spirituales penas culpe originis, potissima est debilitas rationis;

ex qua contingit quod homo difficulter pervenit ad veri cognitionem; & de facto labitur in errorem, & appetitus bestiales omnino superare non potest, sed multoties obnubilatur ab eis. Quibus verbis primò constituit vulnus ignorantie in intellectu speculativo, & deinde in practico, quatenus non potest bestiales superare appetitus. Et in hac parte supra quaest. 85. art. 3. ad calcem corporis articuli ait: *Per peccatum ratio habetur præcipue in agendis.* Vbi ly *præcipue* denotat rationem hebetari etiam in speculabilibus, licet minùs principaliter. Unde hic art. 2. ad 3. asserit quod *magis natura humana corrupta est per peccatum, quantum ad appetitum boni, quam quantum ad cognitionem veri.* Ergo iuxta D. Thom. vulnus ignorantie ex peccato originali proveniens, non est tantum in intellectu practico, sed etiam in speculativo.

Probatur secundò eadem tertia pars assertionis hoc discursu: Ad agendum non solum requiritur potentia physica, sed etiam moralis & expedita, seu ab omnibus impedimentis libera: At in homine lapsa, licet sit potentia physica ad totam veritatum ordinis naturalis collectionem, eò quod illæ contineantur in linea entis sensibilis, quod est obiectum proportionatum nostri intellectus, pro statu coniunctionis cum corpore; non tamen potentia moralis & expedita, cum in statu naturæ lapsæ plura sint impedimenta, quibus quasi ligatur, & impeditur, ne possit totam illam collectionem attingere, nimirum brevitatis vitæ, indispositio corporis, hebetudo sensuum, rebellio & perturbatio passionum, soli-



licitudo frequens circa temporalia, & similia, quæ insinuari videntur verbis illis. Sapient. 9. *Corpus quod corrumpitur, aggrauat animam, & terrena inhabitatio deprimit sensum multa cogitantem*: Ergo non potest homo in statu naturæ lapsæ, sine speciali Dei auxilio, totam veritatum naturalium collectionem attingere.

## S. II.

*Soluantur obiectiones.*

Obijcies primò contra primam partem assertionis: SS. Patres interdum asserunt, omnem nostram cognitionem descendere à Patre luminum, & omne verum, à quocumque dicatur, esse à Spiritu Sancto: Ergo censent neminem, siue speciali Dei gratia, posse ullam veritatem cognoscere. Vnde Deum orabant ad illam obtinendam, vt constat de S. Thoma, qui hanc precandi formam studiis suis præmittere solebat. *Creator ineffabilis, qui verus fons luminis & sapientiæ diceris, infunde super intellectus mei tenebras: radium tuæ claritatis, duplicem à me remouens: priuationem, & tenebras, peccatum scilicet & ignorantiam, &c.*

Respondeo vel SS. Patres loqui de cognitione aliquo modo supernaturali, & ad salutem conducente, quam fateamur non haberi sine gratia; vel solum indicare scientiam & cognitionem veritatum naturalium, manare à Deo vt authore naturæ, & per concursum generallem, intellectum mouentem ad verum intelligendum, vt exposuit S. Thomas quaest. 24. de

verit. art. 14. in resp. ad argumentum sed contra & hic art. 1. ad 1. his verbis. *Ad primum dicendum quod omne verum à quocumque dicatur est à Spiritu Sancto, sicut infundente naturale lumen, & mouente ad intelligendum & loquendo veritatem, non sicut ab in habitante per gratiam.*

Ad illud quod subditur de oratione, dicendum est, quod D. Thomas, & alij sancti, vel postulabant à Deo in oratione notitiam veritatum supernaturalium, vel remotionem impedimentorum, ad hoc ut plenius, clariùs, ac faciliùs cognoscerent veritates naturales. Addo nos posse pro veri assecutione orare, quando illa habet aliquid fallibilitatis & contingentiae, sicut ob eandem rationem oramus pro pluuia & serenitate obtinenda. De quo fusiùs capite sequenti.

Obijcies secundo contra secundam partem: Voluntas ratione vulneris à peccato originali contracti, impotens moraliter mansit ad aliqua opera moraliter bona ordinis naturalis, verbi gratia ad diligendum Deum ut authorem naturae; vel ad superandam grauem tentationem contra praecepta naturalia; unde non potest talia opera, sine gratia, seu speciali auxilio ordinis naturalis exercere, ut infra patebit. Ergo similiter intellectus, ob vulnus ignorantiae, nisi simili auxilio roboretur, non poterit singulas veritates naturales cognoscere.

Respondeo, concessio Antecedente, negando consequentiam & paritatem. Ratio discriminis est, quia etsi utraque potentia per peccatum vulnerata remanserit: diuersimodè tamen; intellectus enim non fuit vulneratus circa primam  
prin-

principia, ex quibus ad conclusionēs cognoscendas procedit, sed solum in extrinsecis quæ intellectui deferuiunt, puta quia sensus externi fuerunt debilitati, vita abbreviata, & plures necessitates ad illam debitè conseruandam contraximus. Voluntas autem vulnerata fuit erga finem, qui est principium in operabilibus, quatenus per culpam originalem à fine ultimo mansit auersa; vnde non mirum quod debilitate intrinsecè in principio rectè operandi, à quo omnis eius motio incipit, non possit aliqua opera moraliter bona ordinis naturalis, ob illorum difficultatem, sine auxilio speciali, exercere, bene tamen intellectus singulas veritates naturales cognoscere.

Obijcies tertio cum Caietano contra tertiam partem assertionis: *Vulnus ignorantiae ex peccato originali proueniens, non afficit intellectum speculatiuum, sed duntaxat practicum*: Ergo homo in statu naturæ lapsæ potest absque auxilio speciali omnes veritates speculatiuas collectiue sumptas cognoscere. Consequentia patet ex supra dictis, Antecedens verò probat Caietanus ex Diu. Thoma supra qu. 85. art. 3. vbi assignando potentias quæ per peccatum vulneratæ remanserunt, asserit vnā ex illis esse *rationem in qua est prudentia*: id est ( vt interpretatur idem Author ) *rationem prout subest prudentiæ*: Sed ratio, prout subest prudentiæ, est practica & non speculatiua: Ergo ex D. Thoma solus intellectus practicus per peccatum originale vulneratus est.

Respondeo negando Antecedens, & ad illius probatio nem dico, glossam illam Caietani

tani non esse bonam, nec textui consonam, nam S. Doctor ibidem ait, vulneratam fuisse voluntatem, in qua est iustitia, & tamen ex hoc inferre non licet, voluntatem solum accepisse vulnus malitiæ, prout iustitiæ subest; nam verba illa non faciunt sensum reduplicatium, sed specificatium. Cum ergo dicit, vulneratam esse rationem, in qua est prudentia, solum vult, rationem practicam in qua residet prudentia, præcipuè vulneratam fuisse, vt expressè tradidit ad finem corporis eiusdem articuli, verbis istis quæ supra retulimus: *Per peccatum ratio hebetatur, præcipuè in agendis.*

Obijcies quartò: quælibet creatura potest cum solo concursu generali exire in actum, suæ formæ, siue virtuti naturali proportionatum, vt docet D. Thomas hic art. 1. Sed cognoscere omnes veritates naturales collectiue, est actus proportionatus lumini naturali intellectus nostri, etiam in statu naturæ lapsæ, cum illa habeat pro obiecto proportionato ens sensibile, seu cognoscibile per species à sensibus ministratas, sub quo omnes veritates naturales continentur, cum per eas (vt supra declarauimus) illas tantum intelligamus quæ ex sensibus cognosci possunt: Ergo potest homo in statu naturæ lapsæ omnes veritates naturales collectiue cognoscere.

Respondeo distinguendo Maiorem: quælibet creatura potest cum solo concursu generali exire in actum suæ formæ siue virtuti proportionatum, proportionem tam morali, quam physica, concedo maiorem. Proportionem tantum physica, nego maiorem. In statu autem

tem naturæ lapsæ; licet collectio omnium veritatum naturalium sit proportionata intellectui humano; proportionem physicam, non tamen moralem, ob plura impedimenta extrinseca, supra adducta, quibus in tali statu potentia cognoscitiua ligatur, & impeditur ne exeat in actum suæ virtuti proportionatum.

Dices, non obstantibus illis impedimentis, potest homo singulas veritates naturales cognoscere: Ergo & omnes collectiue, cum à singulis enumeratis ad omnia simul ascendendo valeat consequentia; ut si dicatur hic homo est risibilis, & ille, & iste, & sic discurrendo per singulos: Ergo omnis homo est risibilis, vel omnes homines collectiue sumpti sunt risibiles.

Respondeo, concessio Antecedente, negando consequentiam, & ad eius probationem dico, modum arguendi à singulis ad omnia simul ascendendo, esse bonum, quando consequens eodem modo sumitur ac antecedens, secus verò si alio modo sumatur: v.g. si dicerem, hic equus separatus ab alio non potest trahere currum, nec ille, nec iste. Ergo nec omnes equi simul & collectiue sumpti, non valeret discursus, quia procederetur à sensu diuisiui ad collectiuium. Ita similiter, quamvis hæc argumentatio sit bona: potest intellectus hanc, & illam, & istam veritatem, enumerando omnes diuisiue, cognoscere, ergo & omnes similiter diuisiue. Ista tamen non valet, intellectus potest hanc, & illam, & istam veritatem cognoscere diuisiue, ergo & omnes collectiue; quia idem committitur defectus, & arguitur à sensu diuisiui ad collectiuium.

Dices

Dices rursus; intellectus, cum sit potentia spiritualis, quo plures veritates cognoscet, eò sit potentior ad alias cognoscendas: Ergo tandem poterit ad totam veritatum naturalium collectionem peruenire.

Respondeo quod licet intellectus quò plura cognoscit, eò fiat ad alia cognoscenda, potentior in seipso, in sibi tamen adiunctis & subseruientibus, puta sensibus corporeis, debilitatur, & fatigatur, subindeque ob illud impedimentum, & alia similia supra recensita, non potest totam naturalium veritatum collectionem attingere.

Quæres, an homo in statu naturæ lapsæ possit sine auxilio speciali, non solum singulas veritates naturales speculatiuas; sed etiam practicas cognoscere?

Respondeo quod quamuis intellectus humanus sine speciali auxilio possit cognoscere singulas veritates practicas naturales, quæ pertinent ad Philosophiam moralem, & quæ sunt principia vel conclusiones illius, quia eadem est ratio de illis ac de speculatiuis, non tamen omne verum practicum ad prudentiam pertinet; cum enim homo in statu naturæ lapsæ, per peccatum originale à Deo ut sine naturali, & supernaturali aduersus sit, non potest sine gratia, vel auxilio speciali, formare hoc iudicium practicum & prudentiale: *Hic & nunc Deus ut author naturæ est super omnia diligendus*: Tum quia tale iudicium dependet à rectitudine appetitus: Tum etiam quia est semper coniunctum cum executione, & habet rationem imperij practici: in statu autem naturæ lapsæ homo non potest sine auxilio

xilio speciali Deum , etiam vt authorem naturæ , super omnia diligere , vt capit. 3. ostendimus .

### §. III.

*Ad cognoscendas veritates supernaturales , & assentiendum mysterijs nostræ fidei , non sufficit externa reuelatio , sed necessario requiritur gratia interna , non solum in intellectu , sed etiam in voluntate.*

Prima pars est certa de fide contra Pelagianos , docentes , supposita externa reuelatione , seu doctrina , posse hominem sine speciali gratia intrinseca credere mysteria fidei . In quo errore fatetur Augustinus lib. de prædestin. Sanct. cap. 3. se fuisse ante Pontificatum , illūque varijs Scripturæ testimonijs ibidem retellit , præsertim verbis illis Apostoli 1. ad Corinth. 4. *Quid habes quod non accepisti ? Si autem accepisti , cur gloriaris quasi non acceperis ?* Quibus dicit se fuisse conuictum ac permotum ad retractandum quod ante Pontificatum docuerat . Item vrget Pelagianos ex verbis eiusdem Apostoli immediate præcedentibus , *Quis enim te discernit ?* Si enim ( inquit ) fides esset in nobis ex nobis , quilibet fidelis dicere posset : fides mea , quam non ex gratia , sed ex me ipso habeo , me discernit . Vrg et etiam ipsos ex illo 2. ad Corinth. 3. *Non sumus sufficientes cogitare aliquid ex nobis quasi ex nobis .* Minus enim est cogitare quam credere , nam credere est cogitare cum assensu ; Si ergo non possumus ex nobis co-  
gi-

gitare veritates supernaturales, multò minus eas possumus credere.

Ratio etiam id suadet, assensus enim fidei quo prædictis veritatibus assentimur, est supernaturalis, cùm illas sub motiui, seu ratione formali sub qua supernaturali, nempe lumine diuinæ reuelationis, attingat: Ergo est improporcionatus viribus naturalibus intellectus subindeque indiget eleuatione & gratia ipsi intrinseca, ad illum eliciendum.

Quod verò non solum in intellectu, sed etiam in voluntate, requiratur auxilium supernaturale, etiam de fide certum est, contra Semipelagianos qui licet cum Ecclesia Catholica faterentur, nos non posse credere mysteria reuelata sine gratia, contendebant tamen initium fidei esse à nobis, scilicet piam affectionem ad credendum, seu quemdam credulitatis affectum. Qui error proscribitur in Concilio Arausicano can. 9. his verbis: *Si quis sicut augmentum, ita & initium fidei, ipsumque credulitatis affectum, non per gratie donum, sed naturaliter nobis inesse dicit, Apostolicis dogmatibus aduersarius probatur, &c.*

Ratio etiam suffragatur, nam ad credendum ex motiui supernaturali requiritur pia motio seu affectio voluntatis, quæ efficaciter moueat, & determinet intellectum ad assentiendum veritatibus ipsis reuelatis: Ergo etiam requiritur auxilium supernaturale ex parte voluntatis. Patet consequentia, quia voluntas suis viribus solis, non potest mouere efficaciter ad actum supernaturalem, cuiusmodi est credere ex motiui supernaturali. An-



recedens verò probari solet in tractatu de fide, ex eo quod veritates supernaturales in hoc differunt à naturalibus, quod istæ habent euidèntiam vel ex seipsis, vel ex medio per quod illuminantur, ratione cuius euidèntiæ conuincunt intellectum, & ab eo quasi extorquent consensum, absque eo quod sit necessarium eum à voluntate ad talem actum applicari, saltem applicatione libera: illæ verò nullam habent euidèntiam, ratione cuius earum certitudo penetrari possit ab intellectu, subindeque quantumcumque proponatur, non conuincunt intellectum, nec ipsum trahunt ad præbendum consensum, sed necessarium est, vt à voluntate specialiter applicetur ad huiusmodi assensum. Vnde bellè Augustinus tract. 36. in Ioan. *Intrare quisquis in Ecclesiam potest nolens, accedere ad altare potest nolens; sed credere non potest nisi volens.* Hæc vero applicatio, pia motio, seu affectio voluntatis communiter appellatur, & de illa intelligi potest id quod dicitur Actor. 16. de quadam Lidia purpuraria, nempe quod *Deus aperuit eius cor intendere his quæ dicebatur à Paulo;* nam ibi per tot significatur voluntas, quæ prius à Deo tangi & imitari debet per auxilium gratiæ, quam intellectus præbeat assensum veritatibus reuelatis.

Confirmatur: Illa pia affectio voluntatis habet obiectum supernaturale: Ergo est supernaturalis, subindeque auxilium supernaturale pro principio formali exposcit. Vtraque consequentia patet, nam ex supernaturalitate obiecti formalis, rectè colligitur supernaturalitas auxilij; & principij. Antecedens verò proba-

batur: Obiectum volitum à pia affectione est ipse actus fidei formaliter: Sed ille est supernaturalis: Ergo pia illa affectio habet obiectum supernaturale.

Obijcies primò contra primam partem assertionis difficile Augustini testimonium, desumptum ex libro de bono perseuer. ca. 14. vbi loquens de Tyrijs, & Sydonijs, qui visis Christi miraculis credidissent, vt dicitur Matth. 11. subdit: *Ex quo apparet habere quosdam in ipso ingenio diuinum naturaliter munus intelligentiæ, quo inducantur ad fidem, si congrua suis mentibus vel audiant verba, vel signa conspiciant.* Quibus verbis docere videtur, aliquos ex solo naturali munere intelligentiæ, absque vilo interiori dono gratiæ quo præueniantur, posse moueri ad fidem, & credere mysterijs reuelatis.

Respondeo, duplicem esse, eamque verissimam, huius loci intelligentiã. Prima est quod per naturale lumen intelligentiæ. S. Augustin. non intelligat quid naturale, sed intelligat munus naturaliter diuinum, id est natura sua diuinum, & supernaturale, ad intelligendum: hoc enim modo explicat ipsemet Augustinus, relatus à S. Th. illud Apostoli, *Gentes naturaliter, quæ legis sunt faciunt*, dicens: *Non te moueat, quod naturaliter dixit eos quæ legis sunt facere, hoc enim agit Spiritus gratiæ, vt imaginem Dei in qua naturaliter facti sumus instauret in nobis.*

Secunda quæ magis litteralis, & textui magis consona videtur, est ibi loqui S. Augustinum de motione ad fidem tantum obiectiua; ita quod solum velit, quosdam habere naturale

rale minus intelligentiæ tale, quod eadem miracula, & eadem exterior prædicatio Evangelij, sunt magis congrua naturali illorum ingenio quam ingenio aliorum, ad mouendos ipsos solum exterius & obiectiue, quia illos alliciunt & exterius inuitant obiectiue magis quam alios; non tamen quod illa sola signorum visio exterior, de facto illos ad fidem trahat, ita vt de facto per illam solam credant. Hanc esse mentem Augustini constat ex verbis subiunctis, statim enim subdit: *Et tamen si Dei aliteri iudicio à perditionis massa non sunt gratiæ prædissinatione discreti, nec ipsa eis adhibentur vel dicta diuina vel facta, per que possunt credere, si audirent utique talia vel viderent.*

Obijcies secundò contra secundam partem assertionis: Si ad credendum requiratur auxilium supernaturale ex parte voluntatis, sicut requiritur ex parte intellectus, sequitur quod sicut in intellectu præter auxilium actuale ponitur habitus supernaturalis fidei, quo inclinatur permanenter ad credendum; ita sit ponendus aliquis habitus supernaturalis in voluntate, quo illa quoque permanenter inclinetur ad imperandum actum fidei: Sed hoc videtur absurdum: Ergo & illud. Maior videtur vera, cum eadem sit ratio de habitu ac de auxilio, & de voluntate ac de intellectu. Minor verò suadetur: Talis habitus supernaturalis in voluntate receptus, nec erit virtus theologia (cum virtutes theologiæ sint tantum tres, nimirum fides, spes & charitas) nec moralis infusa: quia virtutes morales infusæ amittuntur per peccatum mortale cum ipsa gratia à qua.

qua emanant ; si verò talis habitus daretur in voluntate, ille in peccatore remaneret , sicut fides, cum peccator actum fidei informis elicere possit: Ergo talis habitus in voluntate admittendus non est.

Respondeo primò negando sequelam maioris, sicut enim in naturalibus ad opera artis efficienda, ponitur habitus in solo intellectu, non autem in voluntate , quamvis ipse & instrumenta debeant à voluntate moueri : ita ad assentiendum mysterijs reuelatis non est ponendus habitus in voluntate, sed in solo intellectu; licet intellectus assensum fidei non eliciat , nisi applicatus à voluntate, sed sufficit quod voluntas ad hanc applicationem per actuale auxilium eleuetur. Ratio verò disparitatis inter intellectum, & voluntatem , quantum ad actum fidei, est quia intellectus est elicitiuus immediatè actus fidei , & ideò in eo est formalis & immediata difficultas , quæ debet superari per habitum ; voluntas verò mediatè solum & applicatiuè ad illum concurrat, & ideò habitum non eget.

Respondeo secundò , data sequela maioris , negando minorem. Ad cuius probationem dicendum est, talem habitum in voluntate receptum, nec esse propriè virtutem moralem, nec theologicam, sed reductiuè pertinere ad virtutem theologicam, scilicet ad fidem, vt via & dispositio ad illam. Vtraque solutio probabilis est, licet prima videatur probabilior , & faciliior, Sed de hoc fusiùs in tract. de fide c. 7.

## CAPUT II.

*De necessitate gratiæ ad volitionem, & operationem boni.*

**C**ertum de fide est contra Pelagianos, & Semipelagianos, non posse hominem lapsum absque gratiæ auxilio, quidquam cogitare velle, aut facere, quod conducat ad vitam æternam; hoc enim euidenter docet Scriptura Ioa. 6. *Nemo potest venire ad me nisi Pater qui misit me traxerit eum,* & 15. *Sine me nihil potestis facere* 1. Corinth. 12. *Nemo potest dicere, Dominus Iesus, nisi in Spiritu Sancto.* Idem constat ex definitionibus Arausicani can. 7. & Tridentini sess. 6. can. 1. 2. & 3: Ratio etiam id suadet, cum enim vita æterna sit quid supernaturale, excedens omnem naturæ creatæ & creabilis exigentiam, media ei proportionata debent esse supernaturalia, adeoque omnes naturæ vires excedentia. Solùm ergo difficultas esse potest, an homo pariter gratia indigeat ad volendum, & operandum bonum morale ordinis naturalis, seu ad eliciendos actus honestos, & moraliter bonos, quales sunt colere parentes, subuenire egenis, prudenter gubernare rempublicam, reddere unicuique quod suum est: vel ad id sufficiat vis naturalis liberi arbitrij, seu inclinatio illi à natura insita ad bonum honestum, quæ per peccatum originale omnino extincta non est, sed duntaxat imminuta, ac debilitata?

In cuius celeberrimæ difficultatis resolutione, variè opinantur Authores: Quidam enim  
ad

ad quoduis honestatis opus, gratia habitualis inflixi, & charitatis imperium desiderant, ut Michael Baius. Alia cum Iansenio inflixi, saltem fidei, Christianæ necessario exigunt. Alij gratiam quandam actualem auxiliantem necessariam esse existimant. Ita Gregorius Ariminensis, & Vasquez, quos ex nostris sequitur Vincentius Contensonus in sua Theologia mentis & cordis. Thomistæ demum, & alij communiter, docent ad id sufficere vires liberi arbitrij, cum generali Dei concursu.

## §. I.

*Confutantur tres primæ sententiæ, & quarta statuitur.*

Dico primò, ad opus morale ordinis naturalis, non requiritur gratia habitualis, nec charitatis imperium.

Prima pars videtur esse de fide, colligitur enim manifestè ex Tridentino sess. 6. can. 7. ubi anathema dicitur ei qui dixerit, omnia opera quæ ante iustificationem fiunt, verè esse peccata. Et can. 8. damnatur ille qui dixerit metum gehennæ esse malum: Sed hic metus reperitur in peccatoribus ante adeptam gratiam iustificationis: Ergo ex Tridentino quæcumque fiunt à peccatoribus, ante adeptam iustificationem, non sunt mala Unde Scriptura hortatur peccatores ad eleemosynam, & alia bona opera, quod non faceret, si illa non possent fieri à peccatore, sine permixtione peccati; aitque Danielis 4. Nabuchodonosori, *Peccata tua eleemosynis redime*

constat autem operibus malis peccata redimi non posse. Denum Augustinus de Spir. & litter. capit. 24. hæc scribit: *Sicut non impediunt à vita æterna iustum quadam peccata venialia, sine quibus hæc vita non ducitur; sic ad salutem æternam nihil proficiunt aliqua bona opera, sine quibus diffici limè vita cuiuslibet hominis pessimi inuenitur*: Quibus verbis apertè declarat, quod sicut fragilitas humana, vi prorsus ineluctabili, implicat sæpe peccatis nonnullis venialibus quantumlibet iustum; ita lumen vultus Domini, naturaliter inditum homini, atque inextinguibilis boni & æqui ratio, assidue sollicitans animum, extorquet frequenter à quouis pessimo lenià nonnulla & facilia bona opera naturalia, nullius permixtione mali aut intentionis nequam vitiata. Vnde Chrysostomus homil. 67. ad populum: *Non potest malus omnino malus esse, sed euenit ut aliquid habeat boni, neque bonus esse omnino bonus, sed nonnulla solet habere peccata*.

Ex his probata manet secunda pars: cum enim charitas sit inseparabilis à gratia habitualis, si absque eius influxu possit elici à peccatoribus non iustificatis aliquod opus honestum & moraliter bonum: illud pariter, absque motione, & imperio charitatis, ab illis effici posse manifestum erit.

Addo quod in hoc distinguitur bonitas moralis nostrorum actuum, à bonitate illorum supernaturali, & meritoria vitæ æternæ, quod prima, cum sit purè naturalis, constituitur absque habitudine ad finem supernaturalem, per solam conformationem quam actus habet cum  
recta

recta ratione & prudentia naturali; secunda  
 verò procedit ex influxu gratiæ & charitatis,  
 actus nostros in finem supernaturalem refe-  
 rentis; unde licet homo sine charitate non pos-  
 sit elicere actus moraliter bonos ordinis su-  
 pernaturalis, & meritorios vitæ æternæ, bene  
 tamen actus honestos & moraliter bonos or-  
 dinis naturalis, ver. gr. colere parentes, obedire  
 superioribus, subuenire egenis, iste enim actus  
 ex fine proximo, seu obiecto, habent honesta-  
 tem seu bonitatem moralem; unde vt sint mo-  
 raliter boni, non est necesse quod illam à fine  
 extrinseco & imperio charitatis participant.  
 Alioquin si quodlibet opus honestum & mora-  
 liter bonum, deberet fieri ex motiui charitatis,  
 sequeretur nullam dari virtutem, præter cha-  
 ritatem, cui soli competit operari propter ta-  
 le motiuum: quod Scripturæ & SS. Patribus,  
 qui plures alias virtutes agnoscunt & com-  
 mendant pluribus locis, manifestè repugnat.  
 De quo fusiùs in Tractatu de Virtutibus in  
 communi cap. 6.

Dico secundò, ad eliciendum opus hone-  
 stum & moraliter bonum, naturali honestate  
 & bonitate, non requiritur fides.

Probatur primò: In infidelibus dantur ali-  
 qua opera honesta & moraliter bona; Ergo ad  
 illa non requiritur fides in operante, sed suffi-  
 cit lumen naturale rationis. Consequentia pa-  
 tet, Antecedens probatur ex Scriptura, quæ va-  
 rijs in locis refert aliqua infidelium opera fuisse  
 a Deo remunerata. Nam Exodi 1. ait Deum  
 remunerasse obstetrices Ægyptias, ob benefi-  
 cium ab eis præstitum Israelitis, & ædificasse  
 illis domos, Et Ezechiel. 29. Nabuchodonozor



dicitur sui operis mercedem à Deo accepisse. Ex quo ( inquit Hieronymus ) intelligimus, etiam Ethnicos, si quid operis boni fecerint, non absq; e mercede, Dei iudicio præteriri. Vnde Augustinus lib. 5. de ciuit. Dei, cap. 15. asserit Deum dedisse Romanis amplum imperium; vt eorum virtutes in hac vita remunerationem aliquam haberent: Atqui Deus non remuneratur opera mala & puerua, sed tantum bona & honesta: Ergo in infidelibus dantur aliqua opera honesta & moraliter bona, & in libro de spiritu & littera capit. 27. ait esse quadam facta infidelium à gratia Christi alienum, quæ secundum iustitiæ regulam, non modo vituperare non possumus, verum etiam meri recteque laudamus, &c. Quare epist. 130. laudat continentiam Polemonis ethnici, & ait illam fuisse donum Dei.

Respondet Iansenius, his & similibus testimonijs solum probari, dari in infidelibus aliqua opera bona ex officio, seu ex obiecto, non autem ex parte finis.

Sed contra primò; Scriptura, Hieronymus, & Augustinus, locis citatis testantur, aliqua infidelium opera fuisse à Deo remunerata: At si illa fuissent bona solum ex obiecto, & mala ex parte finis, seu mala ex intentione & affectu operantis, non fuissent remunerata à Deo; cum talia opera non mercedem sed poenam mereantur Ergo Scriptura & SS. Patres citati, sentiunt illa fuisse bona, non solum ex officio, seu ex obiecto, sed etiam ex fine operantis.

Contra secundò: Augustinus citatus ait opera aliqua infidelium esse adeò bona, vt secundum

*dum iustitiæ regulam merito rectè quæ laudanda sint: Sed iustitiæ regula attendit præcipuè ad finem & intentionem operantis, & operantem actum bonum ex mala intentione, non dignum laude sed vituperio censet: Ergo Augustinus sentit dari in infidelibus aliqua bona opera, non solum ex obiecto quod respiciunt, sed etiam ex fine & intentione qua fiunt. Nec obstat quod idem S. Doctor ibidem de illis infidelium operibus subiungat; Quamvis si discutiatur quo fine fiant, vix inveniuntur quæ iustitiæ debitam laudem mereantur. Nam particula vix, non significat talia bona opera nunquam in infidelibus reperiri, sed tantum raro & difficulter in ipsis inveniiri, quia illi plurimum ex aliquo pravo motivo, præsertim ex vana gloria, operantur, ut infra dicemus.*

Contra tertio: Idem S. Doctor epist. 99. ad Euodium asserit dari in infidelibus aliqua opera adeò bona, ut merito proponantur imitanda: Sed opera bona solum ex obiecto, & mala ex fine operantis, cum sint vera peccata, non debent proponi ut imitanda, sed potius ut detestanda; aliocuius posset proponi ut imitandus ille qui daret ele. mosynam foeminae indigenti, ex intentione eam inducendi in peccatum, quod est absolutum: Ergo, &c.

Probatur secundò conclusio ex D. Thoma, qui apertè fauet nostræ sententiæ. Nam super cap. 14 epistolæ ad Roman. lect. 1. sic ait: *Cum aliquis infidelis ex dictamine rationis aliquod bonum facit, non referendo ad malum finem, non peccat. Non tamen opus eius est merito, quia non est gratia informatum.* Et super

per cap. 1. epistolæ ad Titum exponens hæc verba Apostoli; *Coinquinatis autem & infidelibus nihil est mundum*, subdit; *Quando peccator facit aliquod bonum, secundum quod est peccator & infidelis totum est peccatum ex radice: sed si quis facit ex principio alicuius boni quod habet, ut fidei informis, vel naturæ, non est immundum*. Item 2. 2. quæst. 10. art. 4. quærit, *utrum omnis afflictio infidelis sit peccatum*. Et respondet negativè: *Quia* (inquit in resp. ad 3:) *per infidelitatem non corrumpitur totaliter in infidelibus ratio naturalis, quin remaneat in ipsis aliqua veri cognitio, per quam facere possunt aliquod opus de genere bonorum*. Quam rationem insinuat S. Augustinus de spiritu & litt. cap. 28. his verbis: *Veruntamen quia non usque adeo in anima humana, imago Dei terrenorum affectuum labe detrita est, ut nulla in ea velut lineamenta extrema remanserint, unde meritiò dici possit, etiam in impietate vitæ suæ facere aliqua legis, vel sapere*.

Probatur tertiò conclusio conuellendo præcipuum fundamentum Iansenij; idcirco enim ille existimat omnia infidelium opera esse peccata, quia opera sua, ex officio seu obiecto bona, vel in praviū infidelitatis suæ finem referunt, vel saltem in verum finem Deum quem ignorant; referre omittunt; unde illa sunt mala, vel ex appositione pravi finis, vel ex omissione debiti: Sed utrumque falsum est: Ergo ruit præcipuum fundamentum Iansenij. Minor quantum ad primam partem patet, potest enim infidelis dare eleemosynam indigentibus, absque eo quod illud opus referat in suum

Idolum, seu in prauum suæ infidelitatis finem, ut constat ex testimonijs D. Th. iam adductis & ex doctrina quam tradit 2. 2. q. 10. art. 4. in corp. vbi sic ait: *Sicut habens fidem potest aliquod peccatum committere in actu, quem non refert ad fidei finem, vel venialiter, vel etiam mortaliter peccando; ita etiam infidelis potest aliquem actum bonum facere, in eo quod non refert ad finem infidelitatis.* Et sanè (inquit Soto lib. 1. de natura & gratia cap. 10.) *si potest unusquisque pro libito suo proycere denarium in flumen, cur non poterit donare pauperi, sine ulla mala circumstantia, eo quod honestum est.*

Secunda verò eiusdem minoris pars sic ostenditur: Ad hoc ut aliquis actus humanus sit honestus & moraliter bonus, honestate & bonitate naturali, non requiritur quod in Deum tanquam in vltimum finem ordinetur, Tum quia, ut præcedenti conclusione dicebamus: in hoc distinguuntur bonitas moralis actuum humanorum, ab eorum bonitate supernaturali, & meritoria vitæ æternæ, quod prima constituitur per ordinem & relationem ad bonum honestum & rationi consonum, quod ex se tendit in Deum ut luminis rationis, & totius boni honesti authorem; secunda verò ex ordine & relatione in Deum ut authorem supernaturalem, & finem vltimum simpliciter, Tum etiam, quia repugnat ordinem ad finem supernaturalem esse de essentia & ratione bonitatis purè naturalis, qualis est bonitas moralis actuum humanorum; de qua agimus in præsentibus, eorum scilicet honestas, & cum ratione con-

formitas . Tum denique , quia cū ordo actuum humanorum in Deum vt authorem supernaturalem , & finem vltimum simpliciter , non nisi ex motione & imperio charitatis procedat , si illud ad eorum honestatem & bonitatem moralem necessariò exigatur , sequitur non solum fidei lumen , sed etiam charitatis imperium , ad bonitatem moralem actuum humanorum necessariò requiri ; subindeque timorem gehennæ esse malum , & actus qui fiunt à peccatoribus ante adeptam gratiam & charitatem , esse peccata ; quod erroneum est , & à Tridentino damnatum , vt precedenti conclusione ostensum est . Ad-  
do quod ; si ordinatio in Deum vt vltimum finem simpliciter , ad operum nostrorum honestatem , & bonitatem moralem necessaria esset , cū homo quotiescumque cum deliberatione agit , teneatur honestè & benè moraliter operari , nec vllus possit dari actus humanus & deliberatus , indifferens in individuo , vt frequentior Theologorum sententia docet cum Angelico Doctore , & fatetur ipse Iansenius ; sequeretur hominem , quotiescumque deliberatè & humano modo operatur , adstringi præcepto charitatis , & dilectionis Dei super omnia , quod à communi Theologorum sententia penitus alienum est ; cū enim tale præceptum sit affirmatiuum , non obligat pro semper , sed pro determinatis temporibus . Vnde Raynerius in Pantheologia , verbo *Infidelitas* capit. 13. *Licet infidelium affectus non habeat bonitatem quæ petitur à fine vltimo , quia non sit directè propter Deum vt propter finem ; non tamen peccatum est*

est ex hoc ipso quod non sit ordinatus hoc modo in Deum ut in finem, non enim semper debet esse ordinatus actus noster in finem beatitudinis: Cuius ratio est, quia præcepta affirmativa non obligant ad semper, quamvis obligent semper: unde non oportet quod actus infidelium, qui in finem illum non est ordinatus, semper sit peccatum, sed solum per tempore illo quo tenetur actum suum in ultimum finem referre. Quibus verbis præcipuum Iansenij fundamentum conuellit.

Dico tertio, homo in statu naturæ lapsæ, per solas naturæ vires potest elicere aliqua opera moraliter bona, seu ad huius vitæ honestatem pertinentia; subindeque ad illa, nec requiritur gratia strictè sumpta, nec auxilium speciale ordinis naturalis, sed sufficit generalis Dei motio & concursus.

Probatur primò ex Tridentino sess. 6. canon. 1. ubi sic habetur: *Si quis dixerit hominem suis operibus, quæ vel per humanæ naturæ vires, vel per legis doctrinam fiunt, absque divina per Iesum Christum gratia, posse iustificari coram Deo, anathema sit.* Quibus verbis Concilium manifestè supponit, per vires naturæ, absque Iesu Christi gratia, aliqua opera moraliter bona effici posse: Sed hoc intelligi nequit de operibus bonis solum ex officio, vel ex obiecto, & malis ex fine & intentione operantis. Ergo Concilium supponit per vires naturæ posse fieri aliqua opera bona, non solum ex obiecto, sed etiam ex fine operantis. Minor probatur, cum enim opera bona solum

ex obiecto , & mala ex fine & intentione operantis , sint verà peccata ( vt constat de elemosyna data foeminae indigenti , ex intentione eam inducendi in peccatum ) haeretici quorum errorem Concilium in illo canone proscrit , non erant adeò dementes ac stolidi , vt dicerent per illa hominem iustificari ( alioquin affirmassent peccata alijs peccatis deleri ) sed hoc asseriebant de operibus moraliter bonis , tam ex obiecto , quam ex fine & intentione operantis : Ergo Concilium supponit talia opera per vires naturæ fieri posse .

Probatur secundo ex Augustino , qui , vt præcedenti conclusione ostendimus , cap. 27. & 28. libri de spiritu & littera docet infideles aliqua fecisse bona opera , *quæ secundum iustitiæ regulam merito rectèque laudamus* . subindeque non solum ex officio , seu ex obiecto & fine operantis bona ; cùm regula iustitiæ attendat præcipuè ad finem & intentionem operantis , & operantem actum bonum ex intentione mala , non dignum laude , sed vituperio censeat , vt supra annotauimus : Atqui Augustinus censet infideles talia opera fecisse ex solis viribus liberi arbitrij , & sine gratia naturæ superaddita : Ergo iuxta eius doctrinam , homo in statu naturæ lapsæ , per solas naturæ vires , potest efficere aliqua opera honesta , & bona non solum ex obiecto , sed etiam ex fine operantis . Maior patet ex dictis conclusione præcedenti , minor verò constat ex ratione quam Augustinus ibidem cap. 28. assignat , ait enim infideles opera illa bona , & secundum iustitiæ regulam laudanda , fecisse , quia non usque adeò  
in

in anima humana, imago Dei terrenorum affectuum labe detrita est, ut nulla in ea velut lineamenta extrema remanserint, unde merito dici possit, etiam in impietate vite sue, facere aliqua legis, vel sapere. Et paulò inferius de iisdem infidelibus loquens, subdit: *ipsi homines erant, & vis illa naturæ inerat eis, qua legitimum a iquid anima rationalis & sentit & sapit, etsi non esset illa pietas quæ transfert in vitam æternam.*

Probatur tertio ex D. Thoma, quia etiam apertè fauet nostræ sententiæ, nam qu. 24. de verit. art. 14 quærit, *Virum liberum arbitrium possit in bonum sine gratia?* Et sic respondet: *Ad bonum quod est supra naturam, constat liberum arbitrium non posse sine gratia, quia per huiusmodi bonum homo vitam æt. nam meretur; constat autem quod sine gratia homo mereri non potest. Illud autem bonum quod est naturæ humanæ proportionatum, potest homo per liberum arbitrium explere. Quod autem per bonum naturæ humanæ proportionatum intelligat bonum honestum & morale ordinis naturalis, ut est largitio eleemosynæ, liquet ex verbis istis immediatè præcedentibus. Actus iste qui est dare eleemosynam est bonum proportionatum viribus humanis, secundum quod ex quadam naturali dilectione vel benignitate homo ad hoc mouetur. Ergo ex D. Thoma homo per liberum arbitrium, & per solas vires naturæ, potest largire eleemosynam, ex quadam naturali dilectione & benignitate, subindeque alios similes actus honestus & moraliter bonos elicere.*

Neque dici potest S. Doctorem verbis istis,  
per



*per liberum arbitrium*, excludere quidem necessitatem gratiæ sanctificantis, vel doni habitualis supernaturalis, non tamen necessitatem auxiliij supernaturalis, vel tamen auxiliij speciali ordinis naturalis. Nam S. Thomas ibidem subiungit: *Quamvis autem huiusmodi bona homo possit facere sine gratia gratuita faciente, non tamen potest ea facere sine Deo, cum nulla res possit in ullam operationem exire, nisi virtute divina; quia causa secundæ non agit, nisi per virtutem causæ primæ, ut dicitur in libro de causis.* Quibus verbis ad huiusmodi actus solum requiritur concursus Dei generalem, quo omnes causæ secundæ, primæ in operando subordinantur, non verò auxilium Dei supernaturale, vel intra ordinem naturæ speciale. Vnde in hac parte q. 109. art. 2. docet expressè hominem in statu naturæ corruptæ posse *per virtutem naturæ suæ*, aliquod bonum particulare agere. Quibus verbis excludit quodcumque auxilium speciale; distinctum à concursu generali; non enim dicimus hominem posse per virtutem suæ naturæ id ad quod requiritur speciale auxilium; utpote merè gratuitum, & naturæ nullo modo debitum.

Nec valet quod ait Vasquez, & post ipsum Contensonus, nimis in hac quæstione illi adhiærens, S. Doctorem ibi non loqui de bono morali, sed naturali, quia (inquiunt) asserti in exemplum opera quæ sunt propter commoditatem naturæ, vel ad gubernationem externam, nempe ædificare domos, plantare vineas, &c. Vnde concedit quidem posse dari sine gratia bonos architectos, & bonos vini-

tores, sed non bonos iustos. Non valet inquam, Tum quia qu. 24. de veritate iam citata, affert exemplum eleemosynæ, quam nemo dubitat esse opus honestum & moraliter bonum. Tum etiam, quia D. Thomas hic artic. 2. affert exemplum de operibus quæ sunt propter commoditatem naturæ, vel ad gubernationem externam, loquitur de illis, prout sunt ex deliberatione: constat autem in doctrina D. Thomæ nullum dari opus deliberatè factum, quod in indiuiduo neque sit moraliter bonum, neque moraliter malum, sed indifferens ad bonitatem vel malitiam moralem: Ergo loquitur de illis operibus, ut sunt in genere moris, non verò prout solum pertinent ad ordinem naturæ, & sunt propter eius commodum, vel utilitatem.

Probatur quartò conclusio hac ratione quam idem S. Doct. ibidem insinuat: Homo in statu integritatis & innocentie poterat per sua naturalia omne bonum morale suæ naturæ proportionatum operari: Ergo in statu naturæ lapsæ potest ex viribus suæ nature, saltem aliquem actum honestum & moraliter bonum elicere. Consequentia patet, liberum enim hominis arbitrium, seu propensio naturalis quam homo habet ad bonum honestum, & rationi consonum non est totaliter extincta per peccatum originale, sed duntaxat debilitata & infirmata, ut asserit Tridentin. sess. 6. can. 5. Ergo quemadmodum homo infirmus, etsi non possit perfectè moveri motu hominis sani, nisi sanetur auxilio medicinæ, potest tamen per se ipsum aliquem motum imperfectum habere: ita homo in statu naturæ lapsæ poterit proprijs

prijs viribus aliquod opus morale ordinis naturalis efficere, etsi non omne, quod est proprium hominis sani.

Confirmatur & magis illustratur hæc ratio ex Augustino epist. 107. ad Vitalem dicente: *Liberum arbitrium ad diligendum Deum primi peccati granditate perdidimus* nam ex verbis illis hoc argumentum deducitur: Supposita etiam originali culpa, homo potest Deum super omnia diligere, & tamen quia id non potest per naturæ vigorem, Augustinus asserit nos perdidisse liberum arbitrium ad diligendum Deum: Ergo si homo lapsus nullum bonum opus morale ordinis naturalis, viribus proprijs possit efficere, etsi id possit per gratiam, verum erit dicere, quod liberum arbitrium ad operandum bonum, primi peccati granditate perdidimus.

Nec valet quod ait Vincentius Contensonus, nempe quod ut liberum arbitrium ad operandum bonum dici possit primi peccati granditate non fuisse extinctum, sed attenuatum duntaxat & infirmatum, sufficit quod ex viribus proprijs, & sine auxilio gratiæ, possit elicere opera bona ex officio seu ex obiecto, quamvis ex fine operantis sint mala. Non valet, inquam, cum enim talia opera sint peccati labe sordidata, si homo in statu naturæ lapsæ, ex viribus liberi arbitrii ea solum elicere possit, sequitur liberum arbitrium in illo statu non nisi ad peccandum valere, sub indeque nos primi peccati granditate liberum arbitrium ad bene operandum amisisse, quod Tridentino repugnat.

## §. II.

*Soluntur obiectiones.*

**O**bjicies primò contra primam conclusio-  
nem: Ad moralem bonitatem actum  
humanorum, necesse est quòd in Deum refe-  
rantur: Sed ad illum referuntur per charita-  
tem: Ergo ad bonitatem moralem actum hu-  
manorum requiritur charitatis imperium.

Respondeo negando Maiorem, licet enim  
ad bonitatem supernaturalem & meritoriam  
actuum humanorum, requiratur quod ab ope-  
rante referantur in Deum, per charitatis im-  
perium; ad illorum tamen honestatem & boni-  
tatem moralem, non exigitur quod ab operan-  
te intendatur talis relatio, sed sufficit quod  
ipse actus ex natura sua siue obiecto ordinetur  
in Deum, ut luminis naturalis & boni ho-  
nesti authorem, & sicut bonum particulare in  
bonum vniuersale; & quod ille qui talem  
actum elicit non impediat talem ordinatio-  
nem, ipsum ad aliquem prauum finem ordi-  
nando, vel alia mala circumstantia vitiando;  
eo enim ipso quod non impediatur relatio  
quam actus ex natura sua importat ad Deum,  
refertur ad illum, saltem interpretatiuè, &  
bonitatem ex tali relatione acquirit. Sicut la-  
pis ex natura sua tendit & fertur in centrum  
ut in terminum & finem sui motus, nisi vio-  
lenter sursum impellatur ab agente extrinse-  
co, & per talem impulsum & detentionem  
violentam, impediatur unio ipsius cum cen-  
tro, siue cum loco deorsum.

Obije-

Obijcies secundò contra secundam conclusionem : Nullum potest dari opus sine intentione recta , iuxta illud Ambrosij lib. 1. offic. cap. 3. *Affectus tuum nomen imponit operi tuo*: Sed non potest dari intentio recta sine fide, cum fides sit veluti mentis oculus qui intentionem dirigit: Ergo nec opus bonum. Vnde August. super Psal. 31. *Nemo computet opera sua bona ante fidem, ubi enim fides non erat, bonum opus non erat: bonum enim opus intentio facit: intentionem fides dirigit.*

Respondeo concessa Maiori, negando Minorem, & ad illius probationem dicendum cum D. Thoma 2. 2. qu. 10. art. 4. ad 2. quod *fides dirigit intentionem respectu finis ultimi supernaturalis, sed ratio naturalis potest dirigere intentionem respectu alicuius boni connaturalis.* Vnde Augustinus loco citato loquitur de operibus bonis ordinis supernaturalis, non verò de bonis bonitate solùm morali ordinis naturalis, de quibus solùm agimus in præsenti.

Obijcies tertio: D. August. lib. 4. contra Iulian. c. 3. docet fidem ad omne opus bonum desiderari, subindeque nullum opus sine fide esse bonum, ex quo infert opera omnia infidelium esse peccata, & virtutes Philosophorum non fuisse veras virtutes, sed vitia:

Respondeo hæc Augustini testimonia quibus potissimum confidit Iansenius, necessariò ab illo esse benigna aliqua interpretatione lenienda. Augustinus enim loco citato, non qualemcumque fidem ad bonum opus exigit sed fidem quæ per charitatem operatur, quæ non solum in infideli, sed nec etiam in peccatore Christiano, minimè inuenitur. Verba Au-

Augustini sunt hæc: *Dice eum qui non facit opera bona, intentione fidei bona hoc est eius quæ per dilectionem operatur, totum quasi corpus quod velat membris, operibus constat, tenebrosum esse, hoc est plenum nigredine peccatorum.* Idem docet pluribus alijs in locis, præsertim libro de gratia Christi cap. 16. his verbis: *Vbi non est dilectio nullum bonum opus imputat, nec rectè bonum opus vocatur, quia omne quod non est ex fide peccatum est.* Vbi Augustinus verba illa Apostoli, *ex me quod non est ex fide peccatum est*, de fide per charitatem operante intelligit; & tamen Iansenius non influxum charitatis, sed solius fidei, ad bonum opus necessariò exigit, ne in errorem Michaelis Baij à Tridentino damnatum impingat. Ergo aliquo tenetur Augustinum interpretatione explicare, sicut & nos.

Dicendum ergo est, Augustinum loco citato, solùm velle nullum opus sine fide esse simpliciter & antonomasticè bonum, quippe cùm homini ad æternam gloriam ordinato, nihil absolutè bonum sit, nisi quod ad eam perducit, vel conducit: nihilque absolutè malum, nisi quod ab ea abducit. Quod autem hæc interpretatio legitima sit, patet ex eodem S. Doctore ibidem, vbi sic ait: *Scito nos illud tantum dicere bonum hominis, illam bonam voluntatem, illud opus bonum, sine gratia Dei à nemine posse fieri per quod solùm potest homo ad æternum Dei donum regnumque perducì.* Unde ibidem columna 10. permittit Iuliano dicere, bona quædam opera fieri per vires nature, dummodo fateatur esse sterilia ad vitam æternam.

Quan-

Quando verò Augustinus asserit omnia infidelium opera esse peccata, solum intendit omnia opera infidelium quæ procedunt ab ipsis reduplicatiue vt infideles sunt, seu ex errore contrariio fidei, esse peccata, etsi ex obiecto & specie sua bona sint. Si enim infidelis ad honorem deorum suorum seruet virginitatem, vel det eleemosynam, haud dubie peccet, quia in his actibus non operatur vt homo, & ex regula rectæ rationis, sed vt infidelis, & ex regula sui erroris, seu ex praua intentione occasione infidelitatis concepta. In eodem sensu intelligi debet illud Apostoli quod Augustinus frequenter allegat: *Omne quod non est ex fide peccatum est*, nam *ly non ex fide*, debet sumi non solum negatiue, sed etiam contrariè, ita vt sensus sit, illud quod non est ex fide, sed ex infidelitate, peccatum est, vt interpretatur D. Thomas ibid. lect. 3. in fine, vbi ait: *Omne quod non est ex fide peccatum est, sic est intelligendum: omne quod est contra fidem peccatum est, etsi ex genere suo bonum esse videatur.*

Demum cum Augustinus negat in infidelibus, seu antiquis Philosophis veras virtutes, nomine veræ virtutis intelligit virtutem perfectam, quæ hominem promoueat ad vitam æternam, siue vt ipse loquitur loco citato, *quæ liberandis, & beatificandis hominibus deseruiat.* Vnde ibidem ait: *Si ad consequendam veram beatitudinem, quam nobis fides per Christum promisit, nihil prosunt homini virtutes, non sunt veræ virtutes.* Addo quod cum virtus non generetur nisi per frequentationem actuum bonorum, & veteres Philo-  
phi

phi rarissimè elicerent actus bonos & honestos, nisi praua aliqua circumstantia, præsertim vanæ gloriæ, vitiatos, rarissime acquirebant veras virtutes morales, & quod ex eorum actibus frequenter repetitis generabatur, non erat virtus, sed vitium. Vnde Hieronymus ep. 4. ad Rusticum: *Philosophi sæculi vitium vitio medicantur, nos amore virtutum vitia superamus.*

Obijcies quartò cum Vasquez contra tertiam conclusionem varia Scripturæ, Conciliorum, & Summorum Pontificum testimonia, quibus insinuari videtur, hominem sine gratia, nullum opus bonum posse efficere. Nam Ioan. 15. Christus ait: *Sine me nihil potestis facere.* Quem locum ponderans Augustinus tract. 81. in Ioan. subdit: *Sine ergo parum, siue multum, sine illo fieri non potest, sine quo nihil fieri potest.* Vnde epist. 46. ad Valentinum sic concludit: *Epistolam meam secundum hanc fidem intelligite, ut neque negetis Dei gratiam, neque liberum arbitrium sic defendatis, ut à Dei gratia separetis, tanquam sine illa vel cogitare aliquid vel agere secundum Deum vltra ratione possimus, quod omnino non possumus; propter hoc enim Dominus cum de fructu iustitiæ loqueretur, ait Discipulis suis, sine me nihil potestis facere.* Item Apostolus 2. ad Corinth. 3. ipsam boni cogitationem, quæ omnis honestatis initium est, donum Dei esse pronuntiat, dicens: *Non sumus sufficientes cogitare aliquid ex nobis quasi ex nobis, sed sufficientia nostra ex Deo est.* Similiter Cœlestinus 1. in epist. ad Episcopos Galliæ, eandem gratiæ adiuuantis ad singulos actus



actus bonos necessitatem manifestè declarat. Nam cap. 7. ait: *Nemo nisi per Christum libere bene utitur arbitrio.* Et cap. 8. *Omnia studia & omnia opera ac merita Sanctorum, ad Dei gloriam, la demque referenda sunt, quia nemo ei placet, nisi ex eo quod ipse donauerit.* Item cap. 9. *Ita Deus in cordibus hominum, atque in ipso libero operatur arbitrio, ut sancta cogitatio, omnisque motus bonus voluntatis ex Deo sit, quia per illum aliquid boni possumus sine quo nihil boni possumus.* Demum in Concilio Palestino Diospoli celebrato definitum est, gratiam Dei ad singulos actus esse necessariam. Quod ipse Pelagius fateri coactus est, ut refert Augustinus epist. 106. & 107. Item in Concilio Arausicano 2. can. 2. sic habetur: *Multa in homine bona fiunt, quæ non facit homo, nulla vero facit homo bona, quæ non Deus præstet ut faciat homo.* Et can. 9. *Quoties bona agimus De sine nobis atque nobiscum ut operemur operatur.* Et can. 22. consecrat verba illa Augustini tra. 3. in Ioan. *Non habet de suo nisi mendacium & peccatum; si quid autem homo habet veritatis atque iustitiæ, ab illo fonte est, quem debemus sitiire in hac eremo.*

Respondè primò, predicta Scripturæ, Conciliorum, & Summorum Pontificum testimonia, esse intelligenda, non de opere bono morali vniuersim, sed de opere bono, ad salutem animæ, & vitam æternam conducente. Quod verò hæc interpretatio legitima sit, constat primò ex Concilio Arausicano 2. can. 7 ubi sic habetur: *Si quis dixerit hominem per naturæ vigorem, bonum aliquod QVOD*  
AD

AD SALVTEM PERTINET VITÆ ÆTERNÆ, cogitare, ut expedit, aut eligere posse, hæretico fallitur spiritu, non intelligens vocem Dei in Evangelio, sine me nihil potestis facere, & illi d' Apostoli, non quod idonei sumus cogitare aliquid à nobis, quasi ex nobis, &c. Quibus verbis Concilium, non solum manifestè declarat, se loqui de bono ad salutem vitæ æternæ pertinente, sed etiam de tali intelligenda esse duo supra adducta testimonia, quæ Aduersarij nobis obijciunt, & quæ apud illos præcipua, & veluti palmaria sunt. Constat secundò, quia Concilia, & Summi Pontifices, locis adductis, Pelagij errorem damnare intendunt: At Pelagius non errauit in hoc quod ad opus aliquod moraliter bonum ordinis naturalis, gratiæ necessitatem negauerit, ut fateri coguntur Aduersarij, ne incurrant censuram Pij V. & Gregorij XIII. has Michaelis Baij propositiones damnantium: *Pelagianus est error dicere quod liberum arbitrium valet ad vllum peccatum vitandum. Cum Pelagio sentit qui boni aliquid naturalis, hoc est quod ex solis naturæ viribus ortum ducit, agnoscit. Ergo quando prædicta Concilia, & Summi Pontifices, dicunt gratiam ad singulos actus esse necessariam, non loquuntur de actibus honestis, & moraliter bonis, ordinis naturalis, sed tantum de actibus meritorijs, & ad salutem animæ, ac vitam æternam conducentibus. Constat tertio, quia si prædicta loca, ea vniuersalitate quæ comprehendat opera honesta & moraliter bona, intelligantur, nostra sententia erit in Scripturâ, & Concilijs, ac Pontificum decretis damnata:*

At

At erroneum est dicere nostram sententiam aliquam censuram mereri, vt constat ex prædictis Baij propositionibus à Pio V. & Gregorio XIII. damnatis: Ergo erroneum etiam erit asserere, loca Scripturæ, Consiliorum definitiones, & Summorum Pontificum decreta, ita amplà & vniuersaliter esse intelligenda, vt opera honesta, & moraliter bona ordinis naturalis comprehendant, & consequenter limitanda sunt ad opera ad salutem proficua, & ad vitam æternam conducentia.

Respondeo secundò, quod si prædicta testimonia de quocumque bono etiam naturalis ordinis intelligentur, per gratiam significari auxilium seu concursum Dei generalem, ad agendum necessarium, qui sub nomine gratiæ largè & impropriè sumptæ comprehenditur, vt initio huius tractatus declarauimus. Vtramque responsionem, & interpretationem tradit S. Thomas in 2. dist. 28. qu. 1. art. 1. ad 1. & 2. qu. 24. de verit. art. 14. in resp. ad argumenta *sed contra*, & super cap. 1. Ioan. lect. 1. vbi exponens verba illa Christi: *Sine me nihil potestis facere*, subdit: *Opera nostra aut sunt virtute naturæ, aut ex gratia diuina: si virtute naturæ, cum omnes motus naturæ sint ab ipso Verbo Dei, nulla natura ad aliquid faciendum moueri potest sine ipso: si verò virtute gratiæ, cum ipse sit author gratiæ manifestum est quod nullum opus meritorium sine ipso fieri potest.*

Dices: Concilia, & SS. Patres citati loquuntur in sensu contradicente Pelagio, cum illius errores proscribant: At ille non negabat opera bona procedere à Deo vt authore naturæ, per concursum generalem, sed solum à Deo vt  
lar-

largitore gratiæ, per auxilium speciale: Ergo hæc secunda responsio & interpretatio non est bona, nec ad mentem Conciliorum, & SS. Patrum

Respondeo falsum esse quod Pelagius satis referret ad Deum ut auctorem naturæ omnia bona opera moralia ordinis naturalis, & quod satis agnosceret nostram dependentiam à Deo in operando, esto enim fateretur hominem non posse agere sine immediato & simultaneo Dei concursu, quo nobiscum operatur; negabant tamen concursum seu auxilium præuium, quo agit in nobis, sine nobis, & quo operatur ut operemur: quia existimabat destrui libertatem, si homo nihil possit operari, nisi præoperante Deo & voluntatem eius ad agendum præmouente, ut in Clypeo Theologiæ Thomisticæ tract. de hæresi Pelag. disp. 1. art. 2, ostensum est.

Ex dictis intelliges, quod quando Confilium Arausicanum ex August. dixit: *Nemo habet de suo nisi mendacium, & peccatum*, vel ly de suo intelligi debet per exclusionem auxilij generalis. Vel tantum vult, mendacium & peccatum esse ita propria hominis, ut nullo modo sint Dei ut auctoris. Vel mendacium, & peccatum improprie & clare usurpat, pro quocunque actu defectuoso, & insufficienti ad vitam æternam, iuxta phrasim & loquendi morem, vetustis Patribus vsitatum, *Qui* (ut ait Sixtus Senensis lib. 6. Biblioth. annot. 40.) *universa opera quæ seclusa diuinæ gratiæ esse fiebant, nedum non bona dicebant, sed frequentissime & mala & vitia, & peccata appellabant; non quod ea verè & simpliciter mala, & pecca-*

*ta esse crederent, sed quia scirent ipsa, nec ad acquirendam christianam iustitiam prodesse, nec ad comparandum æternæ felicitatis bonum proficere, & ob id ea in bonorum numerum referre non dignarentur.*

Ex his facilè intelliges, & expònes duo S. Thomæ testimonia, quæ nobis videntur aduersa; nam quando S. Doctor 2.2. quæst. 136. art. 3. ad 2. ad opus bonum virtutis politicæ auxilium gratiæ requirit, hoc non est intelligendum de auxilio gratiæ specialis, sed de generali concursu, qui est gratia communiter dicta, ad donum creationis pertinens. Vel dici potest, illum loqui de opere morali eximio, quale est sustinere plura & grauissima mala propter bonum patriæ; ad hoc enim opus heroicum requiritur speciale auxilium, vt infra patebit. Similiter cùm idem Doctor Angelicus ait quæst. 24. de verit. art. 14. *Sì gratiam Dei velimus dicere, non aliquod habituale donum, sed ipsam misericordiam Dei per quam interiùs motum mentis operatur, sic nec ullum bonum homo potest facere sine gratia Dei*, loquitur de concursu Dei generali, mouente & applicante singulas creaturas ad agendum, qui potest misericordia Dei appellari, inquantum remouet aliquam miseriam ab homine, nempe defectum potentialitatis & determinationis ad agendum.

Obijcit insuper Vasquez argumentum desumptum ex oratione, & gratiarum actione; Ecclesia enim, non pro quibusdàm tantum, sed etiam pro singulis bonis operibus, Deum orat, eiusque gratiam postulat, & illis peractis, gratias agit; nihil autem in Augustini do-

Actio fundatius, quam orationem, gratiarumque actionem, diuinæ gratiæ esse clarissima significationem.

Sed ad hoc in primis respondetur, Ecclesiam bona opera moralia, prout ad salutem conducunt, à Deo postulare; unde suas collectas concludit *per Dominum nostrum Iesum Christum*; ex cuius meritis gratiam sibi dari postulat: omnis autem gratia Saluatoris, ad vitam & salutem æternam ut ad finem ultimum tendit. Idem cum proportionem de gratiarum actione dicendum.

Respondeo secundò, quod etsi daretur Ecclesiam actus honestos & moraliter bonos absolute à Deo postulare, & pro illis gratias agere, ex hoc tamen non rectè inferri, gratiam strictè & propriè sumptam, ad illos eliciendos esse necessariam, sæpe enim in oratione petimus quæ cum solo concursu generali haberi possunt, quando nimirum ex parte euentus habent aliquid fallibilitatis & contingentia; quapropter oramus Deum pro pluuia, serenitate, & frugibus terræ, illisq; obtētis gratias ei agimus; quia licet pertineant ad prouidentiam generalem, tamen contingentiam & fallibilitatem habent ex parte euentus.

Dices, D. Augustinus disputans cum Pelagianis, ex oratione, & gratiarum actione, inferebat necessitatem gratiæ specialis, illi enim non negabant gratiam generalem, ad donum creationis pertinentem, sed specialem, & à dono creationis distinctam: Ergo ex eo quod fideles à Deo petant auxilium ad eliciendos actus honestos & moraliter bonos, & pro illis elicitis ipsi gratias agant, rectè colligitur,

non solum generale sed etiam speciale auxilium ad eos eliciendos requiri.

Respondeo, concessio Antecedente, negando consequentiā; licet enim ex oratione applicata ad res excedentes donum creationis, & efficaciam naturalium virium, rectè inferatur necessitas gratiæ specialis; & hoc modo S. Augustinus ex oratione rectè probeat contra Pelagianos, specialem gratiam esse necessariam ad resurgendum à peccato, & ad bene operandum in ordine ad vitam æternam, quia hæc vires naturales excedunt: tamen ex oratione ut sic, non infertur gratia strictè sed lato modo sumpta, pro quolibet beneficio Dei; quia illa potest applicari ad res ordinis naturalis, seu ad generalem Dei providentiam pertinentes, quando aliquid contingentiae & fallibilitatis habent, ut patet exemplis supra adductis.

Præter hæc argumenta, duo alia obijcit Contensonus, in quibus præcipuum robur suæ sententiæ constituit. Primum sic potest breuiter proponi. Voluntas hominis in statu naturæ lapsæ, necum est ad bonum vel malum indifferens, sed etiam magis est ad malum quam ad bonum propensa, magisque ad bonum utile, vel delectabile, quam ad honestum, & ratione consonum inclinata, ut egregiè explicat D. Prosper in carmine de ingratis cap. 27. his verbis.

— *Manet ergo voluntas.*

*Semper amans aliquid quo se ferat, &  
labyrintho*

*Fallitur, ambages dubiarum ingressa viarum*

*Vana*

*Vana onpit, vanis tumet, & timet, omni-  
modaque*

*Mobilitate ruens, in vulnera vulnere sur-  
git.*

Similiter S. Thomas 2. 2. quæst. 136. art. 3. ad 1. sic ait: *in natura humana, si esset integra, prævaleret inclinatio rationis, sed in natura corrupta prævalet inclinatio concupiscentiæ, quæ in homine dominatur: Ergo ut homo in statu naturæ lapsæ eliciat actus honestos & moraliter bonos, eget gratia Dei, vel auxilio eius speciali, quo se determinet ad bonum honestum, & practicè iudicet illud esse delectabili præferendum.*

Respondeo, concessio Antecedente, negando consequentiam; licet enim in statu naturæ lapsæ homo sit magis inclinatus ad malum quam ad bonum, & concupiscentia in eo dominetur; illumque frequenter ad actus malos & vitiosos inclinet & pertrahat; quia tamen non tollit totaliter, sed duntaxat minuit & attenuat inclinationem quam homo habet à natura insitam ad bonum honestum & rationi consonum, potest ex viribus suæ naturæ, aliqua opera honesta & moraliter bona exercere, subindeque interdum habere iudicium practicum, quo iudicet bonum honestum esse delectabili præferendum, ut ex supra dictis constat.

Alterum eiusdem Auctoris argumentum est: Ex præcepto charitatis tenemur nostra opera in Deum ut in ultimum finem referre, saltem virtualiter: Ergo ad operis bonitatem moralem; non sufficit ut obiectum, & finis proximus honestate gaudeant, nisi etiam ope-



rans finem vltimum intendat, quod sine gratia præstare non potest.

Respondeo primò, quod si hoc argumentum valeret, probaret ad honestatem, & bonitatem moralem nostrorum operum, non solùm gratiam auxiliantem, sed etiam fidem & charitatem requiri, subindeque omnia infidelium, & fidelium in statu peccati mortali existentium opera, esse peccata; quod erroneum est, & à Tridentino damnatum, saltem quantum ad illa opera quæ iustificationem præcedunt. Sequela patet, cum enim vltimus finis hominis sit supernaturalis, opera ab illo elicitæ non possunt in illum ordinari, nisi per fidem dirigantur & per charitatem imperentur. Ergo si ad illorum honestatem & bonitatem moralem exigatur ordinatio in vltimum finem, requiretur pariter ad illam influxus fidei, & charitatis imperium. Vnde illi Author volens nolens incidit in sententias Baij, vel Iansenij, quas supra confutauimus.

Respondeo secundò, negando Antecedens, cum enim præceptum charitatis sit affirmatiuum, licet semper obliget, non tamen pro semper, sed determinatis quibusdam temporibus, & occasionibus, vt supra ex Raynerio retulimus. Addo, hoc ipso quod voluntas non refert opus ex obiecto bonum, puta eleemosynam, in finem prauum, sed in præcisa misericordiæ honestate sistit, actum illum ex se & sponte sua tendere in Deum, totius honestatis fontem, & finem saltem virtualiter, vel interpretatiuè; non secus ac lapis in centrum, nisi violenter sursum impellatur ab agente extrinseco, vt in

responsione ad primam obiectionem declarauimus.



### C A P V T III.

*De necessitate gratiæ in ordinem ad dilectionem Dei.*

**C**elebris, & communis apud Theologos est, diuini amoris partitio in naturalem, & supernaturalem; cum enim Deus sit author naturæ, seu bonorum naturalis ordinis & etiam gratiæ, seu bonorum ordinis supernaturalis, & sub vtraque ratione sit bonus atque amabilis, sicut & cognoscibilis ab intellectu humano, sub vtraque voluntatis humanæ affectum terminare potest. Vnde sicut duplex est religio, vna ordinis naturalis, cui præfulget lumen rationis, & qua Deus colitur vt author naturæ, per actus eiusdem ordinis; altera supernaturalis, cui præfulget lumen fidei, & qua Deus colitur vt author gratiæ, per actus fidei, spei, charitatis, & virtutum moralium infusarum: ita etiam duplex est dilectio Dei, vna naturalis, & ex genere suo acquisita, quæ per lumen rationis, regulatur, & ad Deum vt authorem naturæ terminatur; altera supernaturalis & per se infusa, cui præficitur lumen fidei, & qua Deus vt author gratiæ, & prout est obiectum beatificans beatitudinis supernaturalis, à nobis diligitur. Hanc non posse ab homine elici ex proprijs viribus, & sine auxilio gratiæ, de fide

certum est, & in Tridentino definitum sess. 6. can. 3. sed de altera difficultas, & contro- uersia est inter Theologos, an homo lapsus, vel in puris naturalibus conditus, ad diligen- dum Deum ut authorem naturæ, dilectione efficaci ( id est quæ vi sua potens sit media ad placendum Deo necessaria inducere, & omnia quæ eius amicitia repugnant excludere ) indi- geat speciali auxilio, vel id ex viribus naturæ præstare possit.

## §. I.

*Resolvitur difficultas quoad utramque partem,  
seu de homine in utroq; statu naturæ  
lapsæ, & puræ considerato.*

Dico primò, homo in statu naturæ lapsæ, non potest viribus liberi arbitrij, & cum solo concursu generali, Deum ut authorem naturæ, dilectione efficaci, super omnia diligere. Ita magis communiter docent nostri Thomi- stæ, contra Scotum, Molinam, & alios recen- tiores.

Probarur primò ex D. Thom. hic art. 3. ubi sic ait: *Homo in statu naturæ integræ non indi- gebat dono gratiæ s. per additæ naturalibus bo- nis, ad diligendum Deum naturaliter super omnia, licet indigeret auxilio Dei ad hoc eum mouentis. Sed in statu naturæ corruptæ indi- get homo etiam ad hoc auxilio gratiæ naturam sanantis.* Rationem paulò antè assignauerat, petitam ex eo quod voluntas hominis lapsi, & in peccato originali vel personali existentis, est veluti recurua, & ad bonum priuatum & pro-

proprium, quod est ultimus finis peccatoris, inclinata, unde nisi sanetur per gratiam, non potest sui & omnium aliorum dilectionem in Deum referre, ipsumque tanquam bonum proprium & priuatum diligere, cum hoc sit contra talem inclinationem curuam & deuiam.

Confirmatur: Licet natura infirma possit aliquod opus efficere, non tamen præstantissimam operationem quam natura sana & integra potest elicere: At diligere Deum vt authorem naturæ dilectione efficaci, est actus præstantissimus & perfectissimus quem natura humana in statu sanitatis, & integritatis, ex viribus liberi arbitrij elicere poterat, cum talis dilectio virtualiter contineat totius legis naturæ impletionem, iuxta illud Basilij lib. de inst. Monach. c. 2. *Mandatum istud* (scilicet dilectionis Dei) *unum quidem videtur, sed omnium mandatorum in se virtutem complectitur.* Ergo homo lapsus & infirmus non potest ex viribus liberi arbitrij, Deum vt authorem naturæ efficaci amore diligere, sed ad hoc indiget gratia. Si autem quæras, qualis requiratur gratia ad talem dilectionem eliciendam? Respondeo, &c.

Dico secundò, ad dilectionem efficace in Dei vt authoris naturæ, per se loquendo, & quantum est ex parte obiecti, solam requiritur auxilium speciale ordinis naturalis; supposita tamen eleuatione ad statum supernaturalem, per accidens & concomitanter, auxilium supernaturale ad eam requiritur.

Prima pars patet, dilectio enim Dei vt authoris naturæ, est actus entitatiuè naturalis, cum obiectum naturale respiciat: Ergo per se, & ex

præcū ratione obiecti, nec gratiam sanctificantem, nec auxilium supernaturale exposcit. Consequentia legitima est, nam eo ipso quod actus ad sui elicentiam exigit pro principio elicente formam supernaturalem, excedit facultatem naturæ, subindeque supernaturalis est.

Secunda verò sic ostenditur: supposita elevatione naturæ humanæ ad ordinem gratiæ, & cognitione Dei ut authoris supernaturalis, non potest homo ipsum amare ut authorem naturæ, nisi simul ipsum ut finem & authorem supernaturalem diligat: sicut supposita tali elevatione, & cognitione, non potest dari auersio à Deo ut conditore naturæ, absque auersione à Deo ut authore supernaturali, neque poni odium authoris nature, quod non terminetur aliquo modo ad ipsum ut authorem gratiæ: Ergo cum dilectio Dei supernaturalis auxilium supernaturale per se exigit; dilectio naturalis, supposita elevatione naturæ humanæ ad ordinem gratiæ, illud per accidens & concomitanter exposcet. Adde ad talem dilectionem, non solum auxilium supernaturale, sed etiam gratiam sanctificantem acquiri, per quam auferatur peccatum, cum tali dilectione impossibile, & remoueatur obex auersionis à Deo ut ultimo fine tam naturali, quam supernaturali, quæ pariter cum eodem amore componi nequit. Unde D Thomas hic artic. 3. docet ad dilectionem Dei ut Authoris naturæ, hominem lapsum gratia sanante indigere: illum verò nomine gratiæ sanantis, gratiam habitualement intelligere, constat ex articulo sequenti, ubi ait: *In statu naturæ*

*corruptæ non potest homo implere omnia mandata divina sine gratia sanante* : Certum est autem , ad omnium diuinorum mandatorum impletionem, gratiam sanctificantem requiri; vt patebit ex dicendis capite sequenti.

Quares, an homo iustus, & gratia sanctificante præditus, auxilio supernaturali indigeat ad diligendum Deum vt authorem naturæ, dilectione efficaci?

Respondeo affirmatiuè , cum enim gratia habitualis in hoc statu viæ non sanet perfectè hominem, neque illi restituat integritatem naturalem , quam per peccatum primi parentis amisit , sed relinquat rebellionem concupiscentiæ , & pugnam inter appetitum superiorem & inferiorem: ad meritum & profectum vitæ spirituali , adhuc indiget robore & auxilio superaddito, vt in actum dilectionis Dei vt authoris naturæ exeat.

Addo quod, etsi homo iustus , & gratia habituali præditus, careat impedimento peccati, & auersionis à Deo vt vltimo fine , tamen ( vt iam ostendimus), supposita eleuatione naturæ humanæ ad ordinem gratiæ, nō potest Deum amare vt authorem naturæ, nisi simul ipsum vt finem & authorem supernaturalem diligat. Ergo cum in homine iusto dilectio Dei supernaturalis auxilium supernaturale per se exigat; dilectio naturalis illud per accidens & concomitanter exposcet.

Dico tertio, homo in pura natura constitutus, non posset cum solo concursu generali, Deum vt authorem naturæ efficaci amore diligere , non indigeret tamen ad talem amorem eliciendum auxilio supernaturali , sed

solum speciali ordinis naturalis.

Prima pars patet ex dictis in prima conclusionem, ibi enim ostendimus hominem lapsum non posse ex viribus naturæ, & cum solo generali concursu, Deum ut authorem naturæ efficaci amore diligere, quia voluntas hominis lapsi est veluti recurua, & ad bonum priuatum & proprium inclinata: Sed in statu naturæ puræ voluntas hominis eodem modo esset propensa in bonum priuatum. Ergo eodem modo esse impotens ad diligendum Deum ut authorem naturæ, dilectione efficaci. Maior constat ex supra dictis, minor verò sic ostenditur. Quod homo lapsus sequatur bonum priuatum, prouenit ex eo quod appetitus inferior inclinatur in bonum sensibile, ab sive fræno rationis: At in puris naturalibus homo haberet eandem inclinationem effrænam ad bonum sensibile contrarium rationi, cum in statu naturæ puræ pars inferior non esset perfectè subiecta & subordinata superiori; sed talis subordinatio & subiectio homini solum in statu integritatis conueniret; Ergo in statu naturæ puræ voluntas hominis eodem modo esset propensa in bonum proprium & priuatum, ac in statu naturæ lapsæ.

Deinde dilectio efficax Dei ut authoris naturæ, est actus omnium perfectissimus, & præstantissimus, cum totius legis naturæ impletionem virtualiter contineat, Ergo solius naturæ integræ & robustæ videtur proprius. Addo quod prima parte in tractatu de homine, & varijs statibus naturæ humanæ, ostendimus quod non fuissent maiores vires naturæ humanæ ad operandum bonum morale, in statu

naturæ puræ, quam sint in statu naturæ lapsæ, Ergo si homo in statu naturæ lapsæ non potest cum solo concursu generali; Deum ut authorem naturæ, efficaci amore diligere, id pariter non potuisset in statu naturæ puræ, si in eo fuisset conditus.

Secunda verò pars constat ex dictis in secunda conclusione, nam ut ibi ostendimus, homo in statu naturæ lapsæ ad dilectionem efficacem Dei ut authoris naturæ per accidens indiget auxilio supernaturali, ob elevationem naturæ humanæ ad ordinem & finem supernaturalem: Ergo cum in statu naturæ puræ non fuisset talis eleuatio, neque pariter fuisset ad illum actum eliciendum indigentia tali auxilij.

Demum tertia pars sequitur ex præcedentibus, nam homo in natura pura posset & teneretur diligere Deum ut authorem naturæ super omnia; Sed ad hoc non haberet auxilium supernaturale, neque sufficeret generalis concursus, ut iam ostendimus: Ergo exigeret auxilium speciale ordinis naturalis. Et certè cum actus ille esse perfectissimus, & luminis intra ordinem naturæ, auxilium speciale eiusdem ordinis non minus exposceret, quam obseruantia totius legis naturalis, quæ in eo virtualiter contineretur.

## §. II.

### *Soluntur obiectiones.*

Obijcies primò contra primam conclusionem; Dicitur Thomæ 1. p. quæst. 60. artic. 6. ad 5. agno.



agnoscit in Dæmonibus dilectionem naturalem Dei super omnia, & in 2. dist. 33. quæst. 3. art. 2. ad 5. illam pariter admittit in animabus puerorum in limbo existentium: Ergo talis dilectio cum peccato siue actuali siue originali potest componi, subindeque proprijs naturæ viribus elici.

Respondeo duplicem posse dari amorem Dei naturalem, vnum à voluntate vt natura est procedentem; quo Deus vt essendi principium, & bonum vniuersale totius naturæ diligitur: alterum qui est à voluntate, vt potentia libera & electiua, quo Deus amore electiuo & libero, vt amicus & vniuersalis legislator amatur. Primus est amor concupiscentiæ, cum enim Dæmones necessitentur ad diligendos seipsos, & nequeant proprium esse diligere, nisi diligant esse Dei, per quod proprium sustentatur & conseruatur, necessitantur ad diligendum Deum amore concupiscentiæ. Aliter verò est amor beneuolentiæ, quo Deus propter seipsum, & in quantum vt author naturæ est in se summè amabilis, super omnia diligitur: Quando ergo S. Tho. locis cit. in Dæmonibus, & animabus puerorum in limbo existentium, admittit naturalem Dei dilectionem super omnia: loquitur de prima dilectione, quam fatemur cum peccato posse componi, & solis naturæ viribus elici; non verò de secunda, de qua solum agimus in præsentī.

Obijcies; secundo potest aliquis ex solis naturæ viribus mori pro patria, vel pro parentibus: Ergo à fortiori pro Deo vt authore naturæ, subindeque illum ex solis naturæ viri-

viribus super omnia efficaciter diligere: nam teste Scriptura Ioan. 15. *Maiorem charitatem nemo habet quam ut animam suam ponat pro amicis suis.*

Respondeo primò, negando antecedens; tùm enim talis actus sit heroicus, arduus, ac difficilis, homo in statu naturæ lapsæ non potest solis naturæ & liberi arbitrij viribus illum elicere, sed ad illum eliciendum indiget gratia: vel saltem aliquo speciali auxilio ordinis naturalis, nisi fortè actus fiat ex motu vanæ gloriæ, ut sæpe contingit.

Respondeo secundò, dato antecedenti; negando consequentiam & paritatem, ob duplicem rationem discriminis. Prima est, quia Deus est magis separatus à bonis sensibilibus, quæ magis & efficacius nos movent. Secunda, quia dilectio bonorum creatorum non postulat quod relinquantur omnia peccata mortalia, sicut dilectio efficax Dei, quæ nullum peccatum mortale, siue actuale, siue habituale, siue originale, compatitur.

Obijciens tertio: Intellectus potest naturaliter cognoscere, Deum ut authorem naturæ esse super omnia diligendam: Ergo & voluntas, quæ est appetitus rationalis, ductum seu dictamen rationis sequens, potest solis naturæ viribus ipsum supra quodlibet aliud diligere.

Respondeo, concessò Antecedenti, negando consequentiam, nam licet intellectus possit speculando ad talem notitiam devenire ex principijs naturalibus, non potest tamen in statu corruptionis habere iudicium practicum & prudentiale, quo iudicet Deum, esse hic & hanc

nunc super omnia diligendum, nisi speciali auxilio adiungetur; quia homo per peccatum originale magis est vulneratus in intellectu practico, quam in speculativo, & magis impotens ad perfectionem boni, quam ad cognitionem veri, iuxta illud Poetæ, *Video meliora, proboque, deteriora sequor.*

Obijcies quartò contra secundam conclusionem: Si homo in statu naturæ lapsæ indigeret auxilio supernaturali ad diligendum Deum ut authorem naturæ, talis dilectio non esset naturalis, sed supernaturalis: At hoc dici nequit, eum enim illa obiectum naturale respiciat, non potest non esse entitatiuè naturalis: Ergo nec illud. Sequela maioris manifesta videtur, ille enim actus ad quem requiritur auxilium supernaturale, supernaturalis est.

Respondeo negando sequelam maioris, & ad illius probationem dico, actum ad quem auxilium supernaturale requiritur per se, & per modum principij elicitiui illius, esse supernaturalem; secus verò, si tale auxilium exigatur tantùm per accidens, & tanquam remouens prohibens, ut contingit in proposito, auxilium enim supernaturale per se non requiritur ad dilectionem efficacem Dei ut authoris naturæ, sed tantum per accidens, ratione eleuationis naturæ humanæ ad ordinem supernaturalem, & coniunctionis finis naturalis cum supernaturali, & ad tollendum obicem peccati, & auersionis à Deo ut ultimo fine, ut in secunda conclusione declarauimus.

Obijcies quintò, contra tertiam conclusionem: In statu naturæ puræ nulla esset infirmitas subindeque homo in eo posset quidquid

poterat in statu integritatis & sanitatis : At homo in natura integra , cum solo concursu generali Deum vt authorem naturæ diligere poterat , vt docet Diu. Thomas hic art. 3. & constat ex illo Augustin. epist. 107. *Liberum arbitrium ad diligendum Deum , primi peccati granditate perdidimus* : Ergo & id posset in statu naturæ puræ.

Respondeo quod homo in statu naturæ puræ non fuisset infirmus priuatiuè, vel positiuè, sed negatiuè; quia licet tunc fuisset propensus ad bonum priuatum , sicut in statu naturæ lapsæ, talis tamen inclinatio non traxisset originem à peccato , sed ab intrinseca hominis constitutione , homo enim constat partibus habentibus inclinationes oppositas , nimirum rationali, & sensitua, quarum prima naturaliter inclinatur ad bonum honestum & rationi consonum , secunda ad bonum delectabile & sensibile , rationi contrarium . De quo fusiùs in tractatu de statibus naturæ humanæ capite vltimo, vbi de statu naturæ puræ.

Obijcies vltimò: Homo in statu naturæ puræ tenetur præcepto naturali Deum vt naturæ authorem super omnia diligere, sub indeq; id posset, cum Deus non obliget ad impossibilia: At non per gratiam, cum status naturæ puræ omnem gratiam excludat : Ergo solis naturæ viribus.


Confirmatur : Homo in statu naturæ puræ haberet naturalem inclinationem ad diligendum Deum vt authorem naturæ super omnia: At si id non posset ex viribus suæ naturæ, talis inclinatio esset frustra, siquidem nullo modo posset reduci in actum, cum status na-  
turæ

naturæ puræ, omnem gratiam, omniaque auxilia ordinis supernaturalis excludat : Ergo homo in statu naturæ puræ posset solis naturæ viribus, Deum vt naturæ authorem super omnia diligere.

Ad obiectionem respondeo, quod homo in statu naturæ puræ, posset Deum vt authorem naturæ super omnia diligere, non quidem per auxilium ordinis supernaturalis, neque cum solo generali concursu, sed per auxilium speciale ordinis naturalis, quod Deus in tali statu offerret, quando vrgeret obligatio præcepti dilectionis; hoc ita exigente prouidentia suæ suauitate, quæ homini in nullo statu impossibilia præcipere potest. Nec status naturæ puræ omnem gratiam specialem excluderet, sed solum gratiam supernaturalem entitatiuè, vel naturalem per modum habitus & formæ permanentis, qualis foret gratia sanans naturam, eamque integram integritate naturali constituens, vt in tractatu de statibus naturæ humanæ cap. 4. declarauimus.

Ex hoc patet responsio ad confirmationem, data enim maiore, neganda est sequela minoris, vt enim inclinatio indita ab authore naturæ, non sit frustra, sufficit quod posset reduci in actum per vires & auxilia ordinis naturalis (siue illa sint generalia, siue specialia intra illum ordinem) absque recurſu ad ordinem supernaturalem. Dixi *data maiore*, quia Curiel, & nonnulli alij non improbabiliter existimant, quod in statu naturæ puræ non fuisset in homine inclinatio & appetitus naturalis ad diligendum Deum vt authorem naturæ, in seipso expressè, & in particulari, sed solum ad  
am an-

amandum bonum vniuersale & in communi,  
& Deum, vt confusè & implicite sub tali bo-  
no vniuersali contentum.



## C A P V T VI.

*De necessitate gratiæ ad obseruantiam  
totius legis naturæ:*

**C**onstat ex dictis cap. 2. posse hominem  
in natura lapsa; aliqua legis naturalis  
præcepta, sine speciali gratia adimplere, cum  
enim ibi ostensum sit, hominem in tali statu,  
cum solo generali concursu, posse aliquando  
efficere bonum aliquod morale, vndeque  
honestum, hinc manifestè colligitur, ipsum  
quoque posse præceptum de tali opere, v.g. de  
elemosyna danda operi extremè indigenti,  
ex solis naturæ viribus adimplere. Certum  
etiam, & exploratum est apud omnes, homi-  
nem in omni statu indigere gratia, ad imple-  
nda præcepta naturalia, quantum ad modum, vt  
scilicet ex charitate, & meritorie, ac fructuo-  
sè, ad vitam æternam, ea adimpleat; cum enim  
modus ille sit supernaturalis, & actus virtutum  
naturalium eleuet ad ordinem, & finem su-  
pernaturalem, manifestum est illum sine gra-  
tia & charitate, quæ est forma aliarum virtu-  
tum illisque confert vim præcipuam merendi  
æternam felicitatem, non posse poni actibus  
nostris. Solùm ergo difficultas est, & contro-  
uersia inter theologos, an homo possit in statu  
naturæ lapsæ, ex solis viribus liberi arbitrij,

totam legem naturæ, seu totam præceptorum naturalium collectionem, quoad substantiam obseruare, vel ad id indigeat gratia, & quæ?

### §. I.

#### *Triplici conclusione difficultas resolvitur?*

Dico primò, homo in statu naturæ lapsæ non potest totam legem naturæ quoad substantiam obseruare, sine speciali gratia.

Hæc conclusio manifestè colligitur ex dictis capite præcedenti, in primis enim tota lex naturæ includit omnia mandata naturalia, à primo vsque ad vltimum: Sed homo lapsus non potest sine auxilio gratiæ obseruare primum omnium mandatorum, nimirum præceptum dilectionis Dei vt authoris naturæ, vt ibid. conclus. I. ostendimus, Ergo nec totam legem naturæ adimplere. Deinde, vt ibidem dicebamus, licet natura infirma possit aliquod opus efficere, non tamen præstantissimam operationem quam natura sana & integra potest elicere: At opus perfectissimum quod homo in statu integritatis & sanitatis ex viribus naturæ exercere poterat, erat totius legis naturalis obseruantia, quantum ad substantiam, nam quantum ad modum conducentiæ ad salutem, etiam in eo statu indigebat gratia, cum modus ille, vt supra dicebamus, supernaturalis sit. Ergo homo lapsus non potest ex viribus proprijs adimplere totam legem naturæ, quantum ad substantiam.

Dico secundò: ad totius legis naturæ obseruan-

nantiam necessaria est in homine lapso gratia iustificans, seu habitualis.

Probatur primò : Impossibile est esse bene ordinatum circa media, qualia sunt præcepta, & non circa finem, scilicet Deum, quia media propter finem eliguntur, & intuitu eius : At sine gratia sanctificante, & charitate, nullus est bene ordinatus in Deum ultimum finem : Ergo sine illa nullus potest in statu naturæ lapsæ omnia mandata naturalia obseruare.

Probatur secundò : Sub lege naturæ comprehenditur præceptum diligendi Deum naturæ authorem super omnia : At hoc impleri nequit sine gratia habituali, vt capite præcedenti ostensum est : Ergo nec tota lex naturalis.

Dico tertiò : in homine lapso ad totius legis naturæ obseruantiam, præter gratiam habituales, necessariò requiritur specialis gratia auxilians, quæ quidem per se, & attenda rei naturæ, debet solum esse specialis intra ordinem naturæ, sed supposita hominis ad ordinem supernaturalem eleuatione, per accidens debet esse entitatiuè supernaturalis.

Probatur prima pars : Impotentia moralis ad totius legis naturæ obseruantiam, in homine lapso, & in peccato mortali existente, non solum prouenit ex defectu subiectionis mentis ad Deum vt ultimum finem, sed etiam ex rebellionem & pugna appetitus inferioris contra rationem : At licet gratia habitualis mentem Deo vt ultimo fini subijciat, rebellionem tamen appetitus inferioris contra superiorem non tollit, sed eam ad agonem, & meritum, in nobis relinquit, vt docet Tridentinum  
sess. 5.



sess. 5. decreto de peccato originali, & experientia satis ostendit: Ergo in homine lapsō ad totius legis naturæ observantiam, præter gratiam habitualement, seu iustificantem, gratia actualis, seu auxilians, necessariò requiritur.

Quod verò talis gratia, per se, & attenta rei natura, non debeat esse supernaturalis entitatiuè, sed sufficiat quod sit specialis intra ordinem naturæ observantia ex aliquo motu honesto naturali, est entitatiuè naturalis: Ergo per se exposcere nequit pro principio proximè eliciente gratiam auxiliantem entitatiuè supernaturalem.

Demum quod supposita naturæ humanæ ad ordinem supernaturalem eleuatione, per accidens illam exigat, patet ex dictis capite præcedenti conclus. 2. agendo de dilectione Dei naturali, idem enim cum proportionē dicendum est de observantia totius legis naturæ,

## §. II.

### *Soluntur obiectiones.*

Obijcies primò contra primam conclusionem illud Deuteron. 30. *Mandatum hoc quod ego præcipio tibi hodie, non est supra te, neque procul positum, nec in cælo situm.* Quibus verbis Moyse insinuare videtur, observantiam legis quam nomine Dei intimabat populo Hebræo, non esse supra naturales illius vires.

Sed facilè responderetur, Moysem illis verbis solum significare voluisse, observantiam talis legis esse in potestate hominis, non vt operantis

rantis ex solis viribus naturæ, sed vt moti & adiuti diuina gratia, quæ cor interiùs pulsat, cum lex exterius auribus insonat. Vnde Diu. Thomas hic artic. 6. ad 2. *Nihil homo potest facere nisi à Deo moueatur, & idè cum dicitur homo facere quod in se est, dicitur hoc esse in potestate hominis, secundùm quod est motus à Deo.*

Obijcies secundò illud Apostoli ad Rom. 2. *Gentes quæ legem non habent, naturaliter quæ legis sunt faciunt*, quo insinuari videtur, Gentiles ex solis naturæ viribus, legem naturalem obseruasse. Vnde Tertullianus de corona militis cap. 6: *Apostolus ad Romanos dicens natura facere nationes ea quæ leges sunt, & legem naturalem suggerit, & naturam legalem.*

Respondeo verba illa Apostoli posse intelligi de gentibus ad fidem conuersis; & per naturam gratia reformatam operantibus, vt interpretantur D. Augustinus lib. 4. contra Iulian. cap. 3. & D. Thomas in commentarijs ad hunc locum lect. 3. Quod si intelligantur de gentibus nondum ad fidem conuersis, & per solas naturæ vires operantibus, vt Origines, Chrysostomus, Hieronymus, Ambrosius, ipseque Augustinus de Spiritu & littera, cap. 28. ea accipiunt, dicendum est, Apostolum verbis illis solùm velle, gentes nondum ad fidem conuersas, naturaliter, id est solo lumine viribusque naturæ, in aliquibus bene operari, & aliqua legis naturalis præcepta obseruare; licet totam præceptorum naturalium collectionem, totamque naturæ legem, adimplere non possit sine auxilio gratiæ.

Obij-

Obijciens tertio: Præcepta legis naturæ collectiue sumpta, cum sint naturalia, non excedunt vires naturæ. Ergo ad illa implenda gratia necessaria non est.

Respondeo distinguendo Antecedens; non excedunt vires naturæ, sanæ & integræ, concedo Antecedens infirmæ & corruptæ, nego Antecedens, & consequentiam. Solutio patet ex supra dictis, ut enim supra dicebamus, licet natura infirma, & vulnerata, possit aliqua opera moraliter bona efficere, non tamen præstantissimas operationes quas natura sana & integra potest elicere, quales sunt totius legis naturæ impletio, & dilectio Dei ut authoris naturæ, quæ de se insert omnium aliorum præceptorum obseruantiam, & eam habet adiunctam; quandiu illa durat.

Obijciens quarto: Homo in statu naturæ lapsæ potest singula præcepta legis naturæ sine speciali gratia obseruare: At qui potest singula præcepta adimplere, potest etiam & totam collectionem: Ergo homo in statu naturæ lapsæ totam præceptorum naturalium collectionem sine speciali gratia obseruare potest.

Respondeo primo, negando maiorem, nam homo lapsus non potest sine gratia obseruare primum & maximum mandatorum legis naturæ, nimirum præceptum dilectionis Dei ut authoris naturæ.

Respondeo secundo, data maiori, negando minorem, cuius falsitas constat ex dictis supra cap. . agendo de cognitione veritatum naturalium, & apertius patebit infra, cum de venialibus agemus.

Obij-

Obijcies quintò contra secundam conclusionem; Ad totius naturæ obseruantiam requiritur gratia sanans infirmitatem naturæ humanæ, per peccatum originale sauciata, vt docet D. Thomas hic artic. 4. Sed gratia habitualis, cum non ordinetur ad operandum, sed ad essendum, nec moueat potentias animæ ad suos actus eliciendos, sed duntaxat animam sanctificet, & à macula peccati mundet, non est gratia sanans, & ad operandum adiuvans, sed iustificans, vel sanctificans: Ergo ad totius legis naturæ obseruantiam non requiritur, sed ad illam sufficit gratia actualis, siue auxilians.

Respondeo, concessa maiori, negando minorem; nam per peccatum originale duplicem infirmitatem contraximus; alteram in parte superiori, per auersionem mentis à Deo; alteram in parte inferiori, quæ à superiori mansit auersa, & ratione vtriusque debiles ad bene operandum remansimus, nam cum vires voluntatis ad bene operandum erga media, ex fine seu adhesionem ad illum sumantur, fit consequens quod parte superiori à Deo per peccatum auersa, languescant voluntatis vires ad bene operandum, ac proinde quod vt fortis reddatur debeat tolli auersio peccati, quæ cum auferri sine gratia habituali non possit, sine illa perfectè sanari nequit; vnde non solum gratia iustificans, vel sanctificans, sed etiam sanans; meritò appellari potest; licet enim non requiratur vt auxilians ad operandum, directè, requiritur tamen vt remouens peccatum prohibens dilectionem, per quam voluntas firma redditur ad operandum.


Obijcies sexto : Homo in statu naturæ puræ æquè esset ad totius legis naturæ obseruantiam debilis, ac in statu peccati originalis, vt in tractatu de statibus naturæ humanæ ostendimus: At in statu naturæ puræ non indigeret gratia habituali ad implendam totam legem naturæ, sed ad hoc illi sufficeret auxilium intra ordinem naturæ speciale, vt infra dicemus: Ergo nec in statu peccati originalis, ad implendam totam legem naturæ gratia habitualis necessaria erit.

Respondeo distinguendo maiorem, æquè esset ad totius legis naturæ obseruantiam debilis, intensiue, concedo maiorem, extensiue ex parte causarum talis debilitatis, nego maiorem, & concessa minori, nego consequentiam. Itaque in pura natura ad eadem opera æquè esset impotens homo ac in natura lapsa, sed impotentia in illo statu vel solum conueniret ex pugna & rebellionem appetitus contra rationem, quæ ab intraneis naturæ haberetur; vel si etiam ei competeret ex auersione mentis à Deo, non tamen ex auersione mentis à Deo vt authore & fine supernaturali, sed duntaxat naturali. At in isto prouenit etiam ex auersione mentis à Deo, vt authore & fine supernaturali; & quia talis auersio in hoc statu auferri non potest, nisi posita gratia habituali, per quam tollatur peccatum, hinc fit quod requiratur in hoc statu habitualis gratia, secus verò in illo.

Obijcies vltimò contra tertiam conclusionem: Totius legis naturalis obseruantia est opus entitatiue naturale: Ergo auxilia entitatiue supernaturalia exigere nequit.

Re-

Respondeo, concesso Antecedenti, distinguendo consequens, auxilia entitatiuè supernaturalia exigere nequit, per se, & attenta rei natura, concedo. Per accidens, & supposita hominis ad ordinem supernaturalem eleuatione, nego. Ex hoc intelliges, quod in statu naturæ puræ, in quo natura humana non esset eleuata ad ordinem supernaturalem, ad totius legis naturæ obseruantiam, sufficeret auxilium intra ordinem naturæ speciale, vt capite præcedenti diximus de dilectione Dei vt authoris naturæ.



## C A P V T V.

### *De necessitate gratiæ ad victoriam tentationum.*

**E**X principijs supra statutis, contra Vasquez, & Contensonum manifestè colligitur, ad victoriam leuis tentationis, ex moti-uo honesto naturali, specialem Dei gratiam in homine lapso non requiri, Nam talis victoria est opus facile, non excedens nec physicè nec moraliter vires hominis etiam infirmi. Ergo ad illam homo in statu naturæ lapsæ speciali gratia non indiget. Consequentia patet ex supra dictis. Antecedens verò certum videtur, non enim fundamentum aliquod potest assignari, vt adeò vires hominis lapsi extendamus, vt proportionem physicam & moralem non habeat ad victoriam leuis tentationis; præsertim cum habeat potentiam suf-

ficientem & proportionatam ad aliqua opera honesta & moraliter bona, v. g. ad dandam eleemosynam pauperi extremè indigenti, subindeque ad implendum præceptum naturale ad illam obligans, & ad resistendum tentationi quæ ab illius impletione retrahere posset, vt constat ex dictis cap. 2. contra eosdem Authores. Vnde inter propositiones Baij à Pio V. & Gregorio XIII. damnatas, hæc numeratur: *Non sol. m fures sunt ac latrones, qui Christum viam veritatis & vitæ negant, sed etiam qui dicunt tentationi ulli, sine gratiæ eius adiutorio, hominem posse resistere.*

Constat etiam ferè apud omnes, ad vincendam grauem tentationem ex prauo aliquo motiuo, v. g. tentationem luxuriæ ex motiuo auaritiæ, vel inanis gloriæ gratiam non requiri; quia actus ille ex circumstantia finis est malus, gratia autem non desideratur nisi ad actum vndeque honestum. Solùm ergo difficultas est, an ad victoriam grauis tentationis, ex motiuo honesto, necessarium sit speciale gratiæ auxilium. Dicitur autem tentatio grauis, quæ vehementer inclinatur ad malum, & retrahit à bono; per propositionem alicuius magni boni apparentis, vel magni mali imminentis. His præmissis.

Dico breuiter, non potest homo lapsus grauem tentationem ex motiuo aliquo honesto superare, absque speciali Dei auxilio.

Probatur primò ex Scriptura, Apostolus enim 1. ad Corinth. 10. ait: *Non patietur vos tentari supra id quod potestis*; ex quo Chrysostomus, & Theophilatus, Theodoretus, & alij

alij, rectè inferunt, dari tentationes quæ arbitrij sibi relictæ vires saltem morales superant. Item Christus Matth. 26. dicebat Discipulis: *Vigilate, & orate ut non intretis in tentationem*: Si autem victoria cuiusvis tentationis in nostra sita sit potestate, per vires liberi arbitrij, absque indigentia gratiæ, ut volebant Pelagiani, non debuisset Christus vigiliam & orationem persuadere Discipulis, ut vincerent tentationem, sed solum illos exhortari ad victoriam quam suis viribus obtinere valuissent. Vnde Hieronymus lib: 2. aduersus Pelagianos, verba illa Saluatoris explicans, sic ait: *Debuit, iuxta vos, dicere, surgite & resistite, liberum enim habetis arbitrium, & simul concessa à Domino vobis potestate, nullius alterius indigetis auxilio*. Similia habet Africanum epist. Synodica, quæ est nonagesima inter Augustinianas, ubi etiam loquens de Pelagianis; *Istorum (-inquit) sacrilegas disputationes necessario sequitur, ut nec orare debeamus, ne intremus in tentationem*. Si enim possibilitate naturæ & arbitrio voluntatis, in potestate sunt constituta, quis non ea videat à Domino inaniter peti, & fallaciter orari, cum crando poscuntur, quæ natura nostræ iam ita conditæ sufficientibus viribus obtinentur; nec debuisse dicere Dominum Iesum *vigilate, & orate, sed tantummodo, vigilate, ne intretis in tentationem*. Idem ferè repetit Concilium Mileuitanum in epistola etiam synodica, inter Augustinianas 92.

Probatür secundò ex Innocentio 1. in epistola ad Concilium Carthaginense, apud Augustinum 91. ubi sic ait. *Nisi magnis præci-*



bus gratia in nos implorata descendat, ne quaquam terrena labis & mundani corporis vincere conamur errores, cum pares nos ad resistendum, non liberum arbitrium sed Dei solum facere possit auxilium. Quotidiana prestat ille remedia sine quibus nullatenus vincere humanos poterimus errores; necesse est enim, ut quo auxiliante vincimus, eo iterum non adiuvante vincamur. Ex quibus verbis hoc potest argumentum deduci: Id quod possumus sine speciali gratia, non est necessarium, illa seclusa: Ergo si possumus tentari, non vinci, sine gratia speciali, non est necessarium ut Deo non adiuvante vincamur, cuius contrarium docet Innocentius.

Probaturn tertio ex SS: Patribus, qui seridmonent, quod licet nostrum sit dare vel negare tentationi consensum, tamen de nostra fortitudine nullatenus est presumendum, sed ad Dei misericordiam tota humilitate currendum. Ita inter alios Augustinus lib. 22 de ciuit. cap. 23. vbi sic ait: In hoc bello periculorum plenissimo, nec de viribus nostris speretur facienda victoria, nec viribus nostris facta tribuatur, sed eius gratiae, de quo Apostolus ait: Qui dat victoriam per Christum. Bernardus quoque serm. in octauam Paschae sic habet: Quoties ergo tentationi resistis, quoties vincis malignum, noli proprijs retribuere viribus, noli in te sed magis in Domino gloriari. Idem tuse prosequitur serm. 1. in Psalm. qui habitat. Item Gregorius Magnus lib. 23. moral. cap. 19. Nemo (inquit) se alicuius virtutis aestimet etiam cum quid fortiter potest, quia si diuina protectio deserat, ibi repente enervi-

*inrobretur, ubi se valenter stare gloriatur. Ex lib. 18. cap. 6. explicans illud Iob 38. Quis posuit mensuras eius si nosti? subdit: Dum considerat ista qui agit, suæ virtuti nihil tribuat, nec de se audeat aliquid, sed perpendens de super mensuras & lineas incomprehensibiliter tensas, tanto magis in humilitate formidinis consistat, quanto magis pendere videt omnia in potestate mensuris.*

Potest insuper suaderi conclusio hac ratione fundamentali, sæpe a nobis insinuata: Homo per peccatum mansit infirmus, & liberum eius arbitrium, etsi non extinctum tamen debilitatum & infirmatum fuit, in ordine ad bonum morale: Ergo licet ex proprijs viribus efficere possit ea opera quæ facilia sunt, subindeque leues superare tentationes, non potest tamen opera ardua ac difficilia præstare, nec graues proinde vincere tentationes, nisi speciali Dei auxilio confortetur, & adiuvetur. Patet consequentia exemplo hominis naturali infirmitate laborantis: etsi enim ille possit proprijs viribus, & sine alterius adminiculo, motus aliquos leues & faciles hominis sani efficere, vt curuare digitum, mouere pedem, & similia: non tamen potest elicere motus perfectos, vt saltare, currere, spatari, nisi alterius ope adiuvetur, Idem cum proportionede hominis in statu naturæ lapsæ dicendum est, ipsum nimirum posse ex proprijs viribus aliquos actus faciles, & aliqua opera honesta & moraliter bona efficere, nec non aliquas leues superare tentationes; non tamen opera ardua & difficilia, vt diligere Deum vt authorem naturæ super omnia dilectione efficaci, totam legem:

naturalem obseruare, vincere graues tentationes, & similia, quæ homo in statu naturæ sanæ & integræ, ex solis liberi arbitrij viribus præstare poterat. Eodem enim modo, proportionē seruata, philosophandum est de infirmitate morali orta ex peccato, sicut de physica & naturali.

Dices, magnum esset inter vtramque discrimen, nam infirmitas physica causat in homine diminutionem membrorum, ideoque reddit hominem inhabilem ad motum perfectum hominis sani; moralis verò nihil entitatis potentiarum diminuit, cū naturalia integra post peccatum remaneant, subindeque non potest inducere in homine lapsō inhabilitatem ad opera ordinis naturalis, quantumuis perfecta & difficilia sunt.

Sed contra primò, si valetet hoc discrimen, sequeretur hominem lapsū nedum ex viribus naturæ posse grauem superare tentationem, sed etiam totam legem naturalem implere, quod est contra communem Theologorum sententiam.

Contra secundò, licet homo per culpam originalem nihil entitatis potentiarum amiserit, fuit tamen spoliatus gratuitis, per quæ mens subijciebatur Deo, & pars inferior superiori, ex quo oritur infirmitatis moralis, subindeque inhabilitas & impotentia in homine lapsō, ad opera ardua & difficilia ordinis naturalis: Ergo quamuis homo per peccatum originale nihil entitatis potentiarum amiserit, mansit tamen infirmus moraliter, & per consequens impotens ad grauis tentationis victoriam viribus proprijs obtinendam.

De

Demum probari potest conclusio hoc discursu : Cuius agenti connaturale est operari secundum praevalentem inclinationem : Ergo cum urgente graui tentatione praeualeat in homine lapsio inclinatio ad bonum delectabile contrarium rationi , connaturale erit quod voluntas istud sequatur , & praeternaturale quod tunc prosequatur honestum & rationi consonum , & consequenter illud , non obstante tali tentatione , prosequi ; & bono delectabili praeferre , atque ad id à Deo determinari , contra id quod connaturaliter iuxta praevalentem tunc inclinationem petit , erit specialis gratia & beneficium Dei.

Nec valet si dicas , hoc argumentum probare etiam quod homo lapsus non possit sine gratia leues superare tentationes , cum per illas pariter inclinetur ad bonum sensibile & delectabile , contrarium rationi . Non valet , inquam , licet enim ex leui tentatione oriatur aliqua inclinatio & propensio ad bonum delectabile ; quia tamen illa levis , ac debilis est , per rationem & inclinationem naturalem quam homo habet ad bonum honestum , facile , & absque speciali Dei auxilio superari potest.

Contra nostram conclusionem obijci solet hoc argumentum , quod aliquibus difficile apparet : Tentatio quantumvis vehemens quantumvis rationis iudicium non absorbet libertatem non adimit homini lapsio ad ei resistendum : Ergo potest homo lapsus , quantumvis graui tentatione contra aliquod praeceptum legis naturae pulsatus , tentationem illam superare , absque speciali auxilio . Conse-

quentia videtur legitima, impossibile enim videtur, quod aliquis omni speciali auxilio destitutus, remaneat liber ad resistendum tentationi, si absque speciali auxilio non possit ei resistere. Antecedens verò probatur ex Div. Thoma supra quæst. 10. artic. 2. & 3. ubi expressè docet, à nullo omnino obiecto, nulla passione, quantumvis vehementi, voluntatem hominis, quandiu est in via, necessitari quoad exercitium actus, sed semper manere liberam, ut eliciat vel non eliciat actum, quod etiam asserit D. Anselmus de libero arbitr. cap. 6. 7. 9. & 10. Ratio etiam suffragatur, nam si gravis tentatio libertatem adimeret homini tentato, speciali auxilio ad ei resistendum destituito, homo ille ei consentiendo non peccaret, quia nemo peccat in eo quod liberè vitare non potest.

Respondeo, concessio Antecedenti, negando eius consequentiam: Sicut enim ut homo dicatur liber ad observanda præcepta supernaturalia, & resistendum tentationibus ad eorum transgressionem inducentibus, non est necesse quod id præstare valeat sine gratia, & ex solis viribus liberi arbitrij, sed sufficit quod id possit mediante gratia, quæ ipsi offertur à Deo, quando urget eorum obligatio, aut pullat gravis tentatio; ut passim docent SS. Patres impugnantés erroré Pelagij, qui asserbat hominem non esse liberum, si Dei indiget auxilio; sicut refert D. Hieronymus in epist. ad Ctesiphontem: ita pariter ut tentatio gravis contra præcepta naturalia relinquat hominem lapsum liberum ad resistendum, non requiritur quod ille, tali tentatione pulsus, possit

possit absque speciali auxilio ipsi resistere; sed sufficit quod id possit cum auxilio speciali, ei à Deo oblato, instante obligatione præcepti naturalis, & grati illa tentatione urgente: vtenim ait D. Thomas hic artic. 4. ad 2. *Illud quod possumus cum auxilio diuino, non est nobis omnino impossibile, secundum illud Philosophi in 3. Ethic. quæ per amicos possumus, aliquo modo non possumus.*

Ad complementum huius quæstionis, quæres primò, an ad resistendum grati tentationi contra præcepta naturalia, requiratur gratia entitatiuè supernaturalis, vel sufficiat auxilium speciale ordinis naturalis?

Respondeo quod si homo ei resistat ex motu aliquo supernaturali, requiritur gratia entitatiuè supernaturalis; quia cum actus specificetur à motu ex quo elicitur, actus quo quis ex motu supernaturali alicui tentationi resistit, non potest non esse supernaturalis, subindeque pro sui principio gratiam entitatiuè supernaturalem non exigere. Si verò tali tentationi resistat ex motu aliquo honesto ordinis naturalis, sufficit auxilium speciale ordinis naturalis, quia cum tunc actus ille quo ei resistit sit entitatiuè naturalis, nequit exigere pro principio sui gratiam supernaturalem entitatiuè. Vnde supra cap. 3. dicebamus, quod dilectio naturalis Dei, non requirit gratiam supernaturalem entitatiuè pro principio elicienti, sed duntaxat expediente, ratione incompatibilitatis quam habet cum peccato, quæ in victoria grauis tentationis non inuenitur.

Quæres secundò, an ea quæ diximus de homine lapsò, seu in statu naturæ lapsæ exi-

stente, sint intelligenda de homine iam iustificato per gratiam?

Respondeo affirmatiuè, nam in homine iustificato manet rebellio appetitus contra rationem, ex qua prouenit virium debilitas in ordine ad bonum morale; vnde sicut ob hanc rationem indiget speciali auxilio ad dilectionem Dei naturalem, & ad totius legis naturæ obseruantiam; ita pariter eo eget ad grauis tentationis victoriam, vt magis constabit ex dicendis capite sequenti.



## C A P V T VI.

*De necessitate gratiæ ad ad diu vitanda omnia  
peccata mortalia quæ sunt contra  
legem naturæ.*

**C**Um fidè certum sit, hominem non posse sine gratia præcepta supernaturalia adimplere, eadem certitudine constat, ipsū quoq; non posse sine ea vitare illa peccata quæ in transgressione vel omissione talium præceptorum consistunt; vnde solū difficultas est de peccatis mortalibus quæ sunt contra legem naturæ, an scilicet illa possint diu vitari sine gratia? Pro resolutione.

Dico breuiter, hominem in statu naturæ lapsæ, non posse viribus suæ naturæ, diu vitare peccata mortalia quæ sunt contra legem naturalem, sed ad hoc gratiam tum iustificantem tum auxiliantem requiri.

Prima

Prima pars constat ex dictis supra c.4. ibi enim ostendimus hominem lapsum non posse ex viribus suæ naturæ totam legem naturalem adimplere: Ergo nec diu potest ex proprijs viribus vitare omnia peccata mortalia contra talē legē. Consequētia patet, ideò enim homo peccat, quia non adimplet præcepta : Ergo si non potest diu proprijs viribus seruare totam legē naturalem , neq; ex eisdem poterit diu vitare omnia peccata mortalia contra legem naturæ.

Potest insuper eadem veritas suaderi ratione D.Th. hic art.8. Homo in statu naturæ lapsæ habet multa tam intrinseca quam extrinseca, prouocantia ipsum ad peccandum; nimirum rebellionem appetitus , tentationem Dæmonum, & societatem prauorum hominum , qui suis exemplis & consilijs inducunt nos ad peccandum, & aliunde corruptio corporis terreni , & distractio circa res mundanas , & ad vitam necessarias, impedit continuam vigiliam & attentionem mentis ad vitanda illa pericula, iuxta illud Sapient. 9. *Corpus quod corrumpitur aggrauat animam, & terrena inhabitatio deprimit sensum multa cogitantem* : Ergo non potest viribus suæ naturæ resistere omnibus , atque adeò nec vitare omnia peccata mortalia contra legem naturæ.

Quod autem ad illa vitanda , gratia habitualis seu iustificans requiratur , probat idem S. Doctor ibidem hac ratione. Vt homo possit diu vitare omnia peccata mortalia , necesse est quod habeat cor suum ita firmatum in Deo, vt pro nullo bono cōsequendo, vel malo vitando, ab eo separari velit: Sed qui est in peccato mortali, & gratiā ac charitate priuatus, non habet  
cor



cor suum ita firmatum in Deo, sed ab eo potius auersum, & conuersum ad creaturam tanquam in vltimum finem. Ergo omnia peccata mortalia diu vitare non potest. Minor constat. Maior vero probatur à D. Thoma dupliciter. Primò à simili, sicut enim inferiori appetitu non totaliter subiecto rationi, non potest fieri quin cōtingant motus inordinati in ipso, & in huiusmodi moribus peccata venialia ita ratione non subdita Deo, & non firmata in illo tanquam in vltimo fine, non potest fieri quin multæ contingāt inordinationes & peccata in ipsis actibus rationis. Vnde Prosper. 3. de vocatione gentium cap. 2. *Voluntas mutabilis quæ non ab incommutabili voluntate regitur, tantò citius appropinquat iniquitati, quanto acrius intenditur actioni.* Hinc etiam Chrysostomus in c. 11. Matth. comparat peccatorem nauis, malo, velis, & gubernaculo destitutæ, quæ certissimo naufragio exposita est, & quæ fertur non quò natura eam dirigit, sed quò ventorum & procellarum impetus eam impellit. Secundò eandem Maiorem probat S. Doctor ex eo quod cum in hac vita multa occurrant mala quæ formidamus, & bona delectabilia ad quæ allicimur, nisi homo habeat cor suum firmatum in Deo, recedit ab eo propter consequenda bona, vel mala vitanda, contemnēdo præcepta ipsius & sic moraliter peccat.

Addit quod, in repentinis homo operatur secundum finem præconceptum, & secundum habitum præexistentem, quamuis ex præmeditatione rationis homo possit aliquod agere præter ordinem finis præconcepti, & præter inclinationem habitus. Sed quia homo non potest semper

per esse in tali præmeditatione, non potest contingere, ut diu permaneat, quin operetur secundum convenientiam voluntatis deordinatæ à Deo, nisi ei ò per gratiam ad debitum ordinem reparetur. Vnde Gregorius 22. moral. cap. 12. *l'ecatum quod per penitentiam mox non deletur, suo pondere in aliud trahit*. Id constat exemplo Dàuid is, qui commissio adulterio, statim addidit homicidium: Et sanè, cum viæ peccatorum, ut ait Propheta regius Ps. 34. *sint tenebræ & lubricum*, & Angelus Domini persequens illos, sine dubio non infrequentius peccando cadunt, quam offendere solent qui per lubrica in tenebris ambulāt, & ab hostibus eos persequentibus vrgentur & impelluntur.

Tertia demum pars conclusionis, quæ asserit hominem in statu naturæ lapsæ, ut diu vitet omnia peccata mortalia contra legem naturæ, non solum gratia iustificante, sed etiam auxiliante egere, passim docetur à SS. Patribus, præsertim ab Augustino de natura & gratia c. 26. his verbis: *Sicut oculus corporis, plenissime sanus, nisi candore lucis adiutus, non potest cernere sic & homo perfectissime etiam iustificatus, nisi æterna luce iustitiæ diuinitus adiuvetur, rectè non potest viuere* Et lib. de eccles. dogmat. cap. 24. ait, *neminem etiam baptismatis gratia renouatum, idoneum esse ad superandas diaboli insidias, & ad vincendas carnis concupiscentias, nisi per quotidianum adiutorium Dei; perseverantiam bonæ conservationis acceperit*. Perseverantiæ autem nomine, non solum eam quæ est usque ad finem intelligit, sed etiam illam quæ quis per multum tempus sine peccato perseverat; hanc enim etiam posse di-

ci perseverantiam docet idem S. Doct. lib. de bono persever. c. 1.

Eandem nostræ conclusionis partem docet S. Thomas hic art. 9. ubi ait hominem in gratia constitutum, ad bene operandum, & vitandum peccatum, indigere auxilio Dei, non solum ea ratione generali qua nulla res creata potest in actum prodire, nisi virtute divinæ motionis, sed etiam ratione speciali, propter conditionem status humanæ naturæ, quæ quidem licet per gratiam sanetur quantum ad mentem; remanet tamen in ea corruptio & infectio quantum ad carnem, per quam servit legi peccati, ut dicitur ad Roman. 7. Remanet etiam quædam ignorantie obscuritas, secundum quam, ut etiam dicitur ad Roman. 8. quid ore-  
mus sicut oportet ne scimus.

Aliam rationem insinuat idem S. Doct. supra qu. 68. art. 2. ubi sic ait: Id quod imperfectè habet naturam aliquam, vel formam, aut virtutem, non potest per se operari, nisi ab altero moveatur. Sicut sol quia est perfectè lucidus, per se ipsum potest illuminare: luna autem in qua est imperfectò natura lucis, non illuminat nisi illuminata. Medicus etiam qui perfectè novit artem medicinæ, potest per se operari; sed discipulus eius, qui nondum est plenè instructus, non potest per se operari, nisi ab eo instruat. Sed gratia iustificans, in hoc statu viæ, imperfectè participatur ab homine iusto: Ergo ille non potest per talem gratiam perfectè operari, & diu facere bonum & vitare peccatum, nisi speciali Dei auxilio moveatur & adiunetur. Maior constat, Minor verò egregie probatur ac illustratur à nostro Conrado in commen-

tario ad art. 9. huius quæstionis, vbi notat quod gratia viæ triplicem habet imperfectionem, per comparisonem ad gratiam patriæ. Prima est in modo operandi, nam gratia patriæ semper causat actualem amorem Dei, non gratia viæ, propter quod dicitur Matth. 11. quod quilibet beatus, quantumvis minimus, maior est Ioanne Baptista, scilicet quantum ad modum operandi; quia Ioannes non semper actu amabat Deum, sicuti beati. Secunda est quod gratia viatoris, quantumvis intensa, de lege ordinaria non sanat perfectè appetitum, sicut gratia beatorum. Tertia est, quod non perficit rationem vt immobiliter inhæreat diuinæ regulæ, sicut gratia patriæ.

Aliam rationem insinuat S. Doctor 3. contra Gent. cap. 155. vbi sic discurret: *Omne quod est variabile, ad hoc quod figatur in viro, indiget auxilio alicuius momentis immobilis: homo autem variabilis est & de malo in bonum, & de bono in malum: ad hoc igitur vt immobiliter perseueret in bono, indiget auxilio diuino.* Idem docet 2. 2. quæst. 137. art. 4. his verbis: *Cum liberum arbitrium de se sit vertibile, & hoc ei non tollat r per habitualem gratiam præsentis vitæ, non subest potestati liberi arbitrij, etiam reparati, vt se immobiliter in bono statuât, licet sit in potestate eius quod hoc obligat; plerumque enim cadit sub nostra potestate electio, sed non executio.*

Ex his intelliges; iustos debere quotidie orare ad obtinendum à Deo auxilium illud speciale ad vitanda peccata, & perseuerandum in bono necessarium, vt monet Concilium Arausicanum can. 10. dicens, *Ad interiorum Dei*  
etiam

etiam a renatis & sanctis semper est implorandum, ut ad finem bonum pervenire, vel in bono possint opere perdurare. Debent etiam iusti quotidie gratias agere Deo, quod à peccato servati sint, ut eleganter declarat Augustinus homil. 23. inter 50. his verbis: *Agnosce gratiam eius cui debes & quod non amisisti. Mihi debet ille quod factum est, & dimissam vidisti; mihi debes & tu quod non admisisti. Nullum enim est peccatum quod fecit homo, quod non possit facere alter homo, si desit rector à quo factus est homo.* Et lib. 2. Confess. cap. 7. *Diligam Te Domine (inquit) & gratias agam, & confitebor nomini tuo, quoniam tanta dimisisti mihi mala, & nefaria opera mea. Gratia tua deputo & misericordia tua, quod peccata mea tanquam glaciem solvisi, Gratia tua deputo & quæcumque non feci mala. & omnia mihi dimissa esse fateor, & quæ mea sponte feci mala, & quæ te dux non feci.*

Obijcies primò: Ideò homo in statu naturæ lapsæ non potest servare totam legem, & vitare diu omnia peccata mortalia, quia observare totam legem, & omnia peccata vitare, est opus hominis sani, atque adeò nequit ab infirmo præstari, ut in prima probatione nostræ conclusionis declarauimus: Sed homo sanatur per gratiam habitualement, quæ idcirco à D. Th. hic art. 4. sanans appellatur: Ergo per illam fit potens ad observandam totam legem, & diu vitanda omnia peccata mortalia, subindeq; ad hoc non indiget ulterius, auxilio Dei speciali.

Respondeo quod licet homo per gratiam habitualement sanetur, non tamen totaliter & adequatè, nam ut ait S. Doctor supra relatus,

*Licet:*

*Licet per gratiã sanetur quantũ ad mentem, remanet tamen in eo corruptio quantum ad carnem, per q amseruit legi peccati.* Id est concupiscentia inclinans ad malum, & ad bonum delectabile contrarium rationi, ex qua oriuntur varix & graues tentationes, qux voluntatem ad peccatum pertrahunt; vnde vt homo iustificatus illas superet, & omnia vitet peccata mortalia, vltra gratiam habitualement, indiget speciali Dei auxilio, quo in bonum inclinetur, & mutetur mentis affectio, quam ex cupiditate alliciente contrahit.

Dices: D. Thomas 3. p. quæst. 62. art. 6. ad 3. loquens de gratia habituali ait quod *minima gratia potest resistere cuilibet concupiscentiæ.* Ergo per gratiam habitualement homo totaliter & perfecte sanatur, & fit potens ad resistendum omnibus concupiscentiæ illecebris & tentationibus, subindeque ad vitanda omnia peccata mortalia.

Respondeo vel D. Thom. ibi loqui de gratia habituali, non excludendo, sed supponendo auxilium Dei speciale, sine quo neque minima neq; maxima gratia potest diu resistere omni tentationi. Vel solum velle (vt interpretatur Caietanus hic art. 9. quod minima gratia sufficit, quantum est de se, & ex natura sua ad resistendum cuilibet concupiscentiæ, non verò quatenus est in tali subiecto, cum pugna appetitus, & cum debilitate rationis, propter ignorantiam. Sicut enim licet calor aquæ bullientis superet eius frigiditatem, quia tamen non est in subiecto sibi connaturali, statim à frigore expellitur: Sic etiam, quia gratia in nobis viatoribus non est in subiecto sibi proportionato,

to, sed multum infirmo, & indisposito, licet ipsa fortior sit concupiscentia, ab ea tamen ratione subiecti, si auxilio Dei speciali destituatur, superatur, & corrumpitur.

Obijcies secundò: Ideò iuxta D. Thom. hic artic. 8. homo existens in peccato mortali non potest diu omnia mortalia collectiue vitare, quia non habet cor firmatum in Deo, ut pro nullo bono obtinendo, vel malo vitando, ab eo separetur: At homo iustus, per gratiam habitualement habet cor suum firmatum in Deo ut ultimo fine: Ergo per illam habet sufficientes vires ad diu vitanda omnia peccata mortalia collectiue. Vnde idem S. Doctor ibidem ait quod homo in statu gratiæ, *potest abstinere ab omni peccato mortali quod in ratione consistit.*

Respondeo negationem firmitatis cordis in Deo esse quidem causam cur homo lapsus non possit diu omnia mortalia collectiue vitare, non tamen totalem, & adæquatam; nam præter illam alia huius impotentia causa reperitur, nempe negatio subordinationis & subiectionis partis inferioris ad superiorem, ut docet D. Th. hic ar. 9. unde cum in statu naturæ lapsæ hæc secunda causa in homine iustificato perseveret; etsi prima non subsistat, non potest vitare omnia mortalia collectiue, sed ea duntaxat quæ ex prima causa, nimirum deordinatione rationis, per auersionem à Deo, & conuersionem ad creaturam, trahunt originem. Et hoc solum intendit S. Doctor, dum ait quod homo in statu gratiæ, *potest abstinere ab omni peccato mortali quod ratione consistit.*

## CAPVT VII.

*De necessitate gratia ad vitanda peccata  
venialia.*

**C**ertum est hominem, in statu naturæ lapsæ, cum auxilijs huic statui ordinarijs, posse singula peccata venialia deuitare, alioquin non peccaret ea committendo, cū nullus peccet in eo quod vitare non potest. Constat enim, illum cum ijsdem auxilijs posse breui aliquo temporis spatio esse sine peccato veniali. Nam vt S. Th. 3. p. q. 79. art. 4. ad 2. exponens illud 1. Ioan. 1. *Si dixerimus quia peccatum non habemus*: ait: *Hoc non est intelligendum, quin aliqua hora possit homo esse absque omni reatu peccati venialis, sed quia vitam istam sancti non ducunt sine peccatis venialibus.* Vnde solū difficultas est an homo per totam vitam, vel per longum tempus, omnia venialia collectiue vitare possit, seu nunquam vel rarò peccare venialiter? Pro resolutione.

Dico breuiter, neminem per totam vitam, vel per aliquod longum tempus, posse cum auxilijs de lege ordinaria gratiæ habituali annexis, omnia peccata venialia collectiue vitare, sed ad id requiri speciale priuilegium, quod soli Deiparæ Virgini fuit concessum.

Prima pars est certa de fide, ac definita in Concilio Mileuitano can. 7. & 8. & in Tridentino sess. 6. can. 23. constatque varijs Scripturæ testimonijs, quibus asseritur, nullum esse quan-



talibet gratiâ ornatum, qui aliquândo non peccet: Secundi Paralip. 6. *Nec enim est homo qui non peccet.* Iacobi 3. *In multis offendimus omnes.* Psal. 31. *Remisisti impietatem peccati mei, pro hac* (scilicet peccati remissione) *orabis ad te omnis* (non solum peccator, sed) *Sanctus.* Demum 1 Ioan. 1. *Si dixerimus, quia peccatum non habemus, ipsi nos seducimus.* Ex quibus & similibus testimonijs hoc argumentum formatur: Id. quod contra legem communem, speciale priuilegium est: Sed iustum omnia peccata venialia collectiue sumpta vitare, est contra legem communem, qua Deus statuit omnibus iustis aliqua venialia permittere, vt constat ex prædictis Scripturæ testimonijs: Ergo nullus potest ab omni veniali collectiue abstinere, absque priuilegio speciali.

Idem constat ex SS. Patribus, qui passim docent hominem quandiu viuit, à leuibus peccatis non posse esse immunem, & pedes, qui sunt animæ affectiones, dum in hoc puluere gradiuntur, ex toto mundos esse non posse: Augustinus enim tra. 1. in 1. Ioan. *Non potest* (inquit) *homo quandiu carnem portat, non habere leuia peccata.* Leo Papa serm. 4. quadrages. *Dum per varias actiones vitæ huius sollicitudo distenditur, necesse est mundano puluere etiam religiosa corda sordescere.* Bernardus in sermone de cena Domini, verba illa Christi, *Qui lotus est non indiget nisi vt pedes lauet*, expendens, subdit: *Lotus est qui graua peccata non habet, cuius caput, idest intentio, & manus, id est operatio, & conuersatio munda est; sed pedes qui sunt animæ affectiones, dum in hoc puluere gradiuntur, ex toto mundi esse non*

pos-

sunt, quin aliquando vanitati, aliquando voluptatis, aut curiositati, plusquam oportet cedat animus vel ad horam, in multis enim offendimus omnes. Huiusque rationem supra assignauerat, dicens, In casu primi hominis cecidim somnes; cecidimus autem super acerrimum lapidum, & in luto; unde non solum inquinati, sed etiam vulnerati & grauiter quassati sumus: lauari quidem citò possumus, ad sanandum vero opus est curatione multa.

Eadem ratione vtitur S. Thomas hic art. 8. vbi ait quod homo in statu naturæ lapsæ non potest abstinere ab omni peccato veniali, propter corruptionem carnis, id est vlcus concupiscentiæ, ex quo sæpe fuit sanies, & pus, seu alicuius peccati putredo & foetor, donec illud fuerit perfectè sanatum in gloria, per charitatem & gratiam consummatam patriæ. Vnde Augustinus lib. de perfect. iustitiæ cap. 4. Peccantem secuta est peccatum habendi dura necessitas, donec tota sanetur infirmitas & accipiatur tanta libertas, in qua sicut necesse est permaneat beatè viuendi voluntas, ita ut sit etiam bene viuendi, & nunquam peccandi voluntaria felixque necessitas.

Hæc ratio confirmari & illustrari potest in hunc modum: Vt homo iustus possit omnia venialia collectiue vsque ad mortem vel per aliquod longum tempus vitare, necessariè requiritur, quod vel ligetur vel extinguatur fomes peccati: At ex vi auxiliorum quæ communiter lege gratiæ annectuntur, nec ligatur, nec extinguuntur fomes; Ergo ex vi aliorum non potest homo iustus omnia venialia collectiue vsque ad mortem, vel per aliquod longum tempus

pus vitare. Minor est certa, tum quia in sola B. Virgine, ob dignitatem matris, fomitis ligatio aut extinctio agnoscitur à Theologis: tum etiam quia in omnibus iustis manet rebellio appetitus ad agonem, ut docet Tridentinum. Maior verò suadetur: Nisi extinguatur, vel saltem ligetur fomes peccati, ex corrupto appetitu, & ulcere concupiscentiæ, insurgunt frequentes motus rationi non conformes circa sensibilia: At inter tot conflictus non potest homo se immunem à peccato servare, nam quando vni resistere nititur, alter insurgit, nec potest ratio esse in continua vigilia: Ergo non nisi extincto, aut ligato fomite, potest homo iustus diu à peccato veniali abstinere.

Ex hoc probata manet secunda pars conclusionis, cum enim in B. Virgine, vel non fuerit fomes, vel fuerit ligatus, aut totaliter extinctus, secundum diversas sententias, in ea quoque, non fuit impotentia illa moralis vitandi omnia venialia collectivè, quæ oritur ex fomite, sed habuit speciale privilegium nunquam peccandi venialiter, ut docet Tridentinum loco supra citato, asserens semper ita sensisse Ecclesiam.

Quod verò talis prerogativa nō fit in alios sanctos quantumlibet insignes dilatanda, constat ex eo quod exceptio firmat regulam in contrarium: At Tridentinum ab hac regula generali: *Nullus est iustus qui non venialiter peccet*, solum excipit Beatissimam Virginem: Ergo ceteros, quantumvis iustos & sanctos, sub tali regula comprehendit. Vnde August de natura & gratia cap. 3<sup>a</sup>. *Hac ergo Virgine excepta, si omnes illos sanctos & sanctas, cum hic viverent, congregare possemus, & interro-*

gare utrum essent sine peccato, quid fuisse responsuros, putamus? Nonne una voce clamasset: Si dixerimus quia peccatum non habemus, ipsi nos seducimus & veritas in nobis non est.

Probabiliter tamen ac piè à multis creditur aliquos sanctos habuisse priuilegium vitandi omnia venialia, in aliqua certa & determinata materia, vt Sanctum Ioannem Baptistam peccata venialia quæ locutione committuntur, quia illa specialiter repugnant officio Prædicatoris & Præcursoris: Vnde Ecclesia canit ipsum antra deserti teneris sub annis petijisse, ne leui famine vitam macularet. Beatum Iosephum peccata venialia quæ sunt contra virtutem castitatis, quia hoc decebat sponsum purissimæ Virginis. Refert etiam D. Gregorius 2. Dialog, cap. 2. S. Benedictum nunquam sensisse rebellionem carnis, postquam se inter spinas volutauit. Quod pariter de Angelico nostro Doctore asseritur, ab eo tempore quo ab Angelis castitatis cingulo fuit præcinctus. Illum etiam nunquam peccasse venialiter in materia superbiæ, Ecclesia aperte declarat, dum in eius officio encomia eius celebrans, canit:

*O munus Dei gratiæ  
Vincens quoduis miraculum;  
Pestifera superbiæ  
Nunquam persensit stimulum*

Contra primam partem conclusionis obijci solet difficile argumentum, quod potest sic breuiter proponi. Nullus peccat in eo quod

vitare non potest, vt ait Augustinus lib. 3. de libero arbitr. cap. 18. At si homo in statu naturæ lapsæ indigeret speciali auxilio, seu priuilegio, ad vitanda omnia venialia, ea non posset vitare, cū Deus non sit paratus tale auxilium seu priuilegium omnibus dare: Ergo non posset ei ad culpam imputari, quod omnia peccata venialia non vitaret. Nec valet quod aliqui dicunt, hoc ei posse ad culpam imputari, ex eo quod impotentia ea vitandi est ipsi voluntaria, saltem in capite, ratione culpæ originalis ex qua fuit relictā. Non valet, inquam, quia licet voluntarium in capite ad culpam originalem sufficiat, non tamen ad actuale, vt constat in motibus primo primis concupiscentiæ, in infidelitate negatiua, & ignorantia inuincibili, quæ non sunt peccata, nec imputantur ad culpam, etsi à peccato originali proueniant, subindeque in capite voluntaria sint. Hac ergo solutione prætermissa.

Huic difficili obiectioni respondeo, vt peccata venialia homini in statu naturæ lapsæ imputentur, non requiri quod Deus det aut dare paratus sit speciale illud auxilium seu priuilegium quod necessarium est ad vitanda omnia venialia collectiuè, sed satis esse vt det auxilium ad vitanda omnia diuisiuè, & seorsim ac in particulari. Ita D. Thomas hic ar. 8. in corp. vbi sic ait: *Huius (scilicet appetitus sensitui) motus singulos ratio reprimere potest (& ex hoc habent rationem peccati & voluntarij) sed non omnes.* Et supra quest. 74. art. 3. ad 2. *Non potest homo vitare omnes huiusmodi (nempe concupiscentiæ) motus, propter cor-*

nem prædictam (fomitis.) Sed hoc suffi-  
 rat onem peccati voluntarij, quod possit  
 singulos. Item 3. contra Gent. cap. 160.  
 inquit) ille qui est in peccato, non habeat  
 propria potestate, quod omnino vitet pec-  
 ,habet tamen potestatem nunc vitare hoc  
 lud peccatum; unde quodcumque commit-  
 untariè committit, & ita non immeritè  
 tatur ad culpam.

ces: Homo iustus non solum tenetur vi-  
 ngula venialia, sed etiam omnia colle-  
 Ergo cum nullus teneatur ad impossibi-  
 ortet ut omnia venialia collectiue vitare  
 ,saltem cum auxilio gratiæ quod Deus  
 ratus conferre,

spondeo non dari præceptum respiciens  
 a venialia collectiue, etsi enim in scri-  
 præcipiatur in communi ut non peccet  
 tamen præcipitur ratione singulorum  
 atorum quæ tenemur vitare; quia pecca-  
 mper se offerunt vitanda diuisiue & seor-  
 non verò simul & collectiue.

stabis: Homo habet naturalem necessita-  
 existendi in aliquo loco indeterminatè,  
 libertate existendi in hoc vel in illo de-  
 inatè, & tamen non potest obligari ad nō  
 endum in aliquo loco, & si de facto pro-  
 etur illi alicubi existere, non peccaret  
 bi existendo, propter illam necessitatem:  
 pariter si homo in statu naturæ lapsæ  
 at necessitatem incidendi in aliquod pec-  
 n veniale indeterminatè, etsi quodlibet  
 rticulari vitare possit, obligare non po-  
 ad non peccandum venialiter.

spondeo, concesso Antecedenti, negan-

do consequentiam, & paritatem, duplex enim inter illud exemplum, & id de quo agimus, reperitur discrimen. Primum est, quod ex natura rei necessarium est hominem existere in aliquo loco, hoc enim provenit ex natura corporis, quod nequit esse extra omnem locum: at verò necessitas incidendi in aliquod veniale, non oritur ex natura rei, nec ex parte ipsorum peccatorum, illa enim sunt secundum se nata vitari, sed ex infirmitate naturæ, per peccatum originale corruptæ: esset autem durum hominem obligare ad aliquid secundum se & ex natura rei impossibile, siue illi prohibere quod necessario, & ex natura ei debet evenire, secus verò id quod secundum se non est impossibile. Secundum discrimen est quod in exemplo adducto, illud commune quod necessitat, semper est coniunctum cum exercitio circa aliquod singulare determinatum, quilibet enim actu exercito in aliquo determinato loco existit, sicque duplex est ibi necessitas, una circa commune, & altera circa continuum exercitium alicuius particularis. At verò in nostro casu est una tantum necessitas ad peccandum ut sic, sed non ad existendum continuò in exercitio alicuius peccati, & ita datur perfecta libertas circa singula peccata venialia, cum tamen in exemplo adducto non sit omnino perfecta libertas circa singularia.

*Vita*  
primò  
se se di  
auxiliu  
art. 6. ad 2. v  
quod in se est,  
faciente quod

## A P V T VIII.

*gratia ad se preparandum  
ad illam.*

gianorum & Semipelagianorum, quo assererebant primam gratiam, primamque Dei vocatio-  
nem boni operis, facti sine gra-  
tiæ viribus, tanquam pro-  
prie condigno, vel saltem de con-  
suetudine Doctores Catholici, existimā-  
tibus naturæ causam dispositivā,  
meritoriam primi auxilij superna-  
re, Durandus, Gabriel, Ri-  
quellus. Alij verò docent, quod  
bona ordinis naturalis, non sint  
dispositiones ad primam gratiam  
ex lege tamen Dei, & pacto ini-  
tiale, de non neganda gratia facien-  
tibus ex viribus naturæ, habere con-  
suetudinem cum illa. Ita Molina in  
p. 10. quem sequuntur plures ex  
s.

## §. I.

*que sententia rejicitur.*

Ad, hominem ex viribus naturæ  
disponere, etiam remotè, ad pri-  
mam gratiæ. Ita D. Thomas hic  
ubi explicat hoc axioma, *facientē*  
*Deus non denegat gratiam*: de  
d. in se est, ut est motus auxilio



talibet gratiâ ornatum, qui aliquâdo non peccet: Secundi Paralip. 6. *Nec enim est homo qui non peccet.* Iacobi 3. *In multis offendimus omnes.* Psal. 31. *Remissi sunt impietatem peccati mei, pro hac* (scilicet peccati remissione) *orabit ad te omnis* (non solum peccator, sed) *Sanctus.* Demum 1 Ioan. 1. *Si dixerimus, quia peccatum non habemus, ipsi nos seducimus.* Ex quibus & similibus testimonijs hoc argumentum formatur: Id quod contra legem communem, speciale priuilegium est: Sed iustum omnia peccata venialia collectiue sumpta vitare, est contra legem communem, qua Deus statuit omnibus iustis aliqua venialia permittere, ut constat ex prædictis Scripturæ testimonijs: Ergo nullus potest ab omni veniali collectiue abstinere, absque priuilegio speciali.

Idem constat ex SS. Patribus, qui passim docent hominem quandiu uiuit, à leuibus peccatis non posse esse immunem, & pedes, qui sunt animæ affectiones, dum in hoc puluere gradiuntur, ex toto mundos esse non posse: Augustinus enim tra. 1. in 1. Ioan. *Non potest* (inquit) *homo quandiu carnem portat, non habere leuia peccata.* Leo Papa serm. 4. quadrages. *Dum per varias actiones uitæ huius sollicitudo distenditur, necesse est mundano puluere etiam religiosa corda sordescere.* Bernardus in sermone de cæna Domini, verba illa Christi, *Qui lotus est non indiget nisi ut pedes lauet*, expendens, subdit: *Locus est qui grauiora peccata non habet, cuius caput, idest intentio, & manus, id est operatio, & conuersatio munda est; sed pedes qui sunt animæ affectiones, dum in hoc puluere gradiuntur, ex toto mundi esse non possunt.*

sunt; quin aliquando vanitati, aliquando voluptati, aut curiositati, plusquam oportet cedat animus vel ad horam, in multis enim offendimus omnes. Huiusque rationem supra assignauerat, dicens, In casu primi hominis cecidim omnes; cecidimus autem super acervum lapidum, & in luto; unde non solum inquinati, sed etiam vulnerati & graviter quassati sumus: lauari quidem citò possumus, ad sanandum vero opus est curatione multa.

Eadem ratione utitur S. Thomas hic art. 8. ubi ait quod homo in statu naturæ lapsæ non potest abstinere ab omni peccato veniali, propter corruptionem carnis, id est vlcus concupiscentiæ, ex quo sæpe fuit sanies, & pus, seu alicuius peccati putredo & foetor, donec illud fuerit perfectè sanatum in gloria, per charitatem & gratiam consummatam patriæ. Vnde Augustinus lib. de perfect. iustitiæ cap. 4. Peccantem secuta est peccatum habendi dura necessitas, donec tota sanetur infirmitas, & accipiatur tanta libertas, in qua sicut necesse est permaneat beatè viuendi voluntas, ita ut sit etiam bene viuendi, & nunquam peccandi voluntaria felixque necessitas.

Hæc ratio confirmari & illustrari potest in hunc modum: Ut homo iustus possit omnia venialia collectiue vsque ad mortem vel per aliquod longum tempus vitare, necessariò requiritur, quod vel ligetur vel extinguatur fomes peccati: At ex vi auxiliorum quæ communiter lege gratiæ annectuntur, nec ligatur, nec extinguatur fomes; Ergo ex vi aliorum non potest homo iustus omnia venialia collectiue vsque ad mortem, vel per aliquod longum tem-

pus

pus vitare. Minor est certa, tum quia in sola B. Virgine, ob dignitatem matris, fœmitis ligatio aut extinctio agnoscitur à Theologis: tum etiam quia in omnibus iustis manet rebellio appetitus ad agonem, vt docet Tridentinum. Maior verò suadetur: Nisi extinguatur, vel saltem ligetur fomes peccati, ex corrupto appetitu, & vlcere concupiscentiæ, insurgunt frequentes motus rationi non conformes circa sensibilia: At inter tot conflictus non potest homo se immunem à peccatō seruare, nam quando vni resistere nititur, alter insurgit, nec potest ratio esse in continua vigilia: Ergo non nisi extincto, aut ligato fomite, potest homo iustus diu à peccato veniali abstinere.

Ex hoc probata manet secunda pars conclusionis, cum enim in B. Virgine, vel non fuerit fomes, vel fuerit ligatus, aut totaliter extinctus, secundum diuersas sententias, in ea quoq, non fuit impotentia illa moralis vitandi omnia venialia collectiue, quæ oritur ex fomite, sed habuit speciale priuilegium nunquam peccandi venialiter, vt docet Tridentinum loco supra citato, asserens semper ita sensisse Ecclesiam.

Quod verò talis prerogatiua nō sit in alios sanctos quantumlibet insignes dilatanda, constat ex eo quod exceptio firmat regulam in contrarium: At Tridentinum ab hac regula generali: *Nullus est iustus qui non venialiter peccet*, solum excipit Beatissimam Virginem: Ergo cœteros, quantumuis iustos & sanctos, sub tali regula comprehendit. Vnde August. de natura & gratia cap. 3<sup>a</sup>. *Hac ergo Virgine excepta, si omnes illos sanctos & sanctas, cum hic viderent, congregare possemus, & interro-*

gare utrum essent sine peccato, quid fuisset respon-  
suros, putamus? Nonne una voce cla-  
masset: Si dixerimus quia peccatum non ha-  
bemus, ipsi nos seducimus & veritas in nobis  
non est.

Probabiliter tamen ac piè à multis credi-  
tur aliquos sanctos habuisse priuilegium vi-  
tandi omnia venialia, in aliqua certa & de-  
terminata materia, vt Sanctum Ioannem Ba-  
ptistam peccata venialia quæ locutione com-  
mittuntur, quia illa specialiter repugnant offi-  
cio Prædicatoris & Præcursoris: Vnde Ecclesia  
canit ipsum antra deserti teneris sub annis pe-  
tisse, ne leui famine vitam macularet. Bea-  
tum Iosephum peccata venialia quæ sunt con-  
tra virtutem castitatis, quia hoc decebat spon-  
sum purissimæ Virginis. Refert etiam D. Gre-  
gorius 2. Dialog, cap. 2. S. Benedictum nun-  
quam sensisse rebellionem carnis, postquam se  
inter spinas volutauit. Quod pariter de An-  
gelico nostro Doctore asseritur, ab eo tempo-  
re quo ab Angelis castitatis cingulo fuit præ-  
cinctus. Illum etiam nunquam peccasse venia-  
liter in materia superbiæ, Ecclesia apertè de-  
clarat, dum in eius officio encomia eius cele-  
brans, canit:

*O munus Dei gratiæ  
Vincens quoduis miraculum;  
Pestifera superbiæ  
Nunquam persensit stimulum!*

Contra primam partem conclusionis obji-  
ci solet difficile argumentum, quod potest sic  
breuiter proponi. Nullus peccat in eo quod

vitare non potest, ut ait Augustinus lib. 3. de libero arbit. cap. 18. At si homo in statu naturæ lapsæ indigeret speciali auxilio, seu priuilegio, ad vitanda omnia venialia, ea non posset vitare, cum Deus non sit paratus tale auxilium seu priuilegium omnibus dare: Ergo non posset ei ad culpam imputari, quod omnia peccata venialia non vitaret. Nec valet quod aliqui dicunt, hoc ei posse ad culpam imputari, ex eo quod impotentia ea vitandi est ipsi voluntaria, saltem in capite, ratione culpæ originalis ex qua fuit relictæ. Non valet, inquam, quia licet voluntarium in capite ad culpam originalem sufficiat, non tamen ad actualem, ut constat in motibus primo primis concupiscentiæ, in infidelitate negatiua, & ignorantia inuincibili, quæ non sunt peccata, nec imputantur ad culpam, etsi à peccato originali proueniant, subindeque in capite voluntaria sint. Hac ergo solutione prætermissa.

Huic difficili obiectioni respondeo, ut peccata venialia homini in statu naturæ lapsæ imputentur, non requiri quod Deus det aut dare paratus sit speciale illud auxilium seu priuilegium quod necessarium est ad vitanda omnia venialia collectiue, sed satis esse ut det auxilium ad vitanda omnia diuisiue, & seorsim ac in particulari. Ita D. Thomas hic ar. 8. in corp. ubi sic ait: *Huius (scilicet appetitus sensitui) motus singulos ratio reprimere potest (& ex hoc habent rationem peccati & voluntarij) sed non omnes.* Et supra quest. 74. art. 3. ad 2. *Non potest homo vitare omnes huiusmodi (nempe concupiscentiæ) motus, propter cor-*

ruptionem prædictam (fornicis.) Sed hoc sufficit ad rationem peccati voluntarii, quod possit vitare singulos. Item 3. contra Gent. cap. 160. Licet (inquit) ille qui est in peccato, non habeat hoc in propria potestate, quod omnino vitet peccatum, habet tamen potestatem nunc vitare hoc vel illud peccatum; unde quodcumque committit, voluntariè committit, & ita non immeritè ei imputatur ad culpam.

Dices: Homo iustus non solum tenetur vitare singula venialia, sed etiam omnia collectiue: Ergo cum nullus teneatur ad impossibile, oportet ut omnia venialia collectiue vitare possit, saltem cum auxilio gratiæ quod Deus sit paratus conferre.

Respondeo non dari præceptum respiciens omnia venialia collectiue, etsi enim in scriptura præcipiatur in communi ut non peccemus, hoc tamen præcipitur ratione singulorum peccatorum quæ tenemur vitare; quia peccata semper se offerunt vitanda diuisiue & seorsim, non verò simul & collectiue.

Instabis: Homo habet naturalem necessitatem existendi in aliquo loco indeterminatè, cum libertate existendi in hoc vel in illo determinatè, & tamen non potest obligari ad non existendum in aliquo loco, & si de facto prohiberetur illi alicubi existere, non peccaret alicubi existendo, propter illam necessitatem: Ergo pariter si homo in statu naturæ lapsæ habeat necessitatem incidendi in aliquod peccatum veniale indeterminatè, etsi quodlibet in particulari vitare possit, obligare non poterit ad non peccandum venialiter.

Respondeo, concesso Antecedenti, negando

do consequentiam, & paritatem, duplex enim inter illud exemplum, & id de quo agimus, reperitur discrimen. Primum est, quod ex natura rei necessarium est hominem existere in aliquo loco, hoc enim prouenit ex natura corporis, quod nequit esse extra omnem locum: at verò necessitas incidendi in aliquod veniale, non oritur ex natura rei, nec ex parte ipsorum peccatorum, illa enim sunt secundum se nata vitari, sed ex infirmitate naturæ, per peccatum originale corruptæ: esset autem durum hominem obligare ad aliquid secundum se & ex natura rei impossibile, siue illi prohibere quod necessario, & ex natura ei debet evenire, secus verò id quod secundum se non est impossibile. Secundum discrimen est quod in exemplo adducto illud commune quod necessitat, semper est coniunctum cum exercitio circa aliquod singulare determinatum, quilibet enim actu exercito in aliquo determinato loco existit, sicque duplex est ibi necessitas, una circa commune, & altera circa continuum exercitium alicuius particularis. At verò in nostro casu est una tantum necessitas ad peccandum ut sic, sed non ad existendum continuò in exercitio alicuius peccati, & ita datur perfecta libertas circa singula peccata venialia, cum tamen in exemplo adducto non sit omnino perfecta libertas circa singularia.

## CAPVT VIII.

*De necessitate gratiæ ad se preparandum,  
ad illam.*

**R**elicto Pelagianorum & Semipelagianorum errore, quo asseriebant primam gratiam auxiliantem, primamque Dei vocationem, dari intuitu boni operis, facti sine gratia, & ex solis naturæ viribus, tanquam propter meritum de condigno, vel saltem de congruo: sunt aliqui Doctores Catholici, existimantes dari ex viribus naturæ causam dispositiuā, non tamen meritoriam primi auxiliij supernaturalis. Ita Scotus, Durandus, Gabriel, Richardus & Iauellus. Alij, verò docent, quod licet opera bona ordinis naturalis, non sint ratione sui dispositiones ad primam gratiam auxiliantem, ex lege tamen Dei, & pacto inito cum Christo, de non neganda gratia facienti quod in se est ex viribus naturæ, habere connexionem infallibilem cum illa. Ita Molina in concordia disp. 10. quem sequuntur plures ex Recentioribus.

## §. I.

*Viraque sententia rejicitur.*

Dico primò, hominem ex viribus naturæ non posse se disponere, etiam remotè, ad primum auxilium gratiæ. Ita D. Thomas hic art. 6. ad 2. ubi explicat hoc axioma, *facienti quod in se est, Deus non denegat gratiam*: de faciente quod in se est, ut est motus auxilio



diuino. Et infra quaest. 112. art. 3. in corp.  
docet quod preparatio hominis ad gratiam  
consequendam, si consideretur secundum quod  
est à libero arbitrio, nullam necessitatem ha-  
bet ad gratiae consecutionem, sed secundum  
quod est à Deo mouente. Item 3. contra Gent.  
cap. 149. loquens de auxilio diuino, mouente  
nostrum liberum arbitrium, sic concludit: *Ho-  
mo igitur non mouet seipsum ad hoc quod adipi-  
scatur diuinum auxilium, quod supra ipsum  
est, sed potius ad hoc adipiscendum, à Deo mo-  
uetur. Motus autem mouentis praecedit motum  
mobilis, ratione & causa. Non igitur propter  
hoc datur nobis auxilium, quia nos ad illud  
per bona opera promouemur, sed potius nos ideo  
per bona opera proficimus, quia diuino auxilio  
praeuenimur.* Demum quodlib. 1. art. 7. hanc  
de opposita sententia refert censuram: *Ad Pe-  
lagianorum errorem pertinet dicere quod homo  
possit se ad gratiam preparare, absque auxilio  
diuinae gratiae.*

Eadem veritas triplici ratione demonstrari  
potest. Prima quam habet S. Doctor hic art. 6.  
potest sic breuiter proponi: Finis & principium  
alicuius effectus, debent quoad ordinem pro-  
portionari: At finis omnis dispositionis ad  
gratiam est Deus, non vt author naturæ, sed  
vt author gratiæ. Ergo principium illius de-  
bet esse Deus vt author gratiæ, & non vt au-  
thor naturæ, & consequenter à libero arbi-  
trio procedere, vt diuina gratia adiuto. Maior  
constat, nam vt communiter dicitur, idem est  
ordo finium & agentium. Minor verò sic  
ostenditur: Omnis effectus cuius finis proxi-  
mus est supernaturalis, habet pro fine vlti-  
mo

mo Deum vt authorem supernaturalem : Sed omnis dispositio ad gratiam , habet pro fine proximo aliquid supernaturale , scilicet gratiam ipsam ad quam disponit : Ergo respicit pro fine ultimo Deum vt authorem supernaturalem.

Secunda sumitur ex loco citato summæ contra Gentes vbi sic discurret : *Nullum agens particulare potest vniuersaliter præuenire actionem primi & vniuersalis agentis, à quo omnis actio particularis agentis originem habet ab vniuersali agente; sicut in istis inferioribus omnis motus præuenitur à motu cælesti : Sed anima humana ordinatur sub Deo sicut particulare agens sub vniuersali : Impossibile est ergo esse aliquem motum in ipsa, quem non præueniat actio diuina.*

Tertia ratio sic potest formari : Dispositio ad aliquam formam , eam petit , & cum ea connectitur : At nihil naturale potest exigere formam supernaturalem , qualis est gratia , nec cum ea connecti , cum de ratione entis supernaturalis sit excedere totius naturæ exigentiam , vt de se patet : Ergo actus ordinis naturalis ad gratiam disponere nequeunt.

Addi possunt plura absurda & inconuenientia quæ sequuntur ex aduersa sententia. In primis enim si homo ex operibus naturæ viribus habitis , ad primam gratiam auxiliantem se disponderet , ab alio non sic operante , in ordine ad spiritualem salutem se discerneret , discretionem non habitam ex gratia , sed ex natura , contra illud Apostoli 1. ad Corinth. 4. *Quis enim te discernit ?*

Secundo iustificationis exordium non à præuenien-

ueniente Christi gratia ; sed à libero sumeretur arbitrio, quod est contra Tridentinum sess. 6. cap. 5. Sequela patet, nam illi actus ex viribus naturæ elicitī, & ad primam gratiam auxiliante[m] disponentes, ad iustificationem dispositiue concurrerent, eamque aliquo modo inchoarent, sicut inchoat generationem ignis, qui primam dispositionem ad illam inducere incipit.

Tertio, si homo ex viribus naturæ possit ad primam gratiam & vocationem se disponere, poterit etiam illam, saltem de congruo, promereri, quod est in Semipelagianorum errorem incidere. Sequela probatur, cum omnis dispositio ex se, & ex sua natura dicat ordinem & habitudinem ad formam ad quam disponit, & sit magna ratio eam inducendi in subiectum, quandam rationem debiti se ad ea affert; vnde si aliunde talis dispositio sit moralis, & consistens in actibus liberi arbitrij, vix potest ab illa aliqua ratio meriti separari. Quare S. Prosper contra Collatorem cap. 6. illum redarguit, eò quod assereret dari in natura quædam initia fidei & bonæ voluntatis, & tamen negaret gratiam secundum merita nostra dari. *Velis nolis* (inquit) *conuinceris gratiam Dei secundum merita nostra dari, cum aliquid in ipsis hominibus præcedere affirmas, propter quod gratiam consequantur. Nec enim ullius meriti haberi potest potentis fides, querentis pietas, pulsantis instantia.* Simili ratione utitur S. Augustinus lib. 2. contra duas epist. Pelagian. capit. 8. ubi sic discurret: *Si sine Dei gratia per nos incipit cupiditas boni, ipsum captum erit meritum, cui tanquam ex*

*debito, gratie veniat adiutorium; ac sic gratia Dei non gratis donabitur, sed secundum meritum nostrum dabitur.*

Demum si homo per opera naturalia, ad primam vocationem, primumque gratiae auxilium se disponderet, gratia non esset praeueniens, sed praeuienta à natura, & à libero arbitrio, nec ductrix illius, sed pedissequa; omnis enim dispositio praeuenit formam ad quam disponit, eamque prioritate temporis, vel saltem naturae, antecedit. Qua etiam ratione usus est S. Prosper libro citato capit. 39. his verbis: *Quoniam si secundum ipsos (scilicet Semipelagianos) aufertur liberum arbitrium, cum à gratia praeuenitur, aufertur etiam gratia, cum à libero praeuenitur arbitrio.*

Dico secundò, nullam esse legem statutam, ut homini facienti quod in se est ex facultate naturae, Deus infallibiliter conferat auxilia gratiae.

Probatur primò ex Concilio Arausicano 2. can. 6. ubi damnatur qui dixerit, *sine gratia Dei credentibus, volentibus, desiderantibus, & pulsantibus nobis, misericordiam conferri: conferretur autem, si esset talis lex statuta: Ergo illa admittenda non est.*

Dices, Concilium in illo canone solùm proscribere errorem Semipelagianorum, qui ponebant aliquale meritum, & moralem causalitatem, in operibus naturae, respectu primae gratiae & vocationis supernaturalis; non autem damnare illos qui licet adiungant gratiam facienti quod in se est, ex facultate naturae, & viribus liberi arbitrij, omne tamen meritum & causalitatem moralem, à naturae

operibus excludunt, respectu diuinæ gratiæ.

Sed contra primò : Concilium damnat eos qui asserunt, *credentibus, volentibus, desiderantibus, & pulsantibus, misericordiam conferri* : Ergo damnat etiam eos qui asserunt auxilia gratiæ dari ex misericordia, & non ex iustitia, vel debito, facientibus quod in se est, ex facultate naturæ, & consequenter eos qui operibus naturalibus gratiam infallibiliter adnectunt, etiam absque merito & causalitate moralii.

Contra secundò : Sicut S. Prosper supra relatus, ex doctrina Semipelagianorum, asserentium homini desideranti, pulsanti, & facienti quod in se est ex facultate naturæ, infallibiliter conferri gratiam, inferebat sequi illam secundum merita nostra dari ; *nec enim* (inquit ille) *nullius meriti esse potest petentis fides, quærentis pietas, pulsantis instantia*. Ita pariter nobis contra Molinam argumentari liceat, & asserere ex eius doctrina sequi, gratiam ex meritis, & non gratuito, nec ex misericordia, sed ex iustitia, à Deo conferri. Etenim quidquid datur ex lege & pacto homini operanti, datur ex iustitia saltem imperfecta, nam lex & conuentio fundant rationem iustitiæ, ut patet ex illa Parabola Christi Matth. 20. in qua operarij conuenerunt cum domino de denario ; ibi enim dominus dixit vni ex illis : *Nonne ex denario conuenisti mecum? tolle quod tuum est & vade*. Idem constat ex illo Apostoli ad Roman. 4. *Ei autem qui operatur merces non imputatur secundum gratiam, sed secundum debitum* : Ergo si auxilia gratiæ præuenientis dantur à Deo ex lege, vel pacto, aut

con-

conuentione, facientibus totum quod possunt ex facultate naturæ, dantur illis ex iustitia, & secundum debitum, non verò secundum gratiam & misericordiam.

Dices, tale debitum & obligationem esse solum in ordine ad Christum, qui tale pactum cum Patre æterno inijt, non autem in ordine ad hominem bene vtentem naturali facultate liberi arbitrij, subindeque illi, gratiæ præuenientis auxilia, ex misericordia, non ex iustitia, & secundum gratiam, non secundum debitum, dari.

Sed contra: Si aliquis Rex, ad instantiam Principis, vel filij, concederet legem, per quam promitteret se daturum aliquam ciuitatem, cuiuscumque ex militibus sui exercitus illam primo ingredienti, certè qui prius ingrederetur talem ciuitatem, eam faceret sibi debitam ex iustitia, fundata in lege illa statuta ad instantiam Principis, vel filij Regis, & supposita tali lege, opus illud haberet aliquam proportionem cum valore illius ciuitatis; quia lex illa daret ei talem proportionem, quamuis secundum se, & illa seclusa, eam non haberet. Ita similiter, si Pater æternus, ad instantiam & petitionem Christi, condidit legem, qua statuit facientibus quod in se est ex facultate naturæ, & viribus liberi arbitrij, dare gratiæ præuenientis auxilia, illa erunt aliquo modo debita ex iustitia homini facienti quod in se est ex viribus naturæ; quia supposita tali lege, opera naturalia, quamuis aliunde improporcionata, & inferioris ordinis, habebunt aliquod ins in auxilia gratiæ.

Probaturs secundò conclusio ex Augustino

de spiritu & litt. cap. 28 ubi sic habet : *Sicue non impediunt à vita æterna iustum qualibet peccata venialia, sine quibus hac vita non ducitur : Sic ad salutem æternam nihil profunt impio aliqua bona opera, sine quibus difficillimè vita ciuslibet hominis pessimi inuenitur :* At si daretur lex infallibilis dandi auxilia gratiæ ad salutem conducentia, cuiuslibet bene operanti ex facultate naturæ, & elicienti opera honesta honestate naturali, talia opera prodescent impio ad salutem æternam, vt de se patet : Ergo falsò, & contra Augustinum, astruitur talis lex.

Probatur tertio : Repugnat Christum auctorem gratiæ meruisse fieri aliquam legem à Patre æterno, qua totus ordo gratiæ destrueretur, seu qua efficiatur quod gratia non sit gratia, & quod non præueniat liberum arbitrium, sed ab eo præueniatur : At vtrumque sequitur, si ex lege & pacto Dei, bene operanti ex viribus & facultate naturæ, infallibiliter conferantur auxilia gratiæ ; gratia enim dabitur ex meritis, vt supra ostensum est, subindeque non erit gratia, sed merces ; illaque non præueniet liberum arbitrium, sed potius ab eo præuenietur ; nec erit ductrix illius, sed pedissequa, vt præcedenti conclusione dicebamus : Ergo lex illa fictitia est, & à Molina excogitata.

Demum suaderi potest conclusio hoc discursu : Lex illa, cum pendeat ex libera voluntate Dei, non potest nobis innotescere, nisi vel ex Scriptura, vel ex Conciliis, vel ex SS. Patribus : Sed illa nullum habet fundamentum in Concilijs, aut SS. Patribus, imò po-

gills

tñis oppositum ex illis colligitur, ut supra ostendimus de Concilio Arausicano, & de S. Augustino; testimonia verò Scripturæ quibus Molina legem illam firmare aut probare conatur, illam non insinuant: Ergo talis lex absque omni prorsus fundamento asseritur. Minor pro vltima parte probatur: Duo sunt præcipua Scripturæ testimonia quæ Molina profert ad probandum dari talem legem, nempe illud Ioan. 1. *Dedit illis potestatem filios Dei fieri*. Et istud 1. ad Timoth. 2. *Deus vult omnes homines saluos fieri*: Sed ex his testimonijs non rectè colligitur dari in Deo legem illam: Ergo illa nullum habet in Scriptura fundamentum. Probo minorem, & in primis quod ex primo talis lex non colligatur, constat ex Augustino lib. 1. contra duas epist. Pelagian. cap. 3. vbi sic ait: *Datur ergo potestas ut filij Dei fiant qui credunt in eum, cum hoc ipsum datur ut credant in eum, quæ potestas nisi detur à Deo, nulla esse potest ex libero arbitrio*. Idipsum docet lib. de dono perseuer. cap. 8. his verbis: *Non itaque in homine, sed in Deo est potestate, ut habeant homines potestatem filios Dei fieri, ab ipsis quippe accipiunt eam, qui dat cordi humano cogitationes suas, per quæ habeat fidem quæ operetur per dilectionem*. Unde rectè obseruat Caietanus in cap. 1. Ioannis, quod Euangelista non dixit, dedit eis potestatem ut se facerent filios Dei, sed dedit eis potestatem filios Dei fieri. Sicut enim (inquit) in naturalibus elementis est potestas non ut se movent sursum, aut deorsum, sed ut moventur terra deorsum, & ignis sursum, ita Christi fidelibus data est potestas, non efficiendi se ipsos

filios



filios Dei (actio enim hæc omnem creatam facultatem excedit) sed ut fierens filij Dei: potestas autem hæc, donum gratiæ est &c. Addo quod D. Ioannes explicans quibus hæc potestas conferatur, addit: *His qui credunt in nomine eius*: Ego ante fidei illustrationem, huiusmodi potestas non datur; & consequenter ex illo testimonio non rectè inferitur, facientem quod in se est per vires liberi arbitrij, habere in sua potestate filium Dei fieri, per infallibilem diuinæ gratiæ assistentiam.

Quod etiam ex secundo testimonio id minime colligatur, in hunc modum ostenditur: Lex ista in sententia Molinæ fundatur in meritis Christi: At voluntas antecedens saluandi omnes homines, in prædicto testimonio contenta, merita Christi antecedit; & Christum præuisum, cum iuxta communioem sententiam, ex voluntate saluandi homines, decretum de Christo Redemptore mittendo processerit, ut in tractatu de Incarnatione ostendimus: Ergo talis lex non deducitur ex illis verbis Apostoli, *Deus vult omnes homines saluos fieri*, sed illa tantum indicant sincerum affectum, quo Deus sua bonitate, auxilia suæ gratiæ omnibus hominibus offert; cum quo tamen stat, ut ea interdum denegat in pœnam alicuius præcedentis peccati, ut in tract. de prædestinatione & reprobatione cap. ultimo ostensum fuit.

## §. II.

### *Soluuntur obiectiones.*

**O**bjicies primò contra primam conclusionem: Prima gratia auxilians supernatura-

turalis indiget ex parte subiecti aliqua dispositione : Sed talis dispositio non potest esse supernaturalis , alioquin alia dispositione supernaturali indigeret , & sic daretur processus in infinitum : Ergo debet esse naturalis , & per consequens homo potest ex facultate naturæ , ad primum gratiæ auxilium se disponere. Minor patet , maior verò ostenditur ex D. Thomæ . i . p . quæ . 12 . art . 3 . ubi sic ait : *Omne quod eleuatur ad aliquid excedens naturam , oportet ut disponatur aliqua dispositione* : At prima gratia auxilians excedit naturam hominis : Ergo ut eleuetur ad illam , dispositio aliqua debet præcedere .

Respondeo negando maiorem , & ad illius probationem dico , veram esse D. Thomæ doctrinam , quando id ad quod eleuatur subiectum , se habet ut terminus generationis , & forma in suo ordine completa ; secus autem quando id ad quod eleuatur , est via ad terminum : Vnde quia gratia auxilians non se habet ut terminus , sed ut via ad terminum , hinc est quod ad illam dispositio præuia non requiritur ; bene tamen ad gratiam habituales , quia habet rationem naturæ terminantis generationem in ordine supernaturali . Sicut in naturalibus indispensabiliter requiruntur dispositiones ad formas substantiales , eò quod per se primò intenduntur , & sint terminus ultimus generationis naturalis , non verò ad formas accidentales , quæ ordinantur ad substantiales . Solutio est D. Thomæ hic quæ . 109 . artic . 6 . ad 3 . & infra quæst . 112 . art . 2 . in corp .

Obijcies secundo : Actus purè naturales impetratoriè ad gratiam conducere possunt : Er-

go & dispositiue. Consequentia patet ex paritate rationis. Antecedens verò probatur ex D. Thoma 2.2. quæst. 83. artic. 16. in corp. ubi docet Deum exaudire orationem peccatoris, ex bono naturæ desiderio procedentem; non quidem ex iustitia, quia peccator hoc non meretur, sed ex pura misericordia: Ergo ex D. Thoma oratio naturalis habet vim impetrandi apud Deum. Vnde ibidem in resp. ad 2. sic ait: *Quamuis eius oratio (scilicet peccatoris) non sit meritoria, potest tamen esse impetratiua; quia meritum innuitur gratiæ.*

Respondeo negando Antecedens, nam ut docet idem S. Doctor ibidem quæst. 82. artic. 15. ad 1. *Oratio quæ impetrat gratiam gratum facientem, procedit ex aliqua gratia* Et in resp. ad 3. ait: *Oratio innuitur principaliter fidei, non quantum ad efficaciam merendi, sed quantum ad efficaciam impetrandi*: Ergo ex mente D. Thomæ, ut oratio sit impetratoria, debet ex gratia procedere. Vnde quando dicit Deum exaudire orationem peccatoris, ex bono naturæ desiderio procedentem, loquitur de desiderio naturæ, non nudæ, sed eleuata per gratiam auxiliantem, & in fide fundato.

Obijcies tertio cum Molina contra secundam conclusionem: D. Thomas quæst. 14. de verit. artic. 11. ad 1. sic ait: *Si quis in syluis enutritus ductum rationis naturalis sequatur in appetitu boni & fuga mali, certissime tenendum est, quod ei Deus, vel per inspirationem reualeret ea quæ ad erodendum sunt necessaria, vel aliquem fidei prædicatorem ad eum dirigeret, sicut misit Petrum ad Cornelium*: Ex-

go ex mente D. Thomæ, diuinæ gratiæ assistentia infallibilis est homini facienti quod potest ex viribus propriis.

Respondeo D. Thomam ibi loqui de homine faciente quod in se est, non ex viribus naturæ nudæ, sed in vi auxilij gratiæ. Quod constat, tum quia loquitur de homine non ponente obiectionem gratiæ, per totius legis naturæ observantiam, ad quam in statu naturæ lapsæ non sufficere vires naturæ, sed requiri auxilium gratiæ, docet expressè idem S. Doctor hic artic. 4. Tum etiam, quia affert exemplum Cornelij: hunc autem non ex sola facultate naturæ fecisse quod in se erat, sed speciali auxilio præuenientis gratiæ, ipsemet docet 2. 2. quæst. 10. artic. 4. ad 3. cuius verba infra referemus. Addo quod idem Doctor Angelicus, quotiescumque explicat hoc axioma, *facienti quod in se est, Deus non denegat gratiam*, ait illud esse intelligendum de faciente quod in se est, non ex viribus naturæ, sed ex auxilio gratiæ, ut constat tum ex testimonijs initio huius capituli adductis, tum ex 1. ad Annibalium distinct. 28. art. 4. ad 3. ubi sic habet: *Ad tertium dicendum quod potestas nostra nihil operari potest sine Deo, qui operatur in omni natura & voluntate, unde cum dicimus aliquid esse in nobis, non excludimus Dei auxilium.* Et ad Rom. 10. lect. 3. Hoc ipsum (inquit) quod aliqui faciunt quod in se est, conuertendo se ad Deum, ex Deo est, mouente corda ipsorum in bonum.

Dices, Homo ille in syluis nutritus, de quo loquitur S. Thomas, supponitur destitutus omni auxilio gratiæ, cum supponatur destitutus illu-

illustratione fidei; quæ est primum auxilium  
supernaturale sufficiens: Ergo loquitur de ho-  
mine faciente quod in se est, ex virtutibus natu-  
ræ nudæ, non verò in vi auxilij gratiæ.

— Respondeo negando Antecedens, nam etsi  
talis homo non haberet fidem explicitam de  
Deo vt authore supernaturali, haberet tamen  
de illo fidem implicitam, ac proinde non esset  
omni auxilio supernaturali destitutus: Ratio  
est; quia in statu elevationis naturæ humanæ  
ad ordinem supernaturalem, impossibile est  
quod de facto ponatur conuersio in Deum vt  
authorem naturalem, sine conuersione ad Deum  
vt authorem supernaturalem; vnde cum ille  
homo ductum rationis naturalis sequens in ap-  
petitu boni & fuga mali, esset in Deum vt au-  
thorem naturæ conuersus, esset etiam, impli-  
citè saltem, conuersus in illum vt authorem  
supernaturalem, ac proinde haberet fidem de  
illo, saltem implicitam; & Deus in tali casu  
aliquem fidei prædicatorem ad eum dirigeret,  
vt ei explicitè proponeret mysterium Trinita-  
tis & Incarnationis, aliaque ad salutem neces-  
saria, sicut misit Petrum ad Cornelium, & Paulum  
ad Macedones. Solutio est D. Thomæ 2.  
23 quæst. 4. ad 3. vbi loquens de Cor-  
nelio ait: *Ille infidelis non erat, alioquin eius  
operatio accepta non fuisset Deo, cui sine fide  
nullus placere potest. habebat autem fidem im-  
plicitam in Deum, manifestat. Euangelij veri-  
tate, vnde vt eum in fide plenius instrueret,  
missus est ad eum Petrus.*


Obijcit insuper Molina aliud D. Thomæ te-  
stimonium; id est sumptum ex libro 3. contra  
Gent. cap. 159. vbi sic ait: *Cum hoc sic in pæ-*

testate liberi arbitrii impedire diuinæ gratiæ receptionem, vel non impedire, non immerito in culpam imputatur ei qui impedimentum præstat gratiæ receptioni, Deus enim, quantum in se est, paratus est omnibus gratiam dare, sed illi soli gratia priuantur, qui in seipsis gratiæ impedimentum præstant; sicut sole mundum illuminante, in culpam imputatur ei qui oculos claudit, si ex hoc aliquod malum sequatur; licet videre non possit, nisi lumine solis præueniatur. Ex quibus verbis inferit Molina: quod si soli illi, diuinæ gratiæ priuantur, qui impedimentum culpæ gratiæ receptioni apponunt, illi, qui facit quantum potest per vires naturæ, diuinæ gratiæ assistentia infallibilis est, cum sic faciens vitet impedimentum, nempe peccatum.

Verum hoc testimonium non fauet Molina; quia D. Thomas ibi loquitur de libero arbitrio, prout erat in homine integro, non verò prout est in homine lapsa, ut ibidem notat Ferrariensis, & constat ex capite immediatè sequenti, ubi sic habet: *Quod dictum est in potestate liberi arbitrii esse ne impedimentum gratiæ præstet, competit quibus naturalis potestas integra fuerit.* Porro hoc non est intelligendum de homine integro integritate purè naturali (in hac enim non fuit de facto creatus, nec si in illa conderetur, ei offerretur gratia supernaturalis, cum hæc oblatio eleuationem hominis ad ordinem supernaturalem supponat) sed de homine integro integritate iustitiæ originalis, quæ partem inferiorem superiori subijciebat, & hanc Deo, nedum ut auctori naturæ, sed etiam ut auctori

thori gratiæ. Ita Ferrariensis ibidem, vbi sic habet: *Per naturalem potentiam intelligit S. Thomas liberi arbitrij potentiam, quæ etiam voluntas dicitur, nullo peccato, nullaque inordinatione vitiatam, sicut erat in primo parente antequam peccaret.*

Ex his intelliges, nec etiam dispositione negatiua posse quempiam ex proprijs viribus se ad gratiam disponere. Nam tunc potest aliquis se negatiuè disponere, quando potest ex proprijs viribus omne impedimentū formę excludere: At homo ex proprijs viribus non potest vitare omne peccatum mortale, per quod ponitur sufficiens impedimentum ad gratiam. Ergo nec potest se negatiuè ad primam gratiam auxiliantem disponere. Vnde D. Thomas ad Hebræos 12. lect. 3. ait: *Hoc ipsum quod aliquis non ponit obſaculum gratiæ, est ex gratia Dei.*



## C A P V T IX.

*De necessitate gratiæ ad perseuerantiam  
finalem.*

**P**erseuerantia potest sumi dupliciter: Primò pro continuatione in gratia longo tempore, abstrahendo ab hoc quod continue-  
tur vsque ad mortem. Secundò pro perseue-  
rantia in gratia, vsque ad finem vitæ inclusi-  
uè, seu pro coniunctione gratiæ cum morte,  
quæ *perseuerantia finalis* appellatur. De per-  
seuerantia primo modo sumpta egimus supra  
cap.

cap. 6. ubi ostendimus hominem iustum, ut diu abstineat à peccatis mortalibus, & in bonis operibus perseueret, præter gratiam habitualement, indigere auxilio speciali. Unde superest nobis hic agendum de perseuerantia finali, quæ sola (ut ait Augustinus) informat meritum, remunerat currentem, coronat pugnantem, & ad portum conducit nauigantem. Hac sola (addit Bernardus) æternitatis quandam speciem præ se fert: sola est cui æternitas redditur, vel quæ æternitati hominem reddit. In huius rei symbolum olim Deo offerebantur, non tantum primitiæ, sed etiam decimæ, quia ab ipso non tantum est inchoatio bonorum operum, per primitias significata, sed etiam perseuerantia in eis, designata per decimas. In eiusdem rei typum (inquit Gregorius Magnus lib. 1. moral. cap. 21.) Ioseph quæ inter fratres iustus perseuerasse dicitur usque in finem, solus talaris tunicam habuisse perhibetur; nam quid est talaris tunica, nisi actio consummata? Quasi protensa tunica talum corporis operit, cum bona actio ante Lei oculos, nos usque ad vitæ terminum regit. Hinc est quod per Moysen caput & caudam hostiæ offerre præcipimur, ut videlicet omne bonum quod incipimus, etiam perseueranti animo compleamur. Hinc concludit Bernardus, & prudenter nos admonet, ut constanter in bono perseueremus: Tene (inquit) quod tenes, hostiæque caudam iunge capiti, & tunicam Dei gratia iam polimitam, cura facere & talaris; quoniam cæpisse nihil proderit, si quod absit, perseuerare non contigerit.



## §. I.

*Perseuerantia finalis est donum Dei speciale, à gratia habituali, & communibus auxilijs distinctum, & consistens in coniunctione gratiæ cum morte, ex efficaci glorificationis intentione imperata.*

**P**rima pars huius assertionis colligitur ex Tridentino sess. 6. cap. 6. ubi perseuerantiam finalem, *magnum Dei donum*, appellat, post Augustinum de bono perseuer. cap. 2. ubi pariter ait, *ipsam perseuerantiam magnum Dei esse donum, quo cætera eius dona conseruantur.* Quibus verbis huius doni magnitudinem declarant, illudque proinde à gratia habituali, & communibus auxilijs esse distinctum, aperte significant.

Eadem veritas duplici ratione fundamentali probari potest: Prima est: Gratia habitualis datur pluribus, cum auxilijs communibus ei annexis, ad bene operandum, & persistendum in bono, etiam per longum tempus, qui tamen finaliter non perseuerant, vt experientia satis constat. Ergo perseuerantia finalis est donum speciale, à gratia habituali, & auxilijs ordinarijs eam concomitantibus distinctum.

Nec valet si dicas cum Molina, & alijs Recentioribus, dari omnibus gratiam & auxilia sufficientia, quibus possint vsque ad mortem perseuerare, sed quosdam bene ijs vti, & quosdam male, & ideò illos perseuerare, non verò istos, ac proinde actu perseuerare, non esse

esse donum à gratia. & auxilijs ex parte Dei distinctum. Non valet inquam : Primò quia hæc responsio apertè repugnat doctrinæ Augustini lib. de corrept. & gratia cap. 12. ubi sic ait : *Tantum quippe Spiritu Sancto accenditur voluntas eorum* (scilicet Sanctorum) *ut idè possint quia sic volunt, idè sic volunt, quia Deus operatur ut velint. Nam si in tanta infirmitate vitæ huius, ipsis relinqueretur voluntas, ut in adiutorio Dei, sine quo perseverare non possent manerent si vellet, nec Deus in eis operaretur ut vellet; inter tot & tantas tentationes infirmitate sua voluntas ipsa succumberet, & idè perseverare non possent quia deficientes infirmitate nec vellet, aut non ita vellet infirmitate voluntatis, ut possent Subvenit igitur infirmitati voluntatis humanæ, ut divina gratia indeclinabiliter, & insuperabiliter ageretur; & idè quamvis infirma, non tamen deficeret, neque adversitate aliqua vinceretur.* Quibus verbis S. Pater apertè docet, ad actum perseverandum in bono, supposito etiam auxilio sufficienti, sine quo non potest aliquis perseverare, adhuc requiri aliud auxilium efficax, quo infallibiliter flectatur voluntas, & perseverantia ipsa de facto donetur, & quo Sancti & electi, non nisi perseverantes sint. Quam doctrinam ità ægrè ferebant Massilienses, ut dicerent ex ea homines in quandam desperationem adduci, ut testatur Hilarius Arelatensis in epistola ad Augustinum, his verbis : *Molestè ferunt ita divini gratiam, quæ vel tunc primo homini data est, vel nunc omnibus datur, ut ille acceperit perseverantiam, non qua fieret ut perseveraret,*

ret, sed sine qua per liberum arbitrium perseverare non posset: nunc verò Sanctis in regnum per gratiam prædestinatis, non tale adiutorium perseverantiæ datur, sed tale ut eis perseverantiæ ipsa donetur; non solum ut sine isto dono perseverantes esse non possint, verum etiam ut per hoc donum non nisi perseverantes sint. His verbis Sanctitatis tuæ ita moventur, ut dicant quandam desperationem hominibus exhiberi.

Secundo ex prædicta responsione & doctrina Molinæ, plura sequuntur absurda & inconuenientia: nam si donum perseverantiæ subijceretur libero arbitrio, & ab eo quantum ad efficaciam & usum dependeret, sequeretur primò quod illi qui perseverant, se ab alijs non perseverantibus discernent per aliquid sibi proprium, nimirum per bonum usum liberi arbitrij, determinantis & applicantis gratiam, contra illud 1. ad Corinth. 4. *Quis enim se discernit?* Vnde de sua perseverantiâ possent aduersus alios inflari, quasi eam non accepissent à Deo, sed sibi donassent, contra id quod ibidem subditur: *Quid habes quod non accepisti, si autem accepisti, quid gloriaris quasi non acceperis?* Sequeretur etiam, Deum per gratiam dare nobis solum posse perseverare, ipsum autem perseverare esse à libero arbitrio; tubindeque illud quod est minis bonum & perfectum tribui Deo, & gratiæ; illud verò quod est maius & perfectius, nobis, & libero nostro arbitrio, quod in Pelagianis Augustinus saepe reprehendit. Item sequeretur, iustos non debere à Deo petere actualem perseverantiâ, nec pro ea ipsi gratias agere, quia

quia ut ait idem Augustinus epist. 107. *Prorsus non oramus Deum, sed orare fingimus, si nos ipsos, non illum credimus facere quod oramus. Prorsus non agimus gratias Deo, sed agere fingimus, si vnde illi gratias agimus, ipsum facere non putamus.* Hoc autem absurdissimum esse constat ex eodem S. Doctore, qui libro de bono perseverantiæ, à capite secundo vsque ad sextum, ex D. Cypriano ostendit, in omni petitione orationis dominicæ (præterquam in illa, *Dimitte nobis debita nostra*) perseverantiæ donum à Deo postulari. Deum ex eadem responsione sequeretur, prædestinationem esse incertam & fallibilem, utpote innixam medio fallibili, nimirum perseverantiæ dono, quod non potest esse firmum & stabile, si eius efficacia baculo arundineo, hoc est causa mobili & defectibili, nimirum voluntati humanæ, innitatur. Vnde Tridentinum sess. 6. cap. 13. huius doni infallibilitatem & efficaciam refert, non in Dei præscientiam, explorantem futurum nostræ voluntatis consensum, sed in diuinam omnipotentiam, facientem quod homo liberè & infallibiliter consentiat. Ait enim initio illius capituli, quod est de perseverantiæ munere, tale donum aliunde haberi non posse, nisi ab eo qui potens est, eum qui stat stare, ut perseveranter sit, & eum qui cadit resitueret. Similiter Augustinus de corrept. & gratia cap. 8. manifestè docet, perseverantiæ donum à libero arbitrio independens esse, & tamen liberam voluntatem donare, ait enim: *Si ad liberum arbitrium hominis pertinere dicis ut persisteret in bono quisquam, vel non perseveret, non Deo donante si perseveret,*

*sed humana voluntate faciente, quid moliturus es contra verba dicentis : Rogavi pro te Petre ut non deficiat fides tua ? An audebis dicere, etiam rogante Christo ne deficeret fides Petri, defecturam fuisse, si Petrus eam deficere voluisset, quasi aliud Petrus ullo modo vellet quam pro illo Christus rogasset ut vellet ? Nam quis ignorat tunc fuisse perituram fidem Petri, si ea quæ fidelis erat voluntas ipsa deficeret, & permanenter futuram, si eadem maneret ? Sed quia præparatur voluntas à Domino, ideò pro illo non posset esse inanis oratio. En quomodo S. Doctor recurrit ad præparationem Dei, non verò ad eius præscientiam, ut ostendat infallibilem Petri in fide perseverantiam.*

*Secunda ratio fundamentalis, qua prima pars nostræ assertionis probatur, potest sic formari : Effectus providentiæ specialis habens infallibilem connexionem cum gloria, est specialissimum Dei donum, à gratia habituali, & communibus auxilijs ipsi adiunctis, distinctum ; cum ea ut hic non sint effectus providentiæ specialis, sed generalis, pertinentis ad ordinem supernaturalem, utpote communia reprobis & prædestinatis : Sed perseverantia finalis est effectus specialissimus & præcipuus prædestinationis, quæ est providentia specialis ordinis supernaturalis, & habet infallibilem connexionem cum gloria ; ut enim egregiè ait Augustinus lib. de cognitione veræ vitæ in fine : *Ad summum bonum iusti quadam catena trahuntur, quæ de virtutibus hoc modo connectitur : in primis fides animam quasi quidam circulus complectitur, fides spe nutritur, spes directione tenetur, dilectio operatione ex-**

*ple-*

pletur, operatio ad summum bonum intentione trahitur, intentio boni perseverantia clauditur, perseverantia Deus sens omnium bonorum dabitur: Ergo perseverantia finalis est speciale Dei donum, à gratia habituali & communibus auxilijs distinctum.

Quod verò tale donum consistat formaliter in coniunctione gratiæ cum morte, ex efficaci glorificationis intentione imperata, ut dicitur in secunda parte nostræ assertionis, sic ostenditur: In eo formaliter situm est donum perseverantiæ, quo perseverantes à non perseverantibus distinguuntur: Atqui non distinguuntur in alio, antecederet ad ascensionem gloriæ, quam in eo quod talis est divinæ providentiæ dispositio circa ipsos, ut debeant mori in gratia, cum alij interdum plus habeant gratiæ & donorum Dei in hac vita: Ergo donum perseverantiæ finalis consistit formaliter in speciali Dei dispositione, qua gratia cum morte coniungitur, ex efficaci glorificationis intentione imperata.

Ex hoc intelliges primò, donum perseverantiæ finalis esse distinctum ab eo quod requiritur ad diu perseverandum in bono; illud enim est effectus proprius prædestinationis, & solis prædestinatis conceditur; istud verò non est effectus prædestinationis, sed providentiæ generalis ordinis supernaturalis, & datur etiam reprobis. Vnde Africanum can. 10. videtur ea distinguere, cum ait: *Sanctis implorandum esse auxilium Dei, ut ad finem bonum pervenire, vel in bono possint opere perdurare.*

Intelliges secundò, donum perseverantiæ

finalis differre à dono confirmationis in gratia : illud enim est commune omnibus prædestinatis , istud specialissimum, quod Deus non nisi B. Virgini , Apostolis , & alijs paucissimis concessit ; illud non tollit, nec ligat potentiam peccandi, sed solum facit quod homo non peccet mortaliter usque ad finem vite, & infallibiliter moriatur in gratia , quamvis absolute peccare possit : Istud verò dat non posse peccare mortaliter aut venialiter , iuxta modum quo datur ; quidam enim ita confirmantur in gratia , ut nec mortaliter nec venialiter peccare possint , sicut B. Virgo ; alij verò licet possint peccare venialiter , non tamen mortaliter , ut Apostoli .

Intelliges tertio , admittendum esse donum perseverantiæ , non solum pro his qui longo tempore ante mortem in gratia perseverant , sed etiam pro illis qui post acceptam gratiam , citò moriuntur ; imò & pro parvulis baptizatis , ante usum rationis decedentibus . Nam quòd adultus post acceptam gratiam , statim occidatur, vel puer fonte baptismatis regeneratus , antequam ad usum rationis perveniat , moriatur, specialis Dei gratia est , quia est effectus specialis providentiæ Dei, disponentis eorum mortem pro tempore quo sunt in gratia, & non sinentis eos diutius vivere, ne expositi gravibus tentationibus , & subditi vertibilitati arbitrij, eam amittant , antequam moriantur , iuxta illud Sapient. 4. *Raptus est ne malitia mutaret intellectum eius* : Ergo ad perseverandum in gratia usque ad mortem, etiam per breve tempus, requiritur speciale Dei donum & beneficium , saltem extrinsecum , seu spe-

specialis diuinæ prouidentię dispositio , qua gratia cum morte coniungatur . Vnde Augustinus de bono perseu. cap. 17. *Videte quam à veritate sit alienum, negare donum Dei esse perseuerantiam vsque in finem huius vitæ, cum vitæ huic quando volueris ipse det finem; quem si dat ante imminuentem lapsum, facit hominem perseuerare vsque in finem. Sed mirabilior, & fidelibus eidentior largitas bonitatis Dei est, quod etiam paruulis, quibus obedientia non est illius ætatis vt decur, datur hæc gratia.* Quibus verbis apertè docet dari paruulis baptizatis, ante vsum rationis decedentibus, donum perseuerantiæ finalis.

## §. II.

*Soluantur obiectiones.*

**O**bjicies primò contra primam partem conclusionis : Ad finiendam vitam in gratia, sufficiunt gratia ipsa, cum auxilijs eam de lege ordinaria consequentibus, & causæ naturales, mortem inferentes : Ergo frustra fingitur aliud speciale donum . Consequentia patet, Antecedens probatur. Gratia cum huiusmodi auxilijs est sufficiens ad omnia peccata vitanda per aliquod tempus, intra quod causæ naturales, v.g. morbus, intemperies aeris, & similia, possunt inferre mortem : Ergo ad finiendam vitam in gratia, sufficiunt ista.

Respondeo illa omnia assignata sufficere quidem ad coniungendam mortem cum gratia, tanquam causas per accidens, non verò vt causas per se ; quia causa per se est quæ ex vi propriæ causalitatis respicit effectum cuius dici-



tur causa per se; illa autem quæ in obiectione assignantur, non ordinantur, ex vi propriæ causalitatis, ad coniungendam mortem cum gratia; unde cum non sit dicendum, hunc effectum esse causalem & fortuitum, necesse est ponere aliud donum distinctum, quo ita disponantur & præparentur omnes causæ, ut tunc mors à causis naturalibus aut violentis inferatur, quando homo existit in gratia.

Obijcies secundò: Homo habens gratiam, habet ius ad gloriam, quæ in gratia, ut fructus in semine, virtualiter continetur, iuxta illud Apostoli: *Gratia Dei vita æterna*: Ergo continuatio gratiæ cum gloria, ex debito, & non ex speciali gratia contingit; subindeque perseverantia faciens coniunctionem gratiæ cum gloria, non est speciale donum, seu specialis providentia, homini habenti gratiam indebita.

Sed nego consequentiam, licet enim iustus habeat ius ad gloriam, quandiu est in gratia, non tamen habet ius ut usque ad mortem in gratia conservetur, seu ut mors cum gratia, coniungatur; cum pro hoc statu, ratione liberi arbitrij, ad bonum & ad malum vertibilis sit: Unde quod quis à Deo protegatur, ut non amittat gratiam, cum adest mors, est maximum & specialissimum donum, & præcipuus prædestinationis effectus; sicut è contra quod aliquis permittatur mori in peccato, seu peccatum cum morte coniungi, est ultimus reprobationis effectus, de quo Christus dicebat Ioan. 8. *Ego vado & quæretis me, & in peccato vestro moriemini.*

Obijcies tertio contra secundam partem assertionis: Perseverantia finalis est donum ac bene-

beneficium speciale & indebitum : Sed coniunctio gratiæ cum morte, non est donum seu beneficium Dei speciale : Ergo in tali coniunctione donum perseverantiæ finalis non consistit formaliter. Maior patet, Minor probatur. Ad coniunctionem gratiæ cum morte, solum requiritur quod infundatur aut conservetur gratia, & quod mortunc eveniat : At mortis eventus naturalis est, & gratiæ infusio aut conservatio est beneficium generale ordinis supernaturalis, ad universalem illius ordinis providentiam spectans. Ergo utriusque coniunctio non est donum seu beneficium Dei speciale ordinis supernaturalis.

Respondeo, concessa Maiori, negando minorem, & ad illius probationem dico, quod licet gratiæ infusio aut conservatio, secundum se considerata, sit beneficium generale ordinis supernaturalis; eius tamen infusio vel conservatio, ex intentione quod cum morte coniungatur, speciale donum ac beneficium est; quia huic coniunctioni gloria infallibiliter annexa est, & ex illius intentione efficaci procedit. Similiter, licet mors, considerata secundum se, & secundum rationem omnibus hominibus communem, non sit donum Dei, sed potius poena peccati; prout tamen est conditio quædam requisita ad habendum statum immobilem in gratia, & ad gloriam obtinendam, datur ex speciali Dei providentia, & est speciale eius beneficium, sicut & ipsa beatitudo ad quam perducit. Vnde Augustinus 13. de civit. *Tantum Deus gratiæ fidei præsinit, ut mors quam constat vitæ esse contrariam, instrumentum fieret per quod transires ad vitam.*

Ad complementum huius celebris quaestio-  
nis, quaeres, an in Angelis & primis parenti-  
bus in statu innocentiae, necessarium fuerit  
speciale Dei donum seu auxilium ad perseue-  
randum?

Respondeo affirmatiuè: Augustinus enim  
12. de ciuit. cap. 9. expressè docet, Angelos  
bonos, qui in dilectione Dei perseverarunt,  
accepisse à Deo maius aliquod auxilium, quam  
maliqui ceciderunt, ait enim: *Istis mala vo-  
luntate cadentibus, illi amplius adiuti, ad  
eam beatitudinis plenitudinem, unde se nun-  
quam casuros certissimi fierent, peruenierunt.*  
Neque potest maius illud adiutorium, bonis  
Angelis concessum, de certa scientia, quia An-  
geli beati norunt se nunquam lapsuros, inter-  
pretari, ut contendit Iansenius. Nam ut rectè  
ait Estius in 2. dist. 41. §. 13. *Si hoc adiutorium  
quo beati Angeli dicuntur amplius adiuti, esset  
ipsa beatitudo, sensus redderetur ineptus, sci-  
licet Angelis collatam fuisse beatitudinem, quæ  
ad beatitudinem peruenirent.*

Possent etiam in eiusdem veritatis confir-  
mationem plures adduci rationes, sed quia de  
hoc egimus in tractatu de voluntate Dei cap.  
4. §. 7. ista quam insinuat D. Thomas 3. con-  
tra Gent. cap. 155. in præsentì sufficet: Om-  
ne quod est de se variabile, ad hoc ut figatur  
in vno, indiget auxilio alicuius agentis im-  
mobilis: Sed liberum arbitrium in Angelis,  
& in primis parentibus, erat mobile, ac ver-  
tibile de bono in malum, ut infelix euentus  
satis ostendit: Ergo ut firmarentur in bono,  
& in eo infallibiliter perseverarent, speciali  
Dei auxilio indigebant. Unde Augustinus  
con-

concione 2. in Psalmum 32. loquens de bonis Angelis, sub nomine & figura cœlorum, sic ait: *Nec ipsi firmitatem sibi propriam præsiterunt, verbo Domini cœli firmati sunt, & spiritu oris eius omnis virtus eorum.* Idem docet Gregorius magnus lib. 25. moral. cap. 8. ubi de Angelis ait. *Alij cadentibus, alij a Deo fuisse solidatos, utique similiter casuros, nisi solidati fuissent.*

Dices primò: Augustinus de corrept. & gratia cap. 11. & 12. expressè docet quod Adam per liberum arbitrium perseverare poterat, & quod ut vellet perseverare, Deus in eius reliquerat arbitrio: Sed illud non dicitur relinquitur arbitrio, vel fieri per liberum arbitrium, quod sit tantum ex gratia speciali, siue ad quod requiritur speciale auxilium: Ergo in Doctrina Augustini, Adam in statu innocentie non indigebat auxilio speciali ad perseverandum; quod, servata proportionem, etiam de Angelis dicendum est.

Respondeo quod quando D. Augustinus affirmat Adamum per liberum arbitrium potuisse in bono perseverare, solum intendit declarare facilitatem quam habebat perseverandi in bono, ratione doni integritatis, perfectè subijcientis partem inferiorem superiori, & superiorem Deo, ac prohibentis omnem rebellionem, seu motum inordinatum concupiscentie. Vnde ibidem cap. 11. sic ait: *Ille non opus habebat adiutorio quod implorant sancti, cum dicunt, video aliam legem in membris meis, repugnantem legi mentis meae &c. quoniam in eis caro concupiscit adversus spiritum, & spiritus adversus carnem, atque in tali cer-*

*amine laborantes ac periclitantes, dari sibi pugnandi vincendique virtutem per Christi gratiam poscunt. Ille verò nulla rixa à seipso adversus seipsum tentatus, in illo beatitudinis loco, sua secum pace fruebatur. Et D. Thomas prædictum Augustini testimonium, quod est præcipuum Iansenianæ doctrinæ fundamentum, sibi obijciens 2. 2. qu. 132. art. 4. sic respondet: Ad secundum dicendum quod Augustinus dicit in libro de corrept. & gratia. Primo homini datum est, non ut perseveraret, sed ut perseverare posset per liberum arbitrium, quia nulla corruptio tunc erat, quæ perseverandi difficultatem præberet. Ex quibus patet quod Augustinus prædicto loco solum intendit excludere à statu innocentiae necessitatem specialis auxilij sanantis infirmitatem naturæ (quale in nobis requiritur ad perseverandum) non tamen specialis auxilij figentis ac firman-  
tis liberi arbitrij vertibilitatem.*

Dices secundò: Donum perseverantiae erat debitum connaturaliter homini in statu integritatis & innocentiae: Ergo non erat speciale Dei donum seu beneficium. Consequentia liquet, Antecedens probatur. Omni formæ in suo subiecto non impeditur, debetur concursus ad id quod ex natura sua exigit: Sed gratia habitualis in homine integro est forma ex natura sua exigens perseverantiam & firmitatem, nullumque quantum ad hoc patiens impedimentum, sicut patitur in homine lapso, ob rebellionem concupiscentiae: Ergo ei debitum erat, titulo connaturalitatis, auxilium ad perseverandum.

Respondeo negando Antecedens, & ad illius


lius probationem , data Maiori , nego Minorem ; licet enim gratia habitualis in homine integro , non pateretur , sicut in homine lapsō , impedimentum quoad sui conseruationem , ex parte rebellionis concupiscentiæ proueniens ; erat tamen obnoxia impedimento consistente in liberi arbitrij nobilitate & verubilitate , vt constat ex supra dictis .

Ex dictis hæctenus de necessitate gratiæ ad bene operandum , & perseuerandum in bono , intelliges , neminem , quantumuis iustum & sanctum , debere in proprijs liberi arbitrij viribus confidere , sed in sola spe gratiæ cœlestis inniti . Vnde sacrilega est hæc Gentilis Philosophi vox : *Det vires Deus , det opes , animum æquum mihi ipse parabo* ; sicut & ista Pelagij in epistola ad Demetriadem : *Spirituales diuitias nullus tibi præter te conferre poterit . In his ergo iure laudanda es , in his meritò cæteris præferenda es , quæ nisi ex te & in te esse non possunt* . Vnde Pelagiani non immeritò aratoribus Ægypti comparantur , nam vt ait Seneca , *Nemo aratorum in terra Ægypti cælum respicit* , quia non à cœlo , syderumque influxu , nec ab imbribus , sed à sola Nili inundatione , agrorum fœcunditatem expectant ; totaque illorum spes è suo flumine , veluti numine pendula , solo , non cœlo , cœno , non Deo , innititur , iuxta illud Poetæ :

*Terra suis contenta bonis , non indiga  
mertis ,*

*Aut lous , in solo tota est fiducia Nilo.*  
Non dissimiliter etiam Pelagiani , Semipelagiani , & quicumque , vel naturæ , vel Philosophiæ , vel propriæ industriæ , aut liberi arbitrij

bitrij viribus, non diuinæ manifestiæ, aut gratiæ efficacitati, bonum virtutis, & opus salutis tribuunt, dici possunt in cœlum nunquam oculos attolere, vnde nobis venit auxilium; sed cœnosæ naturæ adhærentes, in ea veluti aratores Ægypti, totam fiduciam ponere. Quare de illis dicitur Isaïæ 30. *Vae filiis desertiores, habentes fiduciam in umbra Ægypti, sperantes auxilium in fortitudine Pharaonis. Ægyptus homo, & non Deus; caro, & non spiritus, & Dominus inclinabit manum suam, & corruet auxilium, & cadet cui præstatur auxilium, simulque omnes consumentur.*



## C A P V T X.

### De diuisione gratiæ.

**G**Ratia primò diuidi potest in increatam & æternam & creatam ac temporalem. Prima est æterna Dei dilectio, qua gratis dilexit nos in ordine ad gratiam & gloriam, vt docet D. Thomas hic qu. 110. artic. 1. his verbis: *Quandoque gratia Dei dicitur ipsa æterna Dei dilectio, secundum quod etiam dicitur gratia prædestinationis, inquantum Deus gratuito & non ex meritis aliquos prædestinavit. Dicitur enim ad Ephes. 1. Prædestinauit nos in adoptionem filiorum, in laudem gloriæ gratiæ suæ. Altera comprehendit ea dona quæ nobis à Deo ad obtinendum huiusmodi finem in tempore conferuntur. De prima egimus in tractatu de prædestinatione, in quo ostendimus electionem*

nem prædestinatorum esse merè gratuitam, & à præiudicio meritorum independentem, ideoque nomine sortis in Scriptura designari; unde superest nobis hic tractandum de altera, quæ in internam & externam diuidi solet. Interna ea est, quæ interioris nobis vnitur, & quæ in anima hominis, vel in eius potentijs recipitur. Externa verò illa dicitur, quæ ipsum intrinsecè non afficit, sed extrinsecè tantum; unde ad primum genus pertinent gratia sanctificans, virtutes morales per se infusæ, dona Spiritus Sancti, & motiones gratiæ auxiliantis, in intellectu aut voluntate receptæ; ad secundum verò reducuntur omnes causæ, media, & obiecta externa, per quæ mens nostra excitatur ad res diuinas cognoscendas vel amandas; qualia sunt prædicatio verbi Dei, exempla Christi & Sanctorum, lectio sacrarum scripturarum, miracula, & alia huiusmodi, quæ describit S. Prosper 2. de vocat. Gentium cap. 26. his verbis: *Gratia quidem Dei in omnibus iustificationibus principaliter præeminet, suadendo exhortationibus, mouendo exemplis, terrendo periculis, incitando miraculis &c.*

Gratia interna diuiditur in gratis datam, & gratum facientem. Prior per se non conducit ad sanctificationem & salutem eius cui datur, per eam tamen vnus saluti alterius cooperatur. Posterior ad salutem recipientis per se refertur, nec solummodò gratis datur, quod vnicuique gratiæ commune est, sed etiam personam Deo acceptam efficit & amicam.

Rursus gratia gratis data subdividitur in nouem species, quas recenset Apostolus 1. ad



Corinth. 12. his verbis : *Diuisiones gratiarum sunt : alij per spiritum datur sermo sapientiæ, alij sermo scientiæ secundum eundem spiritum, alteri fides in eodem spiritu, alij prophetia, alij gratia sanctorum, alij operatio virtutum, alij discretio spirituum, alij genera linguarum, alij interpretatio sermonum.*

Huius diuisionis sufficientiam demonstrat D. Thomas hic qu. 111. art. 4. & 1. ad Corinth. 12. lect. 2. hoc egregio & mirabili discursu : Gratia gratis data dantur ad hoc vt homo ad alterius salutem & conuersionem cooperetur, non quidem interiùs mouendo ( hoc enim solius Dei est ) sed solùm exteriùs docendo, vel persuadendo. Ad hoc autem tria sunt necessaria, primum vt homo qui alium docere debet, habeat plenitudinem cognitionis diuinorum; secundum vt possit probare & confirmare ea quæ docet; tertium vt quæ docere debet, possit conuenienter proficere his quos instruit. Ad hoc vt quis habeat plenitudinem cognitionis diuinorum, tria requiruntur; primum est cognitio eorum quæ in diuina scientia tanquam principia supponuntur; secundum est cognitio principalium conclusionum; tertium est cognitio effectuum diuinorum, ex quibus oportet interdum manifestari causas; & ideò tres gratia gratis datae sunt necessariae ad plenitudinem notitiæ de diuinis; scilicet fides, per quam prima principia creduntur; sapientia, per quam cognoscuntur principales conclusiones; & scientia, per quam diuini effectus sciuntur. Ad hoc verò vt homo confirmare possit quæ docet de diuinis, requiruntur duo: vnum est vt faciat quæ solus Deus face-

re po-

re potest; & hæc sunt opera miraculosa, quæ duplicia sunt; aut enim sunt ad salutem corporum ordinata, aut ad solam diuinæ potentiae manifestationem, sicut quod sol stet, aut tenebrescat, & his similia; & ideo ad hoc ut qui diuina docet, ea confirmare possit, ponuntur duæ aliæ gratiæ gratis datæ, quæ sunt gratia sanitatum, & operatio virtutum: Alterum est ut possit manifestare ea quæ solius Dei est scire; & hæc sunt duo, scilicet futura contingentia, & occulta cordium, & propterea ponuntur duæ aliæ gratiæ gratis datæ; ad cognoscenda enim futura contingentia, ponitur prophetia; ad cognoscenda verò occulta cordium, ponitur discretio spirituum. Denique ad hoc ut ille qui diuina docere debet, possit conuenienter illa auditoribus proponere, necessaria est facultas pronuntiandi; quæ attenditur vel quantum ad idioma, vel quantum ad sensum eorum quæ sunt proferenda: unde propter hoc ponuntur duæ aliæ gratiæ gratis datæ; nam propter primum ponitur gratia linguarum, & propter secundum ponitur interpretatio sermonum. Constat ergo nouem tantum gratias gratis datas admittendas esse, nam ad plenitudinem scientiæ dantur tantum tres, nimirum fides, propter principia; sapientia, propter principales conclusiones; scientia, propter effectus: ad hoc verò ut possit doctor ea confirmare, quatuor tantum necessariae sunt, scilicet gratia sanitatum, propter corporalem salutem; operatio virtutum, propter diuinæ potentiae ostensionem; prophetia, propter futura contingentia, discretio spirituum propter cognitionem secretorum cordis; denique ut possit docenda

pro-

proponere requiruntur tantum duæ, nempe genera linguarum, propter idioma; & interpretatio sermonum, propter sensum sententiarum.

Ex illis verò gratijs gratis datis, aliquæ sunt in sanctis permanentes, & per modum habitus, unde ijs vtuntur ad arbitrium, & quando volunt; vt fides, sapientia, & scientia; aliæ verò se habent in illis per modum motionis, seu impressionis actualis, quibus ad arbitrium vti non possunt, sed solum quando à Deo mouentur, vt prophetia, & donum miraculorum. Vnde Gregorius homil. super Ezechiel. bellè obseruat, quod Spiritus Sanctus Sapient. i. stabilis simul ac mobilis appellatur: *Quia* (inquit) *in Sanctorum cordibus iuxta quasdam virtutes semper permanet, iuxta quasdam verò recessurus venit, & venturus recedit: in fide enim, & spe, atque charitate, & in bonis alijs, sine quibus ad cælestem patriam non potest veniri, sicut est humilitas, iustitia atque misericordia, perfectorum corda non deserit: in prophetiæ verò virtute, doctrinæ facundia, miraculorum exhibitione, electis suis aliquando adest, aliquando se subtrahit.*

Ab hac tamen regula excipiendus est Christus, in quo omnes gratiæ gratis datæ fuerunt permanentes, & per modum habitus, vt docet D. Thomas 3. p. quæ. 7. idque duplici de causa: Primò, quia eius humanitas erat instrumentum realiter & hypostaticè coniunctum diuinitati; unde consentaneum fuit, vt quemadmodum illa coniunctio erat permanens, & nunquam dissoluenda, sic etiam gratiæ gratis datæ, quæ hanc vñionem conseqnebantur, es-

sense

sent in eo permanenter , & per modum habitus . Secundò, quia Christus erat præditus potestate quam vocant excellentiæ , ratione cuius habebat imperium in omnes creaturas , & de illis ad suum arbitrium disponebat ; ideoque ad libitum suæ voluntatis , poterat miracula patrare , & dæmonibus , morbis , mari , ac ventis imperare , vt in Euangelio legitur .

Gratia interna rursus diuiditur in habitua-lem & actuaalem : Gratia habitualis est donum Dei permanens , quo homo iustificatur , & sanctificatur , fitque Deo acceptus & amicus , de qua fusè capite sequenti . Gratia actualis est auxilium transiens , hominem interiùs excitans , aut eleuans , ad bene operandum , vt oportet ad salutem . Porro tale auxilium non consistit formaliter in actibus indeliberatis intellectus aut voluntatis , vt volunt plures ex Recentioribus , sed in aliqua motione , vel qualitate transeunte , à Deo potentijs animæ impressa , vt eas eleuet , compleat , & constituat in actu primo sufficienti ad tales actus eliciendos ; cum enim intellectus & voluntas ex se non habeant vim sufficientem ad actus supernaturales producendos , non possunt actus indeliberatos ordinis supernaturalis elicere , nisi priùs saltem natura , per aliquam motionem , vel qualitatem fluentem & transeuntem , ad illos eliciendos eleuentur & applicentur , vt docent nostri Thomistæ in tractatu de auxilijs , & ex hoc inferunt necessitatem gratiæ physicè præmouentis & prædeterminantis . De quo videri possunt ea quæ scripsimus in Clypeo Theologiæ Thomisticæ , in Tractatu de actibus humanis , disp. 6, art. 2. §. 10.

Gratia actualis subdiuiditur in operantem & cooperantem, quæ diuifio colligitur ex illo 1. ad Corinth. 15. *Non ego, sed gratia Dei mecum.* Vbi Anselmus ait idem esse ac si diceret, *in bono opere laboraui, non ego, sed & ego: in eo enim quod solo Dei dono prauentus sum, non ego; in eo autem quod donum voluntate subsequutus sum, & ego.* Vtramque gratiam insinuat Aruficanum can. 9. his verbis: *Quoties bona agimus, Deus in bonis, atque nobiscum, ut operemur operatur.* Et Augustinus de gratia & lib. arbit. cap. 17. dicens: *Cooperando Deus in nobis perficit quod operanda incepit; quia ipse ut velimus operatur incipiens, qui volentibus cooperatur perficiens.*

Porro gratia dicitur operans, quatenus applicat voluntatem ad sanctam affectionem, vel operationem; cooperans verò, quatenus cum voluntate applicata, talem affectionem vel operationem producit. Nam vt docet S. Thomas hic quæst. 111. art. 2. gratia dicitur operans respectu illius effectus in quo mens nostra est mota & non mouens, solus autem Deus mouens; cooperans verò in ordine ad illum in quo mens nostra & mouet & mouetur: Atqui respectu illius effectus qui est applicare voluntatem ad agendum, voluntas est mota & non mouens, cum ad illum merè passive se habeat; recipiendo diuinam motionem, per quam ad agendum applicatur; respectu verò alterius se habet simul vt mouens & mota, cum operationem & consensum voluntatis solus Deus non efficiat, sed etiam ipsa voluntas: Ergo gratia actualis rectè dicitur operans, quatenus applicat voluntatem ad agendum; cooperans

perans verò, in quantum cum voluntate sic applicata, eandem producit actionem & effectum.

Gratia autem operans & cooperans, varijs solent nominibus insigniri: In primis enim gratia operans, dicitur præueniens, & cooperans appellatur subsequens. Operans dicitur præueniens, quia præuenit omnem nostram deliberationem, & bonum liberi arbitrij vsum seu consensum, prioritate temporis, vel naturæ, iuxta illud Psalmi 58. *Misericordia eius præueniet me.* Vnde Augustinus lib. 4. contra duas epist. Pelagian. cap. 6. *In omnibus quæ quisque agit secundum Deum, misericordia eius præuenit eum.* Et Bernardus de gratia & libero arbitrio: *Sanè ipsi nos præuenire nequaquam possumus, qui enim bonum neminem inuenit, neminem saluat quem non præuenit.* Gratia autem cooperans dicitur subsequens, quia applicationem ad opus sequitur productio illius. Vnde Augustinus in Enchiridio cap. 33. *Vtrumque legitur in sacris eloquijs, & misericordia eius præueniet me, & misericordia eius subsequetur me. Nolentem præuenit ut velit, voluntatem subsequitur, ne frustra velit.* Et Fulgentius lib. 1. ad Monimum cap. 11. *Præuenit Deus donans homini bonam voluntatem, subsequitur bene volentem, operando in illo boni operis facultatem.* Et rursus: *Præuenit impium, ut fiat iustus; subsequitur iustum ne fiat impius; præuenit elisum, ut surgat; subsequitur elevantum, ne cadat.*

Iterum gratia operans dicitur excitans, cooperans verò adiuuans nominatur. Excitans illa dicitur, quia peccatorem vel iustum à bono

no opere cessantem, tanquam sopore quodam depressum, à somno peccati, vel negligentiae bonorum operum excitat, iuxta illud Apocal. 3. *Ecce sto ad ostium, & pulso, & istud ad Ephes. 5. Surge qui dormis, & exurge à mortuis, & illuminabit te Christus.* Hanc gratiam, seu potius hunc gratiae operantis effectum, eleganter describit Augustinus in libro Confessionum, ubi Deum alloquens sic ait: *Vocasti, clamasti, rupisti surditatem meam: coruscasti; splenduidisti, fugasti caecitatem: flagrasti, & eduxi spiritum atque iam anhelotiori; gustavi, & esurio ac sitio: tetigisti me, & exarsi in pacem.* Quibus verbis declarat, tria attributa, tribus personis diuinis appropriata, maxime relucere in iustificatione peccatoris: potentia enim Patris apparet in virtute & efficacia vocationis eius, his verbis expressa: *Vocasti, clamasti, rupisti surditatem meam.* Sapientia verò Filij, in splendoribus quibus mentem eius illustrat, unde subdit: *Coruscasti, splenduidisti, fugasti caecitatem meam.* Bonitas autem Spiritus Sancti, in mira suauitate qua ipsum ad se allicie & pertrahit, quam verbis sequentibus declarat: *Flagrasti, & eduxi spiritum &c.* Cooperator verò, adiuvans appellatur, quia nos adiuuat ad faciendum id ad quod excitati sumus à Deo. Hanc frequenter à Deo postulat Ecclesia, verbis illis Psalmi 69. *Deus in adiutorium meum intende &c.* Unde Cassianus colat. 10. cap. 5. *Hunc versiculum in opere quolibet seu ministerio vel itinere constitutus decantare non desinas: hunc meditati tibi somnus irrepat, donec incessabili eius exercitio formatus, etiam per soporem eum decantare consuecas.* Hic  
tibi

tibi expergesaſto primus occurrat, iſte euigilans cogitationes anticipet vniuerſas, iſte de tuo conſurgentem cubili, curuationi genuum tradat atque deinceps ad omne opus actusque deducat.

Circa has gratiæ operantis diuiſiones, breuiter obſeruandum eſt, illas quidem propriè conuenire gratiæ actuali, poſſe tamen aliquo modo accommodari gratiæ habituali, vt docet D. Thomas hic quæſt. 111. art. 2. Gratia enim, vt ſupra dicebamus, dicitur operans, quando mens noſtra eſt mota & non mouens; dicitur verò cooperans, quando mens noſtra & mouet & mouetur: Atqui gratia habitualis, & animam ſanctificat in genere cauſæ formalis, quem effectum ſola efficit; & ſimul eſt principium operis meritorij, quod à gratia ſimul & libero arbitrio producit. Ergo gratia habitualis operans & cooperans vera quadam ratione appellari poteſt. Dicit etiam poteſt præueniens & ſubſequens, ratione diuerſorum effectuum, quorum vnus alium conſequitur: v. g. quatenus dat eſſe ſupernaturale, dicitur præuenire ſeipſam, vt mouentem ad bonam voluntatem, operationem, & perſeuerantiam.

Demum celebris eſt diuiſio gratiæ actualis in ſufficientem & efficacem. Sufficiens eſt illa quæ dat poſſe operari, efficax verò eſt quæ cum operatione quam infallibiliter intert, ſemper coniungitur. Sumitur hæc diuiſio ex Auguſtino de corrept. & gratia cap. 11. & 12. vbi diſtinguit duplicem gratiam, vnā quæ dat poſſe perſeuerare, quam aſſerit Adamo & malis Angelis fuiſſe conceſſam: Si enim (inqui) hoc adiutorium vel Angelo vel homini, cum primum facti ſunt deſuiſſet, quoniam non talis



talis natura facta erat , ut sine diuino adiutorio posset manere , non utique sua culpa cecidissent , adiutorum , quippe defuisset , sine quo manere non possent . Aliam quæ dat actu perseverare , quæ fuit Adamo & malis Angelis denegata , daturque sanctis in regnum Dei per gratiam eius prædestinatis . Primam appellat adiutorium sine quo , alteram dicit esse adiutorium quo . Vtriusque meminit Cyrillus in libro de adoratione , ubi sic ait : *Tantam benignitatem nobis exhibet vniuersorum Saluator Deus ut efficaci subsidio adiunget secundum quod scriptum est: Apprehendisti manum dexteram meam, & in consilio tuo deduxisti me ; nam quoniam hominis natura non valde generosa est, neque satis idonea ut malum effugere queat, simul quodammodo nobiscum certat Deus, & duplex concedere beneficium videtur , persuadens admonitionibus , ut subsidium inueniamus , & fortius aliud præstans ; quam ut malum præsens & violentum præualere possit . Vtrumque etiam insinuare videtur S. Thomas hic q. 112. art. 2. ad 2. his verbis : *Contingit quandoque quod Deus mouet hominem ad aliquod bonum, non tamen perfectum , & talis præparatio præcedit gratiam ; sed quandoque statim perfecte mouet ipsum ad bonum, & subito gratiam homo suscipit .* Quibus verbis S. Doctor manifestè agnoscit in statu naturæ lapsæ gratiam quandam mouentem & applicantem ad actus imperfectos , & præparantem ad perfectiores , quam Thomistæ sufficientem vocant , aliam mouentem & applicantem ad actus perfectos , ac efficientem perfectam conuersionem & iustificationem peccatoris , quam efficacem ap-  
 pel-*

pellant. Ergo diuifio gratiæ in fufficientem & efficacem legitima eft, & ad mentem Doctõ-  
ris Angelici, nec non Auguftini, & Cyrilli.

Ratio etiam fuffragatur, cùm enim in om-  
ni natura, præfertim intellectuali, tria distin-  
guantur, nimirum eſſe, poſſe, & operari, conue-  
nienter in ordine ſupernaturali triplex gratia  
admittenda eſt. Vna quæ det eſſe ſupernatu-  
rale & diuinum, & quæ ſit veluti ſubſtantia  
illius ordinis; & hæc eſt gratia ſanctificans,  
quæ nos eleuat ad conſortium & participatio-  
nem diuinæ naturæ, vt capite ſequenti oſten-  
demus. Alia quæ det poſſe, ſeu compleat po-  
tentiam in actu primo, & hæc eſt gratia ſuf-  
ficiens, quæ gratia poſſibilitatis appellatur. Altera demum quæ det actu operari, ſeu quæ  
potentiam moueat & applicet ad agendum,  
eamque cum operatione infallibiliter conne-  
ctat, & hæc gratia efficax nuncupatur.

Verùm aliqui Recentiores contendunt, au-  
xilium illud quod Thomiſtæ admittunt, &  
ſufficiens vocant, nec eſſe, nec debere appel-  
lari ſufficiens: nomine enim (inquiunt) mediij  
ſeu auxiliij ſufficientis, apud omnes communi-  
ter intelligitur id quod ſe ſolo ſufficit, & præ-  
ter quod nihil vltra requiritur ad agendum:  
At, in ſententia Thomiſtarum, præter auxi-  
lium illud quod vocant ſufficiens, aliud requi-  
ritur, per quod potentia applicetur ad agen-  
dum, & de actu primo ad ſecundum reduca-  
tur: Ergo tale auxilium, nec eſt, nec poteſt,  
niſi abuſuè, appellari ſufficiens. Sicut (in-  
quit quidam Recentior) quia enſis & clypeus  
ſunt neceſſaria ad pugnandum, nauis ad naui-  
gandum, alimenta ad vitam conſeruandam,  
colo-

colores & penicillus ad pingendum, nemo prudens & sapiens dicet, hominem posse sine clypeo & ense pugnare, nauigare sine naui, conseruare vitam sine alimentis, & pingere sine coloribus & penicillo.

Respondeo primò, hac difficultate non solum premi Thomistas, sed etiam Patres Societatis, gratiæ congruæ defensores, ut ostendit P. Martinonus, nouus ac celebris eiusdem Societatis scriptor, in Antijansenio disp. 26. sect. 3. num. 25. vbi varijs argumentis gratiam congruam Suarez, Vasquez, aliorumque Theologorumque Societatis, conuellens, istud tertio loco subiicit: *Tertiò, si tanta motio & excitatio necessaria est moraliter ad conuersionem, ergo qui minorem recipiunt, non habent auxilium moraliter sufficiens; atque ita quotquot non conuertuntur, carent auxilio sufficienti moraliter ad conuersionem, estque illis moraliter impossibile ut conuertantur. Unde huiusmodi querimonia metaphysica esset, & non moralis, & rationabilis, quod absit, quid est quod debui ultra facere vineæ meæ, & non feci? Isaia 5. Possent enim Iudæi meritò respondere: debebas nobis dare auxilium moraliter sufficiens, non autem tale cum quo fuit moraliter impossibile conuerti, & quo præuentus nemo conuerteretur: quomodo expectasti vinas ab ijs quibus impossibile moraliter fuit, non ferre labruscas? Et infra num. 28. ait sententiam quæ docet necessitatem gratiæ congruæ ad operandum, incidere in duplex inconueniens quod Patres Societatis obijciunt Thomistis; eamque inducere gratiam necessitatem, ac excludere sufficientem. Quod de morali sufficientia (inquit) ma-*  
nife-

nifestissimum est, quia cum tali gratia sola (nempe incongrua) est moraliter impossibile bene operari. Dicitur enim moraliter impossibile quod adeo difficile est, ut nemo illud faciat. Sicut ergo Suarez, Vasquez, & alij gratiæ congruæ defensores docent, eum qui caret gratia congrua, habere auxilium sufficiens ad operandum, quamvis talis gratia ita ad agendum necessaria sit, ut aliquem sine illa conuertere, vel operari, nunquam contigerit, subindeque id moraliter impossibile sit. Ita Thomistæ possunt prædictum auxilium quod admittunt, sufficiens appellare, quamvis applicatio potentiae, quæ est à gratia efficaci, ad operandum ulterius requiratur; totumque discrimen inter illas duas sententias in eo est, quod gratia congrua est moraliter duntaxat necessaria ad conuersionem & operationem; gratia verò prædeterminans est de prærequisitis physicè ad agendum; cum quo tamen stat, illum qui caret gratia congrua, carere auxilio moraliter sufficienti; si verum est quod prædicti Authores dicunt, eum qui caret gratia physicè prædeterminante, auxilio physicè sufficienti carere.

Respondeo secundò directè difficultati propositæ, conuenienter gratiam quæ dat posse, tametsi non inferat actum, sufficientem appellari, idque duplici titulo: primò quia sufficienter excitat voluntatem ad agendum, secundò quia dat illi totum complementum, & totam virtutem seu sufficientiam quæ requiritur ex parte actus primi, quamvis non det applicationem, actualitatem, seu complementum se tenens ex parte actus secundi. Quod

verò hoc sufficiat ad rationem & dominationem auxilij sufficientis, ex utroque Sancto Doctore Augustino, & Thoma, apertè colligitur: licet enim Augustinus libro de gratia Christi, & libro de correptione & gratia, admittat auxilium actionis, seu adiutorium quo, quod docet ita necessarium esse ad operandum & perseverandum, ut sine illo nemo unquam bene agat, nec perseveret; tamen præter illud agnoscit auxilium possibilitatis, seu adiutorium sine quo, quod sufficiens esse ibidem docet, quamvis præter illud aliud requirat: Ergo ex Augustino de ratione auxilij sufficientis non est, quod illud se solo sufficiat, & præter illud non requiratur aliud ad agendum. Item S. Thomas 1.2. quæst. 106. art. 2. ad 2. dicit quod *lex nova, quantum est de se, sufficiens auxilium dat ad non peccandum*. Vbi per *auxilium sufficiens* intelligit gratiam habituales, ut docent Conradus, Syluius, & alij eius interpretes: & constat tum ex titulo articuli, ubi quærit, *utrum lex nova iustificet?* Tum ex scopo in quem collimat, intendit enim probare, legem novam iustificare, quia ad eam principaliter pertinet gratia habitualis seu iustificans: Atqui in doctrina D. Thomæ, ad non peccandum, seu ad observanda præcepta divina, & actus supernaturales eliciendos, præter gratiam habituales, requiritur in iustis aliqua gratia actualis & mouens, per quam gratia habitualis, & habitus supernaturales & infusi, ab ea promanantes, applicentur ad agendum; & de actu primo ad secundum reducantur, ut constat ex quæst. 109. art. 9. ubi idem S. Doctor sic ait: *Homo in gratia existens, non indi-*

*indiget auxilio gratiæ, quasi aliquò alio habitu infuso; indiget tamen auxilio secundum alium modum, ut scilicet à Deo moueatur ad rectè agendum: Ergo iuxta D. Thomam non requiritur ad denominationem auxilij sufficientis, quod se solo ita sufficiat ad operandum, ut homo non indigeat alio auxilio mouente, & applicante, sed ad hoc satis est, quod auxilium sufficiens tribuat omnia necessaria & requisita ex parte actus primi. Ex quo patet disparitas ad exempla adducta, cum enim ensis & clypeus sint necessaria ex parte ipsius potentia & actus primi completi, ad pugnandum, cibus ad vitam conseruandam, naus ad nauigandum, penicillus & colores ad pingendum; non mirum quod is qui illis caret, non censeatur habere auxilia & media sufficientia ad illos actus. E contra verò, cum gratia efficax, & physicè prædeterminans, supponat potentiam per auxilium sufficiens completam in actu primo ad agendum, & illam duntaxat reducat ad actum secundum; qui ea caret potest dici potens in actu primo ad agendum, subindeque habere auxilium sufficiens.*


Ex his intelliges, Ludouicum Montaltium, dum in famosis illis ad Prouincialem Epistolis, deridet Thomistas, eò quòd auxilium quod admittunt, appellant sufficiens, etsi præter illud, aliud ad agendum requiratur; non solum in doctrina D. Augustini & S. Thomæ sese peregrinum ostendere, sed etiam seipsum vicissim à Thomistis exponere deridendum, iuxta illud vulgare adagium: *Irrisores irridebuntur*. Et certè, cum ille in prædictis Epistolis passim profiteatur, se esse D. Augustini Discipu-

lum, & gratiæ per se efficacis acerrimum defensore, vel debet omne auxilium sufficiens, ab efficaci distinctum, reiicere, subindeque asserere præcepta impossibilia esse iusto qui caret auxilio efficaci, quod Innocentius X in sua noua constitutione damnauit vt hæreticum; vel ipsum fateri necesse est, iustum qui caret auxilio efficaci, & solo sufficienti instructus est, habere potentiam ad agendum sufficienter completam, subindeque dici posse habere auxilium re vera sufficiens ad implenda præcepta.

Nec obest quod apud plebeios & grammaticos illud duntaxat appelletur sufficiens, quod se solo sufficit, & præter quod nihil ultra requiritur ad agendum; nam modus loquendi Theologorum, sæpissime diuersus est à more loquendi Grammaticorum, quia vt ait Augustinus lib. 1. contra Cresconium Grammaticum: *Cum res intelligitur, minus laborandum est, quideam hominibus vocare placuerit.* Demus ergo Montaltio Grammatico, auxilium quod Thomistæ admittunt, & sufficiens appellant, non esse sufficiens *Grammaticaliter*, nobis Theologis satis est, illud esse sufficiens *Theologicè* & in sensu Augustiniano & Thomistico, supra explicato.

Circa aliud membrum huius diuisionis, nempe gratiam efficacem, plures & graues hic resoluendæ essent difficultates, præsertim celebris illa controuersia, vnde petatur efficacia gratiæ, an ex omnipotentia Dei, & supremo dominio quod habet in nostras voluntates, vt docent Thomistæ? An ex eius præscientia futurum nostræ voluntatis consensum explorante,

te, vt volunt Suarez, Vasquez, & alij defensores gratiæ congruæ? An solum ab euentu, seu ex consensu & determinatione liberi arbitrij, gratiam determinantis & applicantis, vt Molina, & Lessius existimant? Verum ob reuerentiam Sedis Apostolicæ, quæ huius controuersiæ, in congregatione de auxilijs coram Clemente VIII. & Paulo V. persæpè agitatæ, resolutionem typis mandare non semel prohibuit, silentio eam prætermitto; melior enim est obedientia quam victima, & utilius nobis est gratiæ vñctionem & efficaciam in se experiri, quam vnde illa proueniat explorare. Facile tamen quæ hic desunt circa hanc celebrem controuersiam, suppleri aut colligi poterunt ex dictis supra de dono perseverantiæ, & ex his quæ de efficacia diuinorum decretorum scripsimus in Tractatu de voluntate Dei.



## C A P V T XI.

*De essentia gratiæ habitualis, seu gratum facientis.*

**V**arijs gratiæ diuisionibus explicatis, superest vt agamus de gratia habituali, seu gratum faciente, quæ est nobilissima species gratiæ, & gratiarum omnium fulgentissimum rubar, cuius radijs cætera fulgent carissimata, qua fides nitet, spes erigitur, ipsaque charitas ignescit ac feruet. Illa est cuius lumine illustramur, cuius munditie à peccatorum fecibus purgamur, cuius candore dealbamur, cui-



ius pigmentis venustamur, cuius sanctitate Sacerdotes Dei consecramur, cuius maiestate Reges æquamur, cuius semine filij Dei generamur, cuius virtute prorsus diuina deificamur. Illa filij Dei, fratres Christi, membra corporis eius, organa Spiritus Sancti, templa sanctissimæ Trinitatis, ciues Sanctorum, domestici Dei, amici & familiares eius, ac nouæ creaturæ efficimur. Illa demum ( inquit Catechismus Romanus ) *diuina qualitas est, in anima inherens, ac veluti splendor quidam & lux, quæ animarum nostrarum maculas omnes delet, ipsasque animas pulchriores & splendidiore reddi.* De illa porro quatuor hic inuestiganda & explicanda sunt, nempe eius essentia, perfectio, causa, & effectus.

## §. I.

*Gratia habitualis, seu gratum faciens, est donum aliquod homini intrinsecum, nempe aliqua qualitas supernaturalis, in anima permanens, subindeque habens rationem habitus & non dispositionis.*

**P**Rima pars est certa de fide, ac definita in Tridentino sess. 6. can. 11. contra Lutheranos & Caluinistas, existimantes gratiam non esse aliquid nobis infusum, siue in nobis existens, sed solum extrinsecum fauorem & beneuolentiam Dei, per quam anima est ipsi grata, & ab eo dilecta. Qui error varijs Scripturæ testimonijs potest refelli: Dicitur enim 2. ad Corinth. 1. *Signauit nos, & dedit nobis pignus spiritus in cordibus nostris.* 1. Ioan. 3.

*Omnis*

*Omnis qui natus est ex Deo, peccatum non facit, quoniam semen ipsius in eo manet. Ioan. 4. Qui biberit ex hac aqua, fiet in eo fons aquæ salientis in vitam æternam:* Sed pignus commissum, sigillum impressum, semen insitum, aquæ fons è corde scaturiens, quid reale & intrinsecè inhaerens apertè sonant: Ergo Scriptura his figuris, seu metaphoris, manifestè declarat, gratiam gratum facientem esse donum aliquod homini intrinsecum, eique inhaerens.

Ratio etiam quam insinuat D. Thomas hic qu. 110. art. 1. id suadet: Per gratiam enim gratum facientem homo fit obiectum dilectionis Dei supernaturalis, cum ut nomen ipsum sonat, per ipsam fiat Deo gratus & acceptus: At dum homo fit obiectum dilectionis Dei supernaturalis, necessariò alicuius doni supernaturalis receptione mutatur: Ergo gratia gratum faciens est aliquod donum supernaturale, à Deo homini infusum, & in eo receptum. Maior constat, minor verò probatur ex discrimine quod reperitur inter amorem diuinum & humanum; amor enim humanus, cum sit impotens & sterilis, nec sit effectiuus, sed tantum affectiuus, non ponit sed supponit bonitatem in rebus; è contra amor diuinus, cum sit potens & fecundus, nec affectiuus, sed effectiuus sit, causat bonitatem in obiecto quod diligit, & ut loquitur S. Thomas 1. p. qu. 20. artic. 2. *est infundens & creans bonitatem in rebus*: Sicut ergo Deus diligendo creaturas in ordine naturali communicat eis perfectiones naturales, quibus sunt obiectum congruum huiusmodi dilectionis; ita diligendo creaturam intellectualem in ordine ad finem

supernaturalem , per talem dilectionem in ea causat aliquam perfectionem , seu donum supernaturale , quo fit obiectum congruum talis dilectionis supernaturalis , & Deo gratus & acceptus in ordine ad æternam beatitudinem , ideoque illud gratiam gratum facientem appellamus .

Dices primò , prædestinatio est specialis Dei dilectio erga electos , in ordine ad finem supernaturalem , & tamen non ponit semper in eis aliquod donum supernaturale , cum interdum contingat electos esse in statu peccati & infidelitatis , subindeque carere omnibus donis supernaturalibus : Ergo falsum est , ex amore supernaturali Dei erga homines , debere in eis causari aliquod donum supernaturale .

Respondeo prædestinationem non includere dilectionem Dei efficacem pro omni tempore ( sæpe enim Deus prædestinatum existentem in peccato mortali odit secundum præsentem iustitiam ) sed solum pro aliquo tempore quo statuit prædestinato gratiam conferre ; unde prædestinatio gratiam confert pro tempore à Deo statuto , non verò eo tempore quo ex decreto diuino non est efficax , sed suspendit effectum .

Dices secundò , odium Dei nihil ponit intrinsecum in homine quem odit : Ergo nec eius amor in eo quem diligit . Sed nego consequentiam & paritatem : tum quia homo potest ex proprijs habere unde sit obiectum odij Dei , scilicet peccatum : non verò unde sit obiectum amoris eius , nempe bonum . Tum etiam quia amor est actus prosecutionis , quare si non  
sup-

supponat bonum in obiecto in quod tendit, debet illud ponere; odium verò est per modum fugæ & recessus; unde non pertinet ad illud aliquid in obiecto ponere, sed potius ab eo tollere.

Dices tertio, obiectum præintelligitur & præsupponitur ad actum: Ergo bonum quod relucet in creaturis, & est obiectum diuini amoris, ad ipsum præsupponitur, non verò ab illo causatur.

Respondeo primo, obiectum præsupponi ad actum, quando ille est merè speculatiuus, scilicet verò si sit practicus, vt constat in scientia visionis, quæ quia est eminenter speculatiua & practica, non supponit suum obiectum, sed illud facit, iuxta illud Gregorij magni lib. 32. moral. cap. 6. *Non existentia videndo creat, & existentia videndo continet*: de quo in tractatu de scientia Dei. Amor autem Dei erga creaturas est practicus & effectiuus, & *insundens ac creans bonitatem in rebus*, vt ait D. Thomas supra relatus.

Respondeo secundo, quod sicut intellectio potest duobus modis considerari, scilicet vt productio verbi (sub quo conceptu appellatur dictio) & prout est pura obiecti contemplatio in ipso verbo: ita amor Dei potest considerari, vt est volitio efficax & practica sui obiecti, & vt habet rationem dilectionis simplicis, siue complacentiæ. Vnde sicut intellectio, vt dictio, est prior verbo, posterior verò, vt est pura contemplatio obiecti in verbo: ita amor Dei, vt efficax & practicus, est prior bonitate quam communicat creaturis; si verò consideretur præcisè sub conceptu puræ

dilectionis siue complacentiæ , non est prior, imò sub hac ratione potest esse posterior , non quidem quoad entitatem, sed quoad suam terminationem .

Secunda pars quæ asserit gratiam gratum facientem esse aliquam qualitatem in anima permanentem , subindeque habere rationem habitus & non dispositionis, probatur hoc discursu D. Thomæ hic qu. 110. art. 2. Deus non minùs prouidet hominibus quos diligit in ordine ad finem supernaturalem , quam creaturis quas diligit in ordine ad bonum naturale : sic autem istis prouidet, vt non solùm moueat eas ad actus naturales , sed etiam ipsis largiatur formas & virtutes quasdam, seu qualitates fixas & permanentes , quæ sunt principia actuum , vt secundum seipsas inclinentur ad huiusmodi motus ; vt patet in lapide , cui dedit grauitatem vt connaturaliter inclinetur ad centrum ; & in igne, cui leuitatem indidit, vt connaturaliter ferretur ad locum sursum : Ergo multò magis debet infundere aliquas formas, siue virtutes , & qualitates supernaturales , permanentes ac fixas , illis quos mouet ad finem supernaturalem, per quas promptè & suauiter ab ipso moueantur ad bonum æternum consequendum ; subindeque gratia gratum faciens erit aliqua forma , seu qualitas , habens esse fixum & permanens . Licet enim hic in statu viæ , per accidens sit variabilis , & faciliè mobilis à subiecto , ob imperfectam eius participationem , & quia non est in suo statu connaturali ; per se tamen & ex natura sua , petit diu in subiecto manere , & difficilè ab illo auelli , quia per se habet causas

fas firmas & stabiles : vnde in patria vbi erit in suo statu connaturali, erit omninò incorruptibilis & inamissibilis, nec mensurabitur tempore; aut æuo, sed æternitate participata, sicut & ipsa visio beatifica. Per quod occurrit instantiæ, quæ contra hanc partem nostræ assertionis fieri posset.

## §. II.

*Gratia sanctificans est participatio formalis naturæ diuinæ, non solum qua natura, sed etiam qua infinita est.*

**P**Rima pars huius assertionis colligitur ex varijs Scripturæ testimonijs nam 1. Petri 2. homines per gratiam dicuntur consortes effici diuinæ naturæ. Item scriptura sæpissimè asserit, illos generari, nasci, & renasci ex Deo per gratiam, & in eius filios adoptari. Cùm autem generatio sit naturæ communicatio, cùm natiuitas sit naturæ receptio, cùm filius ille solus dicendus sit, qui naturam patris exprimit & participat, procul dubio istos, per gratiam diuinæ naturæ participatione gaudere credendum est.

Ratio etiam id suadet, nam per naturam diuinam intelligimus perfectionem illam primitiuam & fontalem, quæ in Deo, iuxta nostrum modum concipiendi, est eminenti quodam modo, fons, radix, & origo diuinorum attributorum, & principium diuinarum operationum: Atqui gratia sanctificans talem perfectionem participat, cùm sit radix charitatis, & aliarum virtutum infusarum, quæ sunt

participationes diuinorum attributorum, & principium operationum attingentium Deum vt est in se tanquam obiectum connaturale & proportionatum, nimirum visionis Dei intuitiue, & amoris beatifici: Ergo gratia sanctificans est participatio diuinæ naturæ, qua natura est.

Confirmatur & magis illustratur hæc ratio: Participare formaliter aliquid, est habere conuenientiam formalem cum illo, saltem analogam: vt patet in accidente, quod participat rationem entis formaliter, quia in illa habet conuenientiam formalem, saltem analogam, cum substantia: Sed gratia sanctificans habet talem conuenientiam cum natura diuina, vt natura est; sicut enim natura Dei est eminenti quodam modo radix cognitionis & amoris, quibus Deus seipsum vt est in se infinito modo cognoscit & amat; ita gratia sanctificans est radix intelligendi & amandi Deum vt est in se, & prout transcendit totum ordinem creatum & creabilem: Ergo illa est participatio formalis diuinæ naturæ, vt natura est. Vnde Cyrilus lib. 2. Thesauri cap. 2. *Eandem operationem connaturaliter habentes cum Deo, necesse est eiusdem esse naturæ.*

Confirmatur amplius: Cum omnis inclinatio tendat in bonum proprium naturæ, in qua radicatur, nihil dat inclinationem in aliquam naturam, nisi saltem participatiue habeat illam: Sed à gratia sanctificante oritur charitas, quæ est inclinatio in Deum, vt est in seipso: Ergo gratia sanctificans habet in se participatiue naturam diuinam, vt natura est.

Quod verò etiam illam participet, quatenus

nus infinita est, probatur contra Alphonsum Curielem, & Vincentium Contensonum, id negantes, & simul præcipuum illorum fundamentum conuellitur. Vt gratia sanctificans dici possit participare naturam diuinam, vt infinita est, non requiritur quod totam Dei infinitatem in se capiat, sed sufficit quod ei conueniat aliqua pars seu aliquis modus diuinæ infinitatis: At gratia sanctificans aliquam partem seu aliquem modum infinitatis Dei in se capit: Ergo participat naturam diuinam, vt infinita est. Maior patet, participare enim aliquam perfectionem, non est habere illam totaliter & completè, sed partialiter & inadæquatè; cum participare nihil aliud sit, quam partem capere, & partem relinquere, vt ex ipsis terminis constat. Minor verò suadetur: Deo vt est ens infinitum, tria conueniunt: primum est habere suam essentiam pro obiecto connaturali, & pro forma intelligibili, ad cuius modum alia intelligat; hoc enim ipsi competit prout excedit totum ordinem naturæ creatæ & creabilis, subindeque vt infinitus est, habetque totam essendi plenitudinem: secundum, vt identificent sibi tale obiectum & speciem, ac operationem qua in illud tendit: tertium, vt illud comprehendat, & cognoscat quantum cognoscibile est: At quamuis gratia sanctificans non possit duo posteriora in se habere, & in illis cum Deo communicare, primum tamen, nempe habere essentiam diuinam pro obiecto connaturali, & forma intelligibili, illi conuenit, & cum Deo communicat, vt patet ex dictis in tractatu de visione beatifica: Ergo gratia sanctificans aliquid de  
infi-



infinitate Dei, seu aliquam partem illius in se capit, subindeque naturam Dei, ut infinita est, participat.

Confirmatur: Charitas nostra est participatio formalis charitatis Dei, ut est infinita: Ergo & gratia sanctificans est participatio formalis naturæ diuinæ, quatenus infinita est. Consequentia patet, non enim magis repugnat participari essentiam infinitam, quam proprietatem infinitam. Antecedens verò est D. Thomæ 2. 2. quæst. 24. artic. 24. artic. 7. ubi probat charitatem viæ posse augeri in infinitum, quia *est participatio quedam infinitæ charitatis Dei*: hæc autem ratio id non probaret, si S. Doctor non intenderet, charitatem esse participationem infinitæ charitatis Dei, quatenus infinita est, sed duntaxat secundum aliquem gradum determinatum; quia aliquam qualitatem participare formam infinitam, secundum gradum determinatum, non arguit illam posse in infinitum intendi, sed potius è contra illam non posse augeri ultra illum gradum quæ participat. Sicut intellectus Angeli, & esse substantiale hominis, non possunt augeri in infinitum; quia licet participant formaliter intellectum & esse Dei, quæ infinita sunt, ea tamen non participant ut infinita, sed secundum aliquem gradum determinatum.

Obijcies primò contra primam partem assertionis: Gratia sanctificans in Scriptura semen Dei appellatur, ut constat ex illo 1. Ioan. 3. *Qui natus est ex Deo peccatum non facit, quia semen eius manet in eo*: At semen virtualiter tantum & non formaliter participat naturam generantis, est enim tantum eius instrumen-

tum,

tum , seu virtus ab illo decisa , ad communicandam suam naturam alteri: Ergo gratia sanctificans non est formalis , sed tantum virtualis participatio diuinæ naturæ .

Respondeo gratiam sanctificantem, non vocari semen Dei, per ordinem ad naturam diuinam, cuius est participatio, sed per respectum ad visionem beatificam, cuius est radix, & quæ in virtute gratiæ , vt arbor in virtute seminis, continetur , iuxta illud Apostoli : *Gratia Dei vita æterna* . Vnde D. Thomas 1. p. quæst. 62. artic. 3. *Gratia gratum faciens hoc modo comparatur ad beatitudinem , sicut ratio seminalis in natura ad effectum naturalem, vnde 1. Ioan. 3. gratia semen Dei nominatur* .

Obijcies secundo : Non est de ratione adoptionis quod communicetur natura personæ quæ adoptatur in filium : Ergo licet per gratiam sanctificantem homo filius Dei adoptiuus constituatur, non sequitur quod per illam participet formaliter naturam diuinam. Consequentia manifesta est, Antecedens verò constat in adoptione quæ fit inter homines , nam per illam adoptatus non recipit naturam ab adoptante , sed duntaxat ad eius hæreditatem acceptatur .

Respondeo quod licet communicatio naturæ non sit de ratione adoptionis quæ fit inter homines, requiritur tamen ad adoptionem per quam homo adoptatur in filium Dei . Ratio autem discriminis est , quia adoptio in humanis supponit quod adoptatus sit eiusdem naturæ cum adoptante , habeatque in se sufficiens principium quo sit aptus ad percipiendum eius hæreditatem ; & ideo non mirum, si per illam  
non

non communicetur natura. Adoptio autem diuina, cum non supponat in homine similitudinem in natura diuina, nec sufficientem capacitatem ad percipiendam hereditatem Dei, debet illam efficere, subindeque diuinæ naturæ participationem tribuere. De quo plura infra, cum de primo effectu gratiæ sanctificantis, nimirum adoptione hominis in filium Dei.

Obijcies tertio contra secundam assertionem cum Patre Vincentio Contensonno: Infinitas, cum sit ipsius diuinitatis character, & propria veluti differentia, Deoque conueniat, prout à creaturis etiam supernaturalibus distinguitur, procul dubio imparticipabilis est à creatura: Ergo gratia sanctificans nequit esse participatio formalis naturæ diuinæ, quatenus infinita est.

Confirmatur primo: Ad formalem participationem seu imitationem & expressionem, formalis conuenientia, & veluti exscriptio saltem analogica, qua participans participati dotes delineat, desideratur: Sed gratia sanctificans non gaudet similitudine & formali conuenientia cum natura Dei, quatenus infinita est, cum sit ens creatum & finitum: Ergo nec participatione formali naturæ diuinæ, prout infinitæ formaliter.

Confirmatur secundo: Quod participatur ab aliquo formaliter, prædicatur de illo: v.g. quia accidens participat rationem entis analogicè, potest ens prædicari de illo: Sed ratio entis infiniti & actus puri, non potest prædicari de gratia sanctificante, cum illa sit essentialiter ens creatum, finitum, & potentiale:

Ergo

Ergo gratia sanctificans non est formalis participatio naturæ diuinæ , quatenus est infinita , & actus purus .

Antequam hæc argumenta soluantur , aduertendum est , hunc Authorem pugnantia scribere & docere : nam tomo 1. pagina 83. docet naturam diuinam, vt natura est, constitui per rationem entis à se & per essentiam . Et tomo 5. in Tractatu de gratia pagina 466. ait quod *Deus est quidem supernaturalis , quia ens per essentiam , actus purus , infinitus & illimitatus est : Sed hæc supernaturalitas , cum sit distinctius Diuinitatis charaëter , quod à creaturis etiam supernaturalibus discernitur , nulla potest in creaturas ratione transfundi , & ab eis exprimi vel exscribi.* Item ibidem pagina 460. asserit cum Thomistis , gratiam sanctificantem esse formalem naturæ diuinæ participationem . Quomodo hæc inter se cohærere & conciliari possint, planè , non video . Si enim natura Dei constituatur per rationem entis per essentiam , & actus puri , & illa ratio imparticipabilis sit à creaturis ; manifestum est , gratiam sanctificantem non esse , nec esse posse , formalem naturæ diuinæ participationem : cum id quod in Deo imparticipabile est , nullatenus participari possit à creaturis . E contra verò , si gratia sit participatio formalis naturæ diuinæ , & illa constituatur per rationem entis à se & per essentiam , seu actus puri, euidentius est , talem rationem non esse omnino imparticipabilem , illamque posse aliqua ratione in creaturas transfundi , & ab eis exprimi vel exscribi . Vnde .

Ad obiectionem propositam respondeo negan-

gando Antecedens, constat enim ex dictis in probatione secundæ partis nostræ assertionis, quod licet infinitas Dei non possit participari à creatura adæquatè, & secundùm omnes conceptus & rationes quas continet, benè tamen inadæquatè, & secundùm aliquam rationem, vel conceptum, nempe prout tribuit Deo habere suam essentiam pro obiecto connaturali, & forma intelligibili, quod à gratia sanctificante participatur; cum illa sit radix visionis beatificæ, & vnionis essentiæ diuinæ in ratione speciei intelligibilis cum intellectu beatorum, lumine gloriæ perfuso.

Addo in alijs relucere aliquam gratiæ infinitatem: Primò quia non habet terminum sui augmenti. Secundò, quia est principium merendi de condigno & ad æqualitatem præmii infinitum obiectiuè, & satisfaciendi aliquo modo pro culpa mortali, quæ in ratione offensæ est intrinsecè infinita, vt in tractatu de peccatis ostendimus. Tertiò, quia est principium charitatis, quæ, vt ait D. Thomas supra relatus, est *participatio quædam infinitæ charitatis Dei*. Demum aliqualis eius infinitas relucet in hoc quod sicut Deus, quia ex se infinitus est, sufficit ad implendum omne cordis humani desiderium, propter quod ab Hebræis *Saldai*, id est *qui sufficit*, appellatur: ita & gratia, cum sit diuinæ naturæ participatio, & veluti quoddam vinculum quo Deus animæ intimè coniungitur potest omnia hominis desideria satiare, præsertim quando fuerit consummata in patria, per lumen gloriæ, & claræ Dei visionem, quæ cuncta hominis desideria implet & satiat, vt in tractatu de bea-

beatitudine ostensum est .

Ad primam confirmationem , concessa maiore , nego minorem ; gratia enim sanctificans habet hanc similitudinem & conuenientiam analogam cum natura Dei , quatenus est infinita , quod sicut Deus , quatenus est infinitus , & excedit totum ordinem creatum & creabilem , habet suam essentiam pro obiecto connaturali , & forma intelligibili ; ita & gratia sanctificans vtrumque participat , vt supra ostensum est .

Ad secundam respondeo ex D. Thoma quolib. 2. artic. 3. quod aliquid dupliciter ab alio participari potest : primò sicut ratio communis & superior , quomodo animal participatur ab homine , vel ratio entis ab accidente ; secundò vt existens extra eius essentiam , sicut ignis à ferro candenti participatur , & lux solis ab aere . Quod primo modo ab alio participatur , potest de illo prædicari , sicut animal prædicatur de homine , & ens de accidente ; secus vero illud quod secundo tantum modo participatur ; ignis enim non prædicatur de ferro candenti , nec lux corporis illuminati potest dici esse ipsum corpus illuminans . Vnde cum gratia sanctificans sit participatio tantum accidentaliter naturæ diuinæ , & ista non comparetur ad illam , sicut ratio communis & superior ad inferiorem , ratio formalis entis infiniti , vel actus puri , non debet de illa prædicari , sed sufficit quod aliqua ratio analogicè communis naturæ diuinæ & gratiæ sanctificanti , nempe esse radicem intelligendi & amandi connaturaliter Deum vt est in se , de gratia prædicetur .

## CAPVT XII.

*Quibusdam Corollarijs magis explicatur natura & perfectio gratiæ sanctificantis.*

**E**X fundamentis cap. præcedenti statutis deduci possunt quædam corollaria, quibus natura & perfectio gratiæ sanctificantis; magis elucidabitur, & perfectius intelligetur.

## COROLLARIUM I.

*Repugnat dari plures species gratiæ sanctificantis, physicè, & essentialiter inter se diuersas.*

**H**Oc corollarium manifestè sequitur ex dictis capite præcedenti, nam gratia sanctificans ( vt ibi ostensum est ) est participatio formalis naturæ diuinæ, vt natura est: Sed natura Dei, sub conceptu naturæ, cum sit simplicissima, non potest nisi vno modo participari, nimirum per modum constitutiuum, & radicis diuinorum attributorum: Ergo gratia sanctificans in plures species essentialiter inter se diuersas multiplicari nequit.

Confirmatur & magis illustratur hæc ratio: Licet infinita Dei perfectio sit participabilis infinitis modis specie diuersis, quando non determinatur modus participationis, secus tamen quando talis modus determinatur: v. g. licet intellectus diuinus absolutè sit participabilis multis modis specie diuersis, & de facto participetur per lumen gloriæ, per visionem bea-

beatam, per fidem, per prophetiam, & per scientiam per se infusam; ille tamen sub ea ratione qua essentiam diuinam, clarè, & vt est in se, ac intuitiue respicit, non potest participari nisi vno modo, scilicet à lumine gloriæ, vt exercet rationem principij cognoscitiui, & à visione intuitiua, vt exercet rationem operationis, seu actualis cognitionis, quia tunc determinatur modus participationis. Ita pariter, licet id quod in Deo habet rationem essentiæ, sit multipliciter participabile à creaturis; si tamen illud sub conceptu & munere naturæ præcisè consideretur, seu vt est eminenti quodam modo radix diuinorum attributorum, non potest nisi vno modo participari, quia tunc modus participationis determinatur & limitatur.

Dixi repugnare dari plures species gratiæ sanctificantis, *physicè & essentialiter inter se diuersas*, quia possunt dari diuersæ gratiæ, distinctæ specie morali, & accidentali: v.g. gratia Christi morali specie differt à nostra, quia est principium meriti & satisfactionis infinitæ. Similiter gratiæ sacramentales differunt inter se specie accidentali, quia habent diuersas virtutes, & connotant diuersa auxilia, contra diuersa vulnera peccatorum. De quo in tractatu de sacramentis.

Dices: illæ formæ distinguuntur specie physica & essentiali, à quibus dimanant proprietates specie diuersæ: Sed à gratia Christi & Adami dimanant proprietates specie diuersæ ab illis quæ à gratia nostra profluunt; nam in Christo gratia est radix iustitiæ commutatiuæ, & in Adamo iustitiæ originalis, & doni inte-  
grita-



gritatis, non verò in nobis ; item gratia in nobis viatoribus producit fidem & spem, in comprehensoribus verò lumen gloriæ , & claram Dei visionem : Ergo illæ gratiæ specie physica & essentiali inter se differunt .

Respondeo quod licet formæ substantiales à quibus dimanant proprietates specie diuersæ, sint diuersæ speciei, non tamen formæ accidentales, qualis est gratia sanctificans. Cùm enim proprium sit formæ accidentalis perficere subiectum in quo recipitur , iuxta modum & exigentiam illius , pro diuersitate subiectorum diuersos producit effectus, interdum specie diuersos : v. gr. calor vt est in igne producit ignem ; vt est in animali , & quatenus est instrumentum potentiæ nutritiue, producit sanguinem & carnem ; vt est in femina producit lac , &c. Item influentiæ corporum cœlestium, pro diuersitate subiectorum , in quibus recipiuntur, varios operantur effectus ; nam in hortis produciunt flores, in vineis vuas , in oliuetis oliuas ; & *aqua cum vnus sit speciei, vario modo operatur, dealbens in lilio, rubricans in rosa, purpurissans in viola*, vt bellè ait Chrysostomus . Ita similiter gratia , licet vna & simplex qualitas , pro diuersa tamen subiectorum, in quibus recipitur, capacitate & exigentia, multiplices, & interdum specie diuersos , operatur effectus : Nam in nobis causat filiationem adoptiuam , sed non in Christo ; quia cùm Christus sit filius Dei naturalis , est incapax adoptionis : in nobis causat poenitentiam , in Christo verò iustitiam commutatiuam : in Adamo ante lapsum fuit radix iustitiæ originalis, & doni integritatis, post lapsum  
verò

verò in eo causauit virtutem poenitentiae : in nobis producit virtutes moderatrices passionum , sed non in Angelis , quia cum careant passionibus , non sunt capaces illarum : demum in statu viæ producit fidem & spem , in patria verò lumen gloriæ , & claram Dei visionem , nec non beatificam fruitionem .

## COROLLARIUM II.

*Gratia sanctificans est simpliciter perfectior charitate, lumine gloriæ, visione beatifica, & quocumque alio ente supernaturali ; licet visio beatifica in modo essendi illam excedat , & sit perfectior secundum quid .*

**P**rima pars huius corollarij patet ex supra dictis : cum enim entia supernaturalia sint participationes Dei , prout excedit totum ordinem creatum & creabilem , tantò aliquid debet æstimari perfectiùs , quantò maiorem Dei perfectionem exprimit & participat : Sed gratia sanctificans participat id quod maiorem exprimit perfectionem Dei : Ergo est simpliciter perfectior alijs entibus ordinis supernaturalis . Maior patet , Minor probatur . Gratia sanctificans , vt ostendimus , participat naturam diuinam , sub conceptu & munere naturæ ; lumen verò gloriæ participat de eminentia Dei , quatenus exercet præcisè munus virtutis intellectiue ; visio beata , quatenus exercet munus actualis intellectiōis ; charitas verò , & alijs habitus infusi , sunt participationes proprietatum & attributorum diuinorum : Quamuis autem omnia quæ sunt in Deo , sint abso-

absolutè æqualia in perfectione , quia vnumquodque est tota essendi plenitudo; non omnia tamen , ex vi propriæ lineæ , aut ex proprio munere , æqualem exprimunt perfectionem : Sed id quod ex vi propriæ lineæ , & sub proprio munere , maiorem exprimit perfectionem in Deo , est natura , siue constitutum , inquantum huiusmodi ; vtpote à quo cœtera , veluti à radice eminentissima , virtualiter derivantur : Ergo gratia sanctificans participat id quod maiorem in Deo perfectionem exprimit .


Secunda pars , quæ asserit visionem beatam in modo essendi esse perfectiorem secundum quid gratia sanctificante , etiam est manifesta , nam actus secundus , seu operatio , in modo essendi est nobilior habitu , quia non continet potentialitatem , quam includit habitus : Sed visio beata est actus secundus , gratia verò , sanctificans est habitus , vt §. i. ostendimus : Ergo visio beatifica in modo essendi est perfectior gratia sanctificante . Similiter lumen gloriæ secundum quid & accidentaliter est illa perfectius , quatenus necessario coniungitur actuali operationi , à qua gratia habitualis separari potest .

Dices : Cùm status patriæ sit simpliciter nobilior statu viæ , dona quæ pertinent ad statum patriæ sunt simpliciter nobiliora donis pertinentibus ad statum viæ : At lumen gloriæ & visio beatifica pertinent ad statum patriæ , gratia verò sanctificans ad statum viæ : Ergo lumen gloriæ & visio beatifica sunt simpliciter perfectiora gratia sanctificante .

Respondeo quædam esse dona supernaturalia

lia quæ pertinent ad statum patriæ tantum , vt lumen gloriæ , & visio beatifica ; quædam quæ pertinent ad statum viæ tantum , vt fides & spes ; & alia quæ pertinent ad statum viæ & patriæ simul , sicut gratia & charitas : Quamuis autem dona quæ sunt patriæ tantum , sint potiora donis viæ tantum , secus tamen est de donis viæ & patriæ simul ; imò hæc præstant omnibus alijs ; saltem quantum ad illud quod est omnium aliorum prima radix & fundamentum , scilicet gratiam sanctificantem. Vnde D. Thomas infra quæst. 113. art. 9. ait : *Donum gratiæ impium iustificantis , est maius quam donum gloriæ beatificantis .*

Ex his intelliges vnicum gradum gratiæ ; maioris esse pretij & valoris , magisque æstimandum , quam bona omnia naturalia totius vniuersi. Vnde Augustinus lib. 2. ad Bonifacium cap. 6. *Gratia non solum omnia sydera , & omnes cælos , sed etiam omnes Angelos supergreditur .* Et D. Thomas infra qu. 113. art. 9. ad 2. *Bonum gratiæ vnius maius est quam bonum naturæ totius vniuersi .* Quæ verba aurea ponderans Caietanus , in commentario illius articuli , hæc scribit : *Ante oculos tuos semper die nocteque tene , quod bonum gratiæ vnius est melius quam bonum naturæ totius vniuersi , vt continuè videas damnationem imminentem non æstimanti tantum bonum oblatum .*



## COROLLARIUM III.

*Gratia sanctificans per se ita peccatum expellit, ut repugnet utrumque in eodem subiecto sociari.*

**P**rima pars manifestè colligitur ex varijs Scripturæ & Sanctorum Patrum testimonijs, quæ impossibilitatem gratiæ cum peccato, saltem de lege ordinaria, apertè declarant. Dicitur enim 1. Ioan. 3. *Omnis qui natus est ex Deo, peccatum non facit, quia semen ipsius in eo manet, & non potest peccare, quoniam ex Deo natus est.* Quibus verbis significat, tandiu hominem nec peccare actu, nec peccato vlllo infici posse, quandiu semen illud diuinum, quod est gratia, qua spiritualiter renascitur, manet in eo. Item gratia in Scriptura vocatur lumen, peccatum verò tenebra, ut patet ex illo 1. Petri 2. *De tenebris nos vocauit in admirabile lumen suum,* id est de peccatis ad gratiam: Ergo sicut lux & tenebræ simul in eodem subiecto & eodem tempore esse nequeunt, ita nec gratia & peccatum. Vnde Apostolus 2. Corinth. 6. *Quæ participatio iustitiæ cum iniquitate, aut quæ societas lucis ad tenebras?* Item SS. Patres docent peccatum esse mortem animæ, vitæque spiritualis interitum, ut videre est apud Nazianzenum orat. 19. & apud Augustinum in Psalm. 9. & serm. 5. de verbis Domini, vbi sic ait: *Sicut anima est vita corporis, ita animæ vita est Deus* (vnitus ipsi per gratiam & charitatem.) *Sicut expirat corpus, cum animam emittit, ita expirat anima, cum Deum amittit.* Deus  
amis-

*amissus, mors animæ; anima emissæ, mors corporis.* Sicut ergo mors & vita simul esse nequeunt in eodem subiecto, & eodem tempore, ita nec gratia & peccatum saltem de lege & potentia Dei ordinaria.

Quod verò id repugnet, etiam de potentia Dei absoluta, probatur primò ex principijs in tractatu de peccatis statutis: ibi enim ostendimus ex D. Thoma, peccatum habituale consistere in priuatione gratiæ habitualis, cum respectu ad actum peccati præcedentem à quo causatur: Vnde cum ea quæ priuatiuè opponuntur, non possint simul esse in eodem subiecto, etiam de absoluta Dei potentia (aliàs forma & carentia eius possent simul stare in eodem subiecto; subindeque idem simul esse & non esse) repugnat peccatum habituale & gratiam sanctificantem, simul in eodem subiecto sociari. Idem cum proportionem dicendum de peccato actuali, cum istud causet peccatum habituale.

Probatur secundò hac ratione: Implicat contradictionem quod aliquis simul habeat plures vltimos fines totales; inter se non subordinatos, aliàs quilibet esse vltimus & non vltimus, vt in tractatu de beatitudine cap. 1. §. 3. ostensum est: Sed ille qui gratia & charitate præditus est, habet Deum pro vltimo fine totali; ille verò qui peccat mortaliter, vltimum finem in creatura constituit, vt in tractatu de peccatis cap. 10. §. 2. probatum est: Ergo implicat contradictionem quod aliquis in gratia & peccato simul existat.

Probatur tertio hoc discursu: Cum secundum Aduersarios gratia natura sua peccati

maculam detergat, si Deus vtendo sua absoluta potentia, impediret ne gratia sanctificans illam detergeret, talis effectus Deo vt authori vel conseruatori speciali tribueretur, subindeque Deus esset author specialis, vel conseruator peccati, quod infinitæ eius sanctitati repugnat. Sicut quia ignis ex natura sua expellit frigus ab aqua, si Deus miraculosè, & vtendo sua potentia absoluta, talem expulsionem impediret, conseruatio frigoris in ipsum vt authorem vel conseruatorem specialem reduceretur.

Demum eadem veritas hac ratione fundamentaliter suaderi potest: Effectus formales gratiæ sanctificantis, & peccati mortalis, sunt impossibiles, etiam de potentia Dei absoluta: Ergo & ipsæ formæ à quibus proueniunt. Consequentia patet, cum enim effectus formales nihil aliud sint quam ipsæmet formæ communicatæ subiecto, & significatæ in concreto, qua ratione inter se pugnant effectus formales, eadem quoque inter se pugnant formæ à quibus proueniunt. Antecedens verò sic ostenditur: Effectus formales gratiæ sanctificantis sunt reddere hominem diuinæ naturæ confor-tem, subindeque illum filium Dei adoptiuum constituere, facere illum obiectum congruum diuinæ dilectionis & amicitiae, illique ius tribuere ad æternam felicitatem: è contra verò effectus formales peccati mortalis, tam actualis, quam habitualis, sunt destruere in hominē participationem diuinæ naturæ, reddere illum Deo exosum & inimicum, priuare illum diuina filiatione, & per consequens iure ad æternam beatitudinem: Sed huiusmodi effectus

fectus nequeunt vlla potentia eidem subiecto conuenire simul, vt constat : Ergo nec effectus gratiæ sanctificantis, & peccati mortalis, siue actualis, siue habitualis.

Nec valet si dicas cum Suarez, effectus illos gratiæ habitualis non esse primarios, sed secundarios, subindeque ab illo per absolutam Dei potentiam separari posse; sicut risibilitas separabilis est à rationalitate, extensio localis à quantitate, & gaudium beatificum à clara Dei visione : Non valet, inquam, tum quia aliqui ex illis effectibus sunt primarij, vt reddere hominem consortem diuinæ naturæ, & filium Dei adoptiuum; tum etiam quia licet aliqui secundarij sint, omnes tamen in natura gratiæ sanctificantis sunt intimè radicati, sicut proprietates radicanur in essentia à qua dimanant : Vnde sicut habenti rationalitatem, potest quidem de absoluta potentia deesse risibilitas actualis, non tamen inesse hinnibilitas; ita homini habenti gratiam habitualem, possunt fortè, de potentia extraordinaria, deesse aliqui ex affectibus recensitis, repugnat tamen quod in eo sint effectus peccati, priuatimè, vel contrariè illis oppositi.

Obijcies primò: Peccatum mortale actuale non expellit gratiam physicè, sed tantùm moraliter & demeritoriè; quia scilicet facit vt peccator mereatur à Deo puniri amissione gratiæ, ipsaque priuari ac spoliari in pœnam illius : At Deus non tenetur pœnam infligere merenti, sed pro sua indulgentia potest eam condonare: Ergo etsi peccatum subtractionem gratiæ promereatur, diuinitus poterit cum gratia sanctificante in eodem subiecto sociari.



Respondeo negando Maiorem, peccatum enim mortale actuale, effectiuè simul & demeritoriè, subindeque physicè simul & moraliter, gratiam sanctificantem expellit ab anima. In eo etenim tria considerari possunt, nimirum ratio offensæ seu iniuriæ Deo illatæ, & sub hac ratione, demeritoriè tantùm & moraliter gratiam expellit: auersio à Deo & conuersio ad creaturam, & hæc gratiam physicè expellunt, non quidem proximè & immediatè, sed mediante conuersione habituali ad creaturam vt vltimum finem, quam peccatum actuale relinquit; hæc enim expellit charitatem, subindeque gratiam in qua radicitur. Tertiò potest considerari in peccato actuali id quod causat & relinquit in anima, scilicet macula, & hæc proximè & immediatè expellit gratiam, sicut priuatio formam. Nec est inconueniens quod vnum & idem, sub diuersa ratione, physicè & moraliter, effectiuè ac demeritoriè, aliquam formam expellat.

Dices, Esto peccatum actuale efficienter destruat gratiam, Deus tamen potest eius causalitatem, subindeque expulsionem gratiæ ab anima impedire: Ergo efficere potest vt in eodem subiecto gratia & peccatum simul existant.

Respondeo negando Antecedens, Deus enim illam solam causalitatem impedire potest, quæ ab ipso dependet & procedit; causalitas verò per quam peccatum actuale dicitur causa peccati habitualis, nec à Deo dependet, nec procedit; quia Deus neque peccati actualis neque habitualis, subindeque nec eorum causalitatis causa esse potest.

Obijcies secundò : Vnus actus non expellit necessariò habitum oppositum, sed potest cum ipso simul existere in eodem subiecto, vt patet in actu intemperantiæ, qui potest simul esse cum virtute temperantiæ, vel è contra vnus actus temperantiæ cum vitio intemperantiæ : Ergo vnus actus peccati non debet necessariò expellere gratiam, sed potest simul cum illa in eodem subiecto existere & sociari.

Respondeo primò, quod si hoc argumentum valeret, probaret non solùm de potentia absoluta, sed etiam de ordinaria, gratiam esse posse cum vno vel altero peccato mortali, quandoquidem absque miraculo habitus cum actu contrario esse potest.

Respondeo secundò, habitum cum actu contrario esse posse, quando ex illorum simultate non sequuntur prædicata contradictoria; secùs verò si ex eorum coexistentia prædicata contradictoria consequantur, vt ex simultanea peccati & gratiæ existentia contingere supra demonstratum est.

Tertiò dici potest, habitus quidem naturales & acquisitos, non expelli necessariò per vnicum actum, bene tamen habitus supernaturales & infusos, qualis est gratia sanctificans. Habitus enim acquisiti, à virtute sui obiecti pendent in fieri & conseruari; habitus verò infusi, quoad sui productionem & conseruationem, pendent ex actione Dei illos infundentis & conseruantis, sicut lux in suo fieri & conseruari pendet ex illuminatione solis. Vnde quemadmodum lumen statim cessaret in aere, si aliquod obstaculum poneretur illuminationi solis; ita posito vno solùm peccato

mortali in anima , statim deficit habitus gratiæ & charitatis, quia per quodlibet peccatum mortale ponitur obstaculum eius infusioni & conseruationi.

## COROLLARIUM IV.

*Gratia habitualis realiter distinguitur à charitate.*

**P**robatur primò : Gratia sanctificans habet se in ordine supernaturali , sicut forma substantialis in naturali : Ergo sicut hæc , ex communiori Philosophorum sensu, distinguitur realiter à proprietatibus & virtutibus actiuis, quarum est radix ; ita & illa à virtutibus supernaturalibus , quæ ab ipsa effluunt , sicut proprietates ab essentia , vt docet D. Thomas hic qu. 110. art. 4. ad 1. his verbis : *Sicut ab essentia animæ effluunt eius potentia, quæ sunt operum principia , ita etiam ab ipsa gratia effluunt virtutes in potentias animæ.* Consequentia patet, nam de rebus supernaturalibus, seruata proportione , ac dempta earum supernaturalitate, Philosophandum est sicut de naturalibus ; quia gratia , quantum fieri potest, attemperatur & accommodatur nature, vt passim docent Theologi ; vnde sicut in ordine naturali substantia non est immediatè operatiua, sed agit mediantibus suis potentijs , quæ sunt principium immediatum operandi , subindeque ab illis distinguitur ; ita & gratia habitualis , quæ in ordine supernaturali gerit vices substantiæ & naturæ .

Probatur secundò ratione D. Thomæ hic qu. 110.

qu. 110. art. 3. quæ potest sic proponi : Charitas præsupponit in anima gratiam habitualement : Ergo realiter ab illa distinguitur. Consequentia patet, Antecedens probatur. Charitas, cum sit virtus, disponit hominem conuenienter secundum naturam præexistentem, hoc enim est de ratione virtutis, vt docet Aristoteles 7. physic. cap. 17. Sed non disponit illum conuenienter ad naturam humanam, qua humana & rationalis est præcisè, hoc enim proprium est virtutum moralium & acquisitarum : Ergo conuenienter ad naturam humanam, vt eleuatam ad esse diuinum & supernaturale, per gratiam habitualement, subindeque illam in anima supponit .

Aliam rationem insinuat idem S. Doctor qu. 27. de verit. art. 2. his verbis : *Sicut in rebus naturalibus aliud est natura ipsa, quam inclinatio nature, & eius motus vel operatio; ita & in gratuitis est aliud gratia à charitate, & à cæteris virtutibus.* Quam rationem ibidem illustrat, obseruando quod in quolibet ordine rerum quatuor reperiuntur, nempe substantia seu natura rei, finis ipsius, inclinatio ad talem finem, & motus seu tendentia in illum : v. g. in lapide est propria natura, consistens in hoc quod sit corpus mixtum talis speciei; finis, qui non est alius quam quies in centro; grauitas, quæ est propensio seu inclinatio in ipsum; & descensus, qui est motus seu tendentia in illud. Similiter in ordine supernaturali hæc quatuor debent reperiri, unde in tali ordine gratia tenet locum substantiæ seu nature, visio beatifica habet rationem finis, charitas est inclinatio in illum, & mo-

tus eius sunt operationes elicite à charitate , vel ab illa imperata , quibus talis finis acquiritur .

Obijcies primò: In Scriptura ijdem effectus tribuuntur gratiæ & charitati , per vtramque enim dicimur iustificari , viuere vita diuina & supernaturali , filios Dei adoptiuos fieri , &c. Ergo non distinguuntur realiter, sed sunt vnus & idem habitus , qui secundum quod obit diuersa munia , diuersis nominibus insignitur .

Respondeo eosdem effectus gratiæ & charitati tribui , non quod sint vnus & idem habitus , sed quia sunt inseparabiliter inter se connexæ. Sicut Apostolus 1. ad Corinth. 3. effectus benignitatis , & patientiæ , & plurium aliarum virtutum , tribuit charitati, non quod sint vnus & idem habitus , sed quia inseparabiliter charitatem ipsam comitantur .

Obijcies secundò : Si gratia & charitas realiter distinguerentur , possent ab inuicem separari , saltem de potentia Dei absoluta : Sed hoc dici nequit : Ergo nec illud . Minor probatur : Si aliquis homo haberet gratiam sine charitate , esset Deo gratus & acceptus , imò & filius eius adoptiuus, & tamen non esset eius amicus , quod videtur absurdum . Item si alicui infunderetur charitas sine gratia sanctificante , ille nec damneretur , cum nullum haberet peccatum , quod cum charitate impossibile est ; nec saluaretur , quia cum non esset filius Dei adoptiuus , esset incapax hereditatis eius .

Respondeo data Maiori , negando Minorem , & ad primam illius probationem dico, quod ille cui infunderetur gratia sine charitate, es-

te, esset amicus Dei radicaliter & remotè, quia haberet gratiam, cui tanquam radici principium diligendi Deum deberetur. Ad secundam dico casum illum esse impossibilem, quia licet Deus de absoluta potentia, essentiam à suis proprietatibus separare possit, earum resultantiam impediendo, non potest tamen facere quod aliqua proprietas existat in aliquo subiecto sine essentia à qua dimanat, præsertim si talis proprietas sit vitalis: v.g. licet Deus possit creare animam rationalem sine intellectu & voluntate, non potest tamen intellectum & voluntatem sine anima rationali producere aut conservare; quia cum illæ potentie sint vitales, sine principio vitali in quo radican- tur subsistere nequeunt: Vnde cum charitas sit potentia vitalis ordinis supernaturalis, non potest existere sine gratia sanctificante, quæ est prima radix vitæ supernaturalis, & quæ in ordine supernaturali gerit vices naturæ seu substantiæ.

## COROLLARIUM V.

*Gratia habitualis subiektatur immediatè in anima, non autem in potentijs eius.*

**S**equitur manifestè ex supradictis: In primis enim quod perficit potentiam per se primò ad operationem ordinatam, est immediatè operativum: Sed gratia sanctificans non est immediatè operativa, ut corollario præcedenti ostendimus: Ergo non residet in potentijs animæ, sed in eius essentia.

Secundò, Dona supernaturalia, quæ sunt

participationes intellectus & voluntatis Dei, recipiuntur immediatè in intellectu & voluntate creata: Ergo illud quod est participatio naturæ diuinæ, vt natura est, debet in ipsa animæ essentia immediatè recipi.

Tertiò, cùm effectus formalis formæ nihil aliud sit quam ipsa forma, vt communicata subiecto, in eo subiecto residet immediatè forma, cui tribuit suum effectum formalem: Sed effectus formalis gratiæ sanctificantis, vt dare esse & vitam supernaturalem, seu esse principium radicale vitæ supernaturalis, per se primò conuenit animæ, & non potentijs eius. Item esse gratum per se primò respicit non operationes, vel potentias, sed subiectum; quia enim illud est gratum, operationes sunt gratæ & acceptæ, iuxta illud Genes. 4. *Respexit Dominus ad Abel, & ad munera eius*: Ergo & ipsa gratia immediatè inest ipsi animæ, non verò eius potentijs.

Demum, vt discurret D. Thomas hic qu. 110. art. 4. *Per gratiam regeneramur in filios Dei; Sed generatio per prius terminatur ad essentiam, quam ad potentias*: Ergo gratia per prius est in essentia animæ, quam in potentijs.

Dices, contraria debent habere idem subiectum à quo se expellant: Sed subiectum peccati quod contrariatur gratiæ, non est essentia animæ, sed eius potentiæ: Ergo gratia non residet in essentia animæ, sed in eius potentijs.

Respondeo negando minorem, licet enim subiectum peccati actualis sit potentia, subiectum tamen peccati habitualis, & maculæ, cui gratia opponitur, est essentia animæ, vt in tractatu de peccatis ostendimus.

## CAPVT XIII.

*De causa gratiæ habitualis, & actione p[er] quam producitur.*

**D**ico primò, nullam creaturam, quantumcumque perfectam, ne quidem Christum, in quantum hominem, esse posse causam principalem gratiæ sanctificantis.

Probatur primò: Per infusionem gratiæ sanctificantis datur Spiritus Sanctus, iuxta illud Apostoli ad Roman. 5. *Charitas Dei diffusa est in cordibus nostris per Spiritum Sanctum qui datus est nobis*: Sed nulla creatura, neque ipse Christus, in quantum homo, habet potestatem physicam & principalem, dandi Spiritum Sanctum. Ergo neque infundendi gratiam sanctificantem. Maior patet, minor probatur. Oportet donum esse quodammodo ipsius dantis, vel per identitatem, vel per originem, vel per possessionem, ut docet D. Thomas 1. p. qu. 37. art. 1. ad 1. Sed nullo istorum modorum potest Spiritus Sanctus esse Christi, in quantum hominis, multo minùs alicuius puræ creaturæ: Ergo nec Christus ut homo, nec aliqua creatura, potest dare principaliter Spiritum Sanctum, Vnde Augustinus 15. de Trinit. cap. 26. *Quomodo Deus non est qui dat Spiritum Sanctum?* Et D. Thomas 3. p. quæst. 8. art. 1. ad 1. *Dare gratiam, aut Spiritum Sanctum, conuenit Christo secundum quod Deus auctoritatiuè, sed instrumentaliter conuenit etiam ei, secundum quod est homo, in quantum scilicet eius humanitas instrumentum fuit diuinitatis eius.*

Pro-



Probatur secundò: Per gratiam habitualement adoptamur in filios Dei, vt capite sequenti ostendemus: Atqui nulla creatura, nec etiam Christus, inquantum homo, potest principaliter nos adoptare in filios Dei; Ergo neque nobis dare gratiam sanctificantem. Minor probatur: Ille solus potest adoptare in filium, qui connaturaliter habet ius ad hæreditatem: Sed nec Christus vt homo, neque vlla pura creatura, habet connaturaliter ius ad visionem beatam, quæ est hæreditas; cum visio beata nulli rei creatæ vel creabili possit esse connaturalis, vt in tractatu de visione beata probatum est: Ergo nulla creatura, nec etiam Christus, inquantum homo, potest principaliter adoptare in filios Dei. Vnde S. Thomas 4. contra Gent. cap. 17. *Adoptare in filios Dei non potest esse opus alterius nisi Dei.*

Probatur tertio: Producere gratiam habitualement in anima, est illam deificare, communicando illi physicum diuinæ naturæ consortium: Sed deificare est solius Dei, per modum causæ principalis, sicut ignire per modum causæ principalis, est solius ignis, vel alterius continentis eminenter naturam ignis, puta solis: Ergo solius Dei est, gratiam sanctificantem per modum causæ principalis producere.

Demum eadem veritas suaderi potest hac ratione D. Thomæ hic quæst. 112. art. 1. Causa principalis debet esse maioris, vel saltem æqualis perfectionis, cum sit effectu: Sed nulla creatura potest superare vel adæquare in perfectione gratiam sanctificantem; cum enim illa sit participatio formalis naturæ diuinæ,

animæ, quatenus infinita est, vt cap. 11. §. 2. ostensum est, superat in perfectione essentiali omnem naturam creatam & creabilem: Ergo nulla potest dari creatura, quæ sit causa principalis gratiæ sanctificantis.

Dico secundò, gratiam sanctificantem neque creari, neque concreari, sed de potentia obedientiali animæ educi.

Prima pars huius conclusionis probatur primò ex D. Thoma hic quæst. 113. art. 9. vbi quærit, an sit maius opus Dei, creatio mundi, quam iustificatio impij? Et sub distinctione respondet, quod ex parte modi operandi est maius opus creatio, quam iustificatio, cum illa sit ex nihilo, non verò ista; sed ex magnitudine rei quæ fit, maius opus est impij iustificatio, quam cœli & terræ creatio: Sed hæc differentia nulla esset, si gratia per creationem produceretur: Ergo iuxta D. Thomam gratia sanctificans non creatur.

Probatur secundò eadem pars ratione Caietani: Gratia quando desinit esse, non annihilatur: Ergo neque quando producitur, creatur. Antecedens est certum, tum quia annihilatio non interuenit de facto in operibus gratiæ, vt docet S. Thomas 1. p. quæst. 104. art. 4. tum etiam, quia gratia destruitur præcisè ex vi separationis eius à subiecto: separatio autem à subiecto, non est annihilatio, cum maneat subiectum. Consequentia verò probatur: Ex communi Philosophorum sententia, inceptio & desinitio rei alicuius, sibi correspondent, ita vt quod incipit per generationem, desinat per corruptionem; & quod desinit per corruptionem, incipiat per generationem.

tionem ; & similiter quod incipit per creationem , desinat per annihilationem , & è contra : Ergo si gratia non desinat per annihilationem , signum manifestum est , eam non produci per creationem .

Quod verò etiam non concreetur , facile potest ostendi : Illud dicitur concreari quod fit per eandem actionem qua subiectum creatur ; vnde intellectus & voluntas dicuntur fieri per concreationem , quia cum sint proprietates animæ rationalis, fiunt per eandem actionem per quam ipsa producit : Sed gratia sanctificans , cum non sit proprietas animæ , sed accidens ipsi indebitum , non fit per eandem actionem per quam anima producit , sed per diuersam : Ergo non potest dici concreari à Deo ad creationem subiecti .

Ex his probata manet tertia pars conclusionis , si enim gratia sanctificans nec creetur , nec concreetur , debet educi ex aliqua potentia subiecti in quo recipitur , cum inter creationem & educationem non detur medium ; creari enim est fieri è nihilo, siue ex non præsupposito subiecto ; educi verò è contra est non fieri ex nihilo , sed ex subiecto præsupposito : Atqui gratia sanctificans non potest educi de potentia naturali , aut violenta sui subiecti , scilicet animæ , cum non sit ei connaturalis , vel repugnans : Ergo de potentia obedientiali animæ educitur .

Obijcies primò contra primam conclusionem . Qui causat principaliter vltimam dispositionem ad aliquam formam , ipsam quoque formam principaliter producit : v.g. qui producit principaliter calorem ut ostio , inducit  
etiam

etiam principaliter formam ignis : Sed homo causat principaliter actus contritionis vel charitatis , qui sunt ultimæ dispositiones ad gratiam sanctificantem : Ergo est causa principalis illius .

Respondeo agens quod ultimam dispositionem ad aliquam formam principaliter producit , ipsam quoque formam principaliter causare , quando illa educitur de potentia naturali subiecti : secus verò , si de potentia obedientiali eius educatur ; quia potentia obedientialis soli Deo ita subditur , ut nullius creaturæ dominio subijci possit , gratia verò sanctificans de potentia obedientiali animæ educitur , ut in secunda conclusione ostensum est . Potest hoc explicari exemplo generationis hominis , homo enim producens , physicas ad introducendam animam rationalem dispositiones , non propterea animæ rationalis est causa præcipua , quia illa è sinu materiæ non educitur , sed à Deo creatur .

Obijcies secundò : Intellectus Beatorum concurrit principaliter & non solum instrumentaliter ad visionem beatificam , quamvis illa sit entitatiuè supernaturalis , & participatio formalis intellectiōis diuinæ , ut docuimus in tractatu de visione Dei : Ergo pariter homo potest esse causa principalis gratiæ sanctificantis , quamvis illa sit entitatiuè supernaturalis , & participatio formalis diuinæ naturæ .

Sed nego consequentiam & paritatem : Ratio verò discriminis est , quia licet visio beatifica sit operatio supernaturalis , omnesque vires naturæ creatæ & creabilis transcendat , sup-

ponit tamen in intellectu beatorum eam eliciente, lumen gloriæ, quod est eiusdem speciei & perfectionis cum illa: gratia verò sanctificans non potest supponere in suo subiecto aliquod principium supernaturale, sibi æquale in perfectione, à quo producat, cum sit perfectissima forma ordinis supernaturalis, quæ se habet ut radix aliarum.

Obijcies tertio contra secundam conclusionem: Scriptura varijs in locis videtur docere quod gratia habitualis creetur: David enim Psalm. 50. petens gratiam sibi à Deo donari, ait: *Cor mundum crea in me Deus*. Et ad Galatas 6. Iustus dicitur *nova creatura*. Item ad Ephes. 1. fideles dicuntur *creati in Christo Iesu*. Quæ loca non videntur posse explicari, nisi dicamus gratiam habitualemente creari.

Respondeo cum D. Thoma hic quæst. 110. artic. 2. ad 3. quod gratia in Scripturis sacris dicitur creari, non quod secundum suum esse naturale & physicum producat ex nihilo, quod importat vera creatio; sed quia infunditur à Deo nullis nostris meritis præcedentibus, quod habet quandam similitudinem creationis, & creatio moralis appellari potest.

Obijcies quarto: Actio per quam produciatur gratia sanctificans, debet esse omnium præstantissima, cum talis qualitas in nobilitate & perfectione, quamcumque rem creatam & creabilem excedat, ut constat ex dictis capite præcedenti: Sed creatio multò nobilior est educatione: Ergo gratia sanctificans non educitur, sed creatur.

Respondeo actionem per quam Deus producit gratiam sanctificantem debere quidem  
esse

esse præstantissimam, sed accommodatam conditioni eius: creationem verò non esse productionem, quæ sit accommodata conditioni & naturæ gratiæ sanctificantis, sed solùm educationem; nam cum illa sit accidens, atque adeò non sit naturaliter per se subsistens, dependet in esse & fieri à suo subiecto, & consequenter ex potentia eius, non quidem naturali, sed obedientiali, educitur, si connaturaliter producat. Vnde præstantia productionis eius supra productiones aliarum formarum, ipsi inferiorum, per hoc sufficienter saluatur, quod nulla sit creatura, in cuius virtute actiua principaliter concurrente, vel in cuius potentia passiva naturali præcontineatur.

Obijcies vltimò: Gratia sanctificans quæ fuit collata Angelis & primis parentibus, in ipso creationis momento, non potuit fieri per educationem: Ergo illa saltem fuit creata, vel concreata. Consequentia patet, nam, vt supra dicebamus, inter creationem & educationem non datur medium. Antecedens verò sic ostenditur: Vt aliqua forma educatur de subiecto, requiritur vt fiat per actionem transmutatiuam illius: Sed gratia sanctificans, quæ Angelis & primis parentibus, in momento creationis collata fuit, non potuit fieri per actionem transmutatiuam subiecti: Ergo nec ab illo educi Maior docetur communiter à nostris Thomistis in Philosophia, minor autem videtur manifesta: Ad transmutationem enim subiecti requiritur quod illud præcedat formam prioritate temporis, vel saltem instantis, & in tali priori sub eius priuatione existat: Atqui subiectum gratiæ Angelorum & pri-

mo-

primorum parentum, non præcessit in aliquo instanti priuatum huiusmodi forma, cum illam in primo creationis momento receperint, iuxta illud Augustini: *Erat Deus in Angelis, condens naturam, & largiens gratiam*: Ergo talis gratia per actionem subiecti transmutatiuam facta non est.

Respondeo negando Antecedens, & ad illius probationem, concedo maiorem, & nego minorem, ad cuius probationem dico, quod licet ad actualem subiecti transmutationem requiratur quod illud præcesserit in aliquo instanti, seu priori in quo, priuatum forma quam recipit; ut tamen actio productiua formæ sit quantum est ex se transmutatiua subiecti, sufficit quod sit distincta ab ea qua subiectum producit, & non habeat inuiolabilem nexum cum illa, ut docent nostri Thomistæ in physica, cum agunt de educatione formarum: actio autem qua gratia Angelis & primis parentibus collata fuit, habuit duas illas condiciones, fuit enim distincta ab ea qua Angeli & primi parentes à Deo producti sunt, & cum ea non habuit inuiolabilem nexum, cum gratia sanctificans à substantia Angelorum & primorum parentum, per modum proprietatis non dimanauerit; unde fuit producta per actionem transmutatiuam subiecti, quamuis per accidens illud actu & de facto non transmutauerit, quia per accidens in eodem momento quo illud conditum est, gratia producta fuit, & sic non præcessit in aliquo instanti sub priuatione illius.

## CAPVT XIV.

*De primo effectu gratiæ habitualis, nimirum  
adoptione hominis in filium Dei.*

**T** Res sunt præcipui gratiæ habitualis effectus, de quibus in hoc capite, & duobus sequentibus agendum est, nempe adoptio hominis in filium Dei iustificatio peccatoris, & meritum iusti.

Circa primum supponendum est vt certum, & indubitata fide tenendum, Deum homines in filios adoptare: dicitur enim 1. Ioan. 3. *Videte qualem charitatem dedit nobis Pater, vt filij Dei nominemur, & simus.* Ad Roman. 8. *Ipse spiritus testimonium reddit spiritui nostro quod filij Dei sumus.* Vnde Chrysologus serm. 10. *Audiuimus fratres quò nos tulit diuina dignatio, quò paternitas extulit nos superna: credamus nos Dei filios, respondeamus generi, viuamus cælo, patrem similitudine referamus, ne perdamus vitijs quod sumus per gratiam consecuti.* Et serm. 70. *Quid mirum si Christus homines, Dei consecrauit in filios, quando se hominis dedit & aptauit in filium? Carnis tunc naturam transtulit in diuinam, deitatem quando humanam detulit ad naturam; tunc hominem sibi in cælestibus præstitit coheredem, quando se participem reddidit terrenorum.* Similia habet Chrysostomus homil. 2. in Matthæum, vbi sic ait: *Cum audieris quia filius Dei filius sit David & Abrahæ, dubitare iam desine, quod & tu, qui filius es Adæ, futurus sis filius Dei. Non enim ita se humiliasset, nisi nos*



nisi nos esses exaltaturus. Natus est enim secundum carnem, ut tu nascerere spiritu; natus est ex muliere, ut tu desineres filius esse mulieris.

Ratio enim suffragatur: Adoptio enim est gratuita assumptio personæ extraneæ ad alterius hæreditatem: Sed Deus gratuito & liberaliter creaturam rationalem assumit seu eleuat ad beatitudinem, in qua Dei hæreditas consistit, & ad quam ex sua natura nullum habet ius, subindeque ad eam ut persona extranea comparatur: Ergo Deus homines adoptat in filios.

Solum ergo difficultas est & controuersia inter Theologos, quænam sit forma quæ hominem filium Dei adoptiuum constituit, seu quæ filiationem Dei adoptiuam fundat? Aliqui enim existimant, diuinitatem Spiritus Sancti extrinsecè nobis vnitam seu assistentem, esse formam quæ dat formaliter esse filium Dei adoptiuum, concurrente gratia sanctificante solum ut vinculo. Ita Lessius lib. de summo bono cap. 2. Alij cum Aureolo docent, charitatem habitualement esse formam quæ talem effectum præstat. Alij demum, cum Scoto & Durando, dicunt gratiam habitualement constitutere quidem hominem filium Dei adoptiuum; id tamen non habere ratione suæ entitatis & perfectionis, sed ex lege & pacto Dei, quo qualitatem illam supernaturalem, de se ad talem effectum insufficientem & improporcionatam, deputauit ac destinauit ad illum præstandum, & per talem deputationem, valorem ei sufficientem contulit; sicut moneta, regio sigillo signata, certum valorem

lorem & æstimationem habet , quam ex se non obtinebat .

## §. I.

*Forma constituens hominem filium Dei adoptivum , neque est diuinitas Spiritus Sancti , nobis extrinsecè vnita seu assistens , neque habitus charitatis , sed gratia habitualis , adquatè , nulloque favore extrinsecò expectato .*

**P**rima pars huius assertionis duplici ratione suaderetur. Prima est: Illa forma constituit hominem filium Dei adoptivum, quæ terminat spirituales hominis generationem : Sed diuinitas Spiritus Sancti, nobis extrinsecè vnita & assistens, non est forma terminans spirituales hominis generationem , seu qua homo regeneratur in filium Dei : Ergo illa non est forma per quam homo filius Dei adoptivus constituitur. Maior patet, quia de filiatione adoptiva philosophandum est sicut de naturali, proportionem seruata : in naturalibus autem illud quod terminat formaliter generationem, causat seu fundat filiationem naturalem . Minor verò sic ostenditur : Forma terminans spirituales generationem est qua terminus genitus spiritualiter viuít , sicut forma dans vitam formaliter termino naturalis generationis , illam formaliter terminat : Sed diuinitas Spiritus Sancti nobis extrinsecè vnita, seu assistens , non est principium quo viuendi spiritualiter : Ergo nec formalis terminus spiritualis generationis . Maior est euidentis , minor

non verò ostenditur ex D. Thoma 2. 2. quæst. 23. art. 2. ad 2. vbi sic ait : *Deus est vita effectiue & anima per charitatem, & corporis per animam ; sed formaliter charitas est vita anima, & sicut & anima corporis : Ergo ex D. Thoma diuinitas Spiritus Sancti nobis extrinsecè vnita, seu assistens, non est principium quo formale viuendi spiritualiter. Ratio etiam id suadet, nam forma quæ est principium formale quo viuendi, debet per identitatem, vel per physicam informationem, accipienti vitam vniri : At diuinitas Spiritus Sancti nullo ex his modis nobis vniri potest, cum vterque modus vnionis imperfectionem importet : Ergo nequit esse principium quo formale viuendi spiritualiter.*

Secunda ratio sic potest proponi : Eadem est forma qua homo iustificatur, & qua filius Dei adoptiuus constituitur, cum iuxta Tridentinum sess. 6. cap. 4. nostra iustificatio sit *translatio ab eo statu in quo homo nascitur filius primi Adæ, in statum gratiæ & adoptionis filiorum Dei* : At forma qua homo iustificatur, non est purè extrinseca, seu assistens, sed intrinseca & inhærens, vt capite sequenti ostendemus, & expressè definit idem Concilium, eadem sessione, can. ix. his verbis : *Si quis dixerit homines iustificari sola imputatione iustitiæ Christi, exclusa gratia & charitate, quæ in cordibus eorum per Spiritum Sanctum diffundatur, atque illis inhæreat, anathema sit* : Ergo forma qua homo filius Dei adoptiuus constituitur, non est purè extrinseca, nec per consequens diuinitas Spiritus Sancti nobis extrinsecè vnita, seu assistens, sed forma intrinsecè inhæ-

inhærens, nimirum ipsa gratia habitualis, quæ in anima residet, & per Spiritum Sanctum in cordibus nostris diffunditur. Vnde sententia Lessij minùs videtur consona menti ac doctrinæ Tridentini.

Secunda pars assertionis, quæ dicit habitum charitatis non esse formam quæ filium Dei adoptivum constituit, sed gratiam habituales, probatur eadem ratione qua præcedens. Illa forma tribuit formaliter esse filium Dei adoptivum, quæ formaliter terminat spirituales hominis generationem: At forma terminans formaliter spirituales hominis generationem, non est habitus charitatis, sed ipsa gratia habitualis: Ergo nec illa filium Dei adoptivum constituit. Maior patet ex similitudine seu analogia quæ reperitur inter generationem spirituales & naturalem. Minor verò sic ostenditur. Licet homo genitus naturali generatione, recipiat simul cum natura proprietates, tamen non terminat formaliter naturalem generationem per proprietates, sed per naturam humanam, quæ est radix illarum: Ergo similiter licet iustus, genitus à Deo spirituali generatione, naturam supernaturalem, & illius proprietates recipiat, non terminat tamen spirituales generationem formaliter, ratione proprietatum, sed ratione naturæ ordinis supernaturalis: At gratia habitualis est in ordine supernaturali natura, charitas verò est illius proprietas, ut supra ostensum est: Ergo homo non terminat spirituales generationem, ratione habitus charitatis, sed ratione gratiæ habitualis, quæ est radix illius.

Confirmatur primò : Terminus formalis generationis spiritualis est ille quo genitus vivit spiritualiter radicaliter , seu qui est radix vitæ spiritualis : Sicut terminus formalis generationis naturalis est ille quo genitus vivit naturaliter radicaliter , seu qui est radix vitæ naturalis : Sed gratia habitualis dat vitam radicaliter in ordine spirituali seu supernaturali , non verò habitus charitatis , ut patet : Ergo gratia sanctificans , non verò charitatis habitus , est terminus formalis generationis spiritualis .

Confirmatur secundò : Terminus formalis spiritualis generationis est ille ratione cuius homo fit particeps diuinæ naturæ , Deoque assimilatur , non in aliquo attributo , sed in natura diuina : At homo non fit particeps formaliter naturæ diuinæ , nec Deo assimilatur in natura , per habitum charitatis , sed per gratiam habitualement ; cum sola gratia habitualis sit participatio diuinæ naturæ , sub conceptu naturæ , habitus verò charitatis sit participatio diuinæ voluntatis , quæ est illius attributum : Ergo idem quod prius .

Ex dictis probata manet tertia pars assertionis , sicut enim homo accipiens naturam generantis secundum convenientiam univocam , ex vi huius acceptionis , absque alio superaddito , constituitur filius naturalis ; ita ex vi acceptionis naturæ diuinæ secundum convenientiam analogam , absque indigentia alicuius superadditi , constituitur filius Dei adoptivus : Sed gratia habitualis , ratione intrinsecè entitatis , est participatio naturæ diuinæ , secundum convenientiam analogam , subin-

deque

deque illam accipiens est similis Deo analogice in natura sub conceptu naturæ : Ergo ex vi acceptionis illius , absque vlllo favore extincto , homo constituitur spiritualiter genitus , & filius Dei adoptiuus .

## §. II.

*Soluantur obiectiones .*

**O** Bjicies primò contrà primam partem assertionis : Forma qua iustus vivit in ordine supernaturali & diuino , est quæ præstat formaliter esse filium Dei adoptiuum : Sed diuinitas Spiritus Sancti , vt iusto vnita per gratiam , est forma qua vivit in ordine supernaturali & diuino : Ergo & quæ præstat formaliter esse filium Dei adoptiuum . Maior constat ex supra dictis ; minor verò suadetur , tum varijs scripturæ testimonijs , quibus Spiritus Sanctus iustos viuificare dicitur : Ioan. 6. *Spiritus est qui viuificat*. Ad Ga'at. 5. *Si spiritu vivimus , spiritu & ambulemus*. Tum quia diuinitas Spiritus Sancti est vita quædam per essentiam , subindeque de se sufficiens ad omnia viuificanda . Vnde D. Thomas 4. contra Gent. cap. 20. observat quod Spiritus Domini initio mundi dicitur ferri super aquas , non quasi ipse moveatur , sed quia primum est motionis & vitæ principium . Et Ecclesia in symbolo Concilij Nisîeni proficitur te credere in *Spiritum Sanctum , dominum , & viuificantem*. Hinc etiam egregie observat Cornelius Muslus lib. 3. de diuina hystoria , omnia spiritu viuificari : *Valent* ( inquit ) *Thysci in*

animalibus suos spiritus: anhelitum in primis, tum corpuscula illa, in corde, in hepate, in cerebro formata; spiritus videlicet naturales, vitales, & animales. Sunt & ipsi Grammaticis spiritus, quos quidem accentus dicimus, ob id quod syllabis accinant, veluti earum tenores & toni. Sanè ut litteræ vocales dictionum, sic litterarum vocalium ipsi accentus, videntur esse animæ quædam, quod eorum sono acuto, vel gra i, voces ipsæ formentur, quasi viuant, vigeant, spirent, & loquantur. Hinc perro ad musicam derivatio fit spirituum, intentiones & inflexiones, inclinationes, & elevationes in tonis & cantibus, spiritus sunt, quibus animata musica tantam vim habet, ut possit amorem excitare, infundere gaudium, & timores pellere.

Respondeo, concessa maiori, negando minorem, iustus enim viuit quidem spiritu Dei, & eius diuinitate, ut causa efficiente, & mouente ad actus vitales ordinis supernaturalis, non verò ut forma & principio radicali vitæ supernaturalis; quia, ut supra dicebamus, forma quæ est principium quo radicale viuendi, debet per identitatem, aut per physicam informationem, accipienti vitam vniri, quorum neutrum Spiritui Sancto competere potest, cum vterque modus vnionis imperfectionem importet. Et in hoc sensu intelligenda sunt prædicta scripturæ testimonia, quibus asseritur, Spiritum Sanctum iustos viuificare, vel iustos viuere Spiritu Sancto; hæc enim in sensu causali non formali accipienda sunt, ut docet D. Thomas 2. 2. qu. 23. art. 2. ad 2. explicans verba illa Deuteron, 30. *Ipse est vita tua,*  
ait

ait enim quod *Deus est vita effectiue, sed formaliter charitas est vita animæ sicut anima corporis.*

Obijcies secundò : Filius constituitur per communicationem eiusdem naturæ quæ est in patre: Sed iusti non possunt constitui filij Dei adoptiui per communicationem eiusdem specie naturæ quæ est in Deo, cum natura diuina sit immultiplicabilis numero : Ergo constituuntur filij Dei adoptiui, per communicationem eiusdem numero naturæ, subindeque per ipsam diuinitatem, eis unitam per gratiam.

Respondeo ad filiationem naturalem requiri communicationem naturæ secundum conuenientiam specificam, sed ad filiationem adoptiuam sufficere communicationem naturæ secundum conuenientiam analogam : & hanc conuenire gratiæ sanctificantis; cum enim illa sit naturæ diuinæ formalis participatio, debet cum illa saltem analogicè conuenire, vt constat ex supra dictis.

Obijcies tertio contra secundam partem assertionis illud 1. Ioan. 3. *Videte qualem charitatem dedit nobis Pater, vt filij Dei nominemur, & simus*, quo significari videtur, charitatem esse formam, qua filij Dei constitui-mur. Sed facile respondetur, aliqua quæ sunt effectus gratiæ sanctificantis, attribui etiam charitati, ratione mutux connexionis quam habent inter se, sicque filiationem Dei adoptiuam attribui charitati concomitanter & secundariò, quia illa est proprietas, quæ à gratia dimanat, & inseparabiliter ipsi coniungitur.

Obijcies quartò contra tertiam partem as-



sertionis : Vt gratia habitualis habeat ius ad vitam æternam , vt mercedem seu coronam , exigitur pactum vel promissio Dei , siue ordinatio eius extrinseca , vt docent Theologi in tractatu de merito : Ergo pariter vt illa habeat ius ad vitam æternam , vt hæreditatem , requiritur pactum & ordinatio gratiæ habituali superaddita , subindeque illa , secluso omni favore extrinseco , non potest filiationem adoptiuam causare , cum ad illam requiratur ius ad hæreditatem Dei , quæ est vita æterna.

Respondeo primò , antecedens negari à pluribus Theologis , existimantibus ordinationem Dei extrinsecam , in pacto vel promissione consistentem , non esse necessariam ad completam rationem meriti , sed sufficere ordinationem Dei intrinsecam , quæ includitur in voluntate dandi gratiam vt principium merendi .

Respondeo secundò , dato Antecedenti , negando consequentiam & paritatem . Ratio autem discriminis est , quia ius meritorium quod in operibus iustorum , gratia & charitate informatis inuenitur , vel est fidelitatis , vel iustitiæ , vel gratitudinis : primum absque promissione stare non potest , secundum verò & tertium nequeunt in pura creatura , absque pacto Dei , operum dignitati superaddito , subsistere ; quia cum opera iustorum sint Deo varijs titulis debita , ex vi propria , & intrinseco valore , non possunt Deum ex stricta iustitia obligare ad illa remuneranda : ius autem fundatum in gratia sanctificante respectu gloriæ vt hæreditatis , cum non sit meritorium , sed solius connaturalitatis , ipsi competit absque interuentu promissionis , vel ordinationis diuinæ ;

uinæ ; sicut Deus iure connaturalitatis tenetur Angelo infundere species, illius creatione supposita ; concurrere ad motum cœli, supposita illius existentia ; & effluxum seu resultantiam passionum non impedire , supposito quod naturas producat .

## §. III.

*Tria corollaria notatu digna .*

**E**X dictis colligitur primò, adoptare creaturam rationalem in filium, non esse proprium alicui ex personis diuinis , sed commune toti Trinitati , ut docet D. Thomas 2. p. qu. 23. artic. 2. Nam Deus adoptat creaturam rationalem in filium, quatenus infundit gratiam spiritualiter generatiuam : Sed actio infusiva gratiæ , cum sit operatio libera , & ad extra, est communis toti Trinitati : Ergo & adoptio creaturæ rationalis .

Observat tamen idem S. Doctor ibidem in resp. ad 3. quod quia filiatio adoptiua est quædam similitudo filiationis naturalis , per appropriationem Filio ut exemplari tribuitur ; & quia in humanis solius patris est adoptare , diuina adoptio Patri æterno ut auctori appropriatur ; item quia eadem adoptio fit per gratiam , quæ est opus amoris diuini , appropriatimè tribuitur Spiritui Sancto , ut infundenti gratiam , per quam adoptamur , & assimilamur Deo . Vnde ad Roman. 8. dicitur : *Acceptistis spiritum adoptionis , in quo clamamus Abba pater .*

Colligitur secundò , Patres veteris testa-

menti, in gratia & charitate existentes, verè fuisse filios Dei adoptiuos; quamuis non fuerint in statu filiorum.

Prima pars patet, nam veteres Patres in charitate existentes, verè fuerunt iustificati, iustificatione eiusdem rationis cum nostra: At iustificatio, ex Tridentino supra citato, est translatio ab eo statu in quo homo nascitur filius primi Adæ, in statum gratiæ & adoptionis filiorum: Ergo Patres antiqui, per gratiam iustificati, verè fuerunt filij Dei adoptiui.

Secunda verò ex eo constat, quod Patres veteris testamenti ducebantur spiritu timoris, unde in sacris litteris appellantur serui, & spiritum seruitutis habere dicuntur, vt patet ad Galat. 4. & ad Roman. 8. & alibi sæpe; item illis non patebat aditus ad hæreditatem cœlestem, sicut iustis nouæ legis. Quare tres gradus filiationis adoptiux distingi possunt: primus & imperfectissimus est iustorum ad veterem legem pertinentium; secundus est iustorum ad legem pertinentium; secundus est iustorum ad legem nouam spectantium; tertius & omnium perfectissimus, est beatorum videntium Deum, qui non solum habent ius ad Dei hæreditatem, sed etiam illam actu possident, Deoque per visionem beatificam perfectè assimilantur. De hac adoptione loquitur Apostolus ad Roman. 8. cum ait: *Nos ipsi primitias spiritus habentes intra nos gemimus, adoptionem filiorum Dei expectantes*, id est filiationem gloriæ, quæ excedit statum adoptionis viæ; sicut status adoptionis iustorum nouæ legis, præstantior est statu adoptionis Patrum veteris testamenti. Vnde sicut, ob hunc ex-  
cess,

cessum, Apostolus ad Galat. 4. statum antiquæ legis comparat paruulo, sub actoribus & tutoribus constituto; ita 1. ad Corinth. 13. loquens de statu præsentis vitæ, comparatiuè ad statum gloriæ, eadem similitudine vtitur, dicens: *Cum essem paruulus* &c. Sicut enim status veteris legis propter imperfectam cognitionem, est sicut paruulus, in comparatione ad statum gratiæ & veritatis, quæ per Christum facta est: sic status præsentis vitæ, in qua videmus per speculum & in ænigmate, est sicut paruulus, comparatiuè ad statum vitæ futuræ, in qua est perfecta cognitio Dei.

Colligitur tertio ex principijs supra statutis, implicare contradictionem, quod aliquis sit filius Dei adoptiuus, sine gratia habituali. Nam ad filiationem adoptiuam Dei, essentialiter exigitur conuenientia saltem analoga cum Deo in natura, sub conceptu naturæ, ut constat ex supradictis: At implicat contradictionem creaturam conuenire analogicè cum Deo in natura, sub conceptu naturæ sine gratia habituali, cum essentia gratiæ habitualis, consistat in hoc quod est esse participationem formalem naturæ Dei, sub conceptu naturæ, ut cap. 11. §. 2. ostensum est: Ergo implicat contradictionem, quod aliquis sit filius adoptiuus sine gratia habituali.

Confirmatur: Implicat hominem esse filium Dei adoptiuum, nisi sit spiritualiter à Deo genitus, cum filiatio adoptiua in spirituali generatione fundetur, sicut naturalis in naturali: Sed repugnat illum esse spiritualiter genitum à Deo, sine gratia habituali: Ergo implicat sine illa esse filium Dei adoptiuum. Maior

patet, minor probatur: esse genitum spiritualiter est procedere vivens vita spirituali à Deo vivente, in similitudinem naturæ, ad quod necessarium est vivere radicaliter vita spirituali & divina: Sed implicat vivere vita spirituali & divina radicaliter, sine gratia habituali: cum illa sit radix operationum vitalium ordinis supernaturalis, nempe actus charitatis, & visionis intuitivæ Dei, aliorumque actuum supernaturalium: Ergo implicat hominem esse spiritualiter genitum à Deo sine gratia habituali.

Dices: Potest Deus, de sua potentia absoluta, velle homini efficaciter gloriam, absque voluntate efficaci conferendi gratiam habitua-lem, cum gloria non habeat essentialem dependentiam ab illa: Sed homo in tali casu esset filius adoptivus Dei: Ergo possibilis est de potentia absoluta filiatio adoptiva Dei, sine gratia habituali. Major confiat, Minor probatur. Adoptio à Theologis & Juris peritis definitur, *gratuita & liberalis assumptio personæ extraneæ ad hereditatem*: Sed in casu posito, voluntas illa Dei esset gratuita & liberalis, ut constat, & homo ordinatus ad gloriam, esset persona extranea respectu hereditatis Dei ad quam ordinaretur: Ergo haberet quidquid requiritur ad rationem filij adoptivi.

Confirmatur: Deus posset talem hominem cui gratiam habitua-lem denegaret, non solum ordinare ad gloriam, sed etiam illum de facto beatificare, cum visio beatifica non dependeat essentialiter à gratia habituali: Ergo posset illum adoptare in filium sine gratia habituali. Consequentia videtur manifesta, nam si for-

ma præbens ius ad diuinam hæreditatem , filium Dei constituit , à fortiori ipsius hæreditatis diuinæ possessio , quæ est ipsa visio beatifica , constituere poterit filium Dei adoptiuum .

Ad obiectionem respondeo , data Maiori negando Minorem , & ad illius probationem dico , quod quando adoptio definitur , *gratuita & liberalis assumptio personæ extraneæ ad hæreditatem* , hoc debet intelligi de assumptione communicante affectiuè naturam , non verò de simplici assumptione ordinante ad hæreditatem , vt constat in humanis & ciuilibus ; nam potest vnus homo promittere alteri hæreditatem , absque eo quod ipsum adoptet in filium ; cum ergo in ca su posito voluntas Dei ordinans hominem ad gloriam , non communicaret effectiuè , nec affectiuè naturam diuinam participatiuè , hoc est gratiam habitua-lem sed è contra haberet voluntatem efficacem eam non communicandi , tali volitioni non conueniret definitio adoptionis , nec homini sic ordinato , vera ratio filij adoptiui . Vnde ad confirmationem , concessio Antecedente , nego consequentiam ; sicut enim in ciuilibus filiationem adoptiuam non præstat ipsius hæreditatis possessio , aliàs omnes hæredes essent filij adoptiui , sed forma quæ præbet ius ad hæreditatem , nimirum communicatio affectiua naturæ : ita & in supernaturalibus , diuinæ hæreditatis possessio , quæ habetur per visionem beatificam , non constituit filiationem Dei adoptiuam , sed ipsa gratia sanctificans , quæ sola , cum sit participatio naturæ diuinæ , potest esse terminus formalis spiritualis generationis , quæ est fundamentum filia-

tionis adoptiux, vt supra declarauimus.


Instabis: Ad adoptionem humanam & civilem sufficit voluntas inefficax & conditionata communicandi naturam adoptato: Ergo & ad adoptionem diuinam & supernaturalem. Vnde licet Deus in casu posito non haberet voluntatem absolutam & efficacem conferendi tali homini gratiam sanctificantem, ille tamen filius eius adoptiuus esse posset.

Respondeo, concessio Antecedente, negando consequentiam & paritatem: Ratio autem discriminis est, quia in adoptione humana supponitur in persona adoptanda natura eiusdem speciei, & proportionata cum hereditate adoptantis, subindeque facultas ad talem hereditatem in adoptione diuina. Vnde D. Thomas 3. p. qu. 23. art. 1. sic ait: *Hoc autem plus habet adoptatio diuina quam humana, quia Deus hominem quem adoptat, idoneum facit per gratia munus ad hereditatem cælestem percipiendam; homo autem non facit idoneum eum quem adoptat, sed potius eum iam idoneum eligit adoptando.*

Celebrem hanc questionem, & caput istud concludam, hac pia Catechismi Romani tractatu de oratione, consideratione seu reflexione: Cogita (inquit) *quem in locum te summa Dei benignitas extulerit, qui non ut seruum ad dominum adire inuitum ac timidum, sed ut ad patrem filium voluntarium, securumque confugere iusserit. Qua in memoria & cogitatione, quo vicissim studio & pietate, tibi orandum sit considera. Danda enim est tibi opera, ut ut talem prabeas, qualem esse decet Dei filium, ad est ut oratio, & actiones tue non indignæ sint*

*sint diuini genere, quo te dignari voluit beneficentissimus Deus.*

Addo verba ista Chrysos. serm. 71. Si te iam filium Dei credis, iuxta prophetam, expecta Dominum, viriliter age & confortetur cor tuum ut hereditatem Dei de expectationis fide & virtute patientiæ consequaris. Quod si gloria dilata te affligit ne tedio afficiaris, ne longæ expectationis fatigatione succumbas crede creditori tuo, qui tibi credidit debitori. Æternæ gloriæ pignus habes, ipsum ne proicias & res tibi oppignorata succedet. Laborans messor quod in semine non videt (ait idem os aureum serm. 40.) videbit in messu & quod in sulco deflet, gaudebit in fructu.



## C A P V T X V I.

*De iustificatione peccatoris, quæ est secundus gratiæ habitualis effectus.*

**P** Rinsquam difficultates scholasticas proponamus & resoluamus, breuiter confutandi sunt duo præcipui Lutheranorum & Calvinistarum errores circa iustificationem peccatoris. Primus asserit, in iustificatione verè & propriè peccata non remitti, aut deleri, sed duntaxat radi, vel tegi per iustitiam Christi, nobis imputatam; eo ferè modo quod vulnera & vlcera alicuius, possunt tegi vel occultari sub veste alterius. Hic error proscribitur à Tridentino sess. 5. can. 5. eiusque falsitas constat ex varijs Scripturæ testimonijs, quibus pec-



peccata tolli, deleri, remitti, ipsique peccatores mundari, abluī, lauari, ac dealbari dicuntur: Ioan. 1. *Ecce qui tollit peccatum mundi.* Psal. 50. *Dele iniquitatem meam.* Psalm. 31. *Beati quorum remissæ sunt iniquitates.* 1. Corinth. 6. *Abluti estis, sanctificati estis, iustificati estis.* Isaïæ 1. *Si fuerint peccata tua sicut coccinum quasi nix dealbabuntur &c.* At illi termini seu modi loquendi Scripturæ, non solum occultationem peccatorum, sed veram ipsorum ablationem important, ut de se patet; ineptè enim ille diceretur ablutus & mundatus, qui sordibus esset inquinatus, quas palio aut veste tegeret; incongruè etiam Æthyopem, ut niuem aut lanam dealbari diceremus, si tantum nigredinem sub veste candida occultaret. Ineptè quoque peccata dicerentur tolli omnino ac deleri, si duntaxat raderentur, sicut capilli capitis, & rursus repullularent ac redirent. Vnde Augustinus lib. 1. contra duas epist. Pelagian. cap. 13. *Dicimus baptismi omnium dare indulgentiam peccatorum, & auferre crimina, non radere, neque radices peccatorum in mala carne teneri, quasi rasorum in capite capillorum, unde crescant iterum ressecandæ peccata.* Quibus verbis prædictum hæreticorum errorem præuidisse ac confutasse videtur. Item concione 2. in Psal. 31. soluit præcipuum illorum fundamentum, desumptum ex aliquibus Scripturæ locis, in quibus peccati à Deo tegi dicuntur. Ibi enim explicans verba illa Psalmistæ: *Beati quorum remissæ sunt iniquitates, & quorum testæ sunt peccata,* sic ait: *Non sic intelligatis peccata coopta esse quasi ibi sint & vivant, & Deus te-*  
gat,

gat, non tu; nam si tu tegere volueris erubescens, medicus non curabit. Medicus regit & curat; sub tegmine vulnerati, celatur vulnus. Quibus verbis docet Deum ita tegere peccata nominum, ut reuera ea tollat & deleat, eorumque vulnera gratiæ suæ medicamine sanet. Ratio etiam id suadet, iustificatio enim peccatoris, ut infra ostendemus, fit per gratiæ habitualis infusionem: At illa cum peccato incompatibilis est, saltem de lege ordinaria, ut omnes fatentur: Ergo impossibile est quod post iustificationem peccata in homine remaneant, & solum tegantur vel occultentur, per iusticiam Christi nobis imputatam.

Secundus error hæreticorum nostri temporis affirmat, iustificationem non fieri per introductionem alicuius formæ, animæ inhærentis, sed per solam iusticiam Christi nobis extrinsecè imputatam. Hic error pariter excluditur à Tridentino sess. 6. can. 11. & triplici ratione confutari potest.

Prima est: Apostolus ad Roman. 5. comparat iusticiam & obedientiam Christi cum peccato & inobedientia Adami: Sed peccatum Adami realiter à nobis contrahitur, nec enim dicimur peccatores, per hoc solum quod peccatum primi Parentis, commissum in paradiso terrestri, nobis imputetur; sed quia in anima cuiusque, quando concipitur, realis macula & iniquitas reperitur, ut in tractatu de peccatis ostendimus, agendo de peccato originali: Ergo iusticia quæ tali peccato opponitur, illudque ab homine expellit, non debet esse quid externum & imputatum, sed internum & reale in anima, cum ex Philo-  
pho

pho contrariorum eadem sit ratio.

Confirmatur : Christus restituit nobis quod perdidimus in Adamo : Sed in Adamo perdidimus iustitiam intrinsecam , nimirum iustitiam originalem , quæ erat forma aliqua seu perfectio inhærens animæ Adam , quam transfudisset in omnes suos posteros , si non peccasset : Ergo Christus per iustificationem nobis communicat formam aliquam seu qualitatem intrinsecam , à qua iusti denominamur .

Secunda ratio : Iustificatio peccatoris provenit tanquam à causa , à dilectione Dei supernaturali , qui diligit hominem in ordine ad vitam æternam : Sed à tali dilectione forma aliqua intrinseca & supernaturalis in homine derivatur , ut cap. 11. §. 1. ostendimus : Ergo iustificatio peccatoris fit per aliquam formam , seu qualitatem inhærentem , & non per solam iustitiam Christi , nobis imputatam.

Tertia ratio : In iustificatione homo adoptatur in filium Dei : Sed filiatio adoptiva Dei fit per aliquam formam intrinsecam , ut capite precedenti demonstravimus : Ergo & iustificatio . Vnde Augustinus epist. 85. *Quid est aliud iustitia , cum in nobis est , quam interioris animi pulchritudo ?* Et lib. 15. de Trinit. cap. 8. *Natura cum à Deo suo conditore iustificatur , à deformi forma , formosam transfertur in formam .*

Argumenta Calvinistarum , è detortis quibusdam Scripturæ locis de prompta , nullius momenti sunt . Non obest enim veritati Catholicæ in Tridentino sancitæ , quod Christus 1. ad Corinth. 1. dicatur nobis factus *iustitia & sanctificatio* , hoc enim in sensu causali , non for-

formali, intelligendum est, sicut cum ibidem dicitur Christum esse nobis sapientiam, & cum Ioan. 11. Christus ait, *Ego sum resurrectio & vita.*

Quod verò dicunt, fieri iniuriam iustitiæ Christi si dicamus nos iustificari per aliquam iustitiam nobis intrinsecam, prorsus absurdum est; nam tantum abest, quod per hoc derrogetur iustitiæ Christi, quin potius magis reluceat dignitas & excellentia meritorum eius si virtute illorum nobis communicetur iustitia inhærens, per quam simus formaliter iusti.

Demum quod asserunt remissionem peccatorum nihil aliud esse, quam eorum condonationem; illam verò non dicere aliud quam actum diuinæ voluntatis, quo vult peccata remittere, & Christi sanctificationem pro nostris peccatis applicari, à veritate penitus alienum est. Condonatio enim offensæ in Deo, non importat actum diuinæ voluntatis sterilem & infœcundum, sed fœcundum & efficacem, ac producentem formam intrinsecam expellentem peccatum. Vnde hoc interest discriminis inter Deum & homines condonantes offensam, quod homo condonat offensam actu sterili & inefficaci, Deus verò actu efficaci & fœcundo. Primò, quia Deus condonando offensam, debet reddere eum cui offensam remittit, obiectum congruum suæ dilectionis, seu condonationis, quod non potest facere homo, cum amor humanus non ponat sed supponat in suo obiecto bonitatem; bene autem diuinus, cum sit creans & infundens bonitatem in rebus. Secundò, quia offensæ non remittitur alicui, nisi eam retractet: Homo autem

tem

tem habet ex se sufficientes vires ad retractandum offensam in alium hominem commissam, secus verò ad retractandam offensam Deo irrogatam; & sic actus Dei condonantis offensam homini, debet illi conferre unde possit eam retractare, & pro ea aliquantulum satisfacere; quod non debet facere actus hominis, alteri homini offensam condonantis.

Ex his inferitur contra Calvinum, iustificationem impij non solum importare remissionem peccatorum, sed etiam sanctificationem & renouationem interiorem hominis, vt docet Tridentinum sess. 6. cap. 7. nam per acquisitionem gratiæ sanctificantis, quæ est causa formalis iustificationis, vt ostendemus §. sequenti, homo transit à vetustate peccati ad nouitatem vitæ, iuxta illud ad Ephes. 4. *Renouamini spiritu mentis vestræ*; & similiter sanctificatur & mundatur, vt constat ex illo 1. ad Corinth. 6. *Abluti estis, sanctificati estis, iustificati estis*: Ergo iustificatio non solum importat remissionem peccatorum, sed etiam sanctificationem, & renouationem interiorem hominis.

### §. I.

*Gratia sanctificans est causa formalis iustificationis, non verò actus contritionis, vel charitatis.*

**I**Ta communiter docent Theologi contra Vasquez & Meratium, probaturque primò ex Tridentino, cuius menti & doctrinæ illorum Authorum sententia minùs videtur con-

consona . Concilium enim sess. 6. cap. 7. vnicam dicit esse causam formalem nostræ iustificationis , nempe *iustitiam Dei* , non quæ ipse *in se* est , sed quæ nos *iustos* facit . Quod verò hæc iustitia ex eius mente sit solum gratia habitualis , non verò aliquis actus , patet ex initio eiusdem capituli , ubi dicit hanc iustificationem fieri *per voluntariam susceptionem gratiæ & donorum* . Item sess. 14. cap. 4. ait , *Contritionis motum præparare ad remissionem peccatorum , si coniunctus sit cum fiducia diuinæ misericordiæ* : Sed quod disponit ad remissionem peccatorum , non est ipsa forma iustificans , cum inter dispositionem & formam , aliqua causalitas & dependentia , subindeque realis distinctio reperiatur : Ergo ex Tridentino actus contritionis non est causa formalis iustificationis .

Confirmatur : Causa formalis iustificationis non impetrat veniam & remissionem peccatorum , sed illam formaliter causat : At contritionis actus non causat formaliter veniam & remissionem peccatorum , sed eam duntaxat impetrat , ut constat ex eodem Tridentino ibidem dicente : *Fuit autem quovis tempore , ad impetrandam veniam peccatorum , hic contritionis motus necessarius* : Ergo idem quod prius .

Potest insuper eadem veritas duplici ratione suaderi . Prima est : In iustificatione homo adoptatur in filium Dei , ut patet ex Tridentino sess. 6. cap. 4. unde illud idem quod est terminus formalis generationis spiritalis , per quam filij Dei adoptivi constituimur , est causa formalis iustificationis peccatoris : At sola gratia sanctificans , non verò actus charitatis ,  
vel

vel contritionis, est terminus formalis illius generationis spiritualis; cum illa sola sit participatio formalis naturæ diuinæ, ut talis est, & gerat vices substantiæ seu naturæ in ordine supernaturali, ut cap. 11. §. 2. ostentum est: Ergo sola gratia habitualis est causa formalis iustificationis.

Secunda ratio sic potest proponi: Forma iustificans expellit peccatum in genere causæ formalis, sicut vniuersaliter omnis forma tribuens suum effectum formalem subiecto, expellit formam aut priuationem oppositam, in genere causæ formalis; v.g. calor, qui est causa formalis calefactionis, expellit formaliter frigus ab aqua; lux quæ est causa formalis illuminationis, expellit tenebras formaliter ab aere: Sed actus contritionis, vel charitatis, non expellit ab anima peccatum habituale in genere causæ formalis; quia cum tale peccatum in priuatione gratiæ habitualis consistat, ut ostendimus in tractatu de peccatis, talis actus ipsi non opponitur formaliter, sed solum in genere causæ dispositiue, quæ ad genus causæ materialis reducitur: Ergo talis actus non est causa formalis iustificationis, sed sola gratia sanctificans, quæ talem maculam, seu peccatum habituale, formaliter tollit.

Obijcit Vasquez contra hanc assertionem aliqua Scripturæ, SS. Patrum, & Conciliorum testimonia, quibus insinuari videtur, dilectionem Dei seu contritionem perfectam, fundatam in dilectione, esse causam formalem nostræ iustificationis: Christus enim Lucæ 7. dixit de Magdalena: *Remittuntur ei peccata multa, quoniam dilexit multum*. Et Augusti-

gustinus lib. 2. contra Cresconium cap. 12. ait quod *a peccatis mundamur sacrificio cordis contriti*. Similiter Tridentinum sess. 6. cap. 7. tribuit iustificationem charitati quæ diffunditur in cordibus nostris &c. Et sess. 14. cap. 4. illam attribuit actui contritionis.

Verum ad hæc facile respondetur, testimonia illa solum probare, dilectione & contritione, ut dispositione vitima, nos iustificari & sanctificari, non vero ut causa formali iustificationis & sanctificationis; effectus enim qui completè procedit à forma, attribuitur etiam dispositioni, quia ab ipsa inchoatiue procedit.

Ex dictis colligitur, gratiam habitualement, ab intrinseco, & ex sua natura habere quod sit causa formalis iustificationis, non verò ex favore Dei extrinseco; tum quia ex se & ex natura sua habet quod expellat peccatum habituale, sicut quælibet forma positiva ex natura sua expellit priuationem sibi oppositam. Tum etiam, quia ex natura sua habet quod sit participatio formalis diuinæ naturæ & sanctitatis, unde sanctificans appellatur: Ergo sicut natura & sanctitas Dei ipsum ab intrinseco constituunt iustum & sanctum per essentiam; ita gratia habet ex natura sua constituere iustum & sanctum per participationem, subindeque expellere peccatum ab anima: sicut capite præcedenti dicebamus, illam ex sua natura, & ex vi sibi intrinseca, non verò ab extrinseco Dei favore, habere quod hominem filium Dei adoptiuum constituat.

Dices quod est bonitatis finitæ, nequit vi sua expellere seu destruere peccatum continens



uens malitiam simpliciter infinitam : Sed bonitas gratiæ sanctificantis est finita , & malitia peccati mortalis in genere moris simpliciter infinita , vt in tractatu de peccatis ostendimus : Ergo gratia habitualis , ex vi propria & ex sua efficacia & valore intrinseco , peccatum habituale destruere nequit , seu illud ab anima expellere , sed ad hoc præter infusionem gratiæ habitualis , requiritur specialis ac nouus fauor Dei condonantis iniuriam sibi per peccatum illatam .

Respondeo distinguendo Maiorem . Quod est bonitatis finitæ nequit expellere , seu destruere peccatum continens malitiam infinitam , per modum satisfactionis , Concedo Maiorem . Per modum formæ impossibilis cum tali peccato ( qualis est gratia habitualis ) nego Maiorem .

## §. II.

*In statu naturæ eleuatæ ad ordinem & finem supernaturalem , non potest dari alia iustificacionis forma , quam gratiæ sanctificans , leue tamen in statu naturæ puræ .*

**P**rima pars huius assertionis probatur primo ex D. Thoma hic qu. 11. art. 2. vbi sic ait : *Non posset intelligi remissio culpæ , si non adesset infusio gratiæ* . Quibus verbis S. Doctor vti solet , quando sentit aliquid implicare contradictionem , eò quod quidquid non implicat contradictionem , intelligibile sit . Nomine autem gratiæ , non intelligit quodcumque donum gratuitum , sed solam gratiam habitua-

lem,

lem, ut patet ex verbis istis immediate præcedentibus: *Effectus divinæ dilectionis qui per peccatum tollitur, est gratia qua homo fit dignus vita æterna.*

Confirmatur: Idem S. Doctör ibidem in resp. ad 1. sicut: *Licet homo antequam peccet, potuerit esse sine gratia & sine culpa; tamen post peccatum, non potest esse sine culpa, nisi gratiam habeat.* Quibus verbis aperte docet, quod licet homo in puris naturalibus constitutus, possit manere absque peccato & absque gratia; postquam tamen semel lapsus est in peccatum, impossibile est in statu elevationis ad ordinem supernaturalem, ipsum reparari, & à peccato resurgere, absque infusione gratiæ.

Ratio etiam id suadet, ut enim in tractatu de peccatis ex eodem Doctore Angelico ostendimus: Peccatum habituale dicit maculam quandam, quæ in priuatione gratiæ habitualis consistit: Sed priuatio alicuius formæ non potest tolli, etiam de potentia absoluta; nisi per formam qua priuat, ut constat in morte, cæcitate, tenebris, quæ non nisi per vitam, visum, & lucem possunt auferri: Ergo peccatum habituale tolli nequit nisi per infusionem gratiæ habitualis, nec per consequens peccator iustificari. Hanc rationem insinuat S. Thomas hic qu. 109. art. 7. his verbis: *Cum decor gratiæ proveniat ex illustratione divini luminis, non potest talis decor in anima reparari, nisi Deo denuo illustrante; unde requiritur habituale donum, quod est gratiæ lumen.*

Confirmatur: Dum homo iustificatur fit obiectum congruum dilectionis Dei supernaturæ-

turalis, subindeque Deo gratus & acceptus, eiusque amicus, imò & filius eius adoptivus: Sed repugnat illos effectus praestari nisi à gratia sanctificante, cum illa sit terminus dilectionis Dei supernaturalis, & forma per quam homo filius Dei adoptivus constituitur, ut constat ex supra dictis, & effectus formalis sine forma haberi nequeat, cum sit ipsamet forma communicata: Ergo implicat hominem sine gratia habituali iustificari.

Dices, quod licet iuxta viam ordinariam, sola gratia habitualis sit una iustificationis forma; attamen per absolutam Dei potentiam, actus contritionis & charitatis possunt esse causa formalis iustificationis.

Sed contra primò. In causis formalibus non habet locum distinctio potentiae ordinariae & extraordinariae, ut communiter docent nostri Thomistae; quia cum effectus suos per solam sui communicationem praestent, non possunt supernaturaliter efficere quod nequeunt naturaliter operari; si enim per aliquid adventitium entitas formae mutetur, non erit eadem forma; si verò non mutetur, immutatus etiam erit effectus formalis; cum ille nihil aliud sit quam ipsa forma ut communicata subiecto, & praeterea nihil: Ergo si actus contritionis, vel charitatis, non sit naturaliter idonea iustificationis forma, neque id vi vlla supernaturali consequitur.

Confirmatur: Id quod essentialiter est dispositio ad effectum formalem alicuius formae, non potest, etiam de potentia absoluta, esse forma ad cuius effectum disponit: sicut quia calor essentialiter est dispositio ad introdu-

ctio-

tionem formæ ignis, & ad eius effectum formalem, non potest, etiam de potentia & lege extraordinaria, esse forma ignis aut præstare effectum formæ ignis; Sed actus contritionis, vel charitatis, est essentialiter dispositio ad iustificationem, vt §. præcedenti contra Vasquez & Merarium ostensum est: Ergo non potest, etiam de potentia absoluta, esse causa formalis iustificationis, in statu naturæ ad ordinem & finem supernaturalem eleuatæ, sed hoc soli gratiæ habituali competere potest.

Quod verò in statu naturæ puræ iustificatio fieret sine infusione gratiæ habitualis, manifestum videtur, supposito, quod status ille de lege Dei ordinaria possibilis sit, vt ostendimus in tractatu de varijs statibus naturæ humanæ cap. ultimo, contra Iansenium, & Vincentium Contensonum, aliosque Recentiores, oppositum sentientes. Patet inquam hæc secunda pars nostræ assertionis: Tum quia peccatum habituale hominis in statu naturæ puræ constituti, & ad finem supernaturalem non eleuati, non esset priuatio gratiæ, aut rectitudinis supernaturalis, sed tantum conuersionis in Deum vt finem naturalem: Ergo per huiusmodi conuersionem posset tolli, cum priuatio tollatur per formam ipsi oppositam. Tum etiam, quia si ad remissionem & expulsionem talis peccati, necessaria esset gratia habitualis, vel alterius doni supernaturalis infusio, sequeretur impossibilem esse remissionem peccatorum, manente homine in illo statu; cum per infusionem gratiæ habitualis, vel alterius doni supernaturalis, educeretur homo e statu naturæ puræ, & constitueretur in statu gra-

tiæ : Consequens non est admittendum : Ergo nec antecedens . Minor constat, quia alioquin homo manens in illo statu, necessariò esset miser, quippe qui semel lapsus in peccatum nulum haberet remedium quo posset reparari; & ab illo infelici statu resurgere, subindeque non posset beatitudinem naturalem ad quam esset ordinatus consequi . Vnde vel dicendum est, statum naturæ puræ esse impossibilem, & diuinæ prouidentiae repugnantem; cum suauitati diuinæ prouidentiae repugnet, hominem in aliquo statu condere, vel ponere, in quo necessariò sit miser, & suum vltimum finem & beatitudinem naturalem consequi non valeat. Vel si huius status possibilitas admittatur, vt de facto admittendam esse loco citato ostendimus, asserendum est, quod iustificatio in illo statu fieret sine gratiæ habitualis infusione, nimirum per actum contritionis naturalis de peccatis, includentem dilectionem Dei super omnia, vt est author naturæ. Cum enim peccatum habituale in illo statu solùm importaret priuationem conformitatis ad legem naturalem, & auersionem à Deo vt fine naturali, ad ipsum destruendum sufficeret actus contritionis, efficacis Dei, vt authoris naturæ, adiuncto fauore Dei extrinseco, condonantis rationem offensæ.

### §. III.

#### *Soluntur obiectiones.*

**O**bjicies primò contra primam partem assertionis : Gratia & peccatum non opponun-

ponuntur immediatè : Ergo potest tolli peccatum sine infusione gratiæ . Consequentia patet , nam quando aliqua duo ita se inuicem habent , vt non opponantur immediatè , potest vnum expelli à suo subiecto , absque eo quod introducatur aliud , vt patet in calore & frigore , in albedine & nigredine ; potest enim idem subiectum de calido fieri non calidum neque frigidum , & de albo non album neque nigrum . Antecedens probatur : Si gratia & peccatum opponerentur immediatè , sequeretur quod sicut iuxta nos non potest tolli peccatum sine infusione gratiæ , ita nec posset auferri gratia ab homine , nisi supposito aliquo eius peccato : Sed hoc dici nequit : Ergo nec illud . Sequela maioris patet , minor etiam videtur certa ; cum enim gratia habitualis dependeat à Deo in fieri , & in conseruari , potest Deus illam auferre homini dormienti , absque vlla eius culpa præcedente , & per suspensionem concursus conseruationi eam destruere .

Respondeo ex D. Thoma quæ. 28. de verit. artic. 2. ad 4. quod licet gratia & peccatum , absolutè loquendo , non sint opposita immediatè , respectu tamen hominis lapsi , in statu eleuationis naturæ humanæ ad finem supernaturalem , immediatè opponuntur . Vnde D. Thomas supra relatus ait quod *licet homo antequam peccet , potuerit esse sine gratia & sine culpa* ( nempe in statu naturæ puræ ) *tamen post peccatum* ( in statu eleuationis naturæ humanæ ad ordinem supernaturalem ) *non potest esse sine culpa , nisi gratiam habeat* . Vnde ad argumentum propositum , nego Antecedens ,

ad cuius probationem , nego minorem , & ad probationem illius dico , quod licet Deus absolute , & nulla facta suppositione , possit auferre gratiam homini dormienti , etiam nulla eius culpa precedente ; hoc tamen impossibile est , supposito decreto Dei ordinante & eleuante naturam humanam ad ordinem & finem supernaturalem . Nam Deum per extrinsecam ordinationem eleuare hominem ad ordinem supernaturalem , est Deum velle , quantum est de se , & nisi per ipsum hominem steterit , dare illi gratiam habitualement , sine qua mereri nequit de condigno vitam æternam : vnde si Deus auferret alicui gratiam habitualement , absque vlla eius culpa , ille non maneret amplius ordinatus in vitam æternam , & finem supernaturalem .

Obijcies secundò contra secundam partem assertionis : D. Thomas quæst. 28. de verit. art. 2. ad 5. sic habet : *Si à solo statu naturæ decidisset homo , nihilominus tamen ad expiationem infinitæ offensæ , donum diuinæ gratiæ requireretur .* Ergo sentit quod si homo conditus in puris naturalibus peccaret mortaliter , non posset peccatum mortale ipsi remitti , sine infusione gratiæ .

Respondeo D. Thomam , per donum diuinæ gratiæ , non intelligere gratiam habitualement , aut aliud donum entitatiuè supernaturale ; cum enim status naturæ puræ talia dona excludat , implicat quod homo peccans in statu naturæ puræ , manendo in eodem statu , ad expiandam offensam contra Deum commissam , indigeat gratia aut dono entitatiuè supernaturali ; indigentia enim horum donorum ,

tura, statum naturæ puræ extingueret, cum natura pura exigentiam omnium donorum supernaturalium excludat. Vnde necessario hæc verba D. Thomæ intelligenda & explicanda sunt de auxilio intra ordinem naturæ speciali, sine quo homo in puris naturalibus conditus, non potuisset diligere Deum ut authorem naturæ, ut cap. 3. ostensum est, nec per consequens actus dilectionis Dei authoris naturæ, vel contritionis naturalis elicere, ad expiandam offensam contra Deum ut authorem naturæ commissam. Cum enim tale auxilium non esset statui puræ naturæ debitum, sed ex diuinæ providentiæ suauitate concessum, donum gratuitum, vel donum diuinæ gratiæ, merito, appellari potest, ut constat ex dictis initio huius tractatus, ubi triplicem gratiæ acceptionem & significationem exposuimus.

Contra eandem partem nostræ assertionis multipliciter arguit P. Contensonus tomo 5. pagina 490. Primò, non est efficacior (inquit) actus dilectionis & contritionis merè naturalis in statu naturæ puræ, quam actus dilectionis & contritionis supernaturalis in statu naturæ lapsæ: Ergo si iste in statu naturæ lapsæ nequeat esse iustificationis forma, nec ille in statu naturæ puræ. Secundò, Quod est essentialiter dispositio ad effectum formalem alicuius formæ, non potest esse forma ad cuius effectum disponit; sicut calor disponens ad ignem, nunquam potest esse forma ignis: Sed actus contritionis, vel charitatis, ex sua essentiali ratione, habet duntaxat esse dispositionem ad formam iustificationis: Ergo impossibile est talem actum esse in aliquo statu



iustificationis formam. Tertiò, Iustificatio peccatoris procedit ex speciali dilectione Dei, peccatum condonare & iniuriam remittere volentis: Atqui singularis illa Dei dilectio aliquid peccatori imprimere debet, ad quod terminetur; cum amor diuinus non supponat, sed ponat bonitatem in rebus, ut frequenter Angelicus Doctor inculcat: illud autem nihil aliud esse potest, quam gratia habitualis: Ergo illa in omni statu vna est iustificationis forma, nec alia esse potest. Demum forma iustificationis debet esse aliquid ratum & permanens in subiecto: Sed actus contritionis vel charitatis est essentialiter fluens & transiens: Ergo impossibile est, illum in aliquo statu esse iustificationis formam; alioquin simili modo Vasquez & Meratius dicere poterunt, tales actus, in statu eleuationis naturæ humanæ ad ordinem supernaturalem, esse ipsam iustificationis formam, corruentque omnia argumenta quibus Authores illos impugnauimus.

Verùm hæc leuia sunt, & probant solum, actum contritionis, vel charitatis supernaturalis, non esse, nec esse posse formam iustificantem in statu naturæ ad ordinem supernaturalem eleuatae. Vnde ad primum respondeo, quod licet actus contritionis, vel dilectionis naturalis, per se, & ex natura sua, non possit esse efficacior & potentior ad iustificandum, quam actus contritionis & dilectionis supernaturalis; bene tamen per accidens, & ratione status in quo elicitur; si enim in eo natura non sit eleuata ad ordinem supernaturalem, subindeque peccatum non inducat pri-

uationem gratiæ sanctificantis , sed duntaxat conuersionis in Deum vt authorem naturæ ( vt contigisset in statu naturæ puræ ) actus contritionis & dilectionis naturalis , sufficiens est ad iustificandum, eò quòd talem priuationem conuersionis in Deum vt authorem naturæ possit expellere , cùm omnis priuatio tollatur per formam ipsi oppositam . Vnde falsum est quod talis actus in statu naturæ puræ esset essentialiter dispositio ad formam iustificationis . Ex quo patet responsio ad secundum. Ad tertium dico, quod dilectio illa singularis, qua Deus peccatorem in statu naturæ puræ iustificare vellet , aliquid ei imprimeret quod esset terminus ipsius, sed non gratiam habitualement, vel aliud donum gratuium ordinis supernaturalis ( statûs enim naturæ puræ talia dona excluderet, & cum illis esset impossibilis) sed auxilium intra ordinem naturæ speciale, quo peccator actum conuersionis & dilectionis Dei naturalis eliceret; tale enim auxilium ( vt supra ostendimus) statui naturæ puræ non repugnaret , sed cum eo stare posset. Nec obest quod illud esset transiens , sicut & actus contritionis & dilectionis Dei vt authoris naturæ ; cùm enim in statu naturæ puræ macula peccati non consisteret in priuatione gratiæ habitualis , vel alterius qualitatis aut formæ permanentis , sed duntaxat in priuatione conuersionis in Deum vt authorem naturæ , per auxilium fluens, & actum dilectionis, vel contritionis transeuntem, illo mediante elicatum, tolleretur . Ex quo patet solutio vltimi argumenti , & discrimen notabile quod inter sententiam Vasquez, ac Meratij , & nostram in-

intercedit. Illi enim Authores loquuntur de iustificatione hominis in statu naturæ ad ordinem supernaturalem eleuatæ, quæ nec per auxilium fluens, nec per actum transeuntem fieri potest, sed duntaxat per gratiam habituales & permanentem, cum in illo statu peccatum habituale in priuatione gratiæ sanctificantis consistat.

#### §. IV.

##### *Corollarium notatu dignum.*

**E**X dictis intelliges, quod licet inter homines possit fieri condonatio & remissio offensæ, absque intrinseca offendentis mutatione; Deus tamen non potest peccatori remittere & condonare offensam, absque intrinseca illius mutatione. Probatur assignando triplicem rationem discriminis: Prima est, quia vnus homo potest remittere & condonare offensam homini, per sui mutationem, & eliciendo actum de nouo, quo vult illi non esse amplius offensus: Deus autem, cum sit ab intrinseco immutabilis, non potest remittere offensam per sui mutationem, sed solum per mutationem ipsius peccatoris. Altera, quia offensa hominis contra hominem, nihil offendenti aufert, cuius priuatione manente non remittatur offensa, sicque vt remittatur necesse non est aliquid inhærens offendenti producere, sed sufficit extrinseca condonatio offensæ: Offensa verò contra Deum aufert offendenti gratiam habituales, conuersionem ad Deum, & conformitatem ad rationem & le-


legem , quorum priuatio dum manet , non remittitur Dei offensa , sicque necessarium est , vt aliquid reale & inherens producat in homine , quo talis priuatio auferatur , & offensa remittatur . Tertia, assignatur à D. Thoma 3. p. quæst. 86. art. 2. in corp. vbi sic discurret: *Offensa directè opponitur gratiæ , ex hoc enim dicitur aliquis alteri esse offensus , quod repellit eum à gratia sua . . . . Hec autem interest inter gratiam Dei & hominis , quod gratia hominis non causat sed præsupponit bonitatem veram vel apparentem in homine grato , sed gratia Dei causat bonitatem in homine grato , eo quod bona voluntas Dei , quæ in nomine gratiæ intelligitur , est causa omnis boni creati . Vnde potest contingere quod homo remittat offensam qua offensus est alicui , absque aliqua immutatione voluntatis eius ; non autem contingere potest , quod Deus remittat offensam alicui , absque immutatione voluntatis eius .*

Dices primò , Dilectio Dei specialis , quæ vult remittere culpam & condonare offensam , non necessitate aliqua , sed omnino liberè concurrat ad productionem gratiæ habitualis , & aliorum donorum supernaturalium : Ergo Deus potest illam habere , sine infusione gratiæ , vel alterius doni supernaturalis , per quod intrinsecè mutetur peccator .

Sed nego consequentiam , libertas enim diuinæ dilectionis , non potest ab ea tollere quod est de eius natura seu essentia : de ratione autem dilectionis Dei specialis est reddere hominem obiectum sibi congruum , per infusionem donorum supernaturalium , vt docet S. Thomas hic quæst. 110. art. 1.

Dices secundò, in dispensatione voti Deus relaxat eius vinculum, absque vlla intrinseca mutatione vouentis: Pariter ergo poterit absque intrinseca mutatione peccatoris, eum liberare à reatu culpæ, & offensam ipsi remittere.

Sed nego pariter consequentiam & paritatem, Deus enim relaxare potest voti vinculum, per solam mutationem moralem vouentis; quia voti obligatio dependet à duobus, nempe à promissione vouentis, & acceptatione Dei, quæ acceptatio in votis quæ dispensatione tolluntur, non est facta à Deo, nisi vsque ad illud tempus quo peteretur dispensatio, & concederetur ministerio Vicarij Christi, aut aliorum habentium in Ecclesia facultatem dispensandi; vnde adueniente illo tempore, positis alijs, cessat illa obligatio, per solam immutationem moralem vouentis. At verò esse auersum à Deo, non est effectus dependens ex aliqua Dei dispositione, sed ex sola natura peccati mortalis; vnde sicut esse cœcum, aut mortuum, non potest tolli nisi per receptionem formarum huiusmodi priuationibus oppositarum; ita & esse auersum à Deo (in quo consistit ratio offensæ seu iniuriæ, ipsi per peccatum mortale illatæ) tolli nequit per solam temporis aut diuinæ voluntatis mutationem moralem, sed duntaxat per receptionem alicuius formæ supernaturalis, conuertentis in Deum vt vltimum finem.



## §. V.

*De dispositionibus ad iustificationem requisitis.*

**R** Equiri in adultis dispositiones ad iustificationis gratiam obtinendam, de fide certum est, vt constat ex Tridentino sess. 6. cap. 5. & 6. & probat D. Thomas hic quæst. 112. art. 3. hac ratione: Deus mouet vnumquodque secundum modum suum & naturam, ac proinde cum mouet adultum de peccato ad iustitiam, simul etiam mouet liberum arbitrium ad eandem iustitiam, & iustitiæ fontem; quia homo adultus ex natura sua & modo operandi est liber; liberum autem ita postulat moueri vt se moueat, exceptis motibus primò primis, in quibus natum est moueri solum. Deinde vt idem S. Doctor 1. p. quæst. 12. artic. 5. discurret: Omne quod eleuatur ad aliquid excedens suam, naturam, debet disponi aliqua dispositione, maxime quando forma ad quam eleuatur est perfecta, & per se primò intentata, ac terminus vltimus generationis: sed homo per gratiam iustificantem eleuatur ad participationem diuinæ naturæ, quæ participatio est supra naturam hominis, & terminus vltimus generationis spiritualis: Ergo oportet quod homo ad illam recipiendam disponatur. Sicut in naturalibus indispensabiliter requiruntur dispositiones ad formas substantiales, quia per se primò intenduntur, & sunt terminus vltimus generationis naturalis. Superest ergo hic explicandum, quænam sint dispositiones ad iustificationem requisitæ, seu

qui actus ad iustificationem adulti, tam ex parte intellectus, quam ex parte voluntatis, sint necessarij? Agimus autem hic de iustificatione in communi, nam de illa quæ sit in susceptione baptismi, vel per Sacramentum poenitentiae, in tractatu de Sacramentis disseremus. His præmissis.

Dico primò, fidem requiri ad iustificationem adulti, illam tamen solam ad eam non sufficere.

Prima pars patet ex Scriptura: Ad Hebreos 10. *Sine fide impossibile est placere Deo.* Marci ultimo: *Qui crediderit saluus erit &c.* Constat etiam ex Tridentino sess. 6. cap. 6. ubi inter dispositiones ad iustificationem requisitas, primò numeratur actus fidei, his verbis: *Disponuntur (adulti) ad ipsam iustitiam, dum excitati diuina gratia, & adiuti, fidem ex auditu concipientes, liberè mouentur in Deum, credentes vera esse quæ diuinitus reuelata & promissa sunt.* Et cap. 8. *Fides est humanæ salutis initium, fundamentum, & radix omnis iustificationis.* Vnde Augustinus serm. 22. *Domus Dei fide fundatur, spe erigetur, charitate perficitur.*

Ratio etiam suffragatur, nam vt discurret D. Thomas hic artic. 4. Ad iustificationem adulti requiritur motus aliquis liberi arbitrij, quo mens hominis auertatur à peccato, & conuertatur ad Deum: Sed primus accessus ad Deum fit per cognitionem fidei, iuxta illud ad Hebreos 11. *Accedentem ad Deum oportet credere:* Ergo actus fidei requiritur ad iustificationem adulti.

Confirmatur: Cùm voluntas sit potentia  
coe-

cœca, & indigeat luce & directione intellectus, impossibile est eam conuerti in Deum ut finem supernaturalem, sine præcedenti actu intellectus, quo Deum ut finem supernaturalem cognoscat: Sed hic actus est actus fidei: Ergo ad conuersionem & iustificationem peccatoris requiritur actus fidei.

Secundâ verò pars, quæ asserit solam fidem non sufficere ad iustificationem, definitur in Tridentino sess. 6. can. 9. contra hæreticos nostri temporis, & colligitur ex Scriptura 1. Corinth. 15. *Si habuero omnem fidem, ita ut montes transferam, charitatem autem non habuerō, nihil mihi prodest.* Iacobi 2. *Fides sine operibus mortua est.* Vnde Augustinus serm. 237. *Attende ad ipsum fidei nomen: fides enim appellata est, quia fit quod dicitur. Duæ syllabæ sonant, cum dicitur fides: prima syllabæ à factō. secunda est à dictō. Interrogote virum credas? Dicis, credo: fac quod dicis, & fides est.* Illi succinit Bernardus super cantica, exponens hæc verba, *Recti diligunt te*, sic enim ait: *Quid fidem tuam ab actu diuidis? fidem perimis tuam, fides enim sine operibus mortua est. Munus mortuum offers. Quæ hostia pacifica, ubi tanta discordia? Non Deum placas, sed offendis, discors tibi. Nec mirum si Cain in fratrem suum insurrexerit, qui fidem prius occiderat suam: fideicida, priusquam fratricida. Fidem ergo tuam animet dilectio, probet actio.*

Eadem veritas hac ratione congrua suaderi potest: Homo per voluntatem suam auersus est à Deo, cum peccauit: Ergo ut remittatur ei peccatum, debet ad ipsam conuerti per actum voluntatis, & per consequens non  
suf-



sufficit actus fidei.

Confirmatur : Voluntas per peccatum fuit præcipuè sauciata : Ergo congruum est , vt illa per aliquos actus sibi proprios moueatur ad iustificationem , quæ est illius sanitas .


Neque his obstant aliqua scripturæ testimonia , quibus iustificatio tribuitur fidei , nulla facta mentione operum . Nam illi tribuitur , non vt formæ iustificanti , aut dispositioni vltimæ , se sola sufficienti , sed vt primo fundamento & radici totius iustificationis , vt docet Tridentinum supra citatum . Cùm verò Apostolus ad Roman. 3. dicit : *Arbitramur enim iustificari hominem per fidem sine operibus* , solum excludit opera legis , vel naturæ , facta sine spiritu fidei . Vnde Hieronymus hunc locum exponens , & errorem Calvinistarum , soli fidei iustificationem tribuentium , veluti præuidens ac præfosans , sic ait : *Abutuntur quidam hoc loco , ad destructionem operum iustitiæ , solam fidem posse sufficere affirmantium cum tamen alibi dicat Apostolus , si habuerimus omnem fidem ita vt montes transferam , charitatem autem non habuerimus , nihil mihi prodest* .

Dico secundò , actum spei ad iustificationem requiri .

Constat ex Tridentino sess. 14. c. 4. vbi ait contritionem , quæ omni tempore fuit necessaria ad impetrandam veniam peccatorum , post baptismum commissorum , præparare ad iustificationem , *si coniuncta sit cum fiducia diuinæ misericordiæ* . Et postea , cùm loquitur de attritione , dicit quod si excludat voluntatem peccandi , cum spe veniæ , disponit ad gratiam

in sacramento impetrandam. Fauet etiam Scriptura, dicitur enim Marci 10. *Confide filia, remittuntur tibi peccata tua.* Et ad Roman 8. *Spe salui facti sumus.* Ratio quoque suffragatur, cum enim remissio peccatorum, non sit bonum humanum, sed diuinum, & à solo Deo sperandum, non potest homo conari ad illud obtinendum, nisi speret se illud obtenturum, iuxta illud Ambrosij lib. 1. de pœnit. cap. 1. *Nemo potest agere pœnitentiam, nisi sperauerit indulgentiam.*

Dico tertio: Ad iustificationem adultorum quæ fit extra sacramentum, præter actum fidei & spei, requiri etiam actum contritionis & charitatis. Nam vt discurret D. Thomas hic art. 5. ad iustificationem requiritur quod homo recedat à peccato, & accedat seu conuertatur ad Deum; sicut ad motum localem necesse est quod mobile recedat à termino à quo, & accedat ad terminum ad quem: Sed recessus à peccato fit per contritionem, qua illud detestamur & odio habemus; accessus verò seu conuersio ad Deum, fit per actum charitatis, quo ad illum accedimus, illique coniungimur, iuxta illud Augustini: *Ad Deum accedimus, non passibus corporis, sed mentis affectibus:* Ergo ad iustificationem adulti extra sacramentum requiritur actus contritionis & charitatis. Dixi *extra sacramentum*, quia quando adultus iustificatur ex vi sacramenti, sufficit attritio supernaturalis, vt in Tractatu de poenitentia ostendemus.



sufficit actus fidei.

Confirmatur : Voluntas per peccatum fuit præcipuè sauciata : Ergo congruum est , vt illa per aliquos actus sibi proprios moueatur ad iustificationem , quæ est illius sanitas .


Neque his obstant aliqua scripturæ testimonia , quibus iustificatio tribuitur fidei , nulla facta mentione operum . Nam illi tribuitur , non vt formæ iustificanti , aut dispositioni vltimæ , se sola sufficienti , sed vt primo fundamento & radici totius iustificationis , vt docet Tridentinum supra citatum . Cùm verò Apostolus ad Roman. 3. dicit : *Arbitramur enim iustificari hominem per fidem sine operibus* , solum excludit opera legis , vel naturæ , facta sine spiritu fidei . Vnde Hieronymus hunc locum exponens , & errorem Calvinistarum , soli fidei iustificationem tribuentium , veluti præiudens ac præfocans , sic ait : *Abutuntur quidam hoc loco, ad destructionem operum iustitiæ , solam fidem posse sufficere affirmantium cum tamen alibi dicat Apostolus , si habuero omnem fidem ita vt montes transferam , charitatem autem non habuero , nihil mihi prodest* .

Dico secundò , actum spei ad iustificationem requiri .

Constat ex Tridentino sess. 14. c. 4. vbi ait contritionem , quæ omni tempore fuit necessaria ad impetrandam veniam peccatorum , post baptismum commissorum , præparare ad iustificationem , *si coniuncta sit cum fiducia diuinæ misericordiæ* . Et postea , cùm loquitur de attritione , dicit quod si excludat voluntatem peccandi , cum spe veniæ , disponit ad gratiam

in sacramento impetrandam. Fauet etiam Scriptura, dicitur enim Marci 10. *Confide filia, remittuntur tibi peccata tua.* Et ad Roman. 8. *Spe salui facti sumus.* Ratio quoque suffragatur, cum enim remissio peccatorum, non sit bonum humanum, sed diuinum, & à solo Deo sperandum, non potest homo conari ad illud obtinendum, nisi speret se illud obtenturum, iuxta illud Ambrosij lib. 1. de pœnit. cap. 1. *Nemo potest agere pœnitentiam, nisi sperauerit indulgentiam.*

Dico tertio: Ad iustificationem adultorum quæ fit extra sacramentum, præter actum fidei & spei, requiri etiam actum contritionis & charitatis. Nam vt discurret D. Thomas hic art. 5. ad iustificationem requiritur quod homo recedat à peccato, & accedat seu conuertatur ad Deum; sicut ad motum localem necesse est quod mobile recedat à termino à quo, & accedat ad terminum ad quem: Sed recessus à peccato fit per contritionem, qua illud detestamur & odio habemus; accessus verò seu conuersio ad Deum, fit per actum charitatis, quo ad illum accedimus, illique coniungimur, iuxta illud Augustini: *Ad Deum accedimus, non passibus corporis, sed mentis affectibus.* Ergo ad iustificationem adulti extra sacramentum requiritur actus contritionis & charitatis. Dixi *extra sacramentum*, quia quando adultus iustificatur ex vi sacramenti, sufficit attritio supernaturalis, vt in Tractatu de pœnitentia ostendemus.



## S. VI.

*Actus contritionis & charitatis effectiue præcedunt à gratia habituali, ad quam disponunt.*

**I**Ta communiter docent nostri Thomistæ, paucis recentioribus exceptis: Probaturque primò ex D.Thoma, qui hic art.7. & 8. apertè fauet nostræ sententiæ. Nam art.7. in corp. sic ait: *Iustificatio impij originaliter consistit in gratiæ infusione, per eam enim & liberum arbitrium mouetur, & culpa remittitur.* Quibus verbis manifestè declarat, ad iustificationem impij non requiri auxilium mouens, à gratia habituali distinctum, sed ipsam mouere simul liberum arbitrium, & culpam remittere, subindeque simul præstare munus auxilij mouentis ad actus contritionis & charitatis, & formæ animam sanctificantis, & mundantis à sordibus peccatorum. Vnde articulo sequenti ait, quod *ipsa Dei mouentis motio est gratiæ infusio.* Quod verò nomine gratiæ, habitualement intelligat, non verò auxilium actuale, ab ea distinctum, manifestum est. Primò, quia loquitur de gratia, per quam fit remissio culpæ, siue quæ est causa formalis iustificationis: illa autem non est gratia actualis, sed habitualis: Ergo de ista loquitur, non de illa. Secundò, quia loquitur de gratia quæ requirit dispositiones in subiecto, vt patet ex verbis istis immediatè sequentibus: *Quod aliqua forma non subito imprimatur subiecto, contingit ex hoc quod subiectum non est dispositum,*

tum , & agens indiget tempore , ad hoc quod subiectum disponat &c. Sed gratia quæ indiget dispositionibus , vt in anima recipiatur , non est actualis , sed habitualis , vt constat ex eodem S. Doctore hic quæst. 112. artic. 2. vbi docet nullam ex parte hominis requiri dispositionem ad gratiam actualem , sed duntaxat ad habitualement : Ergo de gratia habituali loquitur , cum ait , quod *per eam & liberum arbitrium mouetur , & culpa remittitur*. Nec obest , quod ibidem dicat , quod *totâ iustificatio impij originaliter consistit in gratiæ infusione*. Nam *ly originaliter* , non excludit à gratia de qua loquitur rationem causæ formalis iustificationis , sed solum significat , quod talis gratia ita est causa remissionis peccatorum , vt sit radix , fons , & origo totius sanctitatis , & omnium donorum & charismatum , quæ in peccatore iustificato reperiuntur .

Potest insuper probari assertio triplici ratione . Prima potest sic proponi : De ratione actus vitalis est quod procedat à principio proximo vitæ , vt coniuncto principio radicali , vt patet in omnibus actibus vitalibus , tam corporeis , quam spiritualibus , qui procedunt à potentia coniuncta animæ : Sed actus contritionis & charitatis sunt vitales vita supernaturali , nam iustus ex fide per dilectionem operante viuit : Ergo procedunt ab habitibus charitatis & poenitentiae , vt coniunctis gratiæ sanctificanti , quæ est principium radicale vitæ supernaturalis .

Nec valet responsio P. Contensoni , dicentis habituum supernaturalium influxum , auxilij actualis supernaturalis influxu posse supple-

pleri; sicut Paulus Dei visionem elicit, non per habitum luminis gloriæ, sed impressione luminis transeunter communicati. Non valet inquam hæc solutio: Et si enim præter naturaliter, & de potentia absoluta, homo possit elicere actus vitales ordinis supernaturalis sine habitibus supernaturalibus, ratione auxilij supernaturalis suppletis vicem illorum, ut contingit in visione D. Pauli; certum tamen est, (ut fatetur prædictus Author) habitus supernaturales requiri ad melius & connaturalius operandum, & de lege ac potentia Dei ordinaria: Sed actus charitatis & contritionis, qui ad gratiam sanctificantem disponunt, non solum sunt vitales vita supernaturali, sed etiam connaturaliter eliciuntur ab anima, & non præternaturaliter, ac de potentia Dei absoluta; alioquin iustificatio peccatoris esset miraculosa, sicut visio D. Pauli: Ergo tales actus non eliciuntur ab homine, mediante auxilio transeunte, sed mediantibus habitibus charitatis & poenitentiae, ut coniunctis gratiæ sanctificanti, tanquam principio radicali vitæ supernaturalis.

Secunda ratio sic breuiter proponitur: Inclinatione actualis perfecta in aliquem finem, supponere debet (saltem connaturaliter & de via Dei ordinaria) naturam tali fini proportionatam: Sed actus charitatis est inclinatio actualis perfecta in Deum ut vltimum finem: Ergo ut eliciatur connaturaliter, ut contingit in iustificatione peccatoris, supponere debet gratiam sanctificantem, quæ se habet ut natura tali fini proportionata.

Tertia ratio philosophica est, & potest sic  
for-

formari : Non repugnat, imò connaturale est, aliquid disponere subiectum ad receptionem alicuius formæ, & nihilominus ab ea procedere : Ergo licet actus contritionis & charitatis ad gratiam sanctificantem vltimò disponant, possuat tamen ab illa effectiuè procedere . Consequentia patet, Antecedens verò declaratur ac suadetur varijs exemplis è Philosophia petitis . In primis enim nostri Thomistæ communiter docent in libris de generatione & corruptione, dispositiones concomitantes formam geniti, disponere ad eius receptionem, & nihilominus ab ea procedere: v.g. calorem vt octo, qui est vltima dispositio ad formam ignis, ab ea profluere; idque manifestè asserit S. Thomas 3. p. quæst. 7. artic. 13. ad 2. his verbis : *Calor qui fuit dispositio ad formam ignis, est effectus profluens à forma ignis iam præexistentis.* Et quæst. 9. artic. 3. ad 2. ait : *Per calorem disponitur materia ad suscipiendam formam ignis, qua tamen adueniente, calor non cessat, sed remanet quasi quidam effectus talis formæ:* Ergo non repugnat aliquid disponere ad receptionem alicuius formæ, & nihilominus ab illa causari; subindeque actus contritionis & charitatis, à gratia iustificante, ad quam disponunt, effectiuè procedere . Et certè si hoc accadat in generatione naturali, cur non poterit similiter contingere in generatione spiritali, quæ fit in iustificatione peccatoris? Præsertim, cum de rebus supernaturalibus, seruata proportione, & dempta earum supernaturalitate, philosophandum sit sicut de naturalibus; gratia enim, quantum fieri potest, naturæ attemperatur & accommoda-



modatur, vt passim docent Theologi.

Secundum exemplum ex Philosophia desumptum est: Organizatio corporis est dispositio ad receptionem animæ, & tamen corpus non habet esse organicum, nisi ab anima, vt docet S. Thomas 1. p. qu. 76. artic. 4. ad 1. & communiter Philosophi, cum explicant hanc definitionem animæ ab Aristotele traditam: *Anima est actus corporis organici &c.*

Tertium exemplum: Diaphaneitas seu perspicuitas est vltima dispositio in corpore diaphano ad receptionem lucis, quæ propterea definitur ab Aristotele *actus perspicui*, & tamen talis diaphaneitas à luce procedit, cum impossibile sit aliquod corpus esse diaphanum nisi ex participatione lucis.

Demum ventus intrans per fenestram in aulam, est causa efficiens apertionis fenestrationis, & tamen apertio fenestrationis, vt pote impedi-  
menti remotio, concurrit in genere causæ dispositiuæ ad prædictum venti ingressum: Ergo non repugnat, sed potius connaturaliter fieri potest, vt aliquid pendeat ab alio in genere causæ efficientis, & nihilominus sit prior illo in genere causæ disponentis, subindeque nec quod actus contritionis & charitatis ad gratiam habitualementem vltimò disponant, & nihilominus ab illa effectiuè procedant: Quia nimirum *causæ sunt sibi inuicem causæ*, vt ait Philosophus 5. metaph. & 2. physic. vnde quod in vno genere est causa alterius, potest in alio genere ab illo dependere & causari, subindeque in diuerso genere causæ simul esse prius & posterius. Sic materia est prior forma in genere causæ sustentantis, & illa po-  
ste-

terior in genere causæ actuantis & informantis. Sic ambulatio est causa efficiens sanationis, & sanatio causa finalis ambulationis. Sic ex parte solis prius est illuminare quam tenebras remouere: ex parte autem aeris prius est purgari à tenebris, quam consequi lumen, ordine naturæ, licet utrumque sit simul, ut ait D. Thomas hic art. 8. ad 1. Sic demum corruptio secundum ordinem causæ materialis dispositiue, est prior generatione, seu introductione formæ; & tamen introductio formæ est prior alterius corruptione & expulsionem, in genere causæ efficientis, formalis, & finalis, ut asserit idem S. Doctor in 4. dist. 27. quæst. 1. artic. 4.

Ut hæc melius percipiantur, & præcipua Aduersariorum argumenta soluantur: cum Caietano, Conrado, Ferrariensi, Aluare, alijsque celebrioribus Thomistis, breuiter obseruandum est, gratiam habitualement quæ in iustificatione infunditur, posse considerari duobus modis, secundum quos duo mania diuersa exercet: Primò ut est in fieri, seu infundi, & prout se tenet ex parte Dei illam communicantis: Secundò ut est infusa, & in facto esse, & quatenus se tenet ex parte hominis illam recipientis. Primo modo gerit vices auxiliij mouentis, secundò habet rationem habitus & formæ permanentis, atque animam sanctificantis, ac dantis esse diuinum participatiue, esse gratum Deo, & obiectum congruum dilectionis eius; & quia primum minus est propter secundum, exercet prius primum quam secundum, ordine executionis: Quare prius prioritate à quo communicatur  
ani-

animæ, in ratione auxiliij mouentis, quam in ratione habitus & formæ sanctificantis; vt communicata prius in ratione auxiliij, disponat per actus contritionis & charitatis ad sui connaturalem receptionem in ratione habitus. Vnde D. Thomas supra relatus ait quod *per eam & liberum arbitrium mouetur, & culpa remittitur*. Quibus verbis gratiam habitualem vtrumque munus auxiliij mouentis, & formæ sanctificantis præstare, manifestè declarat.

Ex his præcipua Aduersariorum argumenta sponte liquescunt, & in fumum & auram resoluntur. Obijcit enim primò Suarez: Si actus charitatis & contritionis in instanti iustificationis sint à gratia, præsupponunt eam existentem (cùm causa efficiens causet vt existens) ac proinde vt unitam animæ; cùm gratia sit accidens, & existentia accidentis sit inexistencia seu inhærentia: Ergo non possunt animam disponere ad receptionem eius in subiecto.

Sed facilè respondetur ex dictis, distinguendo Antecedens: præsupponunt eam vt existentem & unitam animæ, in ratione auxiliij mouentis, concedo Antecedens. In ratione habitus & formæ sanctificantis, nego Antecedens, & consequentiam. Potest enim gratia habitualis, prius natura vniri animæ per modum auxiliij mouentis, vt illam vltimò præparet ac disponat per actus contritionis & charitatis, ad recipiendos effectus formales quos tribuit, vt habet rationem habitus & formæ sanctificantis.

Obijcit secundò: Gratia habitualis infunditur

ditur homini, quia est contritus : At si contritio eliceretur ab habitu gratiæ, hæc causalis non esset vera, sed potius ista : ideò homo conteritur, quia ipsi infunditur habitus gratiæ : Ergo contritio per quam homo ad iustificationem ultimò disponitur, non procedit ab habitu gratiæ, sed ab auxilio actuali, per modum transeuntis collato.

Respondeo, concessa Maiori, negando Minorem ; cum enim gratia habitualis exercent munus auxiliij mouentis, & formæ sanctificantis, utraque causalis est vera : prima quidem intellecta de gratia, ut habet rationem habitus & formæ sanctificantis ; secunda verò, intellecta de eadem gratia, ut gerit vices auxiliij. Sicut in ordine naturali istæ causales sunt veræ, in diuerso genere causæ : fenestra aperitur, quia ventus aulam ingreditur : ventus aulam ingreditur, quia fenestra aperitur. Anima vnitur corpori, quia est organicum : corpus organicum est, quia anima ei vnitur, & ipsum informat. Corpus recipit lucem, quia est diaphanum, & est diaphanum, quia recipit lucem. Aer illuminatur, quia purgatur à tenebris, & purgatur à tenebris, quia illuminatur. Causæ enim, ut supra dicebamus, sunt sibi inuicem causæ, vnde quod causat aliquid in vno genere causæ, ab illo causari & dependere potest in alio genere.

Obijcit tertio quidam Recentior : Homo per visionem & ambulationem non potest seipsum disponere ad habendos oculos, vel pedes, quia tales actiones effectiue procedunt à potentia visiva, & progressiva. Calor etiam, quamuis possit esse vltima dispositio ad for-

nam ignis, non tamen calefactio, quia à tali forma effectiue producitur: Ergò similiter, si actus contritionis & charitatis, à gratia habituali effectiue procedant, non poterunt ad ipsam disponere; vel si ad eam disponant, ab ipsa procedere non poterunt.

Respondeo, concessio Antecedente, negando consequentiam & paritatem: Ratio autem disparitatis est, quia visio & ambulatio, cum sint actiones successiue, non possunt fieri in instanti; unde præsupponunt in homine potentiam progressiuam & visuam, non solum prioritate naturæ, & instantis à quo, sed etiam prioritate temporis & existentie, seu instantis in quo: quare cum vltima dispositio ad aliquam formam, eam comitetur, & sit in subiecto in eodem instanti quo forma in ipso recipitur, implicat quod homo per visionem & deambulationem seipsum disponat ad habendos oculos & pedes, & idem est de calefactione respectu ignis, cum illa pariter sit actio successiua, & non instantanea. E contra verò, cum actus contritionis & charitatis sint actiones instantaneæ, & non successiue, eliciuntur ab homine in eodem instanti iustificationis, in quo gratia infunditur, eamque prioritate solum naturæ præcedunt; ideoque licet ab ipsa effectiue procedant, possunt tamen ad illam disponere, non ad modum dispositionis antecedentis, sed concomitantis; sicut calor ut octo disponit ad formam ignis, à qua profluit, ut ait D. Thomas supra relatus.

Obijciunt insuper Aduersarij aliqua D. Thomæ testimonia, quæ videntur aduersari vestræ sententiæ, Nam S. Doctor 1. p. q. 62.

art. 2.

art. 2. ad 3. dicit quod ad conuersionem per quam aliquis se præparat ad gratiam habendam, non exigitur aliqua habitualis gratia, sed operatio Dei ad se animam conuertentis. Et in hac parte quæst. 109. art. 6. ait, quod ad hoc quod præparet se homo ad susceptionem doni gratiæ habitualis, non oportet præsupponere aliquod donum habituale in anima quia sic procederetur in infinitum, sed oportet præsupponi aliquod auxilium gratuitum Dei interius animam mouentis.

Verùm ad hæc facilè respondetur, D. Thomam, his & similibus locis, solum intendere, ad conuersionem quæ aliquis se præparat ad gratiam habendam non requiri aliam habituales gratiam, seu donum habituale distinctum à gratia sanctificante, quæ in instanti iustificationis infunditur, aliàs daretur processus in infinitum; sed sufficere talem gratiam quæ prout infunditur, gerit vices auxiliij mouentis, subindeque Dei motio, vel Dei mouentis auxilium appellari potest. Vnde locis supra relatis ait quod *per eam liberum arbitrium mouetur, & culpa remittitur*. Et quod *ipsa Dei mouentis motio, est gratiæ infusio*. Quo nihil clarius & expressius in fauorem nostræ sententiæ dici potest. Et hæc sufficiant de iustificatione peccatoris, quæ à D. Chrysologo *serm. 72. Sacramentum pauperis Sanctorum* appellatur. Vnde *serm. 68. mirabundus exclamat: Stupent Angeli, miratur cælum, paueat terra, caro non fert, auditus non capit, non attingit mens, tota suscinere non potest creatura, æstimare non sufficit, credere pertimescit.*

## CAPV T XVI:

*De merito iusti, quæ est tertius gratiæ habitua-  
lis effectus.*

**H**ominem ex gratia seu per gratiam operando, posse verè & propriè, seu de condigno, aliquid à Deo promereri, constat ex varijs Scripturæ locis, quibus asseritur operibus iustorum respondere mercedem apud Deum, & gloriam dari à Deo vt iusto iudice, & tanquam coronam iustitiæ. Et in hoc Deus honori nostro non parùm profecto consuluit, nam vt eleganter ait Cassiodorus: *Parum laudis habet virtutum corona, quæ ex labore non descendit; potest quidem habere palmam, sed non habet gloriam. Hæc est magnarum ratio virtutum, vt quantò plus homo laborat, tantò plus mercedis acquirat.* Neque per iustorum merita, Christi meritis derogatur, vt garrunt Nouatores, sed potiùs ea magis attolluntur & amplificantur; cùm maxima gloria sit, quod Christus non solum potuerit pro se mereri, sed etiam suis meritis, nobis vim ad merendum obtinere. Sicut quod causæ naturales possint aliquid efficere, non derogat infinitæ potentiæ & efficientiæ Dei, sed potiùs illius virtutem ostendit, quatenus non solum virtutem efficiendi habet, sed etiam potest alios efficientes efficere, seruata sibi nihilo minus semper propria excellentia primæ & vniuersalissimæ causæ. Hoc præmisso, duo præcipuè hic discutienda & explicanda sunt, nimirum quæ conditiones ad meritum re-

qui-

quirantur , & quamnam homo possit sibi , vel alijs , de condigno vel de congruo promereri ?

## §. I.

*De conditionibus ad merendum requisitis .*

**S** Ex requiruntur conditiones ad meritum , tres se tenent ex parte actus meritorij , duæ ex parte hominis merentis , & vltima ex parte Dei præmiantis , de quibus hic breuiter agendum est .

*Tres conditiones ex parte actus meritorij requisitæ .*

**V** T actus sit meritorius in primis debet esse liber , non solum libertate à coactione , sed etiam à necessitate , vt definit Innocentius X. in sua constitutione , & expressè docet D. Thomas qu. 6. de malo art. vnico , vbi ait quod opinio aliquorum qui posuerunt quod voluntas hominis ex necessitate mouetur ad aliq. d. eligendum , quamuis ad id non cogatur , est heretica , tollit enim rationem meriti & demeriti ab humanis actibus ; non enim videtur esse meritorium , quod aliquis sic ex necessitate agit , quod vitare non possit . Ratio etiam id suadet , nam esse meritorium vel demeritorium , est proprietas quadam actus humani : Sed actus purè spontanei , & à sola coactione , non verò à necessitate , innuens , non sunt propriè humani : Ergo nec meritorij vel demeritorij , Maior patet , Minor probatur .



*Illæ actiones propriè humanæ dicuntur, quæ ex voluntate deliberata procedunt, ut ait S. Doctor in hac parte supra qu. 1. artic. 1. Sed actus purè spontanei, non procedunt à voluntate deliberata, id est ex deliberatione rationis, & electione voluntatis, ut patet in amore beatifico, & volitione boni in communi: Ergo actus humani propriè dici non possunt. Argumenta quæ in contrarium fieri solent, in tractatu de voluntario & inuoluntario cap. 4. §. 2. proposita & soluta sunt.*

*Secundo, ut actus sit meritorius apud Deum, debet esse moraliter bonus, quia opus malum non est dignum præmio, sed pœna: opus verò indifferens, vel nullum est in individuo, iuxta communioem & probabiliorem sententiam; vel si opus indifferens in individuo admittatur, non est cur potius præmio quam pœna dignum sit; nam si non meretur pœnam, quia caret malitia, etiam non meretur præmium, quia caret bonitate morali.*

*Tertio, ut opus sit meritorium, debet fieri in obsequium alterius, illius scilicet, qui mercedem siue præmium redditurus est: Cum enim meritum respiciat retributionem, oportet ut retributio expectetur & debeatur à persona determinata; quod enim à nullo debetur, à nullo iure aliquo exigitur: Sed non debetur merces ab aliqua persona, nec ab ea exigipotest, nisi actio ad ipsam dirigatur, & in eius obsequium cedat: Ergo ut opus sit meritorium, debet fieri in obsequium alterius & cedere in bonum, utilitatem, vel honorem illius qui mercedem siue præmium redditurus est.*

*Due conditiones ex parte personæ merentis necessarie.*

**P**rima est status gratiæ, hoc enim supponit Tridentinum sess. 6. cap. 16. & can. 32. & colligitur ex scriptura Ioan. 15. *Sicut palmes non potest ferre fructum, nisi manserit in vite, sic nec vos, nisi in me manseritis*, nempe per fidem & charitatem, ut SS. Patres, & Scripturæ interpretes, passim exponunt. Ratio autem est, quia ad meritum condignum vitæ æternæ, non solum opus, sed etiam persona debet esse isti fini proportionata, subindeque ad ordinem diuinum, & statum amicitiae & filiationis diuinæ, per gratiam sanctificantem eleuata.

Altera est status viæ, ut ex varijs Scripturæ testimonijs apertè colligitur: Dicitur enim Eccl. 9. *Mortui non habent ultra mercedem*. Et cap. 11. *Vbi ceciderit lignum, ibi manebit*. Vbi per casum ligni, mors hominis designatur, & per eius immobilitatem & permanentiam, meritum vel demeritum hominis in alia vita non augeri vel minui declaratur. Vnde Apostolus ad Galat. 6. *Vnum tempus habemus operemur bonum ad omnes*. Et Ecclesiastes cap. 9. *Quodcumque (inquit) facere potest manus tua, instanter operare*. Quia (ut ait Hieronymus in cap. 6. 1. ad Corinth.) *Tempus sementis est præsens vita, cum transierit, operandi tempus aufertur*. Demum ipse Christus Ioan. 9. de se dicebat: *Me oportet operari opera eius qui misit me, donec dies est. Venit nox quando nemo potest operari*. Vbi per diem, tem-

pus præsentis vitæ intelligitur ; per noctem verò mors, seu status post mortem, in quo nemo potest meritoriè operari . Vnde Origenes homil. 3. in Psal. 36. Dominus Saluator ait, *veniet nox quando nemo potest operari*, & hoc dicit de illo tempore quo unusquisque pro malis suis recipiet panas. Tunc ergo dicit mortem illam futuram, cum iam nemo potest operari aliquid, sed unusquisque tunc pascitur ex operibus suis quæ hic positus operatus est. Cum ergo nox fuerit: nemo operatur. In illo tempore malo, cum peccatores supplicijs affliguntur, erit sine dubio fames his qui nullos fructus boni operis collegerunt. In illo autem famis tempore saturabuntur iusti, ex fructibus scilicet iustitiæ suæ. Sicut enim in deserto sex diebus colligebant manna, in sexta autem die, non unius diei modium, sed quantum sufficeret ad crastinum colligebant, & unusquisque edebat in die sabbati quæ collegerat in die sexta: ita etiam nunc, velut sexta quædam dies putanda est Domini nostri Iesu Christi aduentus, & tempus hoc dispensationis eius, quam passione sua hoc in sæculo procuravit. Et idcirco dum in die sexta sumus, colligamus manna dupliciter, ut sufficere nobis possit, dum advennerit vera sabbati observatio populo Dei. Si enim non collegerimus duplices cibos, qui nobis & in præsentis sæculo sufficiant & in futuro, in diebus famis non saturabimur.

Huius conditionis nullam aliam existimo assignari posse rationem, quam diuinam voluntatem, quæ disposuit & ordinavit dare præmium operibus vitæ, non autem illis quæ fiunt post mortem. Valde tamen consentaneè ad  
natu-

naturam hominis, præfixus est terminus viæ, in puncto mortis, & dissolutionis animæ à corpore; connaturale enim est animæ humanæ, ut mediante corpore suam perfectionem acquirat, & in illo plures habeat occasiones merendi & pugnandi pro brauiò beatitudinis comparando. Congruum etiam est, ut creaturæ intellectuales per fidem ad visionem perueniant, & prius intellectum Deo submittant, quam ad illum videndum eleuentur.

Quid verò dicendum sit de Enoch & Elia, in paradiso terrestri degentibus, & Antichristum quem debellaturi & extincturi sunt præstolantibus, vtrum mereantur necne? problema est vtrinque probabile, alijs affirmantibus, alijs negantibus. Vnum ex his duobus necessariò dicendum existimo, nempe vel illos sanctos viros, ab eo tempore quo in paradysum terrestrem translati sunt, non mereri; quia licet mortales sint, non sunt tamen conditionibus mortalitatis subiecti, sicut alij homines, qui lege & modo communi in corpore mortali viuunt; subindeque nec sunt propriè viatores, nec comprehensores, sed veluti *æternitatis candidati*, ut loquitur Tertullianus libro de resurrectione carnis. Vel si ab eo tempore mereantur, eorumque meritum duret vsque ad illorum mortem, quam pro Christo in fine mundi patientur, eos tunc in gratia & charitate æquaturos Apostolos, ipsumque Ioannem Baptistam, subindeque in gloria & beatitudine pares illis futuros. Nec mirum, cum illi futuri sint secundi Christi aduentus præcursores, Apostoli, nec non Martyres eius gloriosi, qui (ut ait idem Tertullianus) *Antichristum*

*sanguine suo extinguunt. Quid horum probabilius & verosimilius sit, prudens Lector iudicabit;*

*Conditio ad meritum ex parte Dei requisita, nempe ordinatio operis ad præmium.*

**R**atio est primò, quia Deus non est capax alicuius obligationis erga creaturam, nisi ex ordinatione sua, vt docent D. Augustinus in Psalm. 83. his verbis: *Debitorem ipse fecit se, non accipiendo, sed promittendo,* & S. Thomas hic quæst. 114. art. 1. ad 3. vbi ait *Deus non efficitur simpliciter debitor nobis, sed sibi ipsi, in quantum debitum est, vt sua ordinatio impleatur:* Ergo vt actio hominis erga Deum inducat aliquod ius retribuendi præmium; indiget Dei ordinatione. Vnde idem S. Doctor in corp. eiusdem articuli sit ait: *Meritum hominis apud Deum esse non potest, nisi secundum præsuppositionem diuinæ ordinationis.*

Secundò, cum opera nostra sint pluribus titulis Deo debita, si Deus ea non ordinaret ad præmium, nullum homo posset ius habere ad illud, nec per consequens infallibiliter illud assequi; posset enim Deus opera nostra acceptare pro alijs titulis sibi debitis, puta pro titulo creationis, vel supremi dominij quod habet in omnes creaturas: Ergo vt homo possit apud Deum mereri aliquod præmium, & infallibiliter illud assequi, necesse est vt Deus ad illud ordinet opera eius. Cuius etiam signum est, quod opera iustorum in purgatorio existentium, & liberi Beatorum actus, quamuis à charitate profecti, nihil tamen  
apud

apud Deum merentur ; quia licet interno valore non careant , ea tamen ad præmium Deus non ordinavit .

## §. II.

*Retributio præmij pro meritis in Deo , non est ætus gratitudinis , aut fidelitatis , sed strictæ iustitiæ , non commutativæ , sed distributivæ .*

**P**rima pars huius assertionis probatur primò ex illo Apostoli 2. ad Timoth. 4. *Reposita est mihi corona iustitiæ , quam reddet mihi Dominus in illa die iustus iudex* . Ex quibus verbis hoc potest argumentum deduci : Quod datur ut corona iustitiæ , & à Deo ut iusto iudice , tribuitur ex iustitiâ , non verò ex gratitudine solùm aut fidelitate : Sed ex Apostolo vita æterna datur à Deo ut corona iustitiæ , & ab illo ut iusto iudice confertur : Ergo datur ex iustitiâ , non verò ex gratitudine solùm , aut fidelitate . Vnde D. Thomas ibidem lect. 2. verba illa Apostoli expendens , sic ait : *Corona iustitiæ dicitur , quia eam Deus ex sua iustitiâ reddit* . Et Augustinus tract. 3. in Ioan. *tam debitum flagitat (inquit) iam debitum exigit : ut ante suscipere gratiam , misericordem patrem opus habebat , ut præmium gratiæ , iustum iudicem* .

Confirmatur ex eodem Apostolo ad Hebræos 6. dicente : *Non est iniustus Deus ut obliviscatur operis vestri* : At si ex sola fidelitate mercedem operibus meritorijs debitam retribueret , si eam denegaret , non deberet dici

iniustus, sed infidelis: Ergo non ex fidelitate, sed ex iustitia, Deus reddit præmium meritis nostris. Vnde Augustinus de natura & gratia cap. 2. *Non est iniustus Deus, ut iustos fraudet mercede iustitiæ.* Et lib. 3. contra Iulian. cap. 3. *Deus ipse (quod absit) non erit iniustus, si ad eius regnum verus non admittitur iniustus.*

Probatur secundò eadem pars hac ratione: Licet id quod est debitum merito, possit reddi ex fidelitate, si sit promissum; aut ex gratitudine, si detur in recognitionem beneficii recepti; quatenus tamen est debitum merito ut tali, tanquam præmium scilicet, corona, & merces formaliter, non redditur ex fidelitate, aut gratitudine; tum quia neutra ex illis virtutibus hanc rationem formaliter respicit; tum etiam, quia si quod redditur ex fidelitate esset præmium & corona, sequeretur quod incarnatio, quæ ex fidelitate promissionum diuinarum fuit data antiquis Patribus, & remissio peccatorum, quæ peccatori se conuertenti datur ex fidelitate diuinæ promissionis, his verbis Zachar. 1. expressæ: *Conuertimini ad me, & ego conuertar ad vos*, essent præmium, merces & corona iustitiæ; quod tamen dici nequit, cum vtraque sit purè gratuita, & non possit cadere sub merito, saltem de condigno, ut de infusione primæ gratiæ infra patebit. Similiter si quod datur ex gratitudine præmium esset, manera quæ in gratiarum actionem Deo offerimus, haberent rationem præmij & coronæ, quod etiam absurdum est: Ergo quod est debitum ex merito, quatenus tali, non nisi ex iustitia redditur.

Con-

Confirmatur : Ex promissione acceptata sub conditione operis æqualis, oritur obligatio ex vera iustitia, vt patet in obligatione reddendi denarium, conuentione facta cum operarijs, sub conditione laborandi in vinea. Vnde cum Deus promiserit iustis vitam æternam, sub conditione bonorum operum, quæ ratione gratiæ & charitatis à qua procedunt, habent æqualitatem seu proportionem cum vita æterna, vt §. sequenti patebit ; supposito tali pacto seu promissione, oritur in Deo obligatio strictæ iustitiæ, ad remunerandum bona opera iustorum, ex gratia & charitate procedentia.

Quod verò talis iustitia non sit commutativa, sed distributiva, constat ex dictis in tractatu de voluntate Dei cap. 5. §. 3. vbi ostendimus in Deo non dari erga homines iustitiam commutativam, sed tantam distributivam, & varias quæ inter utramque reperiuntur differentias, ibidem exposuimus. Vnde breuitatè studentes, ad hunc locum Lectorem remittimus, nec eadem hic inutiliter repetamus.

Obijcies primò contra primam partem assertionis : Tridentinum sess. 6. cap. 16. sic habet : *Iustificatis hominibus, & bene operantibus, proponenda est vita æterna, tanquam gratia misericorditer promissa* : Sed quod datur ex vera & stricta iustitia, gratiæ nomine appellari nequit : Ergo vita æterna operibus bonis & meritorijs non tribuitur à Deo ex vera & stricta iustitia, sed tantum ex fidelitate, vel gratitudine.

Respondeo vitam æternam appellari gratiam, vel quia ortum habet ex summa gratia,



gratuita scilicet Dei prædestinatione ; vel dicitur gratia in radice , quia prima gratia sanctificans , quæ est principium & radix meriti vitæ æternæ , gratuito & misericorditer datur . Non intendit tamen Concilium negare quod vita æterna detur ex iustitia , quatenus est merces bonorum operum , sed id expressè ibidem asserit , subdens : *& tanquam merces ex ipsius Dei promissione , bonis ipsorum operibus & meritis fideliter reddenda : hæc est enim illa corona iustitiæ , quam post suum certamen & cursum , repositam sibi esse aiebat Apostolus , à iusto iudice sibi reddendam .* Idem colligitur ex Arausicano 2. cap. 18. dicente : *Debetur merces bonis operibus , si fiant , sed gratia quæ non debetur , præcedit ut fiant .* Id etiam eleganter expressit D. Prosper 2. de vocat. Gentium cap. 2. his verbis : *Natur unicuique gratia sine merito , unde tendat ad meritum ; & datur ante ullum laborem , unde quisque mercedem accipiat secundum suum laborem .*

Obijcies secundo : Merito non est debitum præmium ex iustitia : Ergo redditio præmij non est in Deo actus iustitiæ . Consequentia patet , Antecedens probatur . Si meritis hominum præmium vitæ æternæ esset debitum ex iustitia , sequeretur quod si Deus merita nostra non remuneraret , faceret nobis iniuriam : Sed hoc non est dicendum , cum enim sit dominus absolutus omnium , nihil adimit non suum , & per consequens nulli facit iniuriam : unde Augustinus super Psal. 70. *Si Deus damnaret iustum , quis ei diceret quid fecisti ? Quanta ergo misericordia ut iustificet iniustum ?* Ergo merito non est debitum præmium ex iustitia.

Re-

Respondeo negando Antecedens , intel-  
 lectum de merito condigno , vt debet intelligi ,  
 & ad illius probationem dico , quod si præ-  
 mium vitæ æternæ esset debitum iustis ex iu-  
 stitia commutatiua , Deus faceret nobis iniu-  
 riam , si merita nostra non remuneraret ; se-  
 cùs verò si sit debitum solùm ex iustitia distri-  
 butiua , quia debitum iustitiæ distributiue non  
 nascitur ex iure alterius erga distribuentem ,  
 sicut debitum iustitiæ commutatiue , sed ex  
 naturali rectitudine , & ipsa lege æquitatis ,  
 qua tenetur distributor commensurare præ-  
 mium meritis , illudque iuxta proportionem  
 dignitatis vel laboris vniuscuiusque distribue-  
 re . Vnde malus distributor non facit propriè  
 iniuriam illi cui non dat præmium æquale  
 merito , sed reipublicæ cuius est minister , vel  
 legi & æquitati naturali quam violat , vt loco  
 citato tractatus de voluntate Dei , fusiùs de-  
 clarauimus , vbi etiam soluimus obiectiones  
 quæ contra secundam partem nostræ assertio-  
 nis fieri solent . Vnde superest solùm hic ex-  
 plicandum , quid homo de condigno vel de  
 congruo promereri possit ?

### §. III.

*Iusti per opera ex gratia & charitate proceden-  
 tia , de condigno merentur vitam  
 æternam .*

**C**onstat ex Tridentino sess. 6. cap. 16. vbi  
 dicit quod *bene operantibus usque in fi-  
 nem , & in Deo sperantibus , proponenda est vi-  
 ta æterna , & tanquam gratia filiis Dei per Chris-  
 tum*

sum Iesum misericorditer promissa, & tanquam merces ex ipsius Dei promissione bonis ipsorum operibus & meritis fideliter reddenda. Et can. 32. damnat eum qui dixerit. Iustificatum bonis operibus quæ ab eo per Dei gratiam & Iesu Christi meritum, cuius viuum membrum est sunt, non verè mereri augmentum gratiæ, vitam æternam, & ipsius vitæ æternæ, si tamen in gratia decesserit, consecutionem.

Ratio etiam suffragatur: In hoc enim distinguitur meritum de condigno à merito de congruo, quod illud habet quandam coaptationem & æqualitatem saltem proportionis cum præmio, subindeque illud iure exigit; istud verò nullam habet cum præmio æqualitatem, nec debitum strictæ iustitiæ, sed solum ius & debitum amicitiae importat: Sed opera iustorum, ut procedunt à gratia & charitate, habent cum visione beatifica proportionis æqualitatem: Ergo illam de condigno promerentur. Maior constat, minor probatur. Gratia est semen gloriæ & visionis beatificæ, ut constat ex illo 1. Ioan. 3. Semen Dei manet in illo: At semen licet secundum entitatem sit imperfectius fructu, est tamen illi æquale secundum virtutem & proportionem; quia in semine non solum fructus, sed etiam tota arbor virtualiter continetur: Ergo gratia habitualis, & opera quæ ex illa procedunt, habent æqualitatem proportionis cum gloria. Vnde D. Thomas hic art. 3. ad 3. Gratia Spiritus Sancti quam in præsentis habemus, esse non sit æqualis gloriæ in actu, est tamen æqualis in virtute, sicut semen arborum, in quo est virtus ad totam arborem. Ob eandem

rationem gratia appellatur Ioan. 4. *fons aquæ salientis in vitam æternam*, quia nimirum fons proportionem habet ad flumen, imò totum flumen virtute continet. Item ad Ephes. 1. vocatur *pignus hæreditatis nostræ*; quia sicut in hoc pignus ab arra differt, quod arra minoris est pretij & valoris, quam res quæ emitur, pignus verò tantum valet quantum id pro quo offertur; ita pariter gratia sanctificans tantum valet, quantum visio beatifica, imò illam superat in perfectione, ut cap. 11. §. 3. corollario 2. ostensum est.

Hanc rationem egregiè expendit S. Doctor hic art. 3. ubi ait, quod opus meritorium hominis iusti potest dupliciter considerari, vno modo secundum quod procedit ex libero arbitrio, alio modo secundum quod est à gratia sanctificante. Si consideretur secundum substantiam operis, & prout est ex libero arbitrio, non potest esse meritorium de condigno vitæ æternæ, propter maximam eius inæqualitatem & improprietatem cum illa. Si verò loquamur de opere meritorio, secundum quod procedit ex gratia sanctificante, sic est meritorium vitæ æternæ, etiam de condigno, quia sub hac ratione habet æqualem valorem cum beatitudine supernaturali. Vnde sicut videmus quod filius natus ex Rege & foemina ignobili, quamvis ex parte matris non habeant ius hæreditarium ad regnum, illud tamen habet ratione patris, à quo nobilitatur: ita similiter, licet bona opera iustorum, ut procedunt à voluntate humana, non habeat condignitatem & sufficientem proportionem cum præmio vitæ æternæ; quatenus tamen sunt

sunt à Spiritu Sancto eam mouente & applicante, ac ipsi per gratiam & charitatem coniuncto, sunt meritoria de condigno æternæ beatitudinis.

Obijcies primo illud Apostoli ad Roman. 8. *Non sunt condignæ passiones huius temporis ad futuram gloriam quæ reuelabitur in nobis.* Quo significari videtur, actiones à nobis elicitas, & passiones toleratas, nullam habere proportionem & condignitatem cum gloria quam expectamus; præsertim cum passiones & operationes huius vitæ citò transeant, & gloria perpetuò sit duratura. Vnde idem Apostolus 2. ad Corinth. 4. ait *quod momentaneum est & leue tribulationis nostræ, æternum gloriæ pondus operatur in nobis.* Et D. Bernardus serm. 1. de diuersis: *Transit hora, transit & pœna; non sic remuneratio, non sic merces ipsa laboris; nescit finem, manet tota simul, & manet in æternum: guttatim pœna bibitur, per minutias transit; at in remuneratione torrens est voluptatis, & fluminis impetus, torrens inundans lætitiæ, flumen gloriæ, flumen pacis.*

Respondeo cum D. Thoma hic art. 3. ad 1. quod Apostolus loquitur de passionibus sanctorum secundum eorum substantiam, non verò ut à gratia & charitate procedunt; sic enim cum gloria habent condignitatem & proportionem, ut ostensum est. Nec obstat quod illæ citò transeant, & visio beatifica eternitate mensuretur; ista enim cum sua duratione immutabili & interminabili, in gratia, tanquam fructus in femine, continetur. Vnde Bernardus serm. 17. in Psalm. *Qui habit-*  
*at:*

rat : *Latet gloria , fratres mei , abscondita est in tribulatione ; in momentaneo hoc latet eternitas , in hoc leui pondus sublime & supra modum .*

Obijcies secundò: Deus, ex communi Theologorum sententia, remunerat opera iustorum ultra condignum : Ergo non est operibus iustorum vera condignitas ad præmium vitæ æternæ .

Sed nego consequentiam , Deum enim remunerare bona opera iustorum ultra condignum , non ita accipiendum est , quasi non sint digna præmio vitæ æternæ , sed quod ultra præmium quod de condigno bonis operibus debetur, Deus ex mera liberalitate & magnificentia , aliquem gradum gloriæ adiungat vt sic reddat non solum mensuram conferatam , qua æqualitas præmij ad meritum designatur , sed etiam coagitatam, & supereffluentem , per quod denotatur aliquis excessus supra æqualitatem .

#### §. I V.

*Vt opera hominis iusti sint meritoria de condigno vitæ æternæ , non sufficit quod per habitum charitatis habitualiter ordinentur in Deum , sed relatio actualis , vel saltem virtualis , charitatis requiritur .*

**P** Robatur primò ex SS. Patribus , qui passim docent charitatem esse radicem meritæ vitæ æternæ , subindeque debere in opera meritoria actualiter, vel saltem virtualiter influere : Augustinus enim de Spiritu & litt. cap. 14. ait quod *fructus non est bonus, qui de cha-*

charitatis radice non surgit Gregorius homil. 27. in Euang. Non habet (inquit) aliquid viriditatis ramus boni operis, si non manet in radice charitatis. Leo Magnus serm. 7. quadragesima, expendens illud Matth. 25. *Quandiu fecistis uni ex his fratribus meis minimis, mihi fecistis*, sic habet: *Quid hoc opere fructuosius? Quid hac humanitate felicius? quæ utique laude sua fraudanda non esset, si propter ipsam naturæ communicationem inuando homini ab homine præberetur: Sed quia quod non ex fidei procedit fonte, ad præmia æterna non peruenit, alia est conditio operum cælestium, alia terrenorum.* Vbi Pontifex ad opus cœleste, id est præmij cœlestis meritum, exigit ut de fidei fonte procedat; fidei, inquam, non informis & mortuæ, sed viuæ & per dilectionem operantis. Demum S. Thomas in 2. distinct. 40. quæst. 5. art. 5. ad 6. sic discurret: *Ad meritum non sufficit omnino habitualis ordinatio actus in Deum, quia ex hoc quod est in habitu nemo meretur, sed ex hoc quod actu operatur: nec tamen oportet quod intentio actualis ordinans in finem ultimum sit semper coniuncta cuilibet actioni, quæ dirigitur in aliquem finem proximum, sed sufficit quod aliquando actualiter omnes illi fines in finem proximum referantur.* Et distinct. 38. quæst. 1. art. 1. ad 4. ait: *Id patet in exemplo quod Avicenna ponit de artifice, qui si dum opus suum exercet, semper de regula artis cogitaret, multum in opere impediretur; sed sicut prius excogitauit per regulas artis, ita postmodum operatur, & sic in opere eius reuerentia artis saluatur.* Quo nihil clarius & expressius in fauorem nostræ asser-

assertionis dici potest.

Eadem veritas triplici ratione suaderi potest : Prima est : Infidelitas , vel status peccati mortalis , concomitans bona opera moralia ordinis naturalis , non vitiat illa , nec facit illa demeritoria , nisi aliquo modo informet ea , referendo in finem malum , vt cap. 3. ostensum est : Ergo pariter gratia & charitas concomitans bona opera hominis iusti , non dignificat illa , nec reddit meritoria vitæ æternæ , nisi ea informet per actualem , aut saltem virtualem relationem ad Deum vt vltimum finem .

Secunda , Vt actus nostri sint meritorij de condigno vitæ æternæ , requiritur vt fiant in obsequium Dei , cùm vna ex conditionibus ad meritum requisitis sit vt actus fiat in obsequium eius à quo merces exigitur , vt §. 1. declarauimus : Sed actus nostri non possunt fieri in obsequium Dei , nisi ad ipsum formaliter , vel saltem virtualiter ordinentur : Ergo ad meritum de condigno vitæ æternæ , virtualis saltem in Deum vt finem vltimum relatio requiritur .

Tertia , Vt opera nostra sint meritoria de condigno vitæ æternæ , necesse est quod sint supernaturalia quoad substantiam , vel saltem quoad modum ; quia vt dicebamus §. præcedenti , opera meritoria de condigno , debent esse eiusdem ordinis cum præmio : Sed ex sola concomitantia habitus charitatis , opera nostra non possunt effici supernaturalia , quoad substantiam , vel quoad modum ; ad hoc enim requiritur aliquis influxus charitatis , actualis , aut virtualis , quo ad ordinem supernaturalem ele-



eleuentur : Ergo vt actus nostri sint meritorij de condigno vitæ æternæ , imperium actuale, vel saltem virtuale charitatis exigitur . Vnde quando D. Thomas quæst. 2. de malo artic. 5. ad 7. ait , *habentibus charitatem omnis actus est meritorius* , non loquitur de habentibus charitatem solum habitualiter , & sine vlllo influxu actuali aut virtuali in actus aliarum virtutum , sed de habentibus charitatem formaliter aut virtualiter influentem in huiusmodi actus . Similiter quando Tridentinum sess. 6. cap. 16. dicit bona opera hominis iustificati vitam æternam promereri , loquitur de operibus à gratia & charitate procedentibus , vel ab ipsa imperatis ; ait enim iustum mereri *operibus in Deo factis* : Sicut autem quando opera dicuntur fieri in nomine Christi , intelligitur ea fieri ex motu charitatis ; ita & quando in Deo facta appellantur , significatur ea esse facta ex charitatis imperio , & ad Deum vt vltimum finem , virtualiter saltem , ordinata .

Obijcies primò : Vt opera moraliter bona sint satisfactoria de condigno pro peccatis , non requiritur relatio seu imperium charitatis : Ergo neque vt sint meritoria vitæ æternæ.

Respondeo , dato Antecedente , de quo in tractatu de pœnitentia , negando consequentiam & paritatem ; quia aliunde petitur condignitas meriti ; condignitas enim satisfactionis sumitur ex adæquatione pœnæ cum culpa , iuxta illud Apocal. 18. *Quantum glorificauit se , & in delicijs fuit , tantum date illi tormentum & luctum* : ad hoc autem vt pœna sit æqualis culpæ , charitatis imperium non

requiritur : meritum verò de condigno vitæ æternæ , fundatur in proportionem actus cum tali præmio , quam opera nostra sine influxu actuali aut virtuali charitatis habere nequeunt . Vnde D. Thomas quæst. 2. de malo artic. 5. ad 7. *Modus charitatis sub necessitate præcepti includitur, secundum quod præceptum ordinatur ad consecutionem beatitudinis, non autem secundum quod ordinatur ad vitandum reatum peccati.*

Ex hoc intelliges, hominem per opera moraliter bona ordinis naturalis, posse implere præcepta naturalia, quamvis illis operibus non possit vitam æternam promereri, nisi fiant ex motivo charitatis, & ab illa virtualiter saltem imperentur. Vnde quando Augustinus de spiritu & litt. cap. 14. ait, *mandatum non servari, nisi ex amore iustitiæ; non enim fructus est bonus, qui de charitatis radice non surgit*; hoc debet intelligi de observantia mandatorum, ut est meritoria beatitudinis, & prout ad salutem animæ & vitam æternam conducit; non verò de observantia præceptorum naturalium, quantum ad substantiam; hæc enim non solum ex charitatis radice, sed etiam ex amore boni honesti procedere potest, ut cap. 3. declarauimus.

Obijcies secundò: Omnes actus Christi Domini erant infiniti valoris, ex eo præcisè quod procedebant à persona infinitæ dignitatis: Ergo similiter in homine iusto omnia opera bona meritoria erunt, ex eo præcisè quod à persona grata procedant.

Respondeo primò, negando Antecedens, in Christo enim illæ duntaxat actiones erant  
ina-

infiniti valoris, quæ erant reflexivæ supra suppositum Verbi diuini, & quæ à Theologis *Theandricæ* appellantur; non verò illæ in quibus dignitas suppositi diuini, merè concomitanter & materialiter se habebat, qualis erat v. g. comestio, aut deambulatio Christi, ut docent Theologi in Tractatu de Incarnatione.

Respondeo secundò, dato Antecedente, negando consequentiam & paritatem; cum enim gratia sit habitus, subditur voluntati nostræ quantum ad usum; inde si nullatenus in opera nostra influat, & ad ea materialiter solum & concomitanter se habeat nullatenus ea dignificat: persona autem Verbi non subditur vsui libero voluntatis, cum substantialis sit, & non possit voluntas sine personæ concursu operari; ideoque dignificat opera à Christo elicita, secundum totum quod potest, & per consequens infinite.

## §. V.

*Soli charitati præmiū essentiale beatitudinis tribuitur, alijs autem virtutibus præmiū duntaxat accidentale, si illarum actus à charitate non imperentur.*

**P**robatur primò ex scriptura, quæ varijs in locis testatur coronam gloriæ, & dona seu bona gloriæ cœlestis, promissa vel præparata esse soli charitati: Iacobi 1. *Beatus vir qui suffert tentationem, quoniam cum probatus fuerit accipiet coronam vitæ, quam repromisit Deus diligentibus se* 1. ad Corinth. 2. *Oculus*

*lus non vidit, nec auris audiuit, nec in cor hominis ascendit quæ præparavit Deus ijs qui diligunt illum. Cui consonat oratio illa Ecclesiæ, Dominicæ 3. post octavas Trinitatis: Deus qui diligentibus te bona invisibilia præparasti, insunde cordibus nostris tui amoris affectum, ut te in omnibus & super omnia diligentes, promissiones tuas, quæ omne desiderium superant, consequamur. Demum Apocal. 21. Angelus mensura arundinea aurea metitur portas & murum cœlestis Ierusalem, ut per hoc significaret, charitatem esse mensuram gloriæ essentialis, & gradus luminis gloriæ commensurari gradibus charitatis. Vnde Augustinus lib. 83. quæstionum, quæst. 46. Anima quantum charitati adhærescit, tantum lumine gloriæ illustrabitur. Et D. Thomas 1. p. quæst. 12. art. 6. Intellectus plus participans de lumine gloriæ perfectius Deum videbit: plus autem participat de lumine gloriæ, qui plus habet de charitate; quia ubi maior est charitas, ibi est maius desiderium, & desiderium quadammodo facit desiderantem aptum & paratum ad susceptionem desiderati: unde qui plus habebit de charitate, perfectius Deum videbit, & beator erit.*

Eadem veritas triplici ratione probari potest. Prima est, perfectio vitæ Christianæ essentialiter consistit in charitate: Ergo meritum præmij essentialis in illa sola fundatur, subindeque nulli alteri virtuti nisi ex eius motione & imperio, potest competere. Consequentia patet, præmium enim essentialis patriæ correspondet perfectioni essentiali vitæ, unde tantò maior quis erit in beatitudine, quan-

quantò præstantior fuerit in perfectione vitæ Christianæ. Antecedens verò docetur expressè à D. Thoma 2.2. quæst. 184. art. 1. ubi sic discurret: *Unum quodque dicitur esse perfectum, in quantum attingit proprium finem, qui est ultima rei perfectio: Caritas autem est quæ unit nos Deo, qui est ultimus finis humanæ mentis, quia qui manet in charitate, in Deo manet, & Deus in eo, ut dicitur 1. Ioan. 4. & ideo secundum charitatem specialiter attenditur perfectio christianæ vitæ.* Vnde Augustinus de natura & gratia cap. 42. *Charitas est verissima, plenissima, perfectissimaque iustitia.* Et cap. ultimo: *Charitas inchoata, inchoata iustitia est; charitas prouecta, prouecta iustitia est; charitas perfecta, perfecta iustitia est.* Item Bernardus serm. 27. in Cantica, magnitudinem animæ, seu perfectionem eius essentialem in ordine supernaturali, ex magnitudine seu perfectione charitatis docet esse metiendam: *Quantitas cuiuscumque anime (inquit) æstimeretur de mensura charitatis quam habet, ut verbi gratia, quæ multum habet charitatis magnasit; quæ parum, parua; quæ verò nihil, nihil: dicente Apostolo, si charitatem non habuerim, nihil sum.*

Secunda ratio: Per illud solùm meremur præmium essentialē, quod consistit in fruitione ultimi finis, per quod in huiusmodi finem tendimus: Sed per solam charitatem, in Deum ut ultimum finem tendimus, nam per actus virtutum moralium acquiratarum, non tendimus nisi in bonum honestum ordinis naturalis; per actus verò virtutum moralium iustissimarum, in bonum honestum ordinis super-

natu-

**naturalis** : Ergo per solos actus à charitate elicitos vel imperatos , præmium essentialē meremur .

**Tertia ratio** : Non est æquum , nec rationi consonum , quod ancillæ & pedissequæ habeant idem præmium & eandem coronam ac domina & regina , nisi ex eius imperio : Sed charitas est domina & regina aliarum virtutum , quæ sunt veluti eius ancillæ & pedissequæ : Ergo charitati specialis debetur corona , nempe gloria essentialis , quæ proinde non tribuitur alijs virtutibus , nisi ex eius imperio .

Adde quod , ut actus sit meritorius vitæ æternæ , debet in bonum Dei præmiantis referri , ut constat ex dictis §. 1. explicando conditiones ad meritum requisitas : Sed actus aliarum virtutum non referuntur in bonum diuinum , nisi à charitate , quæ sola bonum diuinum , seu Deum ut in se bonum , respicit : Ergo non sunt meritorij vitæ æternæ , nisi ex charitatis imperio ; & per consequens , nisi à charitate imperentur , illis non datur præmium essentialē beatitudinis , sed duntaxat accidentale .

**Obijcies primò** : Actus fidei est dispositio valde proportionata præmio vitæ æternæ , ut docet D. Thomas in hac parte supra quæst. 3. art. 3. ubi ait quod fidei in via correspondet visio in patria , in qua formaliter consistit beatitudo . Idem dici potest de spe , tum quia est valde affinis fidei ; tum etiam quia sicut fidei correspondet clara visio in patria , ita & spei comprehensio , ut ibidem asserit S. Doctor : Ergo actus fidei & spei sunt meritorij de condigno visionis beatificæ , subindeque præmij essentialis .

Respondeo quod actus fidei est dispositio valdè proportionata præmio vitæ æternæ, quando est formatus, & à charitate formaliter aut virtualiter imperatus; secùs verò si sit informis, & si non includat aut supponat charitatis imperium. Vnde quando D. Thomas ait fidei in via correspondere visionem in patria, loquitur de fide formata, & à charitate imperata. Idem, seruata proportionem, de actu spèi dicendum est; licet enim spes sit virtus theologica, & proprietas attingat Deum immediatè, non tamen attingit Deum, vt est bonus in se, sed solùm quatenus est bonum nostrum, & prout à nobis diligitur amore concupiscentiæ, vt attingat illum, vt in se bonus est, & in eius obsequium & bonum referatur, requiritur charitatis imperium.

Obijcies secundò: Actus virtutum moralium infusarum habent proportionem cum præmio essentiali vitæ æternæ: Ergo illud de condigno promerentur. Consequentia patet ex supra dictis, Antecedens verò sic ostenditur. Omnis actus procedens à gratia sanctificante habet proportionem cum vita æterna: Sed actus elicit à virtutibus moralibus infusis, procedunt à gratia sanctificante: Ergo habent proportionem cum vita æterna. Minor constet, cum enim omnes virtutes infusæ emanent à gratia, sicut proprietates ab essentia, ipsa gratia mediantibus illis operatur, eo modo quo essentia, medijs suis proprietatibus, seu potentijs. Maior verò hac ratione suadetur: Motus cuiuscumque naturæ habet proportionem ad finem illius, sicut motus grauium & leuium est proportionatus ad fines ipsorum, &

illa ad centrum perducit : Sed proprius finis gratiæ est vita æterna , vnde Ioan. 4. gratia vocatur *fons aquæ salientis in vitam æternam* : Ergo omnis actus procedens à gratia sanctificante , habet proportionem cum vita æterna .

Respondeo negando Antecedens, & ad eius probationem , distinguo maiorem : Omnis actus procedens à gratia sanctificante , habet proportionem cum vita æterna , mediante imperio charitatis , concedo maiorem ; secluso charitatis imperio , nego maiorem . Ad probationem illius , distinguo etiam maiorem : Motus cuiuslibet naturæ habet proportionem ad finem illius , si sit perfectus , concedo maiorem . Si sit imperfectus , nego maiorem . Motus verò gratiæ imperfecti sunt , & veluti informes , nisi à charitate imperentur ; vnde sine eius motione & imperio non possunt efficaciter tendere in finem vltimum , nec per consequens vitam æternam de condigno promereri . Nec obstat quod gratia Ioan. 4. appelletur *fons aquæ salientis in vitam æternam* , per hoc enim non significatur quod gratia sanctificans immediate per seipsam tendat in vitam æternam , & claram Dei visionem , sed solum mediante charitate , quæ est prima & principalis eius proprietas , & formalis tendentia seu inclinatio in finem supernaturalem . Sicut in naturalibus graua & leuia , per propriam naturam & substantiam non tendunt ad centrum , sed mediante grauitate & leuitate , quæ sunt principia proxima motus sursum & deorsum .



## §. VI.

*Opera bona moralia, ex viribus naturæ profecta, nec de condigno, nec de congruo, primam gratiam auxiliantem promerentur.*

**I**N prima parte huius assertionis, ut in fidei dogmate, conveniunt omnes Theologi contra Pelagium, qui cum existimaret liberum arbitrium sufficere ad bene operandum, & per gratiam solum adiuvari ut facilius posset, consequenter etiam asseribat, primum divinæ gratiæ auxilium dari nobis intuitu alicuius boni operis facti sine gratia, tanquam propter meritum non solum de congruo, sed etiam de condigno. Hic error in pluribus Concilijs damnatus est, præsertim in Milleuitano, Palestino, & Arausicano secundo, in quibus Pelagio præcipitur, ut fateatur gratiam Dei non secundum merita nostra dari.

Potest insuper duplici ratione confutari. Prima est: meritum de condigno adæquari debet præmio in morali æstimatione, ut constat ex dictis §. 3. At huiusmodi æqualitas operibus naturæ ad præmium supernaturale repugnat, cum res ordinis naturalis & inferioris nequeat in morali æstimatione rem superioris ordinis adæquare; ut ex terminis manifestum apparet: Ergo etiam repugnat quod opera naturalia sint condignè meritoria præmij supernaturalis.

Altera est: Prædestinatio Christi est exemplar nostræ: Sed unio hypostatice, quæ est pri-

primus ac præcipuus prædestinationis Christi effectus, fuit purè gratuita, & absque ullis præcedentibus meritis, vt ex varijs Scripturæ testimonijs demonstrat Augustinus cap. 15. de prædest. Sanctorum : Ergo similiter prima vocatio, seu primum gratiæ auxilium, datur purè gratis, & non cadit sub merito de condigno operum naturalium.

Secunda verò pars assertionis, quæ dicit opera naturalia ne quidem de congruo primam gratiam auxiliantem promereri, est contra Semipelagianos, seu Massilienses, qui Pelagij hæresim aliquantulum temperantes, assererant nos quidem non posse sine gratia Dei, opera aliqua bona facere, sed debere præueniri voluntates nostras ab ipsa, vt aliquod opus bonum vel inchoetur vel consummetur. Sed tamen dicebant ante ipsam gratiam præcedere ex parte nostra, non quidem bona opera, sed initia quædam fidei & bonæ voluntatis, quorum intuitu Deus mouebatur ad dandam primam gratiam auxiliantem, subindeque aliquod meritum, saltem de congruo, respectu primæ gratiæ admittebant. Hic error videtur proscriptus in Tridentino sess. 6. cap. 7. vbi dicitur exordium nostræ iustificationis desumi à vocatione Dei, *qua nullis eorum existentibus meritis vocantur* &c. Nam particula illa negatiua, omne meritum tam de condigno quam de congruo videtur excludere.

Potest etiam confutari ex Scriptura : Apostolus enim ad Ephes. 1. ait nos esse sorte vocatos, & ad gratiam electos, subindeque nullis præcedentibus meritis, vel occasionibus,

aut congruitatibus; qui enim sorte eligitur, omnem istam præventionem excludit, ut ibidem lect. 4. obseruat D. Thomas, his verbis: *Quia fors nihil est aliud quam inquisitio rerum quæ ex diuina voluntate fiunt, gratia autem eius ex sola diuina voluntate dependet, inde est quod gratia diuina vocationis dicitur fors, quia Deus per modum sortis, secundum occultam providentiam, non ex alicuius meritis, per gratiam internam vocat.*

Demum idem error potest hac ratione refelli: Meritum de congruo potest dupliciter sumi; primò strictè, & pro iure amicabili ad præmium, per quod distinguitur à merito de condigno, quod debitum strictæ iustitiæ, & non solum ius & debitum amicitiae importat. Secundò largè & impropriè, pro quacumque exigentia formæ, siue sit per modum iuris & condignitatis, siue per modum solius habitudinis connaturalis; quo pacto omnis dispositio potest dici meritum de congruo respectu formæ ad quam disponit, quia eam connaturaliter exigit: At opera naturalia neutro modo primam gratiam auxiliantem promereri possunt: Non quidem primo, cum ius amicabile ex gratia sanctificante media charitate proueniat, & opera naturalia gratiam iustificantem antecedentia, sint ab inimico Dei. Nec etiam secundo, cum homo per opera viribus naturæ elicitæ, non possit ad primum gratiæ auxilium se disponere, ut cap. 8. ostensum est: Ergo opera naturalia ne quidem de congruo primam gratiam auxiliantem promereri possunt.

Præcipuum Pelagianorum & Semipelagianorum motiuum, ad asserendum primam gratiam,

tiam, intuitu boni operis naturalis, tanquam meriti de condigno, vel saltem de congruo, à Deo conferri, erat (vt constat ex Epistolis Prosperi & Hilarij ad Augustinum), quia si Deus sola sua voluntate, & nulla existente causa, occasione, vel merito, aut demerito ex parte hominis, suam gratiam concederet, aut denegaret, esset personarum acceptor, ac iniustus suorum donorum distributor; quod repugnat Apostolo ad Roman. 2. & ad Ephes. 6. dicenti; *Non est acceptio personarum apud Deum.*

Sed hoc fundamentum facile potest conuelli, vitium enim acceptionis personarum tunc solum incurritur, quando quod debetur pluribus, vni soli confertur: At diuina gratia nulli debetur, aliàs gratia non esset: Ergo Deus eam tribuens vni, & non alteri, nullo ex parte eorum precedente discrimine, acceptor personarum non est.

Confirmatur & magis illustratur hæc ratio; Personarum acceptio opponitur iustitiæ distributiue, vt docet D. Thomas 2. 2. quæst. 63. art. 1. Sed iustitia distributiva non habet locum in gratuitis & indebitis, qualia sunt dona & auxilia gratiæ, vt declarat idem S. Doctor in cap. 9. epist. ad Roman. lect. 3. his verbis: *In iustitia distributiva locum habet in his quæ dantur ex debito, puta si aliqui meruerunt mercedem, vt plus laborantibus maior merces donetur; non autem habet locum in his quæ sponte & misericorditer aliquis dat, puta si aliquis duos pauperes in via inueniens, det vni quod potest, vel disponit in elemosynam dare, non est iniquus, sed misericors. Similiter si aliquis*

*duobus equè ipsum offendentibus, uni dimittas offensam, & non alteri, & misericors uni, & iustus ad alterum, neutri verò iniquus. Cum ergo omnes homines, propter peccatum primi parentis, damnationi nascantur obnoxii, quos Deus per suam gratiam liberat, sola misericordia liberat, & sic quibusdam est misericors quos liberat; quibusdam autem iustus quos non liberat, neutris autem iniquus.*

Confirmatur ampliùs: Absque vitio acceptionis personarum Deus ex pluribus creaturis possibilibus, quasdam decrevit producere, alijs relictis intra statum possibilitatis; & tamen ex parte illarum quas de facto produxit, nulla ratio inducens ad eorum productionem præcessit. Et ut Deus humanitatem verbo copularet, nullum ex parte illius meritum præcessit, & tamen ex hoc quod alias humanitates sibi vnibiles reliquerit, tale vitium non incurrit: Ergo similiter, licet Deus uni & non alteri suam gratiam largiatur, nullo ex parte illorum præcedente discriminè, non potest argui tanquam personarum acceptor, ac iniustus suorum donorum distributor. Vnde bellè S. Prosper lib. 2. de vocat. Gentium cap. 32. *De parentum carnalium iudicijs conquiri non audemus, cum aliquot filios suos, ante ulla morum examina, ante aliqua pietatis obsequia, indulgentiori complectuntur affectu. In dominis quoque erga famulos libera est dispositio, neque instè quoque reprehenditur, qui de vnius conditionis familia, quosdam sibi quos benignius honestaret, & quos liberalius erudiret, elegit. Nanquid de summi Patris, & veri Domini benevolentissima equitate causandum est,*

*est, quod in magna domo eius, innumeris differentijs vniversa variantur?*

Aliud difficilè argumentum contra secundam nostræ assertionis partem, in hunc modum proponi potest: Magis distat ordo hypostaticus ab ordine gratiæ, quam ordo gratiæ ab ordine naturæ; cùm illa distantia sit infinita, hæc autem finita: Sed non obstante hac maiori distantia, potest ordo hypostaticus cadere sub merito de congruo actuum pertinentium ad ordinem gratiæ; vt enim docent Theologi in tractatu de incarnatione, antiqui Patres meruerunt de congruo substantiam, aut saltem circumstantias incarnationis: Ergo à fortiori opera ordinis naturalis possunt mereri de congruo præmium pertinens ad ordinem gratiæ, non obstante distantia quæ inter vtrumque ordinem reperitur.

Respondeo maiorem esse veram de distantia entitatiua, falsam de distantia proportionis & habitudinis; nam hoc modo plus distat ordo gratiæ ab ordine naturæ, quam ordo hypostaticus ab ordine gratiæ: cùm enim isti ordines intra genus ordinis supernaturalis contineantur, vnus potest terminare habitudinem actuum spectantium ad alium; è contra verò, cùm ordo gratiæ & naturæ sint omnino diuersi, vnus non potest ordinari ad alterum, sed forma supernaturalis totius naturæ exigentiam excedit.

Hæc responsio & doctrina potest hoc exemplo illustrari: plus distat Deus ab intellectu perfuso lumine gloriæ, quam substantia spiritualis ab oculo corporeo, & tamen potest Deus ab intellectu lumine gloriæ perfuso vi-

deri, sequens autem substantia spiritualis ab oculo corporeo. Cuius alia ratio esse nequit, nisi quia maior illa distantia est in genere entis, non in ratione habitudinis potentiae & obiecti. Idem cum proportionem dicendum est in praesenti, scilicet quod ordo hypostaticus potest attingi ab ordine gratiae, quamvis ordo gratiae non possit attingi ab ordine naturae; quia licet ordo hypostaticus magis distet ab ordine gratiae, quam ordo gratiae ab ordine naturae; illa tamen maior distantia est in genere entis, non verò in ratione proportionis & habitudinis, ob rationem quam assignauimus.

## §. VII.

*Homo non meretur de condigno primam gratiam iustificantem, bene tamen augmentum eius, & primam gloriam, primae gratiae habituali correspondentem.*

**P**rima pars videtur certa de fide, tum quia ad Rom. 3. dicitur: *Iustificati gratis per gratiam ipsius*; tum etiam, quia Concilium Arausicanum can. 17. definit charitatem esse donum Dei diffusum in cordibus nostris, nullis ex parte nostra praecedentibus meritis. Et Tridentinum sess. 6. cap. 8. praedicta Apostoli verba exponens ait: *Gratis iustificari ideo dicimur, quia nihil eorum quae iustificationem praecedunt, siue fides, siue opera, ipsam iustificationis gratiam promeretur.*

Ratio etiam iussuatur, nam si homo mereretur de condigno primam gratiam iustifi-

can-

antem, vel eam mereretur per opera ipsam antecedentia, vel per opera ipsam subsequen-  
tia. Non primum, tum quia opera primam  
gratiam iustificantem antecedentia, vel sunt  
purè naturalia, vel imperfectè supernatura-  
lia, subindeque gratiæ iustificanti, quæ est  
perfectissima forma ordinis supernaturalis,  
improportionata. Tum etiam, quia omne  
opus existentis in peccato, impeditur ob indi-  
spositionem & statum subiecti, ne habeat ra-  
tionem meriti apud Deum. Neque secundum,  
primò quia cum meritum sit veluti motus qui-  
dam & via ad præmium, non potest esse quid  
posterius illo, unde homo non potest mereri  
illud quod iam habet, sicut nec sperare bo-  
num quod iam possidet. De quo fusiùs in tra-  
ctatu de incarn. cap. 5. Secundò, quia actus  
non potest esse meritorius illius formæ, à qua  
totum suum valorem desumit, unde commu-  
niter dicitur: *Principium meriti non potest ca-  
dere sub merito*. Sed actus qui gratiam iustifi-  
cantem in anima supponunt, & ex sunt poste-  
riores, ab illa totam suam dignitatem & va-  
lorem meritorium desumunt: Ergo illam me-  
reri nequeunt.

Quod verò mereantur augmentum gratiæ  
constat ex Tridentino sess. 6. can. 32. ubi ana-  
thema dicit ei qui dixerit, hominis iustificati  
bona opera, non verè mereri augmentum  
gratiæ. Et ex Augustino tract. 5. super epist.  
Ioannis, ubi sic ait: *Charitas meretur augeri,  
paupers meretur perfici*. Id etiam suadet ra-  
tio D. Thomæ hic artic. 8. ubi sic discurre:  
*Illud cadit sub merito condigni ad quod motio  
gratiæ se extendit: motio autem alicuius mouen-*



is non solum se extendit ad ultimum terminum motus, sed etiam ad totum progressum in motu: terminus autem motus gratiae est vita aeterna, progressus autem in hoc motu est secundum augmentum charitatis vel gratiae, secundum illud Proverb. 4. Iustorum semita quasi lux splendens procedit & crescit usque ad perfectam diem, qui est dies gloria: sic igitur augmentum gratiae cadit sub merito condigni.

Demum quod iusti mereantur primam gloriam, primae gratiae habituali correspondentem, patet ex iam dictis: cum enim prima gloria non sit principium merendi, sicut prima gratia, sed potius terminus meriti, nihil obstat quominus homo per actus contritionis & charitatis, in instanti iustificationis elicitos, primam gloriam primae gratiae iustificanti respondentem, mereatur de condigno, quamvis talem gratiam per illos actus de condigno mereri nequeat. Vnde D. Thomas supra qu. 112. art. 2. ad 1. *Preparatio hominis ad gratiam habendam, quaedam est simul cum ipsa infusione gratiae, & talis operatio est quidem meritoria, sed non gratiae quae iam habetur, sed gloriae quae nondum habetur.*

Quæres, an homo per actus contritionis & charitatis, alijsque actibus quibus ad gratiam iustificantem disponitur, eam mereatur de congruo?

Respondeo affirmatiuè, si meritum de congruo largè & impropriè accipiatur; nam actibus charitatis, contritionis, alijsque bonis operibus iustificationem antecedentibus, peccator ad primam gratiam iustificantem disponitur, & eam impetrat à Deo: Sed dispositio di-

est congruentiam quandam respectu formæ ad quam disponit; cum eam connaturaliter exigit: Similiter petitio & impetratio alicuius doni, aliquod meritum imperfectum dici potest, iuxta illud Augustini epist. 105. *Neque ipsa remissio peccatorum sine aliquo merito est, si fides hanc impetrat; neque enim nullum est meritum fidei.* Ergo homo actibus contritionis, & charitatis, alijsque quibus ad gratiam iustificantem disponitur; eam meretur de congruo, si meritum de congruo largè & impropriè vsurpetur. Secùs verò, si propriè & strictè sumatur, prout scilicet importat ius amicabile ad præmium; actus enim qui gratiam iustificantem per modum dispositionis antecedunt, tale ius habere nequeunt, cum ius amicabile ex gratia iustificante media charitate proveniat. Nec obstat quod actus contritionis quo homo ad iustificationem ultimò disponitur, procedat, in nostra sententia, à gratia habituali; quia non procedit ab illa, ut habet rationem habitus & formæ sanctificantis, ac dantis esse diuinum participatiuè, sub qua ratione fundat perfectam hominis cum Deo amicitiam; sed producit ab illa, prout est in infundi, & gerit vices auxilij, sub qua formalitate non habet fundare ius amicabile ad præmium, sed solum mouere voluntatem ad operandum.

6374758963922

6374758963922

## §. VIII.

*Iustus non potest sibi mereri de condigno reparationem post lapsum, nec perseverantiae donum; neque etiam de congruo, si meritum de congruo strictè & propriè sumatur; bene tamen; si largè & impropriè accipiatur.*

**P**rima pars probatur ratione D. Thomæ hic art. 7. meritum de condigno dependet ex motione divinæ gratiæ; Sed motio divinæ gratiæ in iusto non potest se extendere ad reparationem ipsius post lapsum; cùm per lapsum sive peccatum subsequens illa interrumpatur: Ergo homo iustus non potest sibi mereri de condigno reparationem post lapsum. Confirmatur: Si iustus posset sibi de condigno mereri reparationem post lapsum; vel mereretur illam, antequam laberetur, vel postquam esset lapsus. Nentrum dici potest. Ergo &c. Minor quoad secundam partem manifestà est, quia postquam aliquis est lapsus in peccatum, ante gratiæ recuperationem, non est capax merendi aliquid à Deo de condigno, cùm sit eius inimicus. Probatur verò quoad primam. Omnia merita hominis iusti, quæ sibi comparavit dum in gratia & charitate existeret, suspenduntur & impediuntur per peccatum subsequens: Ergo tale peccatum non potest tolli, nec homo lapsus reparari, ex vi meritorum quæ habuit antequam in peccatum laberetur. Peccatum ergo se habet respectu meritorum præcedentium, sicut fictio ad Sacramentum: Vnde sicut fictio non tollitur

ex vi sacramenti fidei suscepti, sed requiritur aliquod aliud sacramentum ad ipsam remouendam; ita peccatum mortificans & suspendens merita præcedentia, non tollitur vi huiusmodi meritorum; sicque nullus potest, dum est in gratia, mereri sibi de condigno reparationem post lapsum.

Quod etiam sibi mereri non possit de condigno perseuerantiæ donum constat ex Augustino de bono perseu. cap. 13. ubi sic ait: *Vnde satis dilucidè ostenditur, & inchoandi, & usque in finem perseuerandi gratiam Dei, non secundum merita nostra dari.* Quibus verbis apertè docet, quod sicut prima gratia præueniens non cadit sub merito de condigno, ita nec perseuerantiæ donum. Vnde ibidem cap. 2. perseuerantiam appellat *magnum Dei donum, quo cætera eius dona conseruantur.* Et Tridentinum sess. 6. cap. 13. dicit illud donum aliunde haberi non posse, nisi ab eo qui potens est, eum qui stat statuere, ut perseueranter stet; & eum qui cedit restituere.

Observant etiam aliqui Scripturæ interpretes, electorum prædestinationem esse veluti auream quandam catenam, qua Deus homines ad se trahit, & à terra ad cælum eliehit, ex varijs Dei beneficijs veluti annulis compositam, nimirum prædestinatione, vocatione, iustificatione, & glorificatione: iuxta illud Apostoli ad Roman. 8. *Quos enim prædestinavit, hos & vocavit; quos vocavit, hos iustificavit; quos iustificavit, hos & glorificavit.* Aurea verò fibula, qua annuli illi inter se connectuntur, perseuerantia est; hæc enim finem principio, & glorificationem æternæ præ-

prædestinationi coniungit. Hac Deus electos ad coelum attrahit, sed miserans, secundum illud Ieremiæ 31. *In charitate perpetua dilexi te, ideo attraxi te miserans*, quia perseverantiæ donum, ex sola Dei misericordia, non verò ex nostrorum operum meritis, nobis tribuitur.

Ratio etiam suffragatur, primò quia ut discurret D. Thomas hic art. 9. in argumento *sed contra*: Si iustus posset sibi perseverantiæ donum de condigno promereri, sequeretur quod nullus iustus, vel saltem pauci essent qui illud non obtinerent, cum meritum de condigno infallibiliter cōsequatur suum præmium; & sic vel nullus vel pauci à gloria exciderent, quod repugnat verbis illis Christi. *Muli sunt vocati, pauci verò electi*. Nec dici potest, ideò multos non obtinere donum perseverantiæ, quia per peccatum illi ponunt impedimentum. Nam ut rectè instat S. Doctor ibidem, hoc ipsum quod est peccare, opponitur perseverantiæ; unde si iustus perseverantiæ donum de condigno mereretur, Deus non permetteret ipsum cadere in peccatum.

Secundò id probat in corpore articuli, hac ratione: Id quod se tenet ex parte principij meriti, non cadit sub merito: Sed donum perseverantiæ se tenet ex parte principij meriti quia dependet ex motione gratiæ, quæ est principium omnis meriti: Ergo non cadit sub merito. Vbi, ut rectè observat Caietanus, S. Doctor non loquitur de quacunque motione gratiæ, sed de motione gratiæ, quatenus est conservatiua gratiæ; sic enim non potest cadere sub merito, quia est continuatio primæ  
pro-

productionis, & entitatiuè ipsamet prima productio seu infusio gratiæ, quæ non potest cadere sub merito, cùm sit principium omnis meriti. Sicut nemo potest de condigno mereri suam conseruationem, quia conseruatio non est actio distincta à creatione, quæ non cadit sub merito, sed est ipsa creatio continuata, vt docet D. Thomas 1. p. q. 104. art. 1. ad 4.

Dices, homo potest de condigno mereri beatitudinem, subindeque perpetuitatem gloriæ in ea contentam. Ergo à fortiori perseuerantiam in gratia, quæ non ita nobilis est ac perfectæ, sicut perseuerantia in gloria.

Sed nego consequentiam & paritatem, magnum enim inter perpetuitatem gloriæ & perseuerantiam in gratia, intercedit discriminẽ; quia perseuerantia patriæ se tenet ex parte termini meriti, perseuerantia verò viæ ex parte principij, vt docet D. Thomas hic art. 9. ad 2. his verbis: *Perseuerantia quæ erit in gloria, comparatur ad motum liberi arbitrij meritorium, sicut terminus, non autem perseuerantia viæ.*

Tertia pars assertionis, quæ dicit iustum non posse sibi mereri reparationem post lapsum, vel perseuerantiæ donum, merito de congruo strictè & propriè sumpto, faciliè probari potest ex dictis §. præcedenti; nam, vt ibidem declarauimus, meritum de congruo strictè sumptum, importat ius amicabile ad præmium, & per hoc distinguitur à merito de condigno, quod dicit debitum strictæ & veræ iustitiæ, nempe distributiæ: Sed iustus non habet ius amicabile ad reparationem post lapsum, quia per peccatum subsequens destruitur

tur amicitia Dei cum illo ; violata autem ac dissoluta amicitia, ius amicabile subsistere nequit ; unde peccatum subsequens non minus mortificat & suspendit meritum de congruo strictè sumptum, quam meritum de condigno : Ergo sicut propter illam suspensionem & interruptionem, iustus non potest sibi de condigno mereri reparationem post lapsum ; ita nec illam potest promereri de congruo ; si meritum de congruo strictè & propriè accipiat.

Idem dicendum de dono perseverantiae, propter rationem D. Thomae supra expositam : Quod enim pertinet ad principium meriti, non cadit sub merito etiam de congruo ; cum principium meriti neque de condigno neque de congruo ullus promereri possit, ut constat de prima gratia, quam, quia est principium meriti, nullus de condigno, nec de congruo, mereri potest si meritum de congruo strictè & propriè accipiat, ut §. 6. contra Semipelagianos demonstravimus : Ergo si donum perseverantiae ad principium meriti pertineat, ut supra ostensum est, sub merito etiam de congruo propriè accepto cadere nequit.

Quod verò reparatio post lapsum, & perseverantiae donum possint cadere sub merito de congruo, largè & impropriè sumpto, ex supra dictis manifestum relinquitur ; nam opus impetratorium alicuius doni seu beneficii, & disponens ad illud, largè & impropriè meritum de congruo dici potest : Sed plures iusti impetrant à Deo suis bonis operibus & orationibus reparationem post lapsum, & perseverantiae donum, & ad talia dona à Deo gratis & mi-

& misericorditer recipienda se disponunt: Ergo illa de congruo promerentur; si meritum de congruo largè & improprie accipiantur. Vnde de hoc merito intelligendus est Augustinus, dum lib. de bono perseu. cap. 6. loquens de dono perseuerantiæ ait: *Hoc Dei donum suppliciter emereri potest; sed cum datum fuerit, amitti contumaciter non potest.* Nam ad verbum illud *suppliciter*, aperte declarat, ipsum ibi loqui de merito largè & improprie sumpto, nempe prout idem significat ac impetratio. Cum verò S. Thomas hic art. 7. ait: *Nullus potest sibi mereri reparationem post lapsum futurum, neque merito condigni, neque merito congrui*, intelligendus est de merito congrui strictè sumpto: Nam ad Hæbreos 6. lect. 3. aliquod eius meritum de congruo, largè scilicet & improprie sumptum, respectu illius videtur admittere.

Quæres, an purus homo possit promereri alteri de condigno, vel saltem de congruo, primam gratiam auxiliantem, vel iustificantem, & reparationem post lapsum?

Respondeo neutrum posse promereri de condigno, bene tamen de congruo in vera & stricta significatione, seu prout importat ius amicabile ad præmium.

Prima pars huius resolutionis est D. Thomæ hic art. 6. ubi sic ait: *Meritum condigni nullus potest mereri alteri primam gratiam, nisi solus Christus.* Quod probat ibidem hæc ratio: Meritum de condigno debet esse ex motione diuinæ gratiæ: Deus autem non mouet nec ordinat opera iustorum, nisi ad merendum sibi vitam æternam, vel augmentum gra-





tiæ; quia talia opera procedunt à gratia adoptionis, non verò à gratia capitali, quæ non reperitur nisi in Christo Domino, qui solus est caput omnium aliorum hominum: Gratia verò adoptionis in hoc à gratia capitali distinguitur, quod illa solum ordinatur ad sanctificandum & perficiendum subiectum in quo est, nec se extendit ad aliorum perfectionem & sanctificationem; ista verò habet influxum quendam, saltem moralem, in alios (cùm proprium capitis sit in membra sibi coniuncta influere) subindeque mouet subiectum in quo est ad sanctificandum alios, & ad merendum ipsis gratiam de condigno. Sed de hoc fusiùs in tractatu de incarnatione, cùm agemus de gratia Christi capitali. Hanc rationem insinuat Leo Papa epist. 97. cap. 2. his verbis: *Quamuis multorum Sanctorum in conspectu Domini pretiosa mors fuerit, nullius tamen insontis occisio, redemptio fuit mundi: acceperunt iusti, non dedere coronas, & de fortitudine fidelium exempla nata sunt patientiæ, non dona iustitiæ.*

Secundæ verò pars, quæ asserit, purum hominem posse alteri mereri primam gratiam, & reparationem post lapsum, merito de congruo strictè & propriè sumpto docetur etiam à D. Thomæ articulo citato, his verbis: *Merito congrui potest aliquis alteri mereri primam gratiam, quia enim homo in gratia constitutus implet Dei voluntatem, congruum est secundum amicitie proportionem, ut Deus impleat hominis voluntatem in saluatione aliorum.* Quibus verbis declarat, opera & orationes iustorum, habere ius quoddam amicabile, ratione cuius  
alio-

Aliorum salutem & iustificationem de congruo mereri possunt. Vnde Iacobi 5. dicitur: *Orate pro invicem ut saluemini, multum enim valet deprecatio iusti assidua.* Tritum est etiam illud Augustini in sermone de B. Stephano: *Si Stephanus non orasset, Ecclesia Paulum non haberet; sed idcirco erectus est Paulus, quia in terra inclinatus, exauditus est Stephanus.*

Quod diximus de prima gratia iustificante, dicendum est etiam de reparatione post lapsum, tum quia eadem est ratio de utraque; tum etiam quia iustus idcirco non potest sibi mereri reparationem post lapsum, merito de condigno, vel de congruo, propriè accepto, quia pro tempore quo redditur primum, non est in statu remunerabilis, cum pro tunc sit peccator, & Dei inimicus, ut supra declaravimus: Sed quando fit reparatio alterius, iustus pro tunc est in statu remunerabilis, cum pro illo tempore maneat iustus, & Dei amicus, ut supponimus: Ergo licet iustus non possit sibi mereri reparationem post lapsum, merito de congruo propriè sumpto, eam tamen potest alteri mereri.





# APPENDIX


## AD TRACTATVM

### DE GRATIA.

---

*De varijs Hæreticorum erroribus , circa  
gratiam & liberum arbi-  
trium .*

**C**Um plura quæ diximus in Tractatu  
de gratiâ , omnino pendeant ex ple-  
na & perfecta notitia eorum quæ  
olim in Pelagianis & Semipelagia-  
nis damnauit Ecclesia ; ad perfectionem &  
complementum illius , de Pelagiana & Semi-  
pelagiana hæresi , breuiter hic tractandum es-  
se , huicque tractationi pauca de erroribus  
Manichæorum , Lutheranorum , & Caluini-  
starum , subiungenda esse censuimus .



## CAP. V. T. L.

## De hæresi Pelagianâ.

**C**irca Pelagianam hæresim duo præcipue hic breuiter explicanda sunt. Nimirum quæ fuerit prima eius origo? & quot fuerint gradus seu status illius?

## §. I.

*Hæresis Pelagianæ origo.*

**P**rimam huius hæresis originem ad Iuciferum, vel Adamum; nonnulli referunt; ideoque illos primos hæresis Pelagianæ Patriarchas appellant, vt in Tractatu de Angelis annotauimus. Primum enim Iuciferi peccatum fuit superbia, qua summum bonum per seipsum, propriasque vires obtinere, spreto Dei auxilio, præsumpsit; quod ad Pelagianorum errorem pertinet. Vnde Bernardus serm. 3. de verbis Isaïæ: *Qui sedere præsumpsit, seipso voluit esse contentus*. Et Gregorius Magnus lib. 34. moral. cap. 18. *Relicto eo cui debuit inharere principio, suum sibi appetit quodammodo esse principium*. Similiter Adamus appetijt similitudinem Dei, non quantum ad omnimodam equiparantiam Deitatis, sed quantum ad propriam operandi potestatem; vt scilicet virtutem propriæ naturæ beatitudinem consequeretur; ideoque tam benè Protopelagianus, quam Protoparens, non immerito appellari potest. Vnde Augusti-

nus

nus Psalm. 68. ait, ipsum voluisse rapere, & veluti furari diuinitatem, & perdidisse felicitatem. Hinc aliqui non incongruè obseruant, adeò plausibilem, & naturæ corruptæ consentaneam esse Pelagianam hæresim, vt omnes ferè homines, naturali fermè instinctu, nisi fide corrigantur, Pelagiani sint; quia nimirum inuisceratæ nobis, & ab Adamo in posteros omnes transfusæ superbix, Pelagiana hæresis omnino adulatur.

Alij ad Simonem Magum huius hæresis originem referunt, ille enim in disputationibus cum D. Petro Apostolorum Principe, initio nascentis Ecclesiæ habitis, ex efficacia diuinæ voluntatis & gratiæ, euersionem liberi arbitrij sequi contendebat, vt S. Clemens libro 3. recognitionum refert. Scribit etiam Clemens Alexandrinus, qui floruit anno 204. libro 5. Stromatum, Basilidem, Valentinum, & Marcionem, asseruisse hominem per naturæ vires posse credere, benè operari, & saluari, quæ est ipsissima Pelagianorum hæresis.

Demum alij Origenem primum, aut saltè præcipuum, Pelagianæ hæresis architectum fuisse existimant; idque insinuat Hieronymus epistola ad Cresiphontem, vbi Pelagium alloquens ait: *Vis adhuc & alium nosse tui erroris Principem? Doctrina tua Origenis ramusculus est.* Vnde etiam Rufinus, Origenis sectator, & doctrinæ illius ex græco translator, malè de diuina gratia & arbitrij libertate sensit, vt colligitur ex eodem Hieronymo libro 1. Commentariorum in Ieremiam, vbi Grunnum (quo nomine Rufinum indigere solet) *Præcursorem Pelagij* nuncipat. Et  
sanè

sanè Celestius collega Pellagij, cùm in Carthaginensi Concilio hæresis negantis peccatum originale argueretur, se sequi Rufinum, libera voce protestatus est, dicens: *S. Presbyter Rufinus, Romæ qui mansit cum S. Pammachio, id dixit.* Ita refert S. Augustinus libro 2. de peccato originali cap. 3.

Ex illorum ergo hæreticorum fece ac cineribus, ut virulenta vipera, profiliuit Pelagiana hæresis, & obstetricantē manu Diaboli, eductus est coluber ille tortuosus, qui totum gratiæ Dei spiritum morsu venenoso extinguere conatus est.

Fuit autem Pelagius natione Britannus, ut asserit D. Augustinus epist. 106. ad Bonifacium; vnde S. Prosper carmine de ingratis, sic illum describit.

*Dogma quod antiqui satiatus selle Draconis,*

*Pestifero vomuit coluber sermone Britannus.*

Professione verò fuit Monachus, ut testatur in primis S. Chrysostomus epist. 4. ad Olympiadem, ubi sic dicit: *De Pelagio Monacho magno dolore affectus sum,* & Augustinus libro de hæresibus, hæresi 88. & libro 2. de peccat. meritis & remiss. cap. 16, & Isidorus Pelusiota lib. 1. epist. 314. quæ est de Pelagio Monacho. Eumque fuisse ex illis qui in Ægypto morabantur, refert Cardinalis Baronius annum 411.

Illum fuisse ingenio præstanti & acuto, eloquioque facundum, sæpè affirmat D. Augustinus, & patet ex eius epistola ad Deme- triadem Virginem, aduersus quam S. Augu-

stinus aliam, licet videlicet centesimam quadragessimam tertiam, scripsit ad Iulianam matrem Demetriadis, in qua sic ait: *Satis enim dici non potest quantum cupiamus in eorum hominum scriptis, quæ propter acrimoniam, atque facundiam, leguntur à plurimīs, apertam confessionem illius gratiæ reperiri.*

Demum eum adeò fuisse probum & religiosum, ut pro sancto, & in virtutibus Christianis eximiè prouecto haberetur testatur idem Augustinus lib. 3. de peccat. meritis cap. 1. his verbis: *Post paucissimos dies legi Pelagij quadam scripta, viri, ut audio, sancti, & non paruo prouectu Christiani.* Et cap. 3. vocat illum egregiè Christianum. Item lib. 2. retract. cap. 33. affirmat Pelagij vitam à multis prædicatam. Verùm hæc de Pelagio scripsit S. Doctor, dum pelle ouina vestitus, suum occultabat errorem: postquam autem belluina eius ferocitas cognita fuit, ipsum pestiferum hæreticum appellat. Nam in eodem capite subdit: *Pelagij ipsius nomen non sine laude aliqua posui, quia vita eius à multis prædicabatur, & eius illa redargui quæ in suis scriptis non ex persona sua posuit, sed quid ab alijs diceretur exposuit, quæ tamen postea iam hæreticus pertinacissima animositate defendit.* Isidorus quoque Pelusiota epistola supra citata, post exploratos attentius Pelagij mores, illum ait fuisse vagabundum, ex vno monasterio ad aliud subinde migrantem, perscrutandi & explorandi mensas omnium causa: *Tibi (inquit) annorum turba canitiem inuexit, & tamen rigidum atque inflexum animum habes, ex alio monasterio ad aliud subinde migrans,*  
atque

atque omnium mensas perscrutans & explorans. Quamobrem si carniū nidor, atque obsoniorum condimentum tibi curæ est, ijs qui Magistratus gerunt potius blandire, atque vrbium caminos vestigia; neque enim homines Eremitæ facultates eas habent, ut te quemadmodum tibi gratum est excipere valeant. Id ipsum testatur Orosius in Apologia, ubi de Pelagio loquens, ipsum Monoculum appellat, & cutem suam paulò magis curasse, quam Monachum deceret, affirmat. Et certè non potuit inimicus gratiæ Christi ventris non esse amicus, & malè blandas carnis delicias effusè quærens; non potuit inquam, escis carnalibus non inhiare, qui gratia Dei non curabat stabilire cor; illa enim è cruce Christi & vulneribus eius effluxa, amorem crucis, & deliciarum ac voluptatum contemptum inspirat,


## §. II.

*Præcipui errores Pelagij circa gratiam.*

**P**Ræcipui errores Pelagij circa gratiam, ad sex istos reuocari possunt. Primò quod homo viuere potest sine peccato, Secundò quod omnia diuina præcepta seruire potest sine gratia. Tertiò quod possit se præparare ad gratiam, sine auxilio gratiæ. Quartò quod potest homo mereri sine gratia. Quinto quod principium boni operis est ex nobis, consummatio ex Deo. Sextò quod gratia Dei secundum merita nostra datur. Hos errores deduxit Pelagius ab alio quò negabat peccatum originale à nobis contrahi, & ex Adamo in



eius posteros deriuari: ex hoc enim inferebat, liberum hominis arbitrium non esse infirmatum, nec læsum in suis naturalibus viribus, sed sanum in illis & integrum. Ex quo rursus deducebat non indigere aliquo gratiæ adiutorio vires ipsi tribuente, ad diuina seruanda mandata, ad bonos mores habendos, perficiendamque iustitiam, sed posita illorum cognitione, ea omnia efficere posse suis sanis & integris viribus arbitrium ipsum. Vnde negauit omne auxilium gratiæ, siue efficax, siue sufficiens, quod vires aliquas siue efficaces siue sufficientes arbitrio daret: sufficientes enim, imò efficaces vires habere arbitrium hominis ad diuina seruanda mandata contendebat, illasque sanas & integras in illo esse dicebat. Sicut autem ex negatione originalis peccati necessitatem gratiæ negabat Pelagius, modo explicato; ita negationem originalis peccati ex priori alio deducebat principio, ex libertate videlicet arbitrij, quam intelligere non valebat, nisi eam sanam, firmam, & fortem, ac sine læsione aliqua originalis peccati constitueret, sicut fuerat in primo parente ante peccatum. Vnde inferebat extinctum fore liberum arbitrium ad bonum, si infirmum ac læsum diceretur per originale peccatum, & impotens ad diuina seruanda mandata, & iustitiam perficiendam. Quare prætextus iste seruandæ humanæ libertatis, fuit præcipua causa cur & peccatum originale, & gratiæ necessitatem negauerit.



## §. III.

*Varij gradus seu status hæresis Pelagianæ.*

**Q**ui accuratiùs SS. Patrum volumina scrutati sunt, varios Pelagianæ hæresis status seu gradus distinguendos esse censent. Primus fuit veluti Ethnicismus à Philosophis acceptus; in quo Pelagiani, nulla facta mentione gratiæ, naturam hominis sufficere dicebant ad quæcumque opera virtutum exercenda, ad secunda omnia Dei mandata, & viuendum sine vlllo peccato, ac denique ad veram & æternam felicitatem consequendam. Vnde Pelagius Epistola ad Demetriadem nobilissimam virginem cap. 2. sic ait. *Quoties mihi de institutione morum & sanctæ vitæ conuersatione dicendum est, soleo primò humanæ naturæ vim qualitatemque monstrare, & quid effici possit ostendere, ac iam inde audientis animum ad species, incitare virtutum, &c. Optima enim animi incitamenta sunt, cum docetur aliquis posse quod cupiat.*

Hunc Pelagij errorem varijs in locis reprehendit ac detestatur Augustinus: nam lib. 3. contra Iulian. cap. 3. hæc scribit: *Natura ista in tantas & tam manifestas collapsa miseras, liberatorem, mundatorem & redemptorem Christum habet necessarium; non Iulianum; non Celsium, non Pelagium, laudatorem.* Et lib. 3. contra duas Epistolas Pelagian. cap. 14. Non sic (inquit) debemus laudare Creatorem, ut cogamur dicere, imò verò conuincamur dicere superfluum Salvatorem. Naturam hominis di-

gnis laudibus honoremus, easque laudes ad Creatoris gloriam referamus: sed quia nos creavit, ita sumus grati, ut non sumus quia sanat ingrati.

Hunc verò statum Pelagianismi ad Paganismum potius quam ad hæresim diximus pertinere: quia asserere, hominem ipsum sibi, repudiato omni, siue Dei, siue alterius adiutorio, ad omnem virtutem, sapientiam, felicitatemque sufficere, purum putumque Ethnicæ Philosophiæ somnium est; ut patet ex his verbis Senecæ Epistola 53. Pelagio præcinentis: *Est aliquid quo sapiens antecedit Deum; ille naturæ beneficio, non suo sapiens est. Ecce res magna, habere imbecillitatem hominis, securitatem Dei. Ecce suo beneficio, non Dei auxilio, sapientem fieri hominum putat: Unde Epist. 20. Huc (inquit) cogitationes tuæ tendant, hoc cura, hoc opta, omnia alia vota Deo remissurus, ut contentus sis temetipso, & ex te nascentibus bonis. Quæ potest esse felicitas Deo propior? Quasi cæterorum bonorum vota Deo essent remittenda; ad parandas verò animi opes, homo sibi ipsi sufficeret. Quare rursus Epist. 124. ait, Unum bonum esse, quod beatæ vitæ causa & firmamentum est, SIBI FIDERE. Similia habet Tullius in libro de natura Deorum, ubi in persona Cottæ inquit, Quia sibi quisque virtutem acquirit, neminem unquam acceptam Deo retulisse: propter virtutem enim iure laudamur, & de virtute rectè gloriāmur, quod non contingeret, si id donum à Deo non à nobis haberemus. Et paulò post subdit: Iudicium hoc unicum mortaliū est, fortunam à Deo petendam, à seipso su-*

sumendam esse sapientiam.

Ex his impuris prophana & gentilis Philosophiæ lacunis, hausta videntur illa Pelagij verba quæ tantopere Augustinus detestatur: *Spirituales diuitias nullus tibi præter te conferre poterit. In his ergo iure laudanda es, in his meritò cæteris præferenda es, QVIA NISI EX TE ET IN TE ESSE NON POSSVNT.* Vnde Faustus lib. i. de gratia cap. i. hæc scribit: *Pelagius dicit: quod ad obtinendam salutem natura hominis sibi sola sufficit.*

Secundus status seu gradus Pelagianæ hæresis fuit veluti semi-ethnicismus, in quo Pelagiani naturam ipsam tanquam gratiam cognoscere & prædicare cœperunt. Cum enim Pelagius malè audiret apud Catholicos, quod necessitatem gratiæ negaret, ad declinandam invidiam, & fucum Catholicis faciendum, moderationem quandam suæ sententiæ specie tenuis adhibuit, cœpitque nomine gratiæ, liberum arbitrium intelligere; quia gratis à Deo, id est nullis nostris præcedentibus meritis, in ipsa creatione nobis collatum est; & eatenus affirmavit gratiam esse necessariam ad bene operandum, & peccatum vitandum, quatenus sine libero arbitrio, neque bene agere, neque à malo abstinere possumus. Sic testatur Augustinus serm. i. de verbis Apostoli cap. 7. ubi de Pelagianis ait: *Disputantes contra gratiam pro libero arbitrio, fecerunt auribus pijs & Catholicis offensionem; cœperunt horveri, cœperunt ut certa perniciēs deuitari, cœpit de illis dici quod contra gratiam disputarent, & inuenerunt ad releuandam istam invidiam tale commentum: Non, inquit, contra*

*gratiam Dei disputo. Vnde probet? Ego ipse (inquit) non contra gratiam Dei disputo, quod liberum arbitrium defendo. Videte acumen, sed vitreum: quasi lucet vanitate, sed frangitur veritate. Et infra commentum suum interpretantes Pelagiani dicunt: Quia hominem Deus creauit, & liberum donauit arbitrium, quidquid homo potest de libero arbitrio, cuius gratie debetur, nisi eius qui eum condidit cum eo libero arbitrio? Nomine autem liberij arbitrij, intelligebant naturale bonum libertatis, cum reliquis necessarijs ad liberè operandum, quæ naturaliter nobis insunt; cuiusmodi sunt facultas consultandi & expendendi rationes, & motiua agendi vel non agendi, naturalisque propensio ad bonum, & auersio à malo, vt ibidem testatur Augustinus, & lib. de hæresibus, hæresi 88. nec non Hieronymus Epist. 1. ad Ctesiphontem, & lib. 1. dialogi contra Pelagianos.*

Porro hic status solo nomine distat à præcedenti: easdem enim omnino naturæ vires prædicat, hoc solum discrimine, quod iste causam proferat quæ ipsi tantas vires gratis dedit, & gratiæ nomine vtatur, ne gratiam omnino neglexisse videtur. Diximus autem eum *seni-ethuicisum* posse vocari: quia etiam Philosophi Gentiles eam gratiam agnoscebaat, licet eo nomine non vterentur. Vnde Seneca Epist. 90. *Quis dubitare potest (inquit) quin Deorum immortalium munus sit quod viuimus; Philosophiæ quod benè viuimus? Itaque tantò plus nos debere huic quam Dÿs, quanto maius beneficium est bona vita, quam vita. Aud n superbiam extollentem sese aduersus Deum,*

Deum, ac supra Deum? Ne tamen diuinæ gratiæ oblitus omnino videretur, quasi pudisset eum arrogantia, corrigendo subiicit: Pro certo dederetur, nisi ipsam Dñi Philosophiam tribuissent.

Non diu in isto statu, & in hac sola naturali gratia profitenda, perstitit Pelagius. Cùm enim statim Catholici intelligerent sibi futurum fieri, & gratiæ nomine eandem iterum naturam obtrudi, hanc gratiæ confessionem, veluti prorsus fraudulentam, irriserunt & condemnarunt: quare Pelagius adhuc pulsatus fidelium obiurgationibus, easque declinare volens, ad aliam speciem gratiæ, à natura & libero arbitrio distinctam, confugit, ad legem scilicet & doctrinam diuinitus traditam, cuius auxilio confessus est hominem indigere, vt declinet à malo, & faciat bonum. Vnde Augustinus de spiritu & littera cap. 2. de Pelagianis sic ait: Cùm vrgericaeperint, quomodo id præsumant asserere fieri sine ope diuina, reprimunt se, nec hanc vocem audent dimittere, quoniam vident quàm sit impia & non ferenda: sed aiunt, ideo ista sine ope diuina non fieri, quia & hominem Deus creauit cum libero voluntatis arbitrio, & dando præcepta ipse docet quemadmodum homini sit viuendum. Et infra: Neque quisquam, cùm verecundatus fuerit dicere per nos ipsos fieri nos iustos &c. quia videt hoc à fidelibus & pijs credi non posse, cùm dicitur: ad hoc se conuertat, vt dicat, ideo sine operatione gratiæ Dei nos iustos esse non posse, quia legem dedit, quia doctrinam instituit, quia bona præcepta mandauit.

Hinc Pelagiani, quò melius hoc suum de

gratia legis & doctrinæ commentum stabili-  
rent, magnis laudibus legem extollebant, ut  
testatur idem S. Doctor lib. 4. ad Bonifacium  
cap. 5. ubi hæc verba Pelagij in Epistola ad  
Demetriadem refert: *Lege velut lima natu-  
ra expolitur, & fulgori pristino redditur. Et  
ista: Quamdiu recentioris adhuc naturæ usus  
vignit, nec humanæ rationi velut quandam  
caliginem longus usus peccandi obduxit, sine  
lege dimissa est natura; ad quam Dominus  
nimis iam vitis obrutam, & quadam igno-  
rantie rubigine infectam, limam legis ad-  
monuit, ut huius frequenti admonitione ex-  
poliretur, & ad suum posset redire fulgorem.*  
Sicut ergo priores Hæretici diuiserunt Chri-  
stum; alij Diuinitatis eius veritatem, alij ve-  
ritatem carnis eius abnegantes: ita & Pela-  
gius crucem eius euacuauit; nam ut inquit  
Apostolus ad Galatas 2. *Si per legem iustitia,*  
*gratis Christus mortuus est.*

Hic est tertius, vel potius secundus Hære-  
sis Pelagianæ status, qui ab Ethnicismo dif-  
fert, & ad Iudaismum declinat: nam initio  
nascentis Ecclesiæ plures ex Iudæis, inter quos  
præcipuus fuit Cherintus, de gratia Christi  
malè senserunt, & se per legem iustificari,  
sufficiente ad eam custodiendam libero arbi-  
trio, docuerunt: contra quos Apostolus Epi-  
stolam ad Romanos scripsit, in qua mysteria  
diuinæ gratiæ & prædestinationis fusè expo-  
nit, ut sentire videtur Hieronymus, præsa-  
tione in Epistolam ad Galatas.

Doctrinæ legis addebant Pelagiani exem-  
pla Christi, & remissionem peccatorum. Nam  
primis quidē sæculis, ab Adamo vsq; ad Moy-  
sen

sen, sufficientem dicebant legem naturalem; quia propter illam primæ conditionis integritatem adhuc perseverantem, & vigorem legis naturalis, illæsamque libertatem arbitrij, non erat opus alia gratia: postea verò licentia & consuetudine peccandi sensim magis inualecente, naturā, mala educatione, & pravis exemplis corruptam, eguisse legis scriptæ subsidio, quam Deus per Moysen dedit: cumque postea ob nimiam humani generis corruptionē, quæ peccandi consuetudine inoluerat, lex illa non sufficeret amplius ad piè sancteque vivendum, venisse Christum, veluti tanti morbi medicum, qui homines gratia sua medicinali sanaret, & remissionem peccatorum, doctrinam euangelicam, & virtutum exempla præberet. Vnde Augustinus lib. de peccato origin. cap. 26. *Non igitur sicut Pelagius & eius discipuli, tempora diuidamus, dicentes primum vixisse iustos homines sub natura, deinde sub lege, tertio sub gratia. Ex natura, scilicet ab Adam tam longa etate qua lex nondum erat data: tunc enim, aiunt, duce ratione, cognoscebatur Creator, & quemadmodum esset vivendum, scriptum gerebatur in cordibus, non lege litteræ, sed naturæ. Verum vitiatis moribus (inquiunt) ubi capit non sufficere natura tam decolor, lex ei addita est, qua velut lima fulgori pristino, detrita rubigine, redderetur. Sed postea quam nimia, sicut disputat peccandi consuetudo præualuit, cui sanando lex parum valet, Christus aduenit, & tanquam morbo desperatissimo, non per discipulos, sed per seipsum medicus ipse subuenit.*

Itaque Pelagiani, ne gratiæ Dei videren-



tur inimici, multiplex genus gratiæ comminifcebantur: nam ipsum naturale arbitrium voluntatis, gratiam appellabant, legem Moyſis neceſſariam fuiſſe conſitebantur, qua velut lima fulgori priſtino, detrita rubigine, natura redderetur; doctrinam & reuelationem diuinam recipiebant, quæ nobis demonſtret quid facere debeamus; remiſſionem peccatorum, & Chriſti exempla, ad vitam ritè inſtruendam eſſe neceſſaria prædicabant. Vnde illi tuere philoſophia Ethnici, lege Iudæi, ſolo nomine Chriſtiani, & mutabilitate Prothei, in varias ſe ſe ſpecies transformantes, vt veram Chriſti gratiam abolerent.

Hæc ſunt certa & indubitata apud omnes Theologos, ſed quædam inter illos verſantur difficultates & controuerſiæ, quæſtiunculis ſequentibus breuiter diſcutiendæ & dirimendæ.

Quæres ergo primò, an Pelagijs, præter gratias illas externas iam explicatas, gratiam aliquam interiorem, tandem aliquando admiſerit, ſubindeque tertius vel quartus Pelagianæ hæreſis ſtatus admittendus ſit?

Reſpondeo Pelagium poſt multas diſputationes cum S. Auguſtino, & alijs SS. Patribus habitas, admiſiſſe tandem gratiam interiorem, intellectum illuſtrantem, & voluntatem moraliter excitantē. Pater hoc ex Auguſt. lib. de gratia Chriſti cap. 7. vbi refert verba Pelagij dicentis *Adiuuat nos Deus per reuelationem & doctrinam, dum cordis noſtri oculos aperit, dum futura demonſtrat, dum Diaboli pandit inſidias, dum nos maliſiformi & ineffabili dono gratiæ cæleſtis illuminat.* Et cap. 10. rursus ipſum ſic loquentem inducit: *Operatur in nobis velle*

quod bonum est, velle quod sanctum est, dum  
nos terrenis cupiditatibus deditos, mutorum mo-  
re animalium tantummodo præsentia diligen-  
tes, futurae gloriae magnitudine, & premio-  
rum sollicitatione succendit; dum revelatione  
sapientiae, in desiderium Dei stupentem susci-  
tat voluntatem, dum nobis (quod tamen alibi  
negare non metuit) suadet omne quod bonum  
est. Quibus ultimis verbis, quod tamen alibi  
negare non metuit, apertè declarat Augusti-  
nus, Pelagium initio quidem suae hæresis ne-  
gasse gratiam intellectum illuminantem, &  
voluntatem moraliter excitantem, sed postea  
(id est post Concilium Paestinum, plures-  
que concertationes cum ipso Augustino &  
alijs SS. Patribus habitas) illam admisisse.  
Addit tamen S. Doctor ibidem, per hoc non  
recessisse Pelagium à commendatione legis  
atque doctrinae, cum munus & officium legis  
& doctrinae sit, docere, illuminare, ostendere  
quid faciendum sit, & ad id hortari, suadere,  
ac excitare, non verò dare vires ad faciendum  
& implendum mandata, ut fusè prosequitur  
toto libro de Spiritu & littera. Unde cap. 24.  
libri citati de gratia Christi de Pelagianis lo-  
quens, eorumque doctrinam refellens, sic ait:  
Legant ergo & intelligant, intueantur atque  
fateantur, non lege atque doctrina insenante  
forinsecus, sed interna, occulta, mirabili at-  
que ineffabili potestate, operari Deum in cordi-  
bus hominum, non solum veras revelationes  
(ut fatebantur Peligiani, & uificere crede-  
bant) sed etiam bonas voluntates. Item D.  
Prosper in crimine de ingratis, expressè do-  
cet veram Christi gratiam, non tantum illu-  
mina-

minare intellectum, & excitare voluntatem, sed etiam eam intus reformare ac immutare, ut constat ex his verbis.

*Non hæc consilio tantum, hortatuque benigno*

*Suadens atque docens, quasi normam legis haberet*

*Gratia, sed mutans intus mentem, atque reformans,*

*Vasque novum ex fractis fingens virtute creandi.*

Quæres secundo, an Pelagius auxilium possibilitatis, seu quod dat nobis posse, admiserit?

Respondeo affirmatiuè, id enim constat ex Augustino lib. de gratia Christi cap. 3. ubi de Pelagio sic ait: Cùm tria constituat atque distinguat, quibus diuina mandata dicit impleri, possibilitatem, voluntatem, & actionem: possibilitatem scilicet qua potest homo esse iustus: voluntatem, qua vult esse iustus: actionem qua iustus est: horum trium primum, id est possibilitatem, datam confitetur à creatore nature, nec esse in nostra potestate, sed eam nos habere etiam si nolimus: duo verò reliqua, id est voluntatem, & actionem, nostra esse asserit, atque ita nobis tribuit, ut non vix à nobis esse contendat. Denique gratia Dei non ista duo, quæ nostra omnino esse; id est voluntatem & actionem, sed illam quæ in potestate nostra non est, & nobis ex Deo est, id est possibilitatem, perhibet adiuvare: tanquam illa quæ nostra sunt, hoc est voluntas & actio, tam sint valentia ad declinandum à malo, & faciendum bonum, ut divine adiutorio non indigeant: illud verò quod

nobis ex Deo est, tam sit inualidum, id est possibilis, ut semper gratia adiunetur auxilio. Et capite sequenti, sic Pelagium inducit loquentem. Nos sic tria ista distinguimus, & certum velut in ordinem digesta partimur: Primo loco posse statuimus, secundo velle, tertio esse. Posse in natura, velle in arbitrio, esse in effectu locamus. Primum illud, id est posse, ad Deum propriè pertinet, qui illud creaturæ suæ contulit: duo verò reliqua, hoc est velle & esse, ad hominem referenda sunt, quia de arbitrij fonte descendunt: Ergo in voluntate & opere bono laus hominis, imò, & hominis, & Dei, qui ipsius voluntatis & operis possibilitatem dedit, qui que ipsam possibilitatem, gratiæ suæ adiuvat semper auxilio; quod verò homo potest velle bonum atque perficere, solius Dei est. Et paulò post: Et generaliter uniuersa complectar, quòd possumus omne bonum facere, dicere, cogitare, illius est qui hoc posse donauit, qui hoc posse adiuvat: quod vero bene vel agimus, vel loquimur, vel cogitamus, nostrum est, qui hæc omnia vertere etiam in malum possumus. Et cap. 5. eiusdem libri Augustinus loquens de Pelagio, sic ait: Possibilitatem, voluntatem, actionem tanta subtilitate curauit distinguere, ut quandocumque legimus vel audimus diuinæ gratiæ adiutorium confiteri, siue in lege & doctrina, siue ubilibet constituat, sciamus quod loquitur, nec hæreamus aliter eum intelligendo quàm sentit. Scire quippe debemus quod nec voluntatem nostram, nec actionem diuino adiuari creditur auxilio, sed solam possibilitatem voluntatis, atque operis, quam solum ex his tribus nos habere.

re affirmat ex Deo: tanquam hoc sit infirmum; quod ipse Deus posuit in natura; cetera verò duo quæ nostra esse voluit, ita sint firma, & fortia, & sibi sufficientia, ut nullo indigeant eius auxilio; & ideò non adiunget ut velimus, non adiunget ut agamus, sed tantummodo adiunget, ut velle & agere valeamus. Denique idem S. Doctor cap. 47. totam de auxilio gratiæ controuersiam ad hoc vnum reducit, ut Pelagius non solum possibilitatis, sed etiam voluntatis & actionis auxilium confiteatur, & subdit: Si ergo consenserit nobis (Pelagius) non solum possibilitatem in homine, sed ipsam quoque voluntatem & actionem diuinitus adiunvari, nihil adiutorio gratiæ Dei, quantum arbitror, inter nos controuersia relinquetur.

Quæres tertio, an Pelagius admisserit gratiæ cooperationis & coefficientiæ?

Respondeo affirmatiuè, & probo primò ex D. Hieronymo lib. 1. contra Pelagium in principio, ubi refert Pelagium dixisse: Quidquid in me boni habeo, illo suggerente & adiunante completur. Et interroganti Hieronymo, quod agis bonum, tuum est, an Dei? Respondet: Meum est. & Dei: ut ego operer, ille adiunat.

Probo secundò ex D. Augustino in Enchirid. cap. 32. & lib. 1. ad Simplician. qu. 2. ubi clarè supponit Pelagium docuisse, Propterea dictum esse ab Apostolo, non est volentis neque currentis, sed misericordis Dei, quia ex utroquo fit, id est ex voluntate hominis, & misericordia Dei: tanquam diceretur, non sufficit sola voluntas hominis, si non sit etiam misericordia Dei: Ergo supponit Pelagium gratiam cooperationis & coefficientiæ admisisse.

Quæ-

Quæres quartò , An Pelagiani veram Christi gratiam , quæ facit velle & operari , tandem aliquando admiserint ?

Respondent aliqui cum Iansenio , Pelagianos , post ubique damnatum Pelagium , de sua pertinacia aliquid remittentes , veram Christi gratiam quæ facit velle & operari admisisse , sed eam dupliciter adulterasse & corrupisse ; primò , quia dixerunt talem gratiam non dari gratis , sed ex merito ; secundò quia illam non ad boni operis initium , sed duntaxat ad eius perfectionem & consummationem requiri affirmabant , subindeque illos cœpisse tunc deflectere ad Semipelagianismum. Vnde Augustinus lib. 2. ad Bonifacium cap. 8. *Isti ( loquitur de Pelagianis ) volunt in homine ab ipso homine incipere cupiditatem boni , ut huius cepti meritum etiam perficiendi gratia consequatur.* Et lib. de hæresibus hæresi 88. sic habet : *Denique Pelagius increpatus à fratribus , quod nihil tribueret adiutorio gratiæ Dei , correctioni eorum hætenus cessit ; ut non eam libero arbitrio præponeret , sed infideli calliditate supponeret , dicens ad hoc eam dari hominibus , ut quæ facere per liberum iubentur arbitrium , facilius possint implere per gratiam .*

Verùm licet ex his & similibus Augustini testimonijs quæ profert Iansenius , manifestè constet Pelagianos , post damnatam suam hæresim , sub Zozimo Papa , ad Semipelagianismum deflectere cœpisse , & docere gratiam ex meritis bonæ voluntatis dari , eamque solum ad facilius operandum requiri ; dubium tamen ac incertum est , an illi tunc veram Christi gratiam , quæ nos facit velle & operari  
admi-

admisserint? Augustinus enim cap. 47. lib. de gratia Christi, quem post damnatam hæresim Pelagij à Zozimo Papa edidit ( vt ipse ait lib. 2. retract. cap. 50. ) totam inter ipsum & Pelagium de auxilio gratiæ controuersiam ad hæc reducit, vt Pelagius non solum possibilitatis, sed etiam voluntatis & actionis auxilium confiteatur. Et subdit, quod si tale auxilium vellet admittere, *nihil de adiutorio gratiæ Dei, quantum arbitror, inter nos controuersiæ relinqueretur*. Quod certè non debuisset dicere Augustinus, si Pelagius eo tempore gratiam efficacem quæ dat velle & operari, vt datam ex meritis, & ad perfectionem & salutem adipiscendam vtilem, non tamen necessariam admisisset; sed potius asserere debuisset, quod si ille talem gratiam, vt purè gratuitam, & ad volendum & operandum necessariam, vellet concedere, nulla inter ipsos esset de gratia Christi contentio. Addo quod idem S. Doctor in libro de hæresibus, quem in fine vitæ scripsit, vnde & imperfectum morte præuentus reliquit, affirmat Pelagium quantumlibet varium, versicolore, & multiformem, in eo semper perstitisse, quod omnem gratiam in lege atque doctrina constituerit.

Sed dices, quenam ergo est gratia illa quam Pelagiani tandem admisserunt, & modis prædictis adulterarunt, dicentes eam dari ex meritis, & solum ad faciliùs agendum requiri?

Respondeo auxilium illud, quod tunc Pelagiani admisserunt, esse aliquid præter legem, & communem notitiam mandatorum, nimirum specialem illuminationem, habitam

per

per Spiritus Sancti reuelationem, & se tenentem etiam ex parte potentia, & non solum ex parte obiecti; id est auxilium eleuans intellectum ad melius percipiendum legem, & doctrinam à Spiritu Sancto reuelatam. Ita colligitur ex Augustino, libro saepe citato de gratia Christi, quem post damnatam à Zozimo Papa Pelagij hæresim, contra Pelagium & Celestium edidit: nam cap. 7. ubi retulit verba Pelagij dicentis: *Deus gratiæ suæ auxilium subministrat, ut quod per liberum homines facere iubentur arbitrium, facilius possint implere per gratiam*; subdit de eodem Pelagio: *Et tanquam explicaturus quam dicat gratiam, adiunxit dicens: Quam nos non, ut tu putas, in lege tantummodo, sed & in Dei esse adiutorio confitemur*. Vbi aliquod adiutorium videtur ponere præter legem, seu cognitionem mandatorum Dei, quod dicit ad facilius dari. Sed quod & quale illud sit, patet ex verbis quæ Augustinus subiungit: *Quis non desideret ut ostendat quam, vult intelligi gratiam?* hoc enim maximè de illo expectare debemus, ut dicat hoc quod dicit, non in lege tantummodo se gratiam confiteri; sed nobis hac expectatione suspensis, quid addiderit intuemini: adiuvat enim nos, inquit, Deus, per doctrinam & reuelationem suam, dum cordis nostri oculos aperit; dum nobis, ne presentibus occupemur, futura demonstrat; dum diaboli pandit insidias; dum nos multiformi & ineffabili dono gratiæ cælestis illuminat. Ecce quomodo Pelagius gratia internæ illuminationis agnouit, non ut simpliciter & absolutè necessariam ad implenda legis præcepta, sed ut utilem



lem ad melius & facilius ea seruanda.

Dices : Gratia illuminationis reducitur ad legem & doctrinam , vt supra ex Augustino ostendimus : Sed gratia illa , quam Pelagius post damnatam suam hæresim à Zozimo Papa admisit , non reducitur ad legem & doctrinam , cum Augustinus eam appellet, *Magnum adiutorium diuinæ gratiæ* , & dicat benedicendum esse Deum , quod Pelagiani talem gratiam tandem aliquando admiserint : Ergo aliam gratiam , diuersam à gratia illuminationis , Pelagius admisit .

Respondeo duplicem esse gratiam illuminationis ; vnam quæ se tenet ex parte obiecti , & ad sufficientem eius propositionem seu applicationem pertinet , quam Pelagius , etiam antequam à Zozimo Papa damnaretur , admisit ; alteram se tenentem ex parte potentiae , seu intellectus , per quam roboratur & eleuatur ad assentiendum obiecto tali modo proposito , & hanc admisit Pelagius solum postquam eius hæresis à Zozimo Papa damnata fuit : hæc verò gratia , cum potentiam roboraret & confortet , non pertinet ad legem , quæ habet solum obiectum manifestare & proponere , subindeque ab Augustino , *Magnum gratiæ adiutorium* appellatur .

Quæres quintò , vtum Pelagiani gratiam habitualement, sanctificantem, & à peccatis mundantem agnouerint ?

Respondeo affirmatiuè, contra Suarez: Tum quia Pelagius nunquam fuit accusatus , quod talem gratiam negauerit, & de illa nulla fuit disputatio inter Pelagianos & SS. Patres , sed tantum de gratia actuali , vt ingenuè fatetur

Vasquez disp. 196. cap. 3. num. 13. his verbis: Scholastici qui putarunt cum Pelagio disputatum fuisse de necessitate gratiæ habitualis & remissionis peccatorum, ad seruanda præcepta, ignoratione vocis & historiæ lapsi sunt, existimantes nomine gratiæ intelligi gratiam habitualement & remissionem peccatorum. Tum etiam, quia Baptismus secundum Pelagianos donum aliquod supernaturale addebat: Iulianus enim apud Augustinum lib. 1. contra ipsum cap. 6. ait: *Hac de causa etiam infantes baptizamus, cum non sint coinquinati peccato, ut eis detur vel addatur sanctitas, iustitia, adoptio, hereditas, fraternitas Christi, ut eius membra sint.* Et ne dicatur Iulianum per illam sanctitatem à Baptismate paruulis concessam, intellexisse tantum externam Dei beneuolentiam, & fauorem, nihil intus producentem, iterum audiendus est apud eundem Augustinum lib. 1. operis imperfecti folio 58. ubi loquens de gratia baptismali, ait: *Hanc gratiam locupletem spiritualibus donis credimus, & multis optimam muneribus, ac reuerendam virtutibus.* Quibus verbis Iulianus apertè profitetur, gratiam baptismalem esse donum aliquod supernaturale, in anima receptum, & varijs dotibus eam exornans.

Dices, Augustinus lib. de gratia Christi cap. 30. affirmat se nusquam in scriptis Pelagij & Celestij, gratiam qua iustificamur, & qua charitas Dei diffunditur in cordibus nostris per Spiritum Sanctum, potuisse inuenire: Ergo Pelagiani habitualis gratiæ dona non admisserunt.

Respondeo Augustinum non dicere absolute


tè quod in scriptis Pelagij & Celestij gratiam illam qua iustificamur &c. inuenire non potuerit, sed addere, *quemadmodum confitenda est*: quia gratia habitualis, & habitus infusi qui ab ipsa dimanant, admitti debent, non solum ad sanctificandam, mundandam, & ornandam animam, sed etiam ad influendum vna cum eius potentijs in actus supernaturales? ob quem vsum Pelagiani talia dona non admiserunt, cum nullum auxilium supernaturale, applicans liberum arbitrium ad agendum admiserint.

Quæres sextò, an Pelagiani circa liberum arbitrium errauerint?

Respondeo eos circa liberum arbitrium errasse dupliciter. Primò quia existimabant, voluntatem hominis lapsi esse in perfectò æquilibrio, sicut erat in statu innocentiae, & æquè pronam in bonum ac in malum; subindeque dicebant, liberum arbitrium non fuisse læsum & debilitatum per peccatum Adami, nec ratione concupiscentiae magis propendere ad bonum delectabile, contrarium rationi, quam ad bonum honestum, & rationi consonum, vt refert D. Prosper in epistola ad Augustinum, præfixa libro de prædestinatione sanctorum, vbi eos dixit affirmasse, *quantum quisque ad malum, tantumdem habere facultatis ad bonum, parique momento animum se ad vitia vel ad virtutes mouere.*

Secundò, quia libertatem arbitrij generaliter definiebant per indifferentiam ad bonum & ad malum; ita vt neminem liberum esse dicerent, nisi qui posset indifferenter bene vel malè operari; vt liquet ex Augustino  
lib. I.

lib. i. operis imperfecti contra Iulian. pagina  
150. ubi eum aliosque Pelagianos reprehendit,  
quod libertatem generaliter sumptam restringerent  
ad potestatem indifferentem circa bonum & malum,  
seu quæ posset benè & malè, quia ex hoc sequeretur  
quod nec Deus, nec Angeli, aut homines beati,  
qui non possunt peccare, seu malè appetere,  
vel eligere, non essent liberi: *Si liberum non est (inquit) nisi  
quod duo potest velle (id est bonum & malum)  
liber ergo Deus non est, qui malum non potest  
velle, de quo ipse dixisti; Deus esse nisi iustus  
non potest. Siccine Deum laudas, ut si auferas  
libertatem?*



## C A P V T II;

### *De Hæresi Semipelagiana*

**C**irca Hæresim Semipelagianam tria breviter hic exponenda sunt, nempe unde illa originem traxerit? Quæ fuerint præcipua Semipelagianorum dogmata? & qui fuerint huius hæresis Authores, vel Sectatores præcipui?

#### §. I.

#### *Origo hæresis Semipelagianæ.*

**O**ccasione scriptorum D. Augustini contra Pelagianos, duo errores circa gratiam, inter se oppositi, orti sunt, unus in Afri-

Africa, & alter in Gallia. Primus fuit Monachorum Adrumetinorum, qui (vt refert D. Augustinus lib. 2. retract. capite penultimo) lecta eius epistola centesima quinta ad Sixtum, duas in partes diuisi sunt, quarum altera, duce Floro, credebat gratiam Dei à D. Augustino ita prædicari, vt tolleretur libertatem arbitrij, & correptionis necessitatem; altera verò pro liberi arbitrij defensione pugnat, & gratiæ negabat efficaciam, vt arbitrij defenderet libertatem. Vt hanc dissensionem S. Doctor tolleretur, & discordiam illam componeret, scripsit duas epistolas ad Valentinum Adrumetini monasterij præfectum, totidemque libros vnum de gratia & libero arbitrio, alterum de correptione & gratia, quibus disertè ostendit, per efficaciam diuinæ gratiæ non tolli libertatem arbitrij, neque necessitatem aut utilitatem correptionis, vt ipsemet testatur lib. 2. retract. cap. 66. his verbis: *Propter eos qui cum defenditur Dei gratia, putant auferri liberum arbitrium, scripsi librum de gratia & libero arbitrio. Ad eos autem scripsi Monachos Adrumetinos, in quorum monasterio de hac re caperat esse contentio, ita vt me consulere eorum aliqui cogerentur. Rursus ad eosdem scripsi alterum librum, quem de correptione & gratia prænotavi, cum mihi nuntiatum esset, dixisse ibi quendam, nomen corripendum, si Dei præcepta non facit, sed pro illo vt faciat tantummodo orandum.*

Verum occasione huius secundi libri ortus est secundus error in Gallia, apud Massiliam, in ipsa ferè vltima D. Augustini ætate. Cum enim quidam Massilienses presbyteri, & Gal-

liæ Episcopi, in eo legissent quæ de proposito diuinæ voluntatis & prædestinationis, quo saluandi à perituris discernuntur; & de efficacia diuinæ gratiæ, qua indeclinabiliter agitur voluntas nostra; maximè turbati & scandalizati sunt, & vnde Africani plenius instructi, suum deposuere errorem, exinde Galli nouæ lucis aspectu excæcati, in varios errores prolapsi sunt, vt testatur Prosper in epistola ad Augustinum, in principio, vbi sic ait: *Multi seruorum Christi, qui in Massiliensi vrbe consistunt, in sanctitatis tuæ scriptis, quæ aduersus Pelagianos hæreticos condidisti, contrarium putant Patrum opinioni, & Ecclesiastico sensui, quidquid in eis de vocatione electorum secundum Dei propositum disputasti. Et cum aliquandiu tarditatem suam culpæ maluerint, quam non intellecta reprehendere; quidamque eorum lucidiorem super hoc atque aperti rem beatitudinis tuæ expositionem vulerint postulare, euenit ex dispositione misericordiæ Dei, vt cum quosdam intra Africam similia mouissent, librum de correptione & gratia, plenum diuinæ authoritatis emitteres. Quo in notitiam nostram insperata oportunitate delato, putauimus omnes querelas resistentium sopiendas, quia vniuersis quæstionibus, de quibus consulenda erat Sanctitas tua, tam plene hic absoluteque responsum est, quasi hoc specialiter studueris, vt quæ apud nos erant turbata componeres. Recensito autem hoc Beatitudinis tuæ libro, sicut qui sanctam atque Apostolicam doctrinæ tuæ authoritatem antea sequebantur, intelligentiores multo instructionesque sunt facti; ita qui persuasioni suæ im-*

*pediebantur obscuro, auesiores quam fuerant recesserunt.*

Exordium ergo hæresis Semipelagianæ cœpit à Massiliensibus, qui idcirco *Semipelagiani*, seu *reliquiæ Pelagianorum*, dicti sunt; quia in multis à doctrina Pelagij recedentes, in aliquibus tamen ei adhæsere; præsertim in eo quod dicebat, primam gratiam & vocationem ex meritis bonæ voluntatis dari. Nonnulli tamen existimant, Vitalem Carthaginensem Semipelagianismum in Africa inchoasse; aiebat enim initium fidei ex libero arbitrio esse, non ex motione gratiæ, neque esse donum Dei, sed esse in nobis ex nobis, ut infra patebit, cum de Authoribus & sectatoribus præcipuis Semipelagianæ hæresis differemus.

## §. II.

### *Præcipua Semipelagianorum dogmata.*

**P**Ræcipua Semipelagianorum, seu Massiliensium dogmata, in epistolis Prosperi & Hilarij ad Augustinum eleganter descripta, ad hæc præcipua capita reduci possunt.

Primo, licet admitterent omnem hominem Adamo peccante peccasse, & neminem per opera sua, sed per Dei gratiam regeneratione saluari; attamen vniuersis hominibus propitiationem quæ est in Sacramento sanguinis Christi, æquali voluntate dicebant esse propositam, nec specialiori affectu Deum electos prosequi asserebant, sed potius

eos in regnum suum prædestinasse, quos gratis vocatos, dignos futuros electione, & de hac vita bono fine excessuros esse præscierit.

Secundo inde colligebant doctrinam Augustini de gratuita prædestinatione esse reiiciendam, contendentes neminem ante Augustinum, eum Apostoli ad Romanos epistolæ sensum dedisse, quem ille dederat; quin & doctrinam illius ædificationi audientium esse contrariam, & etiam si vera esset, minime esse prædicandam. Hinc nolebant certum esse prædestinatorum numerum, sed posse minui, vel augeri, ne locum apud infideles & negligentes cohortationum incitamenta non habeant.

Tertiò dicebant, quod si Dei constitutio humanas præueniat voluntates, tollitur humani arbitrij libertas, & fatalis necessitas inducitur.

Quartò, si omnia opera bona Deus in nobis operatur, meritum omne nostrum excludi.

Quintò, ex prædestinatione quam S. Augustinus admittebat, sequi Deum ad peccatum prædestinare. Item illam desperandi necessitatem iniicere, lapsis curam adimere resurgendi, sanctis afferre torporis occasionem, præceptis & exhortationibus aduersari, & audientium ædificationi esse contrariam.

Sextò asseriebant quod Dei gratia humanam, non præueniat sed sequatur voluntatem, ut non ideò velit, quia adiuuatur à Deo; sed à Deo adiuuetur, quia prius voluerit.

Septimò per Dei gratiam non opus ipsum, sed operis tantum possibilitatem donari.



Demum ut refert Hilarius epistola ad Augustinum, in voluntate nostra vires ad benè operandum distinguebant à viribus ad benè desiderandum, petendum, credendum &c. quæ pertinent ad initium bonæ operationis; addebantque quod voluntas nostra, dum esset integra ante lapsum, poterat non solum petere, & desiderare, sed etiam benè velle & operari; adeoque quod tunc gratia adiuuabat hominem benè volentem & operantem, seu bonam eius voluntatem; corrupta autem per peccatum originale natura, non remanere volebat in nobis vires ad benè operandum, & rectè volendum (quæ sunt operationes hominis sani) sed tantum ad desiderandam salutem & petendum remedium; & has vires dicebant esse semina quædam virtutum, naturaliter insita animæ nostræ. Et quia nemo potest desiderare salutem, & eam petere, nisi prius credat Salvatorem; ideò etiam credulitatis affectum ex nostra voluntate esse, gratiamque Christi antecedere affirmabant: sicut æger licet non habeat vires ad ambulandum, & faciendum alia opera hominis sani, potest tamen desiderare salutem, & quærere medicum, ac petere medicinam. Vnde ista initia bonæ voluntatis, non in solo credulitatis affectu, sed etiam in petitione, pulsatione, desiderio sanitatis, & similibus actibus imperfectis constabebant; dicebantque illa in hominibus prærequiri, ut Deus gratiam ad credendum, sperandum, diligendum, & alios actus perfectos eliciendos tribuat; adeoque gratiam Dei non fovere nisi hominem iam appetentem bona, ita quod prior sit obedientia

nostra, quam Dei gratia, nostrasque Deus expectet voluntates, ut purgari & sanari velimus, non autem per suam gratiam efficiat, ut sanitatem animæ quaramus ac desideremus. Idque asseriebant, tum ne Deus videatur iniustus, & personarum acceptor, quosdam sua gratia præueniendo, alios verò relinquendo ac spernendo; tum etiam ne naturalis arbitrij nostri libertas, & inclinatio ad bonum, per originale peccatum omnino extincta videatur, si nequidem sanitatem suam homo ex se possit desiderare, ac petere, opemque medici implorare. Vnde Hilarius in epistola ad Augustinum de Massiliensibus ait: *Conueniens asserunt veritati, re' congruum prædicationi, ut cum prostratis, & nunquam suis viribus surrecturis, annuntietur salutis obtinendæ occasio, eo merito quo voluerint, & crediderint à suo morbo se posse sanari, & ipsius fidei augmentum, & totius sanctitatis sue consequantur effectum.*

Quod autem de inchoatione fidei, hoc etiā de in ea usque ad finem perseverantiæ dicendum esse putabant, nimirum utramque humanæ voluntati pariter adscribendam, ut testatur D. Augustinus libro de bono perseu. cap. 17. ubi ait: *Hi initium fidei, & usque in finem perseverantiam, sic in nostra constituunt potestate, ut Dei dona esse non putent, neque ad hæc habenda atque retinenda, Deum operari nostras cognitiones & voluntates; cætera verò ipsum dare concedunt, cum ab illo impetrantur credentis fide. Et infra: Sed hæc inquirunt, ut à Deo dentur nobis fides imperat quæ incipit à nobis; quam fidem & incipere habere, &*

*in ea usque in finem permanere, tanquam id non à Domino accipiamus, nostrum esse contendunt. Hinc apud S. Prosperum, fidem & per mansionem in fide, ad præscientiam, non ad prædestinationem reuocabant, dicentes: Qui autem credituri sunt, quique in ea fide quæ deinceps per Dei gratiam sit iuuanda, mansuri sunt, Deum præscisse ante mundi constitutionem, & eos prædestinasse.*

Errabant etiam circa perseverantiam in virtutibus, & earum operibus, quam licet facerentur inter Dei dona connumerari, nullum tamen volebant dari perseverantiæ donum, quo fieret ut sancti & prædestinati certò & infallibiter perseverarent, seu quo non nisi benè operantes ac in bonis operibus perseverantes essent, quale docet Augustinus cap. 11. & 12. libri de correptione & gratia. Ita refert Hilarius in epistola ad Augustinum, ubi de Massiliensibus scribit: *Deinde molestè ferunt ita dividì gratiam, quæ vel tunc primo homini data est, vel nunc hominibus datur, ut ille acceperit perseverantiam, non qua fieret ut perseveraret, sed sine qua per liberum arbitrium perseverare non posset; nunc verò sanctis in regnum per gratiam prædestinatis; non tale adiutorium perseverantiæ datur, sed tale ut eis perseverantia ipsa donetur; non solum ut sine isto dono perseverantes esse non possint, verum etiam ut per hoc donum non nisi perseverantes sint. His verbis Sanctitatis tuæ (lib. de corrept. & gratia cap. 11. & 12.) ita mouentur, ut dicant quandam desperationem hominibus exhiberi. Ex quo patet, quod licet illi hæretici auxilium sufficiens & voluntati sub-*  
di-

ditum, quo voluntas potest operari si velit, libenter admitterent; auxilium tamen de se & ex natura sua efficax, quod subijcit sibi voluntatem, & eam ad agendum applicat, ac infallibiliter cum actu coniungit, omnino repudiabant; quia falsò existimabant cum tali auxilio libertatem & indifferentiam voluntatis nostræ non posse componi.

Quæres primò, an Semipelagiani, ad initium fidei & bonæ voluntatis, gratiam aliquam admiserint, vel illud in nuda natura posuerint?

Respondeo aliquos ex illis admisisse ad tale initium interiorem illustrationem & excitationem; alios ad illud non admisisse aliam gratiam, quam legem atque doctrinam; subindeque in nuda natura, omni prorsus auxilio interno gratiæ destituta, initium fidei & bonæ voluntatis collocasse.

Prima pars huius resolutionis suadetur ex eo quod Semipelagiani eam solam Christi gratiam rejciebant, quam nocere libertati, & inutilem reddere correptionem existimabant: Sed gratia interiùs mentem illuminans, & moraliter duntaxat excitans, ac usum & determinationem voluntatis expectans, illa inconuenientia non parit, ut de se patet: Ergo talem gratiam plures ex Semipelagianis non rejciebant, sed eam pro initio fidei & bonæ voluntatis admittebant. Id constat in Gennadio, quem Semipelagianis adhæsisse, & de eorum secta fuisse, capite sequenti ostendemus. Ille enim in libro de Ecclesiasticis dogmatibus hæc scribit: *Manet itaque ad querendam salutem arbitrij libertas,*

*id est rationalis voluntas, sed admonente prius Deo, & inuitante ad salutem, ut vel eligat, vel sequatur, vel agat occasione salutis, hoc est inspiratione. Et infra: Initium ergo salutis nostræ Deo miserante habemus: ut acquiescamus salutiferæ inspirationi, nostræ potestatis est, ut adipiscamur quod acquiescendo inspirationi cupimus, diuini est muneris. Vbi pro initio salutis admittit salutiferam inspirationem, subindeque gratiam moraliter excitantem. Id ipsum non minùs apertè tradit Cassianus collat. 13. cap. 3. ubi ait quod Deus initia s. n. t. voluntatis inspirat, & virtutem atque opportunitatem eorum quæ rectè cupimus tribuit peragendi. Ipse etiam Vitalis, Semipelagianorum præcursor, & qui ut infra dicemus, Semipelagianismum inchoauit in Africa, quamuis fidem esse in nobis ex nobis doceret, ut patet ex Augustino epist. 107. gratiæ tamen interioris moralem excitationem non excludebat. Nam in eadem epistola aiebat, hominem posse Dei suastione præcedente, consequente consensione, libertate naturali credere.*

Secunda pars, quæ asserit aliquos ex Semipelagianis, ad initium fidei non admisisse aliam gratiam, quam legem atque doctrinam, constat ex S. Prospero epistol. ad Rufinum, ubi de quibusdam Semipelagianis sic ait: *Hoc apud se ingenio seruauerunt, ut ad incipiendum & proficiendum, & ad perseuerandum in bono, necessariam homini Dei gratiam profiterentur, sed in hac professione quomodo vasa iræ moli-rentur irreperere, ipsa Dei gratia vasis misericordiæ reuelauit. Intellectum est enim saluberrime-*

mēque perspectum, hoc tantum eos de gratia confiteri, quod quædam libero arbitrio sit magistra, seque per cohortationes, per legem, atque doctrinam, per creaturam; per contemplationem, per miracula, perque terrores extrinsecus iudicio eius ostendat, quo unusquisque secundum voluntatis suæ motum, si quaesierit inueniat, si petierit accipiat, si pulsauerit introeat: quia scilicet gratiæ ipsius vocatio hoc primum circa nos agit ut nostræ facultatis arbitrium admoneat, nec aliud sit gratia, quam lex, quam Propheta quam Doctor. Ait etiam in epistola ad Augustinum, quod quidam horum in tantum à Pelagianis semitis non declinant, ut dicant hominem per naturalem virtutem & facultatem, posse ad gratiam qua in Christo renascimur peruenire, petendo, querendo, pulsando: ut ideo accipiat, ideo inueniat, ideo introeat, quia bono naturæ benè usus, ut ad istam saluantem gratiam initialis gratiæ ope meruerit peruenire.


Ex his constat aliquos ex Semipelagianis, in nuda natura, omni prorsus interno gratiæ auxilio carente, initium fidei & meriti collocasse, contra quos esse videtur Canon ille Arausicanæ Synodi, quo dicitur: Si quis sine gratia Dei credentibus, volentibus, & pulsantibus nobis; misericordiam conferri dicit &c. Ex quo intelliges, hanc propositionem quam damnauit Innocentius X. Semipelagiani admitterebant præuenientis gratiæ necessitatem ad singulos actus, etiam ad initium fidei, falsam esse: si enim aliqui Semipelagiani initium fidei & bonæ voluntatis, in mera natura, omni gratia interna destituta, collocarint, pro-

fectò indefinita propositio æquiualens vniuersali, qua dicitur Semipelagianos admisisse præuenientis gratiæ necessitatem ad singulos actus, etiam ad initium fidei, vera esse non potest.

Quæres secundò, quam vim merendi gratiam tribuerint Semipelagiani initio fidei & bonæ voluntatis, an de condigno, vel tantum de congruo?

Respondeo illos in huiusmodi fidei & bonæ voluntatis initijs, vim tantum merendi de congruo posuisse. Constat hoc ex Fausto & Cassiano, præcipuis Semipelagianæ hæresis sectatoribus. Primus enim (vt refert Gennadius in eius vita) dicere solebat: *Quidquid libertas arbitrii pro labore piæ mercedis acquisierit, non esse propriè meritum, sed gratiæ donum*. Vnde in epistola ad Lucidum ait: *Nosiri laboris fructum, officij rem esse, non meritum*; Alter verò Col. 13. cap. 13. dicit Deum dare suam gratiam, *sub colore cuiusdam desiderij & laboris*. Et ibid. cap. 8. & 11. docet voluntatis nostræ conatus non esse meritorios gratiæ, sed potius occasiones, & veluti anas quas Deus apprehendit. Quæ verba quandam solum congruitatem & decen-  
tiam, non verò strictum & rigorosum debi-  
tum significant. Vnde Synodus Arausicana illum Semipelagianorum errorem proscribens, quo vim merendi gratiam tribuebant initio fidei & bonæ voluntatis, sic ait: *Si quis sine gratia Dei credentibus, volentibus, desiderantibus, & pulsantibus nobis, misericordiam conferri dicit &c.* Quibus verbis Concilium apertè declarat, Semipelagianos non docuis-  
se

se gratiam ex iustitia dari credentibus, volentibus, desiderantibus, & pulsantibus, sed solum ex misericordia; nec per consequens ex aliquo merito de condigno, sed tantum de congruo. Vnde quando D. Prosper contra Collatorem cap. 16. affirmat ex Semipelagianorum sententia, gratiam dari operibus naturalibus ut debitum, non verò conferri ut donum, loquitur de debito ex quadam decentia & congruitate, non verò de debito est stricta & rigorosa iustitia, quale ex merito perfecto & condigno resultat.



### C A P V T . III.

*Qui fuerint Semipelagianæ hæresis Authores  
vel Sæctatores præcipui?*

**A**D complementum huius tractatus, & perfectam Semipelagianæ hæresis intelligentiam, superest ut declaremus, qui fuerint eius Authores vel Sæctatores præcipui?

#### §. I.

*De Vitali Carthaginensi.*

**V**italis Carthaginensis, ad quem D. Augustinus epistolam 107. scripsit, videtur Semipelagianismum inchoasse in Africa, & veluti Semipelagianorum Præcurso em fuisse. Dixit enim iniuriam fidei & bonæ voluntatis esse in nobis ex nobis, & ex libero arbitrio,



bitrio, non verò ex motione gratiæ procedere, vt in eadem epistola S. Doct̃or declarat, his verbis: *Si ea quæ de te audio vera sint, initium fidei, vti etiam initium bonæ, hoc est piæ voluntatis, non v s effed num Dei, sed ex nobis nos habere contendis vt credere incipiamus, cætera autem religiosa vita bona, Deum per gratiam suam, iam ex fide petentibus, querentibus, pulsantibus, donare consentis. Ecce quomodo Vitalis initia fidei & bonæ voluntatis dicebat esse ex nobis, cœtera verò opera ex gratia Dei. Quem errorem fortiter ac neruose confutat ibidem Augustinus, argumento desumpto ex orationibus fidelium, qui orant Deum, vt infidelium mentes ad fidem conuertat, & faciat eos ex nolentibus volentes, & ex repugnantibus consentientes, & gratias illi agunt, cùm eos ad fidem conuertit. Vnde feliciter Vitalem ab illo errore reuocauit, & Semipelagianismum in Africa nascentem, penitus extinxit, & in suo veluti fonte præfocauit.*

## §. II.

### De Cassiano.

**I**oannes Cassianus, Chrysostomi primum Diaconus, deinde apud Massiliam in Gallia Presbiter, qui floruit anno 440. & degebat Massiliæ, tempore quo occasione libri S. Augustini de correptione & gratia, exorta est apud Massilienses magna illa turbatio cuius supra meminimus, fuit vnus ex præcipuis Semipelagianæ hæresis sectatoribus, vt constat

stat ex Collatione 13. de protectione Dei cap. 14. Ibi eniur illam Centurionis fidem, ita à Domino in Euangelio laudatam, quæ propterea erat prout ad salutem oportet, docet ex solis naturæ viribus illius Centurionis fuisse, intantum quod asserit, quod nullius laudis esset ac meriti, *si id in eo Christus quod ipse laudauerat prætulisset.* Item ibidem ait fidem Abraham non fuisse illi à Domino inspiratam sed ex solius naturæ viribus habitam. Docet etiam in eadem Collatione cap. 7. 8. & 12. hominem posse per semetipsum bonum velle, quam bonam voluntatem, veluti emicantem scintillam confouet Deus, suæque inspiratione confortat; quia nihil, inquit, prodest sanitatis gratiam concupisse, nisi Dominus, qui vitæ ipsius vsum tribuit, etiam vigoris incolumitatem impertiat. In eo tamen Cassianus ab alijs Semipelagianis discrepauit, quod alij omnes initia fidei & bonæ voluntatis, ex nobis procedere affirmarunt, ille verò putauit necessarium non esse quod semper gratiam præcederent, sed quandoque diuinam gratiam, seu excitationem, priorem esse asserbat. Vnde duos hominum ordines constituebat, quorum alij liberè veniebant ad Christum, & bonum velle incipiebant, & à gratia adiunabantur & recipiebantur: alij verò totaliter à gratia præuerti, in illis suis actibus nullam habebant libertatem. Vnde vt rectè obseruauit S. Prosper contra Collatorem cap. 9. vtrumque simul amplexus est, Pelagianorum & Manichæorum errorem. Dicendo enim aliquos incipere, & à Deo adiuari, Pelagianus fuit; asserendo autem in aliquibus Deum

Deum incipere , & homines venire absque ipso-  
 forum libertate , Manichæus extitit . Vnde  
 mirum est quod Vasquez 1. p. quæst. 23. disp.  
 89. cap. 4. §. Deinde de Cassiano, alijsque Se-  
 mipelagianis, hæc audeat scribere : *Hi omnes,*  
*utpotè viri alioquin catholici , & religiosi, con-*  
*tra Pelagium & Celestium gratiam Christi fa-*  
*sebantur , non solum utilem , sed etiam necessa-*  
*riam ad iustificationem , perseverantiam , &*  
*merita vitæ æternæ, qua nisi adiuvantur cona-*  
*tus nostri , non solum difficilè consequerentur*  
*quod contendimus , verùm etiam irriti essent,*  
*& inanes ad iustificationem , & merendum vi-*  
*tam æternam .* Mirum etiam est quod ibidem  
 cap. 5. Chrysostomum, Doctorem egregium,  
 in hac materia & causa , cum Cassiano con-  
 iungat, dicens: *Cassianus & Chrysostomus egre-*  
*giè admodum de gratia loquuntur :* quæ enim  
 conuentio lucis ad tenebras ? Et Catholici ac  
 eximij Doctoris , cum hæretico , & Semipela-  
 giano, in quem D. Prosper acriter inuehitur,  
 per totum ferè librum , quem contra ipsam  
 conscripsit ?

### 9. III.

#### *De Fausto Regiensi .*

**F** austus ex Abbate Monasterij Lirinen-  
 sis, Regij, quæ Galliæ vrbs est , Episcopus  
 factus , floruit ad annum 480. medio tempore  
 inter Prosperum & Fulgentium . Ille Pela-  
 gium damnaße , eiusque errores resellere vi-  
 deri volens , incidit in errores Iuliani & Cas-  
 siani , ut constat ex duobus libris quos scripsit  
 de

de gratia & libero arbitrio, in quibus primò docet cum Iuliano, peccatum originale non esse veram culpam in paruulis, quæ arbitrij vires læderet & extenuaret, sed tantum esse poenam; vnde quoties peccatum originale nominat, sub hac tantum ratione illud admittit, vt ex primo libro non difficilè colligitur; totum enim primum & secundum caput ferè consumit in probando contra Pelagium, non futuram esse mortem, si peccatum primi parentis non esset. Cum enim tam ex professo Pelagium in materia peccati originalis impugnet, & mortem solum nominet, nec culpæ mentionem vnquam faciat, hæresim Iuliani ponentis non culpam, sed mortem in posteros, sine dubio sequutus est.

Secundò ex hoc principio infert liberum hominis arbitrium non esse læsum, nec viribus attenuatum, subindeque ex sua naturali facultate, sufficientes vires habere, ad desiderandam querendam, & petendam salutem, cui sic desideranti, querenti, & petenti, quæ sita lux se ingerit. Vnde initium boni operis ante gratiam in homine ponit, cui detur ex merito infallibiliter gratia, quæ est ipsissima Semipelagianorum hæresis. Ita habet lib. 1. cap. 15. 16. & 18.

Tertiò, intantum liberum arbitrium sanum & integrum viribus constituit, vt dicat posse ipsum ex sua innata libertate, si velit, mandata seruare. Nam lib. 1. cap. 12. ex illo Eccles. 15. *Si volueris mandata seruare, conseruabunt te*, hoc infert: *Videmus ergo & in bonam & in contrariam partem posse humane mentis transire consensum*, Et intelligit hoc pos-

posse hominem ex solis viribus liberi arbitrij, cum illud constituat sanum & integris viribus, ut iam diximus. Vnde in libero arbitrio agnoscit vires sufficientes ad diligendum Deum super omnia, quod est primum & maximum mandatum: in quo S. Augustinus passim docet, totam Pelagianorum hæresim fundari.

Quartò hæc verba Psalmi 126. *Nisi Dominus edificauerit domum &c.* quæ Patres de vera gratia interpretantur, de gratia externa ille exponit lib. 1. cap. 11. ubi sic ait: *Nunquid aliter edificat & cognoscit Ecclesiam, quam per labores & officia Sacerdotum, per ministeria & exempla Sanctorum, per Apostolorum virtutes, & Martyrum mortes?* Quin verba illa Salvatoris: *Nemo potest venire ad me, nisi Pater qui misit me traxerit eum,* quæ de vera gratia vnanimis Catholicorum sensus intelligit, sic ille cap. 17. exponit: *Quid est attrahere, nisi predicare, nisi Scripturarum consolationibus excitare, nisi increpationibus deterrere; desideranda proponere, intentare metuenda, iudicium comminari, præmium polliceri?*

Demum prædestinationem post præscientiam statuit, & ex illa certitudinem eius deriuari affirmat: ait enim lib. 1. cap. 11. *Igitur dum liberi interemptor arbitrij, in alterutram partem omnia ex prædestinatione statuit, & definita esse pronuntiat, etiam suprema remedia penitentiae, sensu abruptæ impietatis euacuat.* Et lib. 2. cap. 2. *Prædestinationem Dei malè intelligunt astruentes quod inde humanorum æstium causa nascatur.* Et paulò post subdit: *Generalis itaque præscientia, quæ de statu mundi totius apud Deum manet, de potentia nasci-*

tur ; sed circa statum hominis , qualitates & species prænoscenti , de humani actus inspectione mutuatur . Et infra ait : *Magis de origine voluntatis humanæ genus præscientiæ derivari , quam opera & voluntates hominum , de nutu & impulsu providentiæ celestis incipere .* Et tandem capite sequenti sic concludit : *Nisi præscientiæ exploraverit , prædestinatio nihil decernit .*

Hos libros Fausti Gelasius Papa , cånone *Sancta Romana Ecclesia* , damnauit , & inter apocriphos numerauit . Vnde prudens & notatu digna est hæc Cardinalis Baronij admonitio , tomo sexto , anno Domini 490. *Cum igitur Fausti sententia ubique ab Ecclesia Catholica fuerit contradictum , videant quanto periculo quidam ex Recentioribus , dum in Nouatores insurgunt , ut eos confutent , à sancti Augustini sententia de prædestinatione recedunt cum alioqui arma non desint , quibus Hæretici profligantur .*

#### §. IV.

*De Gennadio .*

**G**ennadius Massiliensis Presbyter , qui vixit tempore Gelasij Papæ ad annum 490. Semipelagianis adhæsisse , & de ipsorum secta fuisse creditur : siquidem libro de viris illustribus Cassianum & Faustum laudat , eorumque de gratia sententiam , Prosperi doctrinæ anteposit , Rufinum Aquileiensem Presbyterum , Pelagij Præcursores , ac Pelagianæ hæresis Architectum ( à quo , ut supra vidimus , se audiuisse non traduci peccatum

tum originale, affirmavit Celestius) Hieronymo præfert: ideoque Gelasius Papa opera eius inter libros Apocryphos rejcit. Hinc Baronius anno 433. nu. 28. Gennadium ait eiusdem esse farinae cum Cassiano: & anno 490. num. 45. fuisse unum è Presbyteris Gallicanis, de quibus Prosper & Hilarius apud Celestinum Papam conquesti sunt, quòd Augustini doctrinae aduersarentur; sed addit ipsum Gelasij opera respuisse, & ad Episcopatum Massiliensem assumptum fuisse, & orthodoxum ac Catholicum è viuis abiisse.

## §. V.

*De Severo Sulpitio.*

**P**ures etiam existimant, Severum Sulpitium, Sancti Martini, cuius vitam scripsit, Discipulum, ac S. Paulinò, Nolano Episcopo, amicitia coniunctissimum, Massiliensis erroris fermento vitiatum fuisse: quia Gennadius libro de viris illustribus cap. 19. hæc scribit: *Severus Presbyter, cognomento Sulpitius, vir genere & litteris nobilis, & paupertatis, ac humilitatis amore conspicuus: & in fine, post enumeratas eius lucubrationes, ista subdit: Hic in senectute sua a Pelagianis deceptus, & agnoscens loquacitatis culpam: silentium usque ad mortem tenuit; ut peccatum quod loquendo contraxerat, tacendo penitus emendaret.* Subscribit Baronius anno 431. num. 189. Gennadiumque sic interpretatur, ut velit Severum, non omnibus Pelagij placitis adhæsisse, sed ijs tantum quæ Massili-

lien-

lienses recipiebant. At refragatur Guibertus Abbas, in compendio Apologiæ pro Seuerio, ubi ait: *Nunquam nisi in Gennadio legi Seuerum à Pelagianis seductum, qui nescio utrum hoc ipse alicubi legerit, an ex sola fama quæ facta infectaque docet, didicerit. Ut ut sit, constat Seuerum Orthodoxum, & Catholicum obijisse: nam in Martyrologio Romano die 29. Ianuarij, in Sanctorum canonem refertur, & virtutibus ac eruditione conspicuus dicitur.*

Hunc aliqui dicunt fuisse Episcopum Bituricensem, quia Guibertus citatus qui pro eo Apologiam scripsit, ipsum Archiepiscopum Bituricensem appellat. Sed hoc alij negant, cum Baronio citato, ubi sic ait: *Neminem reperi antiquorum, qui hunc Seuerum de quo est sermo, Episcopum nominet, verum tantummodo Presbyterum, sicut & Honorius retexens Catalogum clarorum virorum.* Et sanè Gennadius Massiliensis, sui temporis res gestas scribens, libro suprâ citato, non nisi Presbyterum eum nominat, & in eo ordine poenitentem esse defunctum ait.

## §. VI.

### De Ioanne Chrysostomo.

**V**Asquez 1. p. disp. 91. cap. 8. omnes ingenij vires intendit, ut ostendat Chrysostomum, & alios ex Patribus Græcis, in errorem Semipelagianorum esse lapsos, atque Cassianum Chrysostomi discipulum, errorem suprâ relatū, quem habet collat. 13. à suo  
ma-



magistro didicisse asserit. Et capite sequenti plures affert Theologorum interpretationes, quibus Chrysostomi testimonia, quæ Semipelagianis fauere videntur, conantur exponere, & in Catholicum sensum pertrahere; quas omnes paruipendet, & totis viribus conatur euertere.

Sed ab hoc errore, seu potius calumnia rectè Chrysostomum vindicat noster Sixtus Senensis, libro 5. Bibliothecæ annotat. 101. ubi ait Ioannem Oecolampadium, Lutherana hæresis professorem, hunc errorem ei primò imposuisse; pluraque adducit huius sancti Doctoris testimonia, quibus apertè gratiam præuenientem admittit, ac docet nostræ fidei & salutis exordia, à gratia, non verò à nuda natura procedere. Istud, quod habet tomo 1. homil. de Adam & Eva, celebre est: *Omnium bonorum affectuum atque operum, & omnium studiorum, omniumque virtutum, quibus ab initio fidei ad Deum tenditur, Deum profiteamur Authorem, & non dubitemus ab ipsius gratia omnia hominum merita provenire, per quam etiam fit ut aliquid boni & velle incipiamus & facere.* Plura alia possent adduci Chrysostomi testimonia, sed istud sufficit pro defensione huius sancti Doctoris, quem Anastasius 7. Hexam. *Christi fluvium* appellavit: Theodoretus Dialog. 1. *Magnum orbis lumen, admiratione dignissimum Doctorem*: Isidorus Pelusiota lib. 2. Epist. 42. *Ecclesiarum omnium oculum*; & denique Innocentius I. Epist. 30. *Mellitam Constantinopolitanæ Ecclesiæ linguam.*

## §. VII.

*De Vincentio Lyrinensi.*

Certum est de numero Semipelagianorum fuisse Vincentium quendam, doctrinæ S. Augustini impugnatorem, contra quem extant responsiones Prosperi ad obiectiones Vincentianas; Sed quis fuerit ille Vincentius non ita manifestum est. Nonnulli arbitrantur, Vincentium istum fuisse illum Monachum de Conuentu Lyrinensi, quem satis notum nobis reddit famosus ille liber, volumine paruus, sed sententiarum pondere magnus, & elegantissimus, quem pro fidei Catholicæ antiquitate, & veritate, aduersus prophanas omnium hæresum nouitates conscripsit. Sed iniqua est ista suspicio: Primò, quia libellus ille planè aureus, modò relatus, testatur illum fuisse nouitatum maximum impugnatorem. Secundò, quia in ultimo capite illius allegat Cœlestini epistolam ad Episcopos Gallix, in qua apertè Semipelagiani inueniuntur damnati, eamque summoperè laudat: quomodo autem ille Semipelagianus potuit esse, qui damnationem Semipelagianorum ita laudando concelebrat? Tertiò, quia Gennadius in libro de viris illustribus, hunc ei nœuum non appingit, sed validissimum contra hæreticos athletam fuisse memorat. Vnde Baronius ad annum 431. num. 188. verè tradit Vincentium, cuius sunt obiectiones Vincentianæ, apud Prosperum, fuisse alium eiusdem nominis Presbyterum Gallum, cuius

ius meminît prædictus Gennadius lib. de viris illustribus cap. 80. nam cap. 94. de Vincentio Lyrinenfi mentionem facit.



## C A P V T IV.

*Errores Manichæorum, Lutheranorum, & Calvinistarum; circa gratiam & liberum arbitrium.*

**C**Um opposita iuxta se posita magis elucescant, errores Manichæorum, Lutheranorum, & Calvinistarum, qui Pelagianorum & Semipelagianorum erroribus directè opponuntur, breuiter hic describendi sunt.

### §. I.

#### *De erroribus Manichæorum -*

**M**anichæi posuerunt duo esse æterna, seu sibi coæterna principia, vnum bonum, alterum verò malum: Ex quo inferebant duas in homine esse naturas, alteram bonam determinatam ad bonum ex illo bono principio: alteram malam, & determinatam ad malum ex alio malo principio. Ita docet Augustinus varijs in locis, præsertim lib. 1. ad Bonifacium cap. 8. his verbis: *Manichæi, quod etiam te nosse satis indicasti, duas naturas alteram boni, alteram mali, ex diuersis atque inter se aduersis, coæternisque principijs, vanitate sacrilega nefandi erroris inducunt.*

cunt. Ex hoc etiam deducebant, hominem nullo modo libertatem habere, sed omnia siue bona siue mala, ex necessitate naturæ operari; vel ex natura illa boni, & ad bonum determinata, vel ex natura mali etiam determinata ad malum. Vnde Hieronymus in proæmio dialogi aduersus Pelagianos ait: *Manichæorum esse hominum damnare naturam, & liberum auferre arbitrium*. Plures alij erant Manichæorum errores. Nullum enim peccatum originale admittebant, vnde baptismum ad illius emundationem non recipiebant, vt docet Augustinus lib. 2. ad Bonifacium cap. 2. vbi sic ait, *Manichæi dicunt lauacrum regenerationis, id est aquam ipsam esse superfluam, nec prodesse aliquid prophano corde contendunt*. Volebant etiam nuptias esse malas, quia cum libidine & concupiscentia carnis, quam ex prædicta mali natura esse dicebant, exercentur. Item legem veterem iustificare impotentem, tanquam malam reprobabant, & Patres veteris testamenti, tanquam insignes peccatores traducebant. Verùm hæc præsentis instituti non sunt, quia hic solum agimus de erroribus, qui versantur circa gratiam, aut liberum arbitrium.

## §. II.

*De erroribus Lutheranorum & Calvinistarum circa liberum arbitrium.*

**R**ECTè obseruat D. Thomas opusc. 19. cap. 2. quod hæc est errantium consuetudo, vt quia in medio veritatis non possunt consistere,   
vnum

*Unum errorem declinantes, in contrarium dilatantur. Quod ibidem probat exemplo Arrij & Sabellij, Nestorij & Eutichetis, Pelagij & Manichæi. Vnde egregiè Tertullianus contra Praxeam: Variè Diabolus æmolatus est veritatem, affectavit illam aliquando defendendo concutere Unicum Deum vindicat omnipotentem mundi conditorem, ut & de unico hæresim faciat. Idem constat exemplo Lutheri & Caluini, qui ut Pelagianorum errores deuitarent, in Manichæorum hæresim inciderunt; ut enim diuinæ gratiæ necessitatem & efficaciam contra Pelagianos defenderent, liberum arbitrium cum Manichæis negarunt. Vnde Concilium Senonense contra Lutheranos celebratum anno 1528. in præfatione de Luthero sic ait: In errorem Manichæi incidit Lutherus, dum nimis anxie & scrupolosè deuitat Pelagium: metuens namque liberum arbitrium cum Pelagio efferre, omne opus bonum quod est in homine, Deo tribuit, & diuinæ gratiæ; nihil prorsus arbitrio: Sicque tollens omnino liberum arbitrium Lutherus, factus est Manichæus, dum refugit esse Pelagianus. Ex diuersis tamen principijs Manichæi, Lutherani, & Caluinistæ, liberi arbitrij negationem seu extinctionem deduxerunt. Manichæi enim eam deriuari affirmantur ex duplici illa natura, determinata respectiue ad bonum & ad malum, de qua §. præcedenti. Lutherani verò & Caluinistæ, eam referunt ad peccatum originale, & ad diuini decreti, & motionis ab eo promanantis efficaciam & causalitatem.*

Prima ergo hæresis, aliarum quasi basis & fun-

fundamentum, quam in materia liberi arbitrij, per os Lutheri & Caluini, qui sunt veluti duo præcipua antiqui draconis capita, Diabolus exsufflauit, hæc est : *Per peccatum originale fuit in nobis extinctum liberum arbitrium, & determinatum ad malum, sine viribus ac libertate aliqua ad bonum : ita quod manserit res de solo titulo, vel titulus sine re.* Ita Lutherus in assertion. Articulorum ad Leonem X. artic. 36. & libro qui inscribitur : *Operationes in Psalmos*, super Psalm. 5. & libro de seruo arbitrio, & Caluinus lib. 1. Instit. cap. 15. num. 8. & lib. 2. cap. 3. §. 7. Quamuis autem in hoc Caluinus cum Luthero conueniat, per hoc tamen ab eo discrepat, quod Lutherus ita asseruit extinctum liberum arbitrium per peccatum originale, vt contendat etiam contra omnem Philosophiam, illud merè passiuè se habere, recipiendo scilicet motum seu actum à solo Deo productum. Caluinus verò non asserit liberum arbitrium ita esse extinctum, vt merè passiuè se habeat, sed vult illud actiuè in nostras operationes influere, at non liberè, sed sponte tantum, ad modum brutorum, & sicut equus mouetur à sessore. Vnde lib. 2. in Pighium : *Si coactioni ( inquit ) opponitur libertas, liberum esse arbitrium & facior & constanter asseuero, ac pro hæretico habeo, si quis secus sentiat : si hoc inquam sensu liberum vocetur, quod non cogatur, aut violenter trahatur, sed sponte trahatur sua, nihil moror.*

Secunda hæresis Lutheranorum & Caluinistarum in materia de libero arbitrio est : Ex decreto Dei antecedente, & præuenienti gra-

ria efficaci, tollitur hominis libertas. Ita I. ſ-  
therus libro de ſeruo arbitrio, vbi ſic peruer-  
ſè diſcurrit: *Gratia prædicatur: Ergo liberum  
arbitrium tollitur. Auxilium gratiæ commen-  
datur: Ergo liberum arbitrium deſtruitur.* Et  
iterum: *Quot quot ſunt loca in Scripturis di-  
uinis quæ meminerunt auxiliij, tot ſunt quæ  
tollunt liberum arbitrium.* Iuthero concinit  
Caluinus, nam in cap. 6. Ioannis, ſic ait: *Pro-  
nuntiat Chriſtus efficacem eſſe Spiritus Sancti  
gratiam, qua trahuntur, vt neceſſario credant.*  
*His Proſus euertitur tota liberi arbitrij pote-  
ſtas, quam ſibi ſomniant Papifæ, Et contra  
Pighium: Ita efficaciter formari voluntatem  
noſtram conſtituo, vt Spiritus Sancti dūctum  
ſequatur neceſſario.* Idem docet lib. 2. inſtit.  
cap. 3. §. 10. & in antidoto ad Concilium  
Tridentinum ad Canonem 4. ſeſſionis ſextæ.

Ex his intelliges primò, Lutherum & Cal-  
uinum duplici cauſa & titulo negare liberum  
hominis arbitrium. Primò quia aſſerunt per  
peccatum originale libertatem fuiſſe in ho-  
mine penitus extinctam. Secundò, quia exi-  
ſtimant ex diuino decreto antecedenti, & gra-  
tia præueniente & efficaci, tolli hominis li-  
bertatem. Quod ſi quæras, qua ratione hæc  
inter ſe cohærere & conciliari valeant? Si  
enim per peccatum originale liberum arbi-  
trium omnino ſublatus ſit ac extinctum, quo-  
modo poteſt iterum tolli & deſtrui per effica-  
cem gratiæ motionem? Reſpondeo primò, pro-  
prium eſſe hæreticorum in multis minis con-  
ſequenter loqui. Secundò dico, illos ſenti-  
re: quod ablatam libertatem per originale  
peccatum, adhuc magis aufert efficax motio  
Dei.

Dei. Tertiò dici potest, eos velle quod si libertas non esset extincta in homine per peccatum originale, talis est natura efficacis Dei motionis, ut illam omnino tolleret; quia illa ratione suæ efficacis & infrustrabilitatis, necessariò infert actum ad quem datur, ita ut nulla remaneat potentia ad oppositum.

Intelliges secundò, hæreticos qui liberum negarunt arbitrium, ex quadruplici causa ad illud negandum motos fuisse, seu in quatuor diuersa principia necessitatem, liberum arbitrium tollentem, reduxisse. Gentiles enim & Stoici talem necessitatem in fatum reducebant, quo fati nomine, seriem inenitabilem causarum naturalium, & præcipuè cœlorum influxum, intelligebant. Vnde hæc erat Stoicorum vox (ut refert D. Thomas quæst. 6. de malo artic. vnico) *Talis est voluntas in hominibus, qualem induxit pater virorum, deorumque*. Id est cœlum vel sol, ut ibidem explicat S. Doctor. Manichæi verò (ut supra declarauimus) talem necessitatem in duplicem naturam determinatam respectiuè ad bonum & ad malum reducebant. Lutherani autem & Calvinistæ illam referunt ad duplicem causam supra allegatam, nempe ad peccatum originale, & ad diuini decreti, & motionis ab eo promanantis, efficaciam & causalitatem. Vnde Calvinus lib. 1. instit. cap. 16. sect. 8. hæc scribit: *Nos etsi de verbis non litigamus, fati tamen vocabulum non recipimus: tum quia est ex eorum genere quorum prophanas nescitantes refugere nos Paulus docet: tum etiam quia eius odio conantur grauare Dei veritatem*. Dogma verò falsè ac malitiosè obie-




*Etatur, non enim cum Stoicis necessitatem comminiscimur ex perpetuo cansarum nexu, & implicita quadam serie quæ in natura continueatur; sed Deum constituimus arbitrum ac moderatorem omnium, qui pro sua sapientia ab ultima æternitate decreuit quid facturus esset, & nunc sua potentia quod decreuit exequitur.*

Intelliges tertio, Pelagium, Lutherum, & Calvinum, suas hæreses, quamvis inter se oppositas, ex eodem tamen principio deduxisse, nempe ex isto: *Liberum arbitrium cum præueniente & efficaci Dei motione stare nequit.* Pelagius enim sic discurrebat: *Non est liberum arbitrium, si indiget auxilio, ut refert D. Hieronymus in epistola ad Ctesiphontem. Vel quod idem est: Gratia Dei præueniens ac efficax, & humani arbitrii libertas, simul stare nequeunt: Sed in homine est liberum arbitrium: Ergo ad operandum non indiget auxilio Dei præueniente & efficaci.* E contra Lutherus & Calvinus ex eodem principio conclusionem omnino oppositam, nempe non dari liberum arbitrium, inferebant: Sic enim arguebant, ut supra ex Iuthero vidimus: *Gratia Dei præueniens ac de se efficax, & liberum arbitrium, simul stare non possunt: Sed gratia Dei præueniens & de se efficax ponenda est, ut ex Scriptura, & S. Augustino constat: Ergo non datur in nobis liberum arbitrium.* Vel si utramque hæresim ad enthimema, quod breuius & facilius est, reducere velimus, clarius apparebit hæc veritas. Sic ergo Pelagius arguebat: *Est in homine liberum arbitrium: Ergo Dei non indiget auxilio, Vel: Est in homine liberum*

*berum arbitrium : Ergo non datur præueniens & efficax Dei auxilium . In quo antecedens posuit de fide, ex quo hæreticam deduxit consequentiam . Lutherus è contra & Calvinus sic discurrebant : Datur efficax gratiæ præuenientis motio , vt ex Scriptura & S. Augustino constat : Ergo non est in homine liberum arbitrium . Vbi ex antecedenti Catholico , opposito consequenti ipsius Pelagij hæretico , inferebant oppositum Antecedentis Catholici, quo Pelagius dixerat esse in nobis liberum arbitrium . Vnde de istis hæreticis meritò dici potest quod de alijs ait Innocentius III. relatus in capite *Excommunicamus* , extra de hæreticis , nimirum quod illi *facies quidem diuersas habent* ( cum illorum errores diuersi sint , & oppositi ) *sed caudas adinuicem colligatas* ; cum suas hæreses deducant ex eodem principio , in quo colligantur, nempe ex isto: *Liberum arbitrium cum præueniente & efficaci Dei motione stare nequit .**

Demum ex iam dictis intelliges, doctrinam Thomistarum directè & è diametro opponi Pelagianorum & Calvinistarum erroribus, cum Thomistæ negent falsum illud & peruersum principium: *Arbitrij nostri libertas cum efficaci gratiæ præuenientis motione stare nequit*, ex quo , vt iam ostendimus , illi hæretici suas hæreses deduxere; imò cum Angelico Doctore passim doceant , diuinæ voluntatis efficaciam esse primam totius libertatis & contingentiæ rerum radicem , vt in tractatu de voluntate Dei fusè declarauimus . Vnde sicut ille qui fundamentum alicuius domus euerit , vel radicem arboris auellit , statim talem

domum & arborem destruit : Sic Thomistæ falsum illud Pelagianæ & Calvinianæ hæresis principium ac fundamentum negantes & destruentes, utramque hæresim funditus evertunt, & utramque pestiferam ac virulentam plantam, radicitus tollunt & euellunt. E contra verò cum Molina, Suarez, & alij Recentiores, assertores, vel defensores scientiæ mediæ, prædictum Pelagianorum & Calvinistarum principium admittant, & passim doceant ac contendat contra Thomistas, arbitrij nostri libertatem, cum præuenienti, & physica, ac de se efficaci diuinæ gratiæ motione, stare non posse, Pelagij & Caluini erroribus præter intentionem fauent, & tot hæreticis illis arma cudunt ac subministrant, vt suos tueantur errores, quot argumenta ex Molinæ officina depromunt contra Thomistas, ad probandum, gratiam Dei præuenientem, & de se efficacem, arbitrij nostri libertatem destrueret. Vnde Doctores Louanienses in sua censura rectè obseruarunt, Molinæ sententiam magis aptam esse ad stabiliendam, quam ad evertendam Pelagianorum & Calvinistarum hæresim. De quo fusè in Apologia Thomistarum, quam in Clypeo nostro, ad calcem tractatus de voluntate Dei in noua editione, apposuimus.



## §. III.

*Caluini errores in materia de gratia.*

**P**lures sunt Caluini errores in materia de gratia, quos breuiter hic describemus. In primis asserit, quod efficax gratiæ auxilium, facit secum homines operari sponte, non liberè, ad modum quo iumentum sequitur spontaneè non liberè sessoris ductum. Ita lib. 2. instit. cap. 3. §. septimo, & in Antidoto ad canonem quintum sessionis sextæ Concilij Tridentini, ubi hæc scribit: *Quid ergo sibi vult Augustinus, cum de libertate voluntatis loquitur & nempe quod toties repetit, non cogi homines inuicta Dei gratia, sed voluntarios regi, ut sponte pareant ac sequantur.* Vnde vult auxilium diuinæ gratiæ, ita esse efficax, ut indifferentiam voluntatis absorbeat, impositaque consentiendi necessitate dissentendi potentiam consumat; sola spontaneitate, seu immunitate à coactione, in voluntate relicta. Quare in responsione ad primum articulum de occulta Dei prouidentia, hæc scribit: *Quod de absoluta potestate negantur Scholastici, non solum repudio, sed etiam detestor.* De quo fusè in prædicta Apologia Thomistarum.

Secundò Calvinus docet, sic totum tribuendum esse gratiæ, ut nostræ postea electionis non sit motioni eius obtemperare, aut refragari. Ita lib. 2. instit. cap. 3. §. 10.

Tertiò, posita gratia efficaci hominem non posse non velle, nec dissentire. Ita lib. 3. de libe-

libero arbitrio contra Pighiam pagina 285. & in antidoto Concilij Tridentini ad Canonem 4. sessionis sextæ, in quo damnatur hic error, qui primo affinis est, & veluti illius confectarium.

Quartò, auxilium præuenientis gratiæ, quo Deus facit nos velle & facere, mouere quidem efficaciter voluntatem, sed non eam excitare moraliter. Ita lib. 2. instit. cap. 3. §. 10. De quo Bellarminus lib. 1. de gratia & libero arbitrio cap. 11.

Quintò, omne auxilium prout venit à Deo esse eîficax, & nullum tantùm sufficiens. Ita locis proxime citatis.

Sextò gratiam Dei sic dare ipsam velle & operari, vt creata voluntas ei liberè non cooperetur. Ita lib. 2. instit. cap. 3. nu. 11. & 12. vbi & Catholicos ridet, quòd liberi arbitrij cum gratia concurrentiam, ex hoc Sancti Pauli loco confirmant: *Plus omnibus laboraui, non ego, sed gratia Dei mecum.* Quem in errorem inductos esse ait ex præpoltera versione, in qua græci articuli vis omissa fuit, quæ si exprimatur, hunc sensum efficiet: *Non ego, sed gratia Dei quæ mihi aderat.* Qua de re pluribus agit in Commentarijs ad hunc Sancti Pauli locum.

Ex his liquet, Caluinum admisisse quidem gratiam eîficacem, mouentem spontaneè voluntatem, sed negasse sufficientem, moraliter excitantem, & cooperantem, subindeque totaliter extra gratiam fuisse, vt enim ait D. Prosper epistola ad Demetriadem cap. 7. *Gratia Dei nisi tota suscipitur, tota repellitur: sicut enim alienus est à numero fidelium, & à sorte san-*

*sanctorum , qui in aliquo à Catholica veritate dissentit ; ita extra gratiam efficitur , qui aliquid de eius plenitudine difficitur .*

Constat etiam ex dictis , iuxta doctrinam Caluini , & Sectatorum eius homini , in statu naturæ lapsæ , mandata esse omnino impossibilia ; cum in illo statu nullum agnoscant auxilium sufficiens , quod tribuat potentiam ea adimplendi . Vnde Melancthon ad caput. 13. epistolæ ad Romanos ait : *Cum mandat lex diligere , perinde impossibile iubet , ac si præcipiat nobis transuolare Caucasum .*

MAG 825

*Finis Tomi quarti Manualis ,  
Thomistarum .*















